



М И Ш И  
Б А Х Ш И Е В

**ХУШЕГЪОЙ  
ОНГУР**



МИШИ БАХШИЕВ

# ХУШЕГЪОЙ ОНГУР

Роман



ДАГЕСТАНСКОЕ КНИЖНОЕ ИЗДАТЕЛЬСТВО  
МАХАЧКАЛА 1963





Эвели бэхш

### ШЕВ ГІЭРУЬСИ

Пушой богъчирегьо бу. Гермигьо екем хуьрд биренге, гьовой шохьонгум, чуйшме э посой догъгьо пэхьнуь биренбугьо вэхд келе мерд Гіэзиз се сале невей хуьшдере, Марале э гъужогъ вэгуьрде, нуьшдебу э гьейвуй хуне, э гъирогъ чор куьнжие э емишгьоревоз вараюнде оморе келе стол, диги-диги зере, эденбу мэгни хунде э гьовой хэйтогъи:

Чумгьойтуь эжи духдер?  
Чумгьоймере чуй сохде туь?  
Гуьлей онгуре дирейге,  
Гье уре хуной эри туь.

Э у лойгей стол, э раче-берачей Гіэзиз э сер стол гъуз бире эденбу нубогьой хуьшдере хунде келеи невею, кук Рэхьмон, суьфдеи сал эри хунде нуьшдебугьо Шемей. Э дорун куьнж гьейву, э пушой кинле нуьшдебуьруьт Божи зен Гіэзиз не гіэруьс ишу Хумор. Келе зен сер

хуышдере сэхд пучунде э ковре келегъэи, эденбу э сер тэхде гушд куде, гIэруыс хэми сохде, эденбу э сер фуържи велг шенде эри дуышпере.

— Гене хунум эйтуь мэгни? — пуърси келе мерд эз неве.

Божи гIоси бире, шэфд дениши э шуьвер хуышде, хуьырш сохд.

— Э мерд, гIэилле бирей? Ние дире бегем туь. Шемей эдей нубо хунде!

— Гьо, гьо, тунгъ, бэхшлемиш мисоку Шемей э ме не Марал, — мэхсере соегъи гуфди келе мерд, песде э дуьл хуышде мугу: «Гьеле кей зугъу вокурди бегем Шемей, имогъой кук школаиш бисдо, дуз хьофд салаи. ДовгIо варасде е сал гиросхебу Шемей биренге, гьозори нуьгъсади чуьлшешимуьн сал. ГьейсэгIэт гьозори нуьгъсади пенжогъ сеимуьн сали. Чуь зу гиросхедуьт рузгьо, гьемей эн и рузгьо эз гIуьмуьр имунуьт». Песде э ёр келе мерд омо, чуьтам довгIо сер гуьрденге — э гьозори нуьгъсади чуьлекимуьн сал е теке кук хуышдере, Рэхьмонне, э довгIо рэхь сохдебуге, чуьтам хэйли вэхд эз кук хэбер не бире, песде вир бири гуфдире когъоз оморевуге, чуьтам Божи сер сифет хуышдере гьэрмэгъ кешире хуни сохдебуге, чуьтам песде довгIо варасденге, Рэхьмон оморе ведироморевуге, гIэриси сохдебуге, бэгъдовой е салиге Шемей биревуге. «Имогъой, худоре шуькуьр, кукме бебей кифлетиш бири, — гуфди э дуьл хуышде ГIээиз, дуразе сипре руьшгъой хуышдере тимор сохде, — курс агрономиш хунди варасди, хубе бригадир колхозиш бири, эй хубе кор, куьллуье бегьер онгур воровундеи орденгъош вегуьрди, коргъоюре гьобул сохде коммунистгъой колхоз юре секретариш вихдет. ГIэруьсмеш, худоре шуькуьр, хунди акушерке бири».

— Туьш бебере хуно бош, — гуфди гье ебо келе мерд, э лой Шемей чарусде. — Дануьсди, хуб хун!

Песде фурмуш сохде гофгъой Божице, гене гьово гуьрд Марале э гьужогъ, гене хунд гье у мэгнире.

— Эле, туь э сенгъ чарусдей беге, мерд?

ГIээиз хэндуйсд, вэхуьшд э пой, гуьрд гьул Марале, дениши э келе зей.

— Михило сох э иму, дедей Божи, эдейме вадарафде э куче эри вози сохде.

— Эй муьгIуьжуьз дире мунди дедейтуь, гIэиллен, гIэилле. Э хьисобевоз пир бирей, пешму бире!

Хумор э гъулевоз косинкей сере дуз сохде, эз зир чум денишире э зен хуьсуьр, мугу:

— Ногьогъ гъоси эйчуь бире туь, дедей, бошгу, бигьил э гъэилевоз вози соху дие.

—Э гъэилевоз вози соху, э гъэилиге мешет бу, нубо хунде негьилуь?

— Э ме мешет нисд, — гуфди Шемей, сере тик не гуьрде.

У евош-евош эденбу э дефдер дуразе ризгьо кешире.

— Шинири Марал? Гъеме э лой ме нен туьни. Эн-жэгъ келе дедей эз иму гъосини. Кеш вадарайм э куче.

Гъэзиз не Марал эз пилонконгьо э фурамореки, Божи мугу: Хьэл сохди мере. Худо хьэл соху дуьл дедейтуьре.

Келе мерд дие гофгьой Божире ние шиновусденбу. У невере э гъужогъ вегуьрде, эденбу гирошде эз гъэрей бигьдоргьо не онордоргьо, вебуьруьтгьо э хьэет, томоше сохде, чуьтам сер гуьрдетге эри зерд бире кими велггьой доргьо. «Гъуьмуьр инсонгьош эн и велггьоре хунон: вероморенуьт, келе биренуьт, иловлере ярашуьгъ доренуьт, песе оморе-оморе пир биренуьт, зерд биренуьт, дуьллу биренуьт э хори офдоре».

— Дедуш-ка, мере онгур, — гуфди Марал, десе кешире э лой зерде хушегьой онгур, дуьллу бируьтгьо э зерверсер ишу эз шив кенде, хьэете чордогъ зереbugьо келе тегьенг.

— Туьре воюгьо онгур, — жугьоб до келе мерд, гъэиле э хори норе, — ги эри туь е хуше онгур. Ху, духдерме, игьоре эйшму кошдем.

Песеде сере тик гуьрде, Гъэзиз дирени э хьэет е деседе гъэруьс-духдер диromo: гъемешу вараисде э булишигьой гуьлмэхбер, крепдешин, э сер ишу ранги-рангие е небуге сипре дуьгуьргьо, э пой ишу пойвокугьой лак. Э пушо деbugьо веди буки екем огьилте зен бу, угьониге жогьилгьо, эз гъеме посо эденбу оморе е хьофд-хьэшд сала духдерле, э десню ейлугъ дери, э ейлугьиш чигьо дебу. «Э жун бебейме, гене хундогугьон,—гуфди э дуьл хуьшде келе мерд, — мегъ эн гъэруьсигьон, эн кинибу гъэруьси?»

— Холей Божи не Хумор э хуне деруьт? — пуьрси огьиле зен, шохьонгум эхэйрбу гуфдире бэгьдо эз келе мерд.

— Эри, духдерме, эри, э хуне деруьт. Дарайт, эн кини э шори никиревоз гъэруьси?

— Шори ники винош э гІэилгьойтуьревоз, — гуфди зен. — Духдер бироргили туь, эн Хьэнукой Офдум духдере э шуьвер дори. Туьш винош эз невегьой туь.

— Сэгіэтию никбу, дарайт э хуне.

Хундегугьо дарафдуьт э доруй хьэет. ГІэзиз э невревоз вадарафд э куче. Хундегугьоре дире, Божи вэ-хуьшд э пой, эз хори рафденбугьо домунегьой фирегье булуши хуьшдере кура сохд, хош оморі сохд хундегугьоре.

— Эз невегьойтуьш винош, — гуфди э пушой хундегу дебугьо зен, э Божи денишире. Песде э лой Хумор чарусде, гуфди: — Шемейлей туь келе бире, домор бире, шоригьо никигьо винош, имишев э хуней ГевгІидигьо э гІэруьси миьйт!

— Шори ники винош туьш э бирорле бирорзереревоз, эз гІэилгьойтуьш винош! — жугьоб до Хумор. — Нуьшит!

— НэгІ, эдейм рафденім. Гьеле огол зеренигьо омбар мунди.

Божи зури-зури дарафд э хуне, ведировунд е пенж монетиш, дуь хоеш, оноргьош до э дес чуькле духдерле, э посой хундегугьо гешденбугьо.

— Егьин биейто, — гуфди э пушой хундегу дебугьо зен э вадарафдеки — Ненге ГевгІид гьэгьри мубу.

— Рэхьмон эз собрание зу омоге миейм, угьоре собраниеи, — жугьоб до Хумор.

— Хэлгь дир кура бире, те умогьой Рэхьмон, миёв, ёгьин биейт!

Хундегугьо вадарафденки, Хумор вегуьрд куфде гушдгьоре эз пушой Божи эри дуьшпере депучунде.

— Ме мидепучунум, хэлефме, — гуфди Божи, — туь дара э хуне, парталгьоре ути зе, у ризе-ризе шеи звруьшуьмире веги эри Рэхьмон.

— Гьеле белки нисе рафденбирим, — гуфди Хумор, — туь дануьсденики хосиет Рэхьмоне, э гІэруьсигьо омбар рафде хьэз нисе оmore юре.

— Худо мебура, Рэхьмон э ГІэдотгьой хэлгьэвоз кор ние сохде. Бегем хуби гьечу: э гІэруьси мара, э мило мара. Гьеме кореш гьэрдини...

Хуморе хэнде гуьрд. Фуьржигьо не велгьой хэмире э пушой Божи куьнд овурде, у евош-евош мугу:

— Дие коми гьэрдини уре? Ю мило не сохди гІэил хуьшдере ечи, э милогьой хэлгь чуьтам рафде у?



— Пой бура, бирор туь муно, — гIоси бисдо гене келе зен. — Е туьни э и гIуьлом екке шуьвер туь тозе зокун ведешендейтгьо... Дие бегем эз ишму бэггэй хэлгь коммунист нисди? Партийни бу гуфдире одоми бегем гIэиле мило нисоху?

И ченд гилеи и гофгьоре эдей шиновусде Хумор эз зенхуьсуьр хуьшде. Э ёр эн уни, чуьтам Шемей эз деде биренге эри мило не сохдеи э хуне келе женг биребуге. Рэхьмоне хэберсуьз ГIэзиз не Божи жэгIмете кура сохде, рабиреш огол зеребуьруьт, гьеме хьозуригьоре диретуьруьт. И коре дануьсде, Рэхьмон келе женг вэхуьзунд, гIэиле эз дес раби восдо, не гьишд мило сохде. Божи сифетгьой хуьшдере гьэрмэгь кешире, журай дешенд: «Ме гIуьмуьр мере эй туь пуч сохдем, — гуфди у эз Рэхьмон, — ме чор сал довгIо шеве шев не дануьсде, рузе руз не дануьсде, чуме-рэхь туь бирем, гIэрс тигьи сохдем, эз худо эритуь лово хосдем, чумгьойме е кур не бири, э рэхьтуь дебири. Бэхдевере дедейгьоре хуно мереш шори никитуьре дире воисди. Имогьой худо метлеб мере овурде воровунденки, мере неве доренки, гIэдот гIуьлом гьисдигьоре хуно ние гьишде гIэиле мило сохде?» Ченгьэде Рэхьмон минет сохд э дедешу, хоши гуьрде юре, гуфди: «Ме коммунистуьм, эриме гIэмел ниёв у куьгьне гIэдотгьой дин догIотире гуьрде...» Суьфде ГIэзизиш э лой Божи бисдо, гуфдики эз пэхьники мисохим, екиш нида нуь. Рэхьмон рази не бисдо. Божи гирисд, нолусд, сер куфд, сифете гьэрмэгь кеши. ГIэзиз виники, Рэхьмон сэхд поисди, сер гуьрд эри хоши гуьрде Божире. «Де имогьой иму чуьккелегьоим, угьо келегьо, — гуфди у э лой Рэхьмон нен Хумор денишире, — женг сохде герек нисди». Божи омбар гуфди, Рэхьмон кем шиновусд, э сер гоф хуьшде поисд. Имогьой эз у руз хьофд сал гиросде бэгьдо, Хумор э ёр овурде и гьознире, мэхьтел мунд, чуьтам келе зен рази бисдоге э гоф Рэхьмон.

— Худо мебуро, шуьвер туь эз гьеме бешгьэн, — гуфди келе зен чум не вегуьрде эз сиегье гьошгьо не шогьбалудие чумгьой гIэруьс, эз пушотейнере хуно гьирми-зи мундетгьо дуь гуьл гьутиней ю не э муйгьой сер духдер хуне ухшеш зеренуьтгьо бендгьой муйгьой ю.

Хумор жугьоб не до, десгьой хуьшдере шушд, дарафд э хуне эри партал ути зере.

Гьово эденбу торик бире. Э зверсер Дербенд, э ков-ре асму сер гуьрдебуьруьт еки-еки эри чум зере астар-

гъо. Эз лой клуб корсохгъой рэхъ огъуни эденбу оморс сес музик. ГІэзиз э куче поисде, эз звер э зофру денишире, дирени э сер дерьёгъ евош-евош эдей вероморе суьрхэ хуно тов-тов доренигъо менг. Э пушой келе мерд гъечу омо, ки мугинге менг пара сохд синей келе ковре дерьёгъе, вешенд хушдере зверо э асму ве тэгІди сохде омо э лой шегьер. Э и туьтем эз хъэет сес Божи омо:

— Э мерд, эжеи туь?

— Инжоюм, — жугьоб до ГІэзиз, — биё виниш, бирортуь муно, чуьжире рач гънсдиге гъони сер дерьёгъ. Эз товуш менг гІов дерьёгъиш зерд бири, эдей зара хуно товуш доре.

Божи ловгъоре шефд сохде, мугу:

— Туьш мундей чуь сохиге!

— Гъери, чуь биё сохум ме?

— Ди э ме гІэиле, бура виниш Рэхъмон эйчуь не омоге. Дуьшперереш гъеле не декуьрдем э гъэжгъу, терсиренуьм, муьдуьшуь хъэл мубу. Бура гъери.

Келе мерд сере жумунде, гуфди:

— Э зен, эже бурам ме? Миёв дие собрание варадки. Туь дануьсдени у э жой поисденигъо нисди.

Божи гоф не сохде, векенд гІэиле эз дес шуьвер хуьшде, э хуьършевоз дениши э ю. «Эгъ!» — сохде, э зир зугъу нифри сохде Божире, ГІэзиз чарусд рафд э лой кантор эн колхоз. Е хэйли рэхъ рафде, эз куьнж келе куче гирошде бэгъдо, э гуш ГІэзиз дарафд сес чуьнгуьр не тефд, сес «гъурре-гъурре», зере вежегъисде. Ебойге дирени эз е гІэрелугъ, боргулугъо э дес дери, зерегоргъо э пушо дери, е десде жем-жогъил, гІэруьс-духдер вежегъисде-вежегъисде эдете э у кучейге гирошде. Э сер духдергъо келе тебэгъгъо, сер дегуьрдегъо вебуьруьт. «Эдете боргулу берде э хуней гІэруьс, — гуфди э дуьл хуьшде ГІэзиз. — Хубе вэхди гъони, вэхд гІэруьсигъои». Э ёр ГІэзиз оморут жогъилигъою, чуьтам э хьовиргъой хуьшдеревоз — ГІэсоилевоз, Эсефевоз, Геврилевоз, Юсуфэфоз ченд гилегъо э бирордоморигъо рафде, хьофд шев, хьофд руз, эз шобот те шобот шевгъо кура бире, мизеруьт, мэгІнигъо мухундуьт, мивежегъисдуьтге. Расди умэхъэлигъо косибигъо бу, Рэхъмон бебей ГІэзизигъоре не богъ, не хуне бу, гьердуьеки бебе писер эй кес фэхълеи мисохдуьт э богъгъо, э ветэгъэгъо, нун не гъофун зимисдунере кура мисохдуьт, запас мигъишд. Гъемише э хуней гьомхуней

дебуурьт. Ченгээде косибиш буге ишуре, эз шори ники посо ние поисденбуурьт, не ишуре зиёдие хэржигъош герек ние биренбу, эри шобош дешенде бэгъэй. Расди бирордоморлегъо тебэгъ мибердуьт. Уш э гъувот хуьшде гуьре. «У имогъои е пара одомигъо гъэдот ведешендетгъо, — гуфди э дуьл хуьшде Гъэзиз:—Э гъэруьси гъерки рафди, биё е сад монет бери, е дивисд. Небердиге, гъэйб сохде, не рафдиге, гъэгъри бире. Белки е одомире э оринею э е гъэруьси огол зеренбуурьт, белки е одомире, эз хэржи хуьшде зиёдите пул небу? Песде чуй биё бу?... Биё туй имогъой и гофгъоре э Божи зенме гу. Мар мубу, э ехэн туй мепуьчуь...»

Гъечи хэйли дамит сохде, рэхъ рафде, ебойге э гуш келе мерд сес дарафд:

— Туй э же гъечи, бебе?

Винирени Рэхъмони. Э юревоз председатель колхоз Мукоилиш гъисди.

— Шевтуй э хэйр бу, лелей Гъэзиз! — гуфди Мукоил.

— Эгъуьбеттуй э хэйр, ме эдебуурьм э кантор оmore. Дедей эн игъо — Божи гъэрэхэрмон сохди дегъишде мере. Бура, мугу, ебо виниш Рэхъмон эйчуь ние оmoreге. Дуьшперере, мугу, терсиренуьм э гъэжгъу декуьрде, хьэл мубу гуфдире...

— Тегъер гуфдиренуьтгъо, посою дуьшперен дие, — гуфди Мукоил. Гъемешу хэндуйсдуьт.

— Дие гъечу буге туйш кеш бурайм э лойму эри дуьшпере хурде, — гуфди Гъэзиз эз Мукоил.

— Песде мереш хунеигъойму гешдуьтге?

— Гешдуьтге, миофут, кешит бурайм.

Гъемееки рафдуьт э хуней Гъэзизигъо.

— Шев ишму э хэйрбу, дедей Божи, — гуфди Мукоил эз пилонконгъо э гъейвуй хуней Рэхъмонигъо ворморе.

— Эгъуьбеттуй эхэйр, хэлэфме, хош оморит. Эжент ишму эй, глов дуьшпере муьдуьшуь марасуьки, — песде э лой дер хуне чарусде, хъэрой сохдени: — э Хумор, биё дуьшперегъоре деки, чумгъойме хуб чи нисе дире. Алуьз муно и чумгъош.

— Гъич фикир мекеш, духдер гъэбиле, — гуфди хэндуйсде-хэндуйсде. Гъэзиз, — эйтуй э и зуригъо чумгъой шишен миёрум.

— Чумгъой дедейтуй кур гердо! — гъоси бисдо Божи.

— Гьечи эйчуь, Божи? — пуьрси Мукоил.

У шопкере эз сер вегуьрд, песеде эрэгъ пушони хуьш-дере темиз сохд. Пушони Мукоил омбар келе веди биренбу, чуьнки муйгьой серию сер гуьрдебу эри рафде. Э чум Мукоил вохурд, чуьтам духдерлей Рэьхмон-Марал э ю денишири поисдиге.

— Биё э киме, гегей! — гуфди у, эз куьф хуьшде гьэнфитгьо вегуьрде доре гIэиле. Марале гIэйб оморенбу восдоре.

— Восдо, у лелен о, — гуфди Божи, эз гьул гIэил гуьрде э лой Мукоил кешире.

Хумор сер столе кеши, овурд гиргине нунгьой тонуи, графинкей эрэгъи не пейлегьо, бишгьобгьо, лэгъэгьо но э пушой Мукоилигьо.

— Туь ичгу омбар мэху, — гуфди Хумор эз Рэьхмон, — э гIэруьси биё бурайм иму.

— Эн кини гIэруьси? — пуьрси Мукоил.

— Эн невей хьэмейдигьогьои, эн дусдгьой мерд иму, — жугьоб до Божи.

— Дусдгьо эн бебеют, дие ме эйчуь биё бурам э гIэруьси? — пуьрси Рэьхмон, духдерлей хуьшдере э гьужогь вегуьрде.

— Бебе имогьой пири, э шори никигьо, ишму, жогьилгьо биё бурайт! — жугьоб до Божи.

— Шиновусдени, Мукоил, чуь гуфдиреге духдер гьэбилейму? Ме пируьм мугу... — гуфди ГIэиз.

— Дерд рафде нисди эй, — гуфди Рэьхмон, — гьейсэгIэт лап шулух сохдет гIэруьсигьоре. Кура сохденуьт дивисд-сасад одомире, нуьшунденуьт э чул-пелесе, сер гуьрденуьт гьэр-гьур, дамба-дудуре, дие нуьшде эки еки, дусд-ошне мэгIрифет дире ние дануьсденуьт. Лап омбар кура сохденуьт одоми.

— Пул омбар миёв эхи, — гуфди Мукоил.

— Гье уни кореш шулух сохденигьо дие...

Хумор э бишгьобгьо дуьшпере декуьрде, овурдени, норени э сер стол, песеде юш нуьшдени, косинкей сер хуьшдере дуз сохдени. Э лой Рэьхмон денишире, Хумор гуфдирени:

— Ди гIэиле э ме, эрэгъи деки эришму.

— НэгI, ме ние оморе, — гуфди Марал.

Шемей э ён бебешу нуьшдебу. У гье ебо гуьрдени Марале эз дес, зерени эз гьулию. Хумор вэхуьшдени э пой, вегуьрдени гIэиле эз дес шуьвер хуьшде.

— Худо гьишдге имогьой себэхь персебэхь дарафде-  
ним эри огьоден чире дие? — пуьрси ГӀээзиз эз Мукоил,  
гьерки е румке эрэгьи хурде, зокуске сохде бэгьдо.

— Мере воисденбу гье себэхь дерайм эри огьоден  
чире, заготовитель эдей гуфдире онгур ишму гьеле не  
расири, ширин нисди, э гьиметию нивегирим. Э ужузе  
гьимет чьутам чиним дим онгуре?

— Кини заготовитель, гьобоне Бебе небу ебойге, —  
гуфди ГӀээзиз.

— Гье уни, — жугьоб до Мукоил:

Божи э мэхьтелиревоз денишире э мердгьо, пуьрси:

— Эле, э и мухьуьсгьош расири гьобоне Бебе? Гье-  
чиш бегем келеети дери э дес эни?

— Келеети дебисдо, не дебисдо, огьодеире эз колхоз-  
гьо у вегуьрде.

— Райкоме чуй бири, э райком бура! — гуфди ГӀээзиз.

Гьуногь не сэхьибхуногьо хурдуьт, хорундуьт, е хэйли  
шев рафдеки, эз сер суьфре вэхуьшдуьт.

— Дие дарайт, сер тен ишмуре вокунит, гӀэруьсихуне  
одоми пур мубу. Дири, — гуфди Божи.

Рэхьмон вокурд тозе ковре кастум бастоне, зерде туф-  
лигьоре, ризе-ризе шеире эз зир кастум. Хумор зури-зури  
муйгьой сер хуьшдере шуне зе, гуьле-гуьле булиши ши-  
фоне вокурд, кофтей пешмире э дес вегуьрд.

— Белки хиник бисдо, вегуьруьм кофтере, — гуфди  
у э Рэхьмон .

— Веги, — жугьоб до Рэхьмон, песде э тигьэтевоз де-  
ниши э сифет зен хуьшде... «Гьич дегиш не бири», — гуф-  
ди у э дуьл хуьшде. Мугуиге э пушой эн у гьейсэглӀэт  
поисдебу гье у э духдери э юревоз гӀэйбе-гӀэйб гоф сох-  
денбугьо Хумор, астараре хуно уьшуьгь доренбуьруьтгьо  
хун ширине чумгьою, э гьирмизине оибгьой Хочмез ух-  
шеш зерембуьруьтгьо гьутинегьою, эврьюшье хуно  
буьруьтгьо раче дуразе бендгьой муйгьою.

— Э хьисобевоз суьфделе дирей мере? — пуьрси Ху-  
мор. Угьо зен шуьвер тэхьно дебуьруьт э доруни хуне.

— Суьфделеш не винуьруьмге, эз сад салиге бэгьдош  
эри ме туь гье у Хумори, — евошлей-евошлей гуфди  
Рэхьмон.

— Дие зу бош, кеш, сэхьиб гӀэруьси гьэгьри мубу,  
дири...

Э вадарафдеки Хумор моч сохд Марала. Те нимерэ-хьи э Рэхьмон не Хуморевоз омо Мукоилиш, песе согъ-боши гуфдире, десгьошуре, гуурде рафд э хуне.

Глэруьси нуьшунде омореву э келе хъэет, товуш сохде оморевугьо э лампегьой электриревоз. Э биней е бору жерге-жерге норе оморевуьруьт стулгьо, э у лойге ду-разе тэхдегьо, э зир ишу хъэчегьо дери. Э сер стулгьо э тозе хэлгIэт вараисде нуьшдебуьруьт жуьфде жуьфд мердгьо не зенгьо, зен-шуьвер, э е гьирогь, э зир луьге-гьой келе тутдор норе омореву чоркуьнже стол сер ю де-гуурде э серстоли китаиревоз, э ён стол нуьшдебуьруьт сазандаргьо.

Тарчи Мамед-ногьи э тар зереки жуню эденбу хъэз сохде, оммо тефдчи ГIэмелтей тефде гьово вегуьрдеки, сере эденбу зофру фушенде.

— Пушотегьо э ёрмени, — гуфди ГIэмелтей эз Ма-мед-ногьи, — зенгьо э мердгьоревоз э е жиге ние нуьш-денбуьруьт. Энжэгь эри вежегьисде огол мизеруьт ми-дировундуьт духдергьоре.

— Э имуш, э азербайджангьош гьечу бу, — гуфди Мамед-ногьи.

— ГьейсэгIэт хуби, — гуфди ГIэмелтей.

— Гьелбетте, — жугьоб до Мамед-ногьи.

Э и туьтем серпои, сара, гьобоне шуьгьэм, десе гьово гуурде хъэрой дешенд:

— Эй сазандаргьо, хисирейт! Сэхд зенит, гIэруьси гIэили!

Рэхьмон не Хумор нуьшдебуьруьт э е куьнж хъэет, э жергей колхозигьой колхоз ишу, эденбуьруьт томоше сохде, чуьтам э бузпои вежегьисденбуге э шегьер мэгл-луьм бугьо раче вежегьисдегор Ихьиил-Петегьу.

— Ме шиновусдем бебей эн игьош зурбое вежегьис-дегор бири гуфдире, — гуфди Рэхьмон эз Хумор. — Э гье-ме гIэруьсигьо у гIэзизе гьуногь биренбу мугу, чуьнки ярашуьгьи эн мэглреке бу мугу.

И гоф э лэгIэй Рэхьмон дери, э миглей хъэет веди бис-до Бебе, шовол галифе не чекмегьой хром э пой вери, руйшенни бостон э форм военни этен ю, не фурашке эз мол руйшенни э серию. Серию э гердению дарафдебу, шуьгьэмню гьуьндуьр воромореву. Э лой расди гьул ю поисдебу зен ю Либо, келе сипре дуьгуур э сер дери, фи-регье булиши гуьлмэхбер э тению.

— Дирей, — пуърси Рэхмон эз Хумор, — Бебе бегьеме воени бири.

— Вой эри ю волелей, — жугьоб до Хумор сере гъуз гуърде. — Э вэхд довго муш бире э хуне пэхьни биребу, гьони игид ведиромори.

Вежегьисдегоргьо эз мейду вадарафдуьтки, зерегоргьо зерере поюндуьтки, серпони куьнд бире э ки Бебе, мугу:

— Ишму хош оморит, кешит ебо нуьшит! — песде э лой нуьшдегоргьо чарусде, мугу: — Эй хуърде глов-гэил, жиге дит!

Эз гъул Бебе гуърде, серпони берд юре, нуьшунд э келе куьнж. Э ён шуьвер хуьшде нуьшд Либош, домбуле чумгьой хуьшдере диеш келе сохде, хэлгэз томоше сохде-сохде. Бебеш чуме чару сохде, э шинохгьоревоз шев эхэйрбу сохде, чум ю бирден вохурд э Рэхмон не Хумор. «Вой эри туь», — гуфди э дуьл хуьшде Хумор, Бебе эз зир чум э ю денишики. Оммо Бебе эз дуьл ох кеши, giroшде рузгьоре э ёр оворд, зен ю Либо э юревоз гоф сохдеки, эз гъулию бибине векенд. «Лэггэй туьре ги, инжо эз лэггэ зиёдие гоф меведировун», — гуфди Бебе. Песде гене эз зир чум денишире э Хумор, э дуьл хуьшде мугу: «Рэхмон мозоллуь ведиромо». Э и туьтем э гуш Бебе не дебу не сес раче гьовой «Терекеме», зеренбуьруьтгьо сазандаргьо, у бегьем ние дениширенбу э у энтигэз вежегьисденбуьруьтгьо жогьиле кукгьо, духдергьо. Жун Бебе домундебу рафде э лой Хумор. Гье и думитгьо вепичирф э Бебе, серпони омо поисд э пушою:

— Гьери, гу вуьнуьм, Бебе, чуй гьово зенуьтгэ эритуь.

— Ме гьеле ние вежегьисденуьм, — жугьоб до Бебе.

— Песде нубо нирасуь, гу чуй гьово воисдеге.

Бебе е кем э хуьшде домунд, песде мугу:

— Эгь, э и гьуьлом мунденигьо эри одоми е кефи...

Зенуьтгу эз гьэдимие гьовой — «Узун-дере».

Серпони э лой сазандаргьо чарусде, хьэрой вегуьрд:

— Э Ггэмелтей, зенит гьери эри бирор иму Бебе е гьовой «Узун-дере»!

Песде э лой хэлгэз денишире, мугу:

— Гьери, чек зенит!

Бебе вэхуьшд э пой, гьэиш хуьшдере дуз сохд, гъулгьоре еново гуърде, дуь дов луьнгьоре жумунд э пушой Либо, вэхуьзуь гуфдире эри вежегьисде. Е кем черх хурде бэгьдо э мейдуй ггэруьси, десе э куьф доно, гьэм пен-

жогыгьоре эз куьф ведешенде, екире э дес Либо, до, еккере э пушой зерегоргьо дешенд э уьктемиревоз.

— Дирей? — пуьрси Рэхьмон э лой Хумор денишире, — эдей хуьшдере бирмунде.

— Вой эрию...

Е хэйли вежегысде бэгъдо, Бебе чум зе Либоре/вадарав гуфдире, ю хьэрой дешенд:

— Г'эруьсе дировунит эри вежегысде, г'эруьсе.

Сес чеке-чек бежид бисдо, сазандаргьо дирилмиш бисдорут, Г'эмелтей тефде э гьуьндуьри вешенд. Серпой эз гьул г'эруьс гуьрде, дешенд юре э мейду эри вежегысде э Беберевоз. Бебе усэг'этте ведешенд дуь пенжогьыре — екире э е дес г'эруьс, еккере э е десигею дено. Песде эз гьемело жем-жогьыл, мерд-муле, зен-зоре вэ-хуьшде э дес г'эруьс пул деноруьт. Ведешенд эз куьф пул Рэхьмониш. У огол зе серпоире, до эю пенжогьыре, бер э дес г'эруьс ди гуфдире.

Хэйли шев рафде бэгъдо, э пушой хэлгъ суьфре дешендуьт. Суьфде омо герме нунгьой тонуи не эрэгьн-шороб, эри зокуске савзи, дуруп не г'ловгуьрде чигьо. Э ичгу темэхъ бирегоргьо не денишируьт э г'лошгьо, егьнигьо, сер гьурдуьт эри хурде эрэгьни, зокуске сохде э савзигьоревоз. Бебе э лой Хумор денишире, дуьлюю гуп-гуп сохде, парте-парт эденбу декуьрде э бугьоз эрэгьни. Гьечи бисдоки, тейте э пушо г'лош дуней не егьни ве де чигьойге оmore, Бебе пиён бисдо сер гуьрд эри мэг'нигьо хунде:

— Г'эмелтей, гьери е гьовой «Дуьбеит» зенит эриме, — гуфди Бебе, песде хунд мэг'ни.

Ошугъ буьруьм э туь, дилбер,

Э туь, дилбер, э туь, дилбер,

Хьэсрет э дуьл мундум, дилбер,

Мундум, дилбер, мундум, дилбер.

Бебере сес не вобу, хунде ние дануьсденбу. Эз пиёни гофгьореш дуз овруде ние дануьсденбу. Уне гуьре мэг'ни эн у э гуш екиш не дебу. Нуьшдегоргьо эденбуьруьт э еки гоф сохде, хурде, пейле-пейле зере. Энжэгъ Хумор гуше лой Бебе бугьо, хуб вараси мэг'эной гофгьой Бебере. Эз гьул шуьвер хуьшде гуьрде, у мугу:

— Вэхиз бурайм!



Эз гъопу э вадарафдеки, дедей ГІэруьс не серпои оморут, гуьрдуьт рэхь ишуре:

— Вой эйме гердо, — гуфди ГевГІнд, — гъечи зу эйчуь рафденит?

— Ме себэхьмунде зу биё э кор бурам, — гуфди Хумор. — Гъемише э шоригъо никигъо биёвойм э хуней туь.

— Шоригъо никигъо виношит, эз ГІэилгъой туьш винош и рузе!

Шев сокит бу. Э гъово эденбу товуш доре менг, эз гъитгъо лампегъой электри. Рэхьмон не Хумор эденбуьруьт рафде евош-евош гоф не сохде. Рэхьмон дануьсденбу, ки мэгІнигъой Бебе дуьл Хуморе хуьрд сохдуьт гуфдире, оммо ю э гуш ние гуьрденбу и коре. Эри дуьл Хуморе воровунде, у гешд е гофиге офд:

— Хубе рузгъои эри богъгъоре чире, — гуфди у. — Ебо тейте и ворущгъо оморе рихде мидарафдимге, мичириримге, хуб бу.

Хумор жугъоб не до. «Кошги ни оморум э ГІэруьси», — гуфди у э дуьл хуьшде. Песде эз гъул Рэхьмон гуьрде, мугу:

— Вомундем, кеш зури-зури бурайм.

Дербенд хисиребу. Дузе товуше серине кучегъою лос бу. Энжэгъ эз дури, эз лой рэхь гъовуни эденбу оморе сес дудуй паравоз.

— Валлагъ, хубе шегъери шегъер иму, гъэдимие Дербенд, — гуфди Рэхьмон.

## БОГЪЧИРЕГЪО

Гуфдиренуьт келе мердгъо ховсевен ние бире гуфдире. ГІэзиз гъеме келемердгъоре э и кор зеребу гирошде. И ченд салгъош зениу гузет сохдебу, чуьтам гъеле себэхь не вокурде шувверию эз хов вэхуьшде богъчей хъэте гъурлугъ сохдениге, э дерьёгъ рафде оморениге. Егиле ГІэзиз гъечу зу вэхуьшде эз торики-товуши э дерьёгъ рафдебу, э гъирогъ дерьёгъ зигъисденуьтгъо морякъго дуьзд дануьсде юре гуьрдебуьруьт э милиция берде. Де-журни эз милиция шинох ГІэзиз бире, юре шинохде, шэгъгъэ зеребу хэндуьсде. Эз у рузевоз Божи гуфдиребу э у шев дери дие э дерьёгъ мара гуфдире. Бегем Божи гуь гуфдире, хуте бире пишере одоми фурмуш сохде дануьсдени. «Гъоргой туь гушд хъэруьми хурди, — гуфди е

дов Гэзиз эз Божи, — умэхъэли меш себэхьгьоймунде э дерьёгь нирам». Эз гофгьой шуьвер глоси бире, Божи мугу: «Туьре зендебугьо дедей е нимесухде миёсде зенде». Гьечи угьо э гоф еки рази не бисдорут: не Божи хьэрьюми не хурд, не Гэзиз себэхьгьоймунде э дерьёгь рафдере не шенд.

Гьемишеинере хуно Гэзиз и себэхь эн сентябрь гьозори нуьгьсади пенжогь сеимуьн сал эз торики-товуши вэхуьшд. Э дерьёгь эри рафде нэГ, э богьчирегьо миёсде рафде у имбуруз. «Руз дегуьрди чуй кориге», — гуфди э дуьл хуьшде келе мерд э гьово денишире. Эз лой догьгьо култе-култе булутгьо оморе эденбуьруьт фираморе, эз гьемело вадабура эденбуьруьт пучунде гьэлере. «Ебойге оморе воруш тигьи небу,—гуд ти Гэзиз, — гьечунигеш э вэхд мигидгьой «руьшгьешонс. «кипур» не «сукегьо» ворушгьо оморенигьо гэдоти». Воруш омореи гьони екиреш ние воисденбу, чуйнки онгургьой «Огьодеи» расиребу у онгургьойгеш эденбу расире. Воруш омореи э и туьтем омбар зарал бу э богьгьо, онгургьо, иллогьки бегьем сэхд не расиретгьо мупуси момунд э тегьенг. «Хьэрекет сохде гереки эри зури-зури чире огьодеире», — гуфди гене келе мерд. Дес-руй хуьшдере шуьше, Божире хэбер сохде, у омо э лой дер хуне, Рэхьмонигьо хисиребуьруьтгьо.

— Э Рэхьмон, вэхи, жун бебе, — хьэрой сохд Гэзиз, — эзини рузгьо омбар хисире гэмел ниёв, богьчирегьой.

Эз расдекиш э рузгьой богьчирегьо колхозигьо э хьэрой хисире не буьруьт, гьечунигеш гьеле-меле онгуре э не расире, богьчирегьо дир сергуьрде, угьо дуьлпосс буьруьт ворушгьо оморе рихде, кешире жофогьошу пуч небу. Омбаре колхозигьо и ченд руз пушо гье эдебуьруьт гуфдире: кешит э богь дарайм гуфдире эри «огьодеи» чире. Угьо гэйбе эз председатель колхоз Мукоил жусденбуьруьт. « И чуй жире председатели, — гуфди ебо Эсеф гуфдиренигьо келе мерд, сипре руьшгьо, куьгьне богьдор, — Одигуьзел председатель гьисдики хьэрекет мисохд, э вэхдию эри чире онгуре, е гуьлелеш пуч небу, Мукоил чуй кориге тэгиди ние сохде». Гьечи мугуфдурут е пара колхозигьойгеш. Дие угьоре хэбер небу, ки заготовительгьо ние вегуьрденуьт гуфдире онгуре тейте хуб расире, шиб-ширин бире. Е гиле се-чор колхози Эсеф э пушо дери э кин Рэхьмон оморебуьруьт эри шуьккет сохде:

— Туь эз иму э гIуьмуьр чуьклеш гьисдиге, — гуфди Эсеф эз Рэхьмон, — келеймуни, эгъуьл туь эз эгъуьл иму биё зиёд бу, ненге туьре партия келе ни но эриму. Иму тевэгъэ сохденим э туь, е-дуь гоф гу э Мукоил, имуре ние воисде жофой эн и десгьойму э гъэгъ-ногъогъ пуч бу.

Келе мерд пушово кешире, бирмунд э Рэхьмон гъобугъ гуьрде кефгьой десгьой хуьшдере. Рэхьмон дениши э чуькле ковре чумгьой Эсеф, пэхьнуь биребуьруьтгъо э зир сипре келе пигIогъо, ловгъою э хэнде варафд, сифетию гьирмизн бисдо.

— Сабуьр сох, лелей Эсеф, — жугъоб до у, — имбуруз-себэхь мидарайм эри богъ чире. ГIэйб э Мукоил неве, гIэйб э заготовитель ве, гьимет ние доренбу эри онгур.

— Кини у заготовитель?

— Эёртуь не мунди э иму завхоз бугъо Бебе?

— Гъобоне Бебе! — гIоси бисдо келе мерд. — Бебелемиш сохо у имэхьшемуь!

Де имогъой э гIэре райком дироморе бэгъдо, Бебере секретарь райком Мамедов огол зере гуфдире бэгъдо, коргъо дузелтмиш биребу, «огъодеи» чире сер гуьрде оморебу.

Богъгьой бригадай Рэхьмон э дуь жигебу: куьгъне богъгъо э посой келе есиёв Маркалай, э зир куней догъ, тозе богъгъо — э лой завод «Огни» э ён рэхь огъуни. Эри огъодеи чире Рэхьмон э членгьой бригадай хуьшдеревоз оморебу э куьгъне богъгъо. Омбаре членгъо э кор кифлетлугъ оморебуьруьт. Келе мерд сипре руьшгъо Эсеф гъэлейхэнжели э се невей хуьшдеревоз не гIэруьсевоз вегуьрдебуьруьт эришу э лой эн гьендэгъ е тэхдере эденбуьруьт э зарбевоз кор сохде. Келе мерд, гIэруьс не е невею, онгур чиренбуьруьт, дуь невейге пура гъэрзинкегьой онгуре ведеберденбуьруьт. Те руз пишнеи бире кифлет нормей дуь рузи эн пенж одомире чире ведеберденбу. Э е лойгей тэхде, кемеде гъуз гуьрде эденбу онгур чире ГIээзи. Э ёнию эденбу кор сохде Хумор, сере пучунде э е назуке шол, э пойгъош чекмегьой мердуне вокурде. И дуь сал медучилишере варасде бэгъдо, Хумор медсестра кор сохденбу э поликлиника. И рузгъо эн у отпуск бу эз кор. Богъчирегъо сер гуьрденге у мугу э Рэхьмон: «Меш эдеме оморе эй онгур чире». Рэхьмон гоф не сохд. ГIээзи мугу: «Куьгъне сенигIэте э ёр овурде, духдерме?» Эхи Хумор ченд салгъо э духдери э колхоз кор сохдебу, э вэхд довгIо эри хубе кор сохдеи хуькуьмет уре медалиш

доребу. «Бошгу дие, биёвгу кумеки сохугу э ишму, — гуфди Божи э Гээзиз.—Э хуне ме деруым, гьечиш гьечуш э и хэсдее занигьоймеревоз ме эз хуне э жой вадарафде ние дануьсденуьм». Богъчирегьо сер гуьрденки, Хумор э ёр оворде, пушотейне сенигъэт хуьшдере э мердгьоревоз тен бетен эденбу кор сохде.

Э вэхд гьызгъини кор, колхозигьо э кор дерики, э миглей богъ, э гъэрей дуь тэхдеи омо поисд легковая машина «Победа». Эз машин ведироморуьт председатель колхоз Мукоил не е жонлуье саре мерд — фирегье душгьо, э тению савзе китель, э пойгьою шовол галифе не чекмегьой парусини. У бу секретарь райком партия Мамедов. Гъуногъгьоре эз дур дире, Рэхьмон видовусд омо, дес ишуре гуьрд, «хош омори» сохд. Мамедове винире, «хош омори» сохдуьт Гээзиз не Эсефиш.

— Гъувот бу, гъувот бу! — келе-келе гуфди Мамедов, э лой колхозгьо денишире.

Песде э Рэхьмон денишире, пуьрси:

— Чуьтами, омбар чирейт?

Рэхьмон ох кешире, мугу:

— Э вэхдию сер мигирдимге, те имогьой «огъодеире» варасде, э «нерме» мидарафдим.

Э и туьтем Эсеф, коре гьишде, оморе э кин секретарь, мугу:

— Хьовир Мамедов, дениш э гьово: асму огъу вечири мунде, вэхд ворущгьо эдей бире. Те имогьой мнесде амбардеки богъгьо чире оморе.

Мамедов дениши э сипре руьшгьой Эсеф, э гъуьндуьре балаю не хун пур биребугьо мундебугьо чумгьою.

— Чиренит дие, — гуфди Мамедов, — эз ки жусденит гъэйбе? Райком биёв чуьнуь эйшму онгуре?

Эсеф эмэхьтелиревоз дениши э Мукоил, мугу:

— Эхи председатель мугу сэхд ширин не бире онгуре ние вегуьрдунуьт эз иму.

— Ки ние вегуьрде? — пуьрси Мамедов.

— Заготовительгьо.

— Гъэйбиш бу гуфдире: тизкере нун жуьгьи вогъней, гуфди гье ебо э ен Эсеф поисдебугьо колхози Эхьмеддои. И гофгьоре шиновусде, гьемееки хэндуьсдуьт.

— Хуби дие, — гуфди Мамедов е хэйли тегъенгьоре фегьм сохде бэгъдо, — гьери имогьой э лой бригадей Рамазан бурайм. Туьш биё э имуревоз, Рэхьмон.

Гье машин эз богъ вадарафде сэгIэт, эз гьово ебо чиг омо, песде сер гуьрд воруш.

— ГIээиз бирор, — эз дур хьэрой дешенде гуфди Эсеф, — дирени? Дуьл ГIээиз омбар гурунд бисдо, гьош-гьою дулла, сере тик гуьрде, у э гьово дениши. Асму биребу сип-сиегъ, сар, ве мугуиге у гьони миофдону э хори мирасуь. Песде эз дури сес биренгъине омо, воруш бежид бисдо. «НэгI, и воруш э и зуригьо поисденигьо нисди», — гуфди эри хуьшде ГIээиз чуме-чару сохде Хуморе. Оммо Хумор э е десде гIэруьс духдеревоз э сергьошу туморегьо, шолгьо, пинжекгьо дегуьрде пэхьни биребуьруьт э зир луйгегьой келе тутдор.

Эз и рузевоз сер гуьрдуьтгьо ворушгьо е ченд руз лэгIэ не гуьрдуьт. Кими рузгьо себэхьмунде офдо миведиромо, колхозигьо шор бире мирафдуьт э богъгьо, е-дуь сэгIэт кор мисохдуьт, е кем онгур мичуьруьруьт, ебойге миомо сайлов мирихд, хэлгъэ эз кор лов мисохд. Ворушгьо поисдуьт э гIэрей мигIидгьо, руьшгьешоне варасде, кипур куьнд биреки. Руз мэгIлуймей кипур руз гьеминоне хуно бу — офдон, хуьшги, герми. Эз келе те чуькле гьеме колхозигьо э богъ оморебуьруьт. Кимигьо э хуьшдеревоз гIэилгьоре, хэгьер-бироргьоре овордебу э кумеки екиревоз эри онгур чире, плане бегьем сохде. Мукоил эз е бригад э е бригад рафде, э эшгъэвоз кор сохдегоргьоре дире, эз дуьли шори сохденбу. Шохьонгум эз кор вогьшденки, гьемишеинере хуно кифлет ГIээиз э сер суьфре эри чи хурде нуьшденки, Рэхьмон э шориревоз денишире э Хумор гуфди:

— Баракеллогъ, Хумор, дуь рузине нормире бегьем сохдей туь имбуруз. Эдем дире, фурмуш не сохдей кор богьире.

— ТэгIриф меди, чум мизени, — хэндуьсд Хумор.

Рэхьмон эз зир чум дениши э ю, диеш шори сохд. «Жогьил мунди, хуб мунди», — гуфди э дуьл хуьшде. ГIээиз бишгьоб епрэгьире хурде, гьобе посово кешире, э Рэхьмон денишире, гуфди:

— Дануьсденуьм, хэлефме, туь эз Хумор разини. Хумор хуб кор сохде. Эз у олхонн бош, себэхьиш хуб кор мисоху. Оммо дануьсде бош, себэхь руз кипури, е пара одомигьо белки мигIид гуьрд... Гьечу сохде гереки, ки э жигей эн угьо екигьойге семе биьв эй богъ чире...

Рэхьмон мугу:

— Эйме оморенигьо тек-тук белки эз кор поисдге

себэхь, гьечунигеш и ченд рузгьо ворущгьо мешет бирет, онгургьо эдет кара гуьрде.

— Фурмуш месох, кипур у миглидгьойгере хуно нисди, — гуфди Гэзиз.

— Иму и рузгьо лекциягьош хундейм эри эн угьо, — гуфди Рэхмон. — Лелей Гэсоиле огол зеребуьруьм. Ме мугум туь мий э клуб, веде не бисдори. Е раче лекция хунд лелей Гэсоил эз товней кипур. Е хуб гуш дошденбуьруьт колхозигьо...

— Гэсоил гьелбеттеш мухуну. Уре хуно ки дануьсде туроре. Лап келе рабигьо э Дербенд деруьтгьош гьони ченд Гэсоил туро нисе дануьсденуьт.

— Эзуни у гьечу хуб очугь сохденигьо дургунигьой турорей, — гуфди Рэхмон.

Те имогьой сес ние сохденбугьо Божи, чумгьоре чарунде, элой шуьвер денишире, мугу:

— Дедей миро туьре, э мерд, туьре глэйб ние оморе эз и сипре руьшгьой туь э пушой худо глоси бирени?

Келе мерд хэндуьсд, мугу:

— Эй духдер гьэбиле, ченд гилегьо туь не гуфдирей рабигьо гьеме дургу-дулобгьоют гуфдире?

Келе зен э пой вэхуьшде, е хьэрой вегуьрд:

— Эле, бебейме руьш буро гьеригьой, и чуй гофгьои э и шев кипур ме шиновусденуьм... туь эгьуьл туьре хурдей бегем мерд! Эжигей хубе рэхь норе э пушой глэйлгьо э себэхьине руз кипур миглиде хор несохут, туь диеш э зир гьэжгьу глэтош дешенде!

— Туьре эз боггьо хэбери ненге нэгл? И ченд рузгьо ворущгьо лэглэ не гуьрдет, онгургьо эдете пусире вомунде... гьечунигеш э хэлгь хэйли зарали расири. Э гофтуьревоз и мундигьо онгургьош пуч бу... Песде нун ки мийеру муьдуь туьре, худо, ненге раби Хьэим?

— Худо келеи, — гуфди Божи, — борух гьешим, гьеле екиш гисне нисди...

Хумор хоши гуьрде Божире, мугу:

— Глоси мебош, дедей.

— Чуьтам глоси небошум? Ние шиновусде чуй жире рэхгьо норениге э пушой глэйл? Рэхмон жогьиле одомини, коммунисти, у эз глэйлиревоз э рэхь коммунисти рафди, э уревоз гофме нисди. Эхи и келе мерди, дедей миро ире, той эн и гофгьои и э пушой муьрдрузи хуьшде!

Гэзиз шэгъгъэ зере хэндуьсд, чуькле невере э дес вегуьрде мугу:

— Шиновусди, Марал, келе дедей туь муьрдеймере эдей хосде...

Рэхьмон э пой вэхуьшде, мугу:

— Тейте женг бире, вечинит и суьфрегьоре. Хисире гереки, себэхь зусери э кор рафде воисде.

Эз гьеме зуш дегешдге Рэхьмон-э хьэлов, те нимешев чумгьоу э хов не варафдуьт. Бебешу гуфдире гофгьо э гушию домундуьт. «Эз расдекиш омбаргьо э кор не ведироморутге себэхь, чуь мисохим?» — гуфди у э дуьл хуьшде. Нимшешев Хумор хэбер бире, дирени Рэхьмон гогь э и ло эдей чарусде, гогь э уло.

— Эйчуь ние хисире? — э гуши-гуши пуьрси Хумор.

— Хис, хис, меш эдем хисире, — жугьоб до евошлей Рэхьмон, гьэл гуьрде бирэхьнее душгьой Хуморе, астале моч сохде герме гьутинеюре.

Себэхьмунде Рэхьмон гьемишеинере хуно зу вэхуьшд, Хуморе хэбер сохд, ведиромо э гьейву. Гэзиз поисдебу э хьэет, хьозури хуьшдере дире эри рафде, эденбу томоше сохде, чуьтам чуьшме ведироморениге. Песде э богь оморенге, диреники, хэйли келе мердгьо не оморет э кор, Гэзиз мугу эз кук хуьшде:

— Ме э туь чуь гуфдиребуьруьм, Рэхьмон хэлефме, Эсефиш не омори...

— Гьеле белки оморенбуьруьт, — жугьоб до Рэхьмон.

Гэзиз не Хумор дарафдуьт эри богь чире. Рэхьмон омо э ён тирозучи, э гьирогь богь, э ён сара хунелей гуьли э пушой тирозу хьозур нуьшдебугьо эри чире онгургьоре пеймунде, хьисоб сохде.

— Чуьтам оmore эри туь, Исхьогь? — пуьрси Рэхьмон эз тирозучи, тигьэтлуь денишире э куьмуьре хуно сиегь, астарере хуно товтови бугьо гиргине чумгьой жогьиле колхози. — Амбаргьо мигид муьгуьруьт имбуруз?

— Чуь гуюм эйтуь, гьэззи Рэхьмон, бирор туь муно е дуге гофгьо. пери лелей Гэсоил гуфдиребу эз товней мигидгьо, диндогьотгьо. Э ки мугуи? Э мэхьэй кимигьо ние дарафде. Билене бил мугу, билмеене чувол-чувол. Гуьлом — вилеет гьеме эдей културни бире, и е пара дербендигьойму гуьрдет поисде дуьмгьой рабигьоре.

Рэхьмон э думит домунд. Исхьогь гузет сохд чуьтам хун пур бире мундебугьуьтгьо чумгьой Рэхьмон могьбул бисдорутге, сие гьошгьою дуллу бисдорутге.

— Имогьой туь гуфдиренигьо, докладгьош кори ние сохде э е пара одимигьо дие? — пуьрси Рэхьмон эз Исхьогь.

— Лекция-микция чуьни, — хэндуьсд у, — эри е пара одомигьо тоегьи гереки.

Рэхьмон э мэхьтелиревоз дениши э Исхьогь.

— Туь лап шит сохди! — гуфди у.

Э и туьтем сес машине шиновусде, Рэхьмон посово дениши. Эён гьендэгь поисд «Победа», эз машин ведиромо Мукоил, э тению вери ковре плащ, э пою гердеверис чекмегьо.

— Себэхь ишму э хэйр, эхириш гьово хуб бисдо, — гуфди, сере тик гуьрде э чуьшме денишире.

Гьовой руз расдекиш хуб бу. Эз лой дерьёгь зверо варафде-варафде эденбу келе бире гиргине гьол-гьоли чуьшме, ригагьой хуьшдере шэхдегьой воруже хуно шенде э сер ковре дерьёгь нен фирегьуне онгурбогьгьой Дербенд. Мукоил дес Рэхьмонигьоре гуьрде, усэгьэт куьнд бисдо э лой тегьенг, эз комики дуллу буьруьт куьллуе хушегьой онгур. Винире чуьтам сер гуьрдетге эри кара гуьрде зуьм-зуьмие хушегьой «нерме», эз дуьл председатель «ох» воромо.

— И чуьни, Рэхьмон, эдее пусиреки?

— Дие ме э чуь думит деруьм! — гуфди Рэхьмон ве гиргине гьутинегьою и песини рузгьо хэйли дору дарафдебуьруьтгьо эз гьэгьр гьирмизи бисдорут. — Терсиренуьм кешире зэхьметгьо пуч не бошуьт, и пура хушегьой онгур пусире не мунут.

Мукоил э иловлей богь дениши, мугу:

— Зури-зури чире варасде воисде, гуфдире гереки кифлетгьоре биёрут членгьо.

— Мечини, — гуфди Рэхьмон э охмуриревоз, — кифлетгьоре нэгь о, кими членгьо ишуш не оморет имбуруз.

— Эле, имбуруз кипури эхи! — э ёр овурде гуфди Мукоил. — Гьемей эн и середерди эз зерде Эсеф медиров. Эри э нумаз рафде эдей муьрде у. Ебо э ёрмени, пушой довогьо э гьэд богь келе мердгьоре кура сохде, нумаз вокурдебу.

— Оммо и перигьо э женг оморебу э киме, — гуфди Рэхьмон. — Эйчуь ние чиренит, мугу, богьгьоре, куьгьне председатель Одигуьзел, мугу, ижире дир ние кеширенбу, туьш мугу парторг бире, е хьэрекети ние сохде, песде



мугу ворущгъо миёв. Оммо гъони ю коре гъишди э нумаз рафде.

— Келе мерди, — гуфди Мукоил, — гІэйб месох...

— Лелей ГІэзизиш келе мердики, — гуфди Исхьогъ.

Э и туьтем ГІэзиз, э душ воноре келе гъэрзинкей онгуре, ведировунд.

— Гъери кеш, Исхьогъ! — гуфди у, руз эхэйрбу доре бэгъдо Мукоиле.

— Эсеф хьовиртуь коргьоре шулух сохди о, — гуфди Мукоил эз ГІэзиз.

— Туьре бугу Эсеф, — жугьоб до ГІэзиз э хэндеревоз. — Хьовирме гъони Исхьогъи, туьни, ини, дирей оморенигъо Рамазане? Уни хьовирме.

Мукоил еново денишире, дирени шуш нефес гуьрде эдее оmore бригадир эн дуймуьн бригада Рамазан — е чуйкле, лэгъэре мерд, чупуре сифет, шопкей алати э серию, ковре пинжек сетини э тению. Себэхъ эхэйрбу доре, у э биразиревоз мугу:

— Хьовир председатель, ижиреш кор бирени? Иму гоф дорейм е хуше онгуреш, пуч несохде вечирени, паздагъ тонн эз гъер гектар дорени, оммо гъе и гъово хуб биригъо руз дегъ одоми эз бригада э кор не оморет. Ижиреш кор бирени!

Руз унгъэде герм не бугеш, э пушони Мукоил эрэгъ верома. У плаще векед эз тен, до э шофер, ведешенд эз куьф гъути папрусе, э лерзиренбугъо десгьоревоз спичке зе, сухунд.

— МигІиди имбуруз, — гуфди Мукоил, — мигІид жуьгури, кипур. МигІид гуьрдет.

— Эри эн игъо лекциягъо хун, докладгъо сох, ченгъэде э ишу андурмиш сох, ние дарафде э мэхъэшу дие! — ГІоси бире гуфди Рэхъмон.

Екем думит сохде, Мукоил мугу:

— Жун ишу жегъендем, е имбурузи кипур. Себэхъ гъемешу миёвт. Ишму кор ишмуре сохит!

Песде Рамазане э машин хуьшде венушунде, Мукоил мугу:

— Гъери кеш э бригадей туь бурайм.

Э бригадей Рамазан оmoreки, Мукоил дирени, гъобоне Бебе э ихдилот гуьрде секретарь райкоме Мамедова, эдее гоф сохде:

— Ини Мукоилиш омо, — гуфди Бебе. — Ишму заготовительгьоре тэхсир сохдебирит, эри коле онгургъо гъи-

мет ние доре гуфдире ишмуре. Ини, имогьой онгургьо расире, эдете пуч бире, дие эйчуь ние чиренит!

И гофгьоре гуфдиреки, Бебе дуь келе пусире хушегьой онгуре вегуьрд. Мукоил жинленмиш бисдо.

— Бигьил шулухэ гофгьойтуьре, — э гьэгьревоз гуфди Мукоил — дануьсденуьм чуьтам дуьл туь сухдениге эри колхоз иму!

Чумгьой Мукоил хун вечиребу мунде. Мугунге у гьони гьов микенуь миёв бугьмиш мисоху Бебере.

— Эле, дирей, хьовир Мамедов, чуь гуфдиреге председатель? Богьчирере эз сер ние берденуьтгьо ишунуьт, колхозигьоре тербиет доре ние дануьсденуьтгьош ишунуьт, оммо тэхсиркор менуьм. Ме гуфдирем э колхозникгьой туь руз кипур э нумаз буравт! — хьэрой вегуьрд Бебе. — Э парторг туь гу хуб кор соху. Эжигей ю кор гировунде э гьэрей колхозникгьо, э кес тапшурмиш сохде. Эз партия ведекуьрде оmore одомигьо, куьгьне рабигьоре оворди эри лекция хунде...

— Иму гьеле мивним ки тэхонр кор гьисдиге, — гуфди Мукоил. — Гьемей эни заралире э сер иму туь овордей!

Бебе хэндуьсд:

— Хьэ-хьэ-хьэ, артисти, артист! Себэхь онгургьой богь ишму дуьздире омоге, уреш биёр э сер ме веше!

Мамедов дирени, ки ихдилот эдей дураз кешире.

— Хьовиргьо, — гуфди у, — ихтилот данани гьурте веруьр. Хьуьжете песде мисохит, гьони онгуре чире गरेки.

— Гьеле себэхьмундеи, — гуфди Мукоил. — Ме гьони мурам э шегьер, ченгьэдеш бисдо одоми муьфуьрсуьм э богь. Эз себэхьэвоз зиёд мидобу корсох э богь.

Мукоил э машин венуьше э лой шегьер рафд. Мамедов не Бебе — э колхозгьой район. Мамедов нуьшдебу э пушо, э ён шофер, Бебе э посо, кемере воноре э сер нерме болуше хуно норм бугьо кемер машин. Мамедов эз куьф пачкей сигарете ведешедки, Бебе эз гузги эпушой шофер вобугьо вини, усэглэтте ведешенд спичкере куьнд оворд э пушой секретарь.

— Буюр, юлдаш Мамедов, — э хэндее ловевоз гуфди Бебе.

— Согьбоши, — жугьоб до Мамедов, папрус дегесире бэгьдо. Машин эденбу рафде эз келе рэхь, эз гьэрей богьгьой онгури. Эз лой расд веди буьруьт савзе догьгьо

ве дигъгъо, вебуъруйтгъо э сер догъгъо, эз лой чеп Гловгъой фирегъуне дерьёгъ хэзер, дуразе десдей вогунгъо, паравоз э пушо дерн дуду зеро эз рэхъ гъовуни рафденбугъо. И догъгъо, богъгъо, дерьёгъгъо ве машингъоре Мамедов омбар дирёбу. Э гуш эн у гъейсэгІэт сес паравоз недебу. Уре думит коргъой колхозгъо гуърдебу. И рузгъо э Масков Пленум Центральный Комитет партия эденбу гиросде. Келе везифегъой коргъой колхозгъоре эденбу фегъм сохде Пленум. Доклад Хрущеве шиновусде э радио, Мамедов фикир сохдебу, чуьтам э гъэриш эн э пушо деригъо дуь-се сал коргъой колхозгъо хуб, буле бегъергъо зиёд буге, мол-гъэре зиёд буге, трудоденгъой колхозникгъо ферлуь буге. Э дуьл Мамедов добу хъэрекет соху богъчирегъо э вэхдию гирору, хубе бегъер вечире биев, коргъой район нен шегъер э пушо бурав. «Оммо ворущгъо омбар мешет бисдорут э иму», — гуфди э дуьл хуьшде Мамедов. Песде э ёр эн у омо имбурузине ихдидилот э колхоз «Дербенд», чарусде э лой бебе пуърси:

— Туь эз товуней эз партия ведекуърде одомигъо эденбири гуфдире э Мукоил. Ме неварасируьм эз товней коми одомигъо бу туь гуфдиренбиригъо.

Бебе гъолине жендек хуьшдере э ило-уле чарунде, гуфди:

— Туь ние шинохде беге Гэсоил Бинаеве? Пушой довгогъо у эз партия ведекуърде не омори? Редактор газет гъисдики у келе политический ошибкегъо дегъишдебу. Не дегъишдениш небу. Ечи политически нехундегоре одомини у, раби бири э девр Николай. Эз раби чуь коммунист не редактор биренини?

— Шинохдум, — гуфди Мамедов, гоф Бебере зеро, егІни дие мегу весси, лэгълэгъи месох.

Мамедов хуб шинохденбу Гэсоиле. Э ёр эн уни ю комсомол гъисдики, э рузгъой мигІид Октябрь нен Май, э демонстрация ведиромореки, чуьтам Гэсоил, сер бирэхъне э трибуна варафде, десе гъово гуърде, суьфде э зугъун уруси, песде э зугъун тати не азербайджани эловлуь гоф сохденбуге, раче гофгъо гуфдиренбуге, революцияре, партияре, Ленине тэгІриф доренбуге. Гэсоил э гоф сохдеки, жендек одоми биз-биз сохденбу. Песде э ер Мамедов немунди: ю эй хунде рафд э Масков, оморенге дие э трибунагъо чигъо не вини Гэсоиле. Киниге гуфдиребу э ю Гэсоиле эз партия ведекуърдет гуфдире эри келе коргъо, оммо егиле бебешу гуфдиребу э Мамедов:

«Хэлефме, у ГЭсоил гуфдиренигъо пушоте раби жугъур-гъо бугъо мерде шинохдени? Лап ногъогъ эз партия ведекуурде омори. Рабиш бириге у, еки эз туьре воюгъо, эй хуькуьмет совет дуьл сухунденигъо одомини»... Е ченд гилегъо э заготзерно омореки, унжо дирербу ГЭсоиле Мамедов, эз дур руз эхэйрбу дорербуурьт екире. Э заготзерно агент кор сохденбу у вэгидои ГЭсоил, Мамедов шиновусдебу хуб селэгъэлуь кор сохдеи ГЭсоилеш. Оммо мэхьтел бу Мамедов — гъич ГЭсоил э райком оморе, ние гуфдиренбу эз товней коргъой хуьшде. «Э хьисо-бевоз е гIэйб дебири э и, ведекуурди юре эз партия, — гуфди э дуьл хуьшде Мамедов. — Ненге миомо, эрзо мидо, партбилет хуьшдере михосд». Песде и гофгъой Бебереш шиновусде, Мамедов э думит домунд: «Ме эдем дире и Бебе э фитночи ухшеш зере, мурав э Махачкала-гъо чигъош лэгълэгъи мисоху, гIэрэгъэришкии мисоху, сер имуре э боле мидешенуь. Эз хэто дур бире гереки».

Оммо гене Мамедове дуьл не бисдо, огол зенуь парторг колхозе Рэхъмоне гуь э у куьгъне раби ГЭсоил лекциягъо-чигъо меди гуфдире эри хунде. У бовор ние сохденбу ГЭсоил зобуни власти михьогъу гуфдире. Мамедов нэгI, инструктор райком Якубов гоф сохд э Рэхъмоневоз.

## ЧУГЪУЛИ

Е руз богъчирегъо варасденге Рэхъмоне огол эе берд э ки хуьшде инструктор райком Якубов. Руз эденбу шохьонгум бире, вэхд кор сохдей учреждениягъош варасдебу, оммо Якубов не Рэхъмон гъеле-меле эз райком ние вадарафденбуурьт. Угъоре келе гоф биребу инжо эз товней ГЭсоил. Якубов гуфдиренбу, ки Рэхъмон ногъогъ тапшуурмиш сохди э ГЭсоил эри лекция хунде, чуьнки у эз партия ведекуурде оморе одомини, екке пушотегъо, э девр Николай раби бири.

— Бегем имуре членгъой партия, е ненге э партия не дебирегоре интеллигенциягъой совети кеми? — гуфди Якубов.

— Кем нисди, — жугъоб до Рэхъмон, ве Якубов вини чуьтам гъирмизи бисдоге жиге яра вебугъо э гъутиней Рэхъмон. — Имуре активгъо омбаруьт. Оммо эз лекциягъой ГЭсоилиш зарал нисди, у эдей шефдигъой диндогIо-

те, эн рабигьоре очугъ сохде, э иму кумеки сохде эри тербиет доре колхозигьоре.

Якубов вэхуьшд э пой, гешд э иловлей хуне. Назуке жогьиле одоми, Якубов дарам гешденбу. Э тению ковре китель не шовол галифе вобу, э пой ю чекмегьой хром. Сиегье келе муйгьой серию гьир-гьир биребуьруьт мунде.

— Туь эз ме келетеш гьисди хьовир Рэхьмонов,—гуфди у, —оммо ме эдем дире туь политикере усол варасире...

Рэхьмон тоб недоре, хэндуюсд.

— Согь боши, хьовир Якубов. Дие гофтуь гьисди э меревоз?

Якубов вараси, ки Рэхьмон э руьхшендиревоз эдей гоф сохде. У мугу эз Рэхьмон:

— Фурмуш месох, э ме ченд эрзогьои, хэлгъ эдей шуькеет сохде эз дес туь. Туьре чуй ихдиёри эз партия ведекуьрде оmore одомире овурде, лекциягьо доре э у эри хунде! Весси! Эхир-эхир этуь гуфдирере э назар вегуьрде гереки/небуге нэгI! Себэхь-персебэхь собранией актив мубу. Унжош гьерки бисдо мэхуьзуь мугую, биё-бури...

Расдекиш эз се рузиге бэгьдо э собранией актив и гоф бисдо. Кесиге нэгI, гьемин Бебе ведироморе э трибуне гьеме гьэгьр хуьшдере тигьи сохд э сер Рэхьмон.

— Хьовиргьо, гьеме колхозигьо эдете гуфдире,— Рэхьмон келегед бири гуфдире...

— Туь эз нуминей колхозигьо мегу, эз нуминейтуь гу, —бури гоф Бебере Мукоил э пой вэхуьшде эз миглей зал.— Колхозигьоре воисдге ишу мигуют...

Секретарь райком Мамедов звеноке зе, егIни мешет мебош.

— Диренит, хьовиргьо, гофиш ние гьишденуьт сохде эй! Гьеле инжо э собранией актив лэгIэймуре зеренге, э колхоз чуьтам мибошут Рэхьмон не Мукоил! Е гилейгеш эдем гуфдире: сер Рэхьмон келе бири. Эз омбар тэгIриф дорей юре. Е дуь сал колхоз хубе бегьер вегуьрди гуфдире, хуькуьмет ишуре орденгьо дори гуфцире, хуьшдере келе гуьрдет! Иллогьки Рэхьмон. У гьечу дануьсдени дие гьеме колхозигьо тербиет вегуьрдет, э угьоревоз кор гировунде герек нисди. Э жигей ю парторг оmore э ки корсохгьо, э ишуревоз эз дуьли жуни гоф сохде, эз четини не терсуьт, э вэхдию бегьере вечуьнуьт, куьгьне рабигьоре овурди эй лекция хунде. Посою чуй бисдо? Э герме

рузгъо, онгур хуб расиребугъо ружгъо, нимей колхозигъо мигИнд гуърдуйт...

И гофгъоре шиновусдки, жендек Рэхмон лерзи. «Дургу дулоби туь, фитночи», — гуфди э дуьл хуьшде Рэхмон. У мэхьтел мундебу Мамедов и гофгъой Бебере шиновусде, лэгИэй эн уре эйчуь ние зереге. Эхириш не вотовусде, Рэхмон эз зал хьэрой дешенд:

— Фитночи! Чугъул!

Мамедов звонок зе, гене Бебе мугу:

— Шиновусденит хьовиргъо? Э метелегъо гуфдире-нуьт: дугъри сузи диенде, кечелуьн боши енедуь...

— Дие эз туь кечелте э Дербенд одоми не дерики! — бурри гоф Бебере Мукоил.

Э зал нуьшдегоргъо шэгъгъэ зере гьемееки хэндус-дуйт, чуьнки э шегьер Бебере эз гъобоне Бебе бэгъэй кечеле Бебеш лэгъэм вобу.

Бебе гене гуфди ченд жире гофгъойгеш эри исбот сох-де э сер Рэхмон гъэлетигъоюре, биёбур сохде юре. Э зал дебирегоргъо дениширенуйт диренуйт э гофгъой Бебе е метлеб дери, критикай энэ эз хосдеи нисди, кимигъо хьэ-рой вегуьрдуйт:

— Весси гоф сохдейгъо, вэхд варасди!

Э зал офдо сес хьэрой-хьэрой. Мамедов звонок зе. Бебе гофгъой хуьшдере не варасде, эрэгъ пушонире э келе ейлугъэвоз покурде-покурде эз трибуна фурамо э жигей хуьшде нуьшд. Рэхмон гьечу дануьсд ки, Мамедов э эхир собрание э гоф сохдеки едуь гоф мугую эз товун чугъулигъой Бебе, оммо нэгИ. У гоф сохд эз товун сентябрьский Пленум норигъо везифегъо, гуфди эз серботи е пара кемсуьгигъой колхозигъой Дербенд, эн пуч бирей егъэдер онгургъо ве теклиф сохд гьер колхоз, гьер рэхьберчи, гьер коммунист-активист фикир соху, чуьтам коргъой колхозгъо совхозгъошуре хуб сохутге эри э жиге овурде Пленум ведешендигъо гъэроргъоре. «Эз товуней гофгъой Бебе гьичиш не гуфди, — думит сохд Рэхмон. — Веди биреники у э гофгъой Бебе рази-ни. Якубовиш ногъогъ огол не зеребу мере». Омбар гу-рунд бисдо дуьл Рэхмон. Собрание варасдки, у гьич э Мукоилиш не денишире, шопкей хуьшдере воноре видо-вусд вадарафд эз клуб.

Э буру уже торик бу. Гьоворе булут шиширебу. Асму мугуиге офдоребу лап зофру эденбу э бунгъой хунегъой шегьер нуьшде. Лампагъой электри эденбуьруьт сухде

энжэгъ э кучей Ленин не э лой вокзал гьисдуйтгьо кучеъо.

Собранней актив гирошдебу э клуб корсохгьой рэхъгьовуни, э зофруй кучей Ленин. Эз клуб те гъирогъ дерьёгъ садипенжогъ-дивисд метро рэхъ дебу. Рэхъмон гюси бире, папрус кешире-кешире, рафд гирошд рэхъгьовунире, песде гирошд эз пушой руз бе руз келе биренигъо консервный комбинат, ведиромо э гъирогъ дерьёгъ. Инжо, э торики нуьшде, Рэхъмон дуъл могъбул эденбу гуш дошде, чуьтам сес сохденуьтге келе шаргьой дерьёгъ. Э дуъл эн у э и сэгIэт ченд жире коргьо омо: ихдилотгьой бебешу эз товуней ГIэсоил, чуьтам у э дөвр революция рабиетире шенде, коммунист биребуге, чуьтам рабигъо-гIоширгьой Дербенд ГIэсоиле нифри сохде гешденбуьруьтге, песде чуьтам ГIэсоил э косибгъо кумеки сохдебуге эри колхозгъо гуьрд сохде, песде чуьтам эрию чугъулгъо ведироморе, э серию хъэшогъо вешенде мерде эз партия ведекуьрдетге... имогъой э се-реботи ГIэсоил э Рэхъмон оморет хъэлово бире... «НэгI, ме бовор ние сохденуьм ГIэсоил э партиейму хогъин медиров гүфдире, — гүфди э дуъл хуьшде Рэхъмон. — Нэнге у эз дин—догIот вадарафде, эй хуьшде дуьшмегъо гъэзенж сохде, э революция бэхш вегуьрде, коммунист нибисдо». Песде Рэхъмон думит сохд и ченд салгъо ГIэсоиле дуборе эйчуь невегуьрдетге э партия... «Эхи те имогъой фегъм сохде мибисдо дузи-шефди уре ведекуьрдеире... Песг чуь кори те имогъой у беспартийни мунди?...» И хэелгъо э дуъл дери, Рэхъмон вэхуьшд эз сер гъумгъой гъирогъ дерьёгъ, эз лой вокзал гирошде, варафд евош-евош северо э шегьер, э лой хуне.

Рэхъмон э хуне омогъо, ГIэзизигъо хисиребуьруьт. Энжэгъ Божи э пушой кинле нуьшде, эденбу гIэтош деноре гъэжгъуй чи хиник небу.

— Вой эй ме гердо, веи небисдо нохогътуь — гүфди Божи, — чумгъой дедей туь сипи бисдо ки...

— Э собрание буьруьм, дедей, — жугъоб до Рэхъмон. — Ногъогъ нуьшдей поисде.

— Эле, дедей миро туьре, хинике чире миёсди хурде туь песде?

— Мере гисне нисди, дедей, дегерд хис.

— Дедей миро туьре, эже хурдей оmore, хэлефме?

Гоф сохдей Рэхъмон нен Божире шиновусде. Хумор

вэхуыште эз хьэлов, дуразе халат ранги-рангире вокур-де, э душ хуыште герме шарфе дегуьрдс, ведиромо.

— Туь эйчуь ведироморей? — пуьрси Рэхьмон.

— Ме бегем хисирем, чумме э рэхь туь бу.

Божи глош не епрегъи декуьрде, овурд но э сер стол.

— Веги ху, хэлефме, — гуфди у.—Уни эишкоб чорекей шоробиш дери воисдениге.

Рэхьмон гоф не сохде, дарафд эз хуне ведировунд шоробе, декуьрд е келе пейле, э е хуьпезов хурд, пезде е-дуь лэгъэ глош не епрэгъиш хурд. Хумор дануьсд дуьл Рэхьмон могъбул бирейре, глоси не бу гуфдире гоф не пуьрси эз ю. Э лой Божи чарусде, мугу:

— Дие эйчуь нуьшдей туь, делей, дара дегерд хис.

— Худо хьэрмэхь эришму, хэлефме, — гуфди келе зен э хуне дарафде.

Рэхьмон е пейлейгеш шороб декуьрд эри хуыште, хурд, пезде сере тик гуьрде дениши э Хумор.

— Дуьл песо бири? — пуьрси у, чуме не вегуьрде эз раче чумгьой зен хуыште.

! — Дуьл песош мубу дие.

Ловгьой Рэхьмон э хэнде варафд. У вэхуышд э пой, гуьрд э десевоз гьул Хуморе, фурмуш сохде гьеме имишев сохде фикиргьоре, мугу:

— Кеш, ме вомундем, мере хов дери...

Себэхьмунде хэбер биренге, Рэхьмон дирени Хумор э кию э хьэлов не дери... Сэглэт хьэшд зиёд бу, Хумор рафдебу э кор. Духделею Марал эз лихьифию кешире, эденбу гуфдире:

— Папа, дедушка оголи!

— Гьо жун папа, — гуфдире Рэхьмон гьужогъ зе вегуьрд глэиле, моч сохд се-чор гиле, пезде но э хори, юш вэхуышд э пой. Е кем э богъчей хьэет гешде, хори-гьоре бил зере, пезде дес руй шуште эй чой хурде э сире нуьшдебу Рэхьмон, эз лой гьопу сес омогьо.

— Рэхьмон э хуне дери?

— Эри, дино, киниге, — жугьоб до Божи.

Э хьэет диromo е лэгъэре мерд, руьш чире, э тению нимдошде ковре палтуй поизи вокурденигьо, э пою гердеверие нимдошде чекмегьо, э серию гиргине сие шопке. У бу Глэсоил, эз товун комики, и ченд руз эденбу фикир сохде Рэхьмон.

— Себэхь ишму эхэйр, — гуфди Глэсоил.

Сес Глэсоиле шиновусде эз дору ведиромо Глэзиз.



— Эгъуьбеттуь э хэйр, хош оморн, — гуфдире ГЭзиз куьнд бисдо дес ГЭсоиле гуьрд.

Рэхьмон э пой вэхуьшде, себэхь эхэйрбу гуфдире, жиге до гъуногъэ эри нуьшде.

— Нуьш, нуьш, ме эдеме рафде, эри е дэгъдэгъэи ди-роморем, — гуфди ГЭсоил.

— Бегем диромореш эз туьни, вадарафдеш — хэн-де-хэнде гуфди ГЭзиз. — Ихдиёр туь гъони э дес иму, эн сэхьибхунегъо дери. Иму туьре хьэрзо ние сохденим. Нуьш!

— Нуьш, нуьш, гЭзилгъой туь муно, — теклиф сохд Божиш, — нуьш е пейле чой ху э Рэхьмонигьоревоз.

— Белки э ме эй чой хурде рэхь невобу, — гуфди э хэндеревоз ГЭсоил, э дорун гьейву гиросде, сер стул нуьшде.

— Лелей ГЭсоиле ишму тозе шороб дит, — гуфди Рэхьмон.

— Э у кор ме рази нисдуьм, — жугьоб до ГЭсоил, — гьечу буге хэгьерме Божи, эрме е пейле тухэ чой биёр...

— Шороб эйчуь нэгI, лелей ГЭсоил? — пуьрси Рэхьмон. ГЭсоил десе веноре э сер шуьгъэм, гЭйбе-гЭйб жугьоб до:

— Эз шуьгъэм гъони екем зэгIиф бирем, хэлефме, ичку хурде сэгIэт дорд доре...

Песде е кем э хуьшде домунде э дуьлю чуь кориге оморе, э лой ГЭзиз чарусде, гуфдирени:

— Пир бисдорим, куьгъне хьовир. — Песде э лой Рэхьмон чарусде мугу: — Бебешму дануьсдени э жогъили чуьтаи хурденбиримге шоробе... э балам, гьич пиёниш ние биренбирим.

— Э эгъуьлмендиревоз хурденбирим эхи, — гуфди ГЭзиз.

— И чуь гофи, — гъэриш бисдо э ихдилот Божи, чой норе э пушой мердгъо. — Худо мебуро, туьре хуно э эгъуьлмендиревоз ичку хурдегор мубу? Эхьисобевоз фурмуш сохдей, Рэхьмон э гъужогъме верики лул пиён бире нимешев оморе э парталгьоревоз э хэлов офдоренбиригъо...

— Куьгъне ярагъой Божи хэгьер мере очмиш сохди, бироргили? — гуфди ГЭсоил эз ГЭзиз.

— Угьо возигьой жогьили бу, — жугьоб до ГӀээиз. — Куьгьне гьэгьргьо эз дуьл хуненгьойму ние вада-рафде...

— Хубе коргьо зу фурмуш бире, зобуне коргьо фурмуш ние бире, — гуфди ГӀэсоил.

— Веги чой туьре, — теклиф сохд ГӀээиз. — Хиник мубу мурав. Песде гоф мисохим. Веги ху. Чутьтам гуфдиренигьоре хуно: хэберден хингьэл ехши...

Э чой хурдеки Рэхьмон эз зир чум дениширени э сифет ГӀэсоил, сечмиш сохдени, чутьтам дору дарафдетге куне чумгьою, буруне ведироморетге осгьугьой гьутинегьою, зердов зериге ранг сифетию. «Э хьисобевоз э и гоф чи расири, — фикир сохд Рэхьмон, — пушотенегьоре хун зарифетиш ние сохде, э дуьл эн и гоф дери диромори себэхь-себэхь... Белки шиновусдебу шовуне ихдилотгьо э собранией актив биригьоре...» Оммо ГӀэсоиле гьич хэбериш небу не эз дигьне гофгьой Бебе э собранией актив, не эз ихдилот, биригьо э гӀэрей инструктор райком Якубов нен Рэхьмон эз товуней лекция не дорей э ГӀэсоил. Ранг-руй эню дегиш бугьо эз кефсуьзи бу. И песини вэхд шуьгьэм эн у хэреб бире, эз дорд доре омбар зэхьмет кеширенбу, чиш бегьем хурде ние дануьсденбу, гьетте чи хурде, дорд мидо. ГӀэсоил эденбу эри хуьшде дуьл муьхшули гешде. Ченгьэде э гӀэрей хэлгь мигешд, ихдилот мисохд, хуб биренбу эрию, дорд дорей шуьгьэм эз ёрию рафденбу. И ченд рузгьо у э колхоз Рэхьмонигьо не оморебу, не лекцияш не хундебу. Гьони уре воисденбу гоф соху э Рэхьмоневоз, хьозур соху е лекция хуну э клуб колхоз.

— Ме шориш мибисдорум, лелей ГӀэсоил, туь е лекция мухундиге и орине эри колхозникгьой иму, — гуфди Рэхьмон...—Оммо мере гӀэйбиш сохдиге, минкин нисди мере эри лекция доре э туь...

ГӀэсоил мэхьтел мунд.

— Чутьтам? Гоф-чи гуфдирегор бири? — пуьрси у.

— Эри,—жугьоб до Рэхьмон. — Эз десме чугьулигьо сохдет ки ме э туь, э эз партия ведекуьрде оморигьо куьгьне раби лекциягьо дорем гуфдире эри хунде... Дие ние доренуьм, гьэгьриш бисдориге эз ме...

Рэхьмон гьирмизи бисдо, сере гьуз гуьрд. ГӀэсоилиш сере гьуз гуьрд. Эз лэгӀэю гоф не ведиромо. Энжэгь э дуьл хуьшде мугу: «Мен сениичун муьрдеки, сен менуьн пойпичеки. Ме эри эн и власть эдем жунмере доре, э ме

ихьдибориш не мунди... Вой эй мунде рузгьойме...» Эз Г'эзиз не Рэхьмон г'эйб нибисдоге, гьони эз чумгьой Г'эсоил шэх-шэх г'эрс миомо мирихд.

— Туь мегу, лелей Г'эсоил, ме э туь ихьдибор ние сохденуьм гуфдире, — мугу Рэхьмон. — Ме дануьсденуьм дуьл туь эри партияйму, эри власть сухденигьоре. Туь эдей дире, лелей Г'эсоил, э ме кор невери...

— Дануьсденуьм, хэлефме, дануьсденуьм...

Гене сере гьуз гьурде, думит сохде, Рэхьмон чарусде, мугу:

— Лелей Г'эсоил, ме э туь мэхьтелуьм, туь эрзо эйчуь ние нуьвуьсде туьре э партия восстановить сохут? Ме дануьсденуьм туь егиле нуьвуьсдебири гье умогьойгьо... Гене нуьвуьс. Ме имид сохденуьм, ки гьони туьре восстановить мисохут гуфдире.

Эз дуьл Г'эсоил е келе ох верома, думит сохде, у мугу:

— Муьнуьвуьсуьм, хэлефме. Де имогьой ёгьин муьнуьвуьсуьм. Дуз э сер Никита Сергеевич Хрущев муьнуьвуьсуьм. Гьемере муьнуьвуьсуьм, гьеме э сер ме омор гьозие — гьэдергьоре. У э гьэвл мирасуь, фегьм не сохде нигьлуь эрзоре...

Божи эз ён кинле вэхуьшде, омо пейлей Г'эсоиле вегьурд эри гене чой декуьрде.

— Медеки дие, э шори хурде биёво чигьошму, — гуфди Г'эсоил э пой вэхуьшде.

— Шорй ники винош эз г'эйлгьой туь, невегьой туь, худо метлебгьой туьре воровуно, — жугьоб до Божи.

Г'эсоил согъ боши гуфди, Г'эзиз вадарафд эри рэхь сохде юре. Э кучегьой Дербенд э и руз поиз одоми кем бу. Гьовой руз булутгьо, асмуш снетов зеребу мунде. Мугуиге гьейсэг'эт миёв ворущ тигьй мубу.

— Дара э хуне, — гуфди Г'эсоил, — гьовой ворущи, меш эдем э хуне рафде.

Расдекиш Г'эсоил екем рэхь рафдки, э кучей Буйнакский э ю дебиренбугьо жиге расики, эз гьово ворущ тигьй бисдо.

Эз гьово ворущ оморенбугеш, Г'эсоил тэг'иди ние сохденбу эри э хуне рафде. У э думит добу. Эдебу фикир сохде, чуьжире нуьвуьсуьге эрзой хуьшдере э Центральный Комитет партия. Келе мерд эёр овурд гиросде рузгьой хуьшдере, четнигьо, диригьоре э г'уьмуьр хуьшде.

...Э ёр Гэсоил омо бешу-косибе богдор Дербенд. Уре чор кук бу. Гьеме дуь эз еки чуькле. Гьемере дошде, келе сохде, э пой эй поюнде четин бу. Се кукэ э леумурчин норе, екире семе хундегор сохде воисденбу уре Гьич эз ёр Гэсоил ние рафденбу бешу гуфдире гофго: «Ме эз Гэлиревоз зэхьмет кеширем, кор сохдем, гьем косиб бирем, гьем нехундегор. Гьечи воисдени мере е кукэ семе хундегор сохум».

Хундегор. Э чуьжо миёсд хунде э девр падшогыети кук косиб? Школагьо умогьой э Догъисту тек-тук буьруьт. Э угьош кукгьой Гоширгьо мидануьсдуьт хунде. Куьфгьой ки эз пул зинг-зинг сохдениге. Эри косиб нубохундегьой рабигьо бешгъэй жиге небу. Чорей Хьийе не бире, берд Гэсоиле, нуьшунд эри хунде э ки раби ЕгГэнгил. Э хундеи Гэсоил зирек бу. Хубе сесиш вебу юре. Гьечи э жогьили хунде варасде, Гэсоил десдур вегуьрд, бисдо раби эн нумаз.

Э ёр Гэсоил омо, чуьтам ю гьеле раби гьисдики, э девр падшогыети хундебуге книггьой марксистире. Умогьой э Дербенд пэхьники революционный кружок большевикгьо бу. Э у кружок дебуьруьт эз Петербург пиш сохде оморе большевик-революционер Маркус, Керим Мамедбеков, Люба Эрлих, Арон Эрлих ве е ченд жогьиле хундегоргьойгеш. Э Керимевоз шинох бире, Гэсоил хосдебу эз пэхьники, вегуьрдебу, хундебу марксистски книггьоре. Гьеле умогьой Гэсоил эденбу варасире, ки дин-доглот, рабиети хубе кор нисди гуфдире, хэлгъэ фурмундени гуфдире. Гьеле те революция бире Гэсоил хьозур бу эри шенде нумазе, большевик бире. Омо жогьил бу, гьеле э серию сегьм бебе вобу. Э дуьлю добугьо метлебе у ихдилот сохдебу энжэгъ эри е куьнде дусд хуьше Гэзиз Рэхьмон — фэхьлей боггьой Менешир Огьо. Гэзиз фэхьле бугеш, дин-доглоте гьурлугъ сохденигьо одоми бу, ние гьишденбу Гэсоиле шенде нумазе, гъэгьри сохде бебе-дедере.

Чуьш бисдоге Гэсоил метлеб хуьшдере сохдени бу. У метлеб хуьшдере сохдеш сохд.

Э февраль 1917 сал э Дербенд хэбер омоки падшогы эз тэхд фушенде омори гуфдире, э дуьл Гэсоил шори офдо. Себэхьими э хьэет реальное училище митинг бибеки, Гэсоил руьшгьой хуьшдере чире, рафд э митинг. Кура бирегоргьо мэхьтел мундуьт Гэсоил э трибуне во-роморе, гоф сохдки. У килэхъэ э дес вегуьрде, десгьоре

гъово гуърде, эз жэгмет мугу: дин-доглот гъеме дургуни, ме раби бире, ишмуреш, хушдереш фирмундем. Шенит диндоглоте. Бурайт э рэхь большевикгъо, э Ленин бирмунденигъо рэхь. Э посой буржуйгъо нен рабигъо мерайт!

Гъемей эни ихдилотгъо омо гъони э ёр Гэсоил. Гене э ёр эн у омо, чуьтам гюширгъо власти вегуърде э Дербенд, гъэсд сохдебуьруьтге юре эй дешенде э гъэземет, чуьтам Гэзиз хъэрмэхью не Керим кумеки сохдуьтге э ю эри вирихде э Царицын, чуьтам гиросдебуге граждански довгю, ве Гэсоил не Гэзиз партизан бире, туфенг э дес вегуърдебуьруьтге, власть советире гъэлхэнд дошдебуьруьтге.

Э 1920 сал коммунист бире, Гэсоил омо э Дербенд. Э ёр эн у омо, чуьтам начальник продотряд гъисдики эз хунегъой гюширгъо, кулакгъо гендуьм бердебуге эй косибе хэлгъ, чуьтам кулак Шомоил гъэрчогъи юре терс доревуге, э посой эй куьше гъучигъоре фуьрсоревуге. Песде Гэсоил бисдо корсох профсоюзгъо, корсох райком партия, песде э Дербенд колхозгъо гуьрд сохд, эхириш редактср газет бисдо.

Э ёр Гэсоил омо у гуруне 1937 сал. Бебе Шомоилс гуфдиренигъо глэл э райком эрзо нуьвуьсдебу, ки Гэсоил «буржуазный националисти» гуфдире, куьгъне рабини гуфдире, партияре фурмунди, гъирмизине билег вегуьрди гуфдире. Секретарь райком Фомичев э гуш не гуьрд у эрзоре, инжимиш не сохд Гэсоиле. Чуьнки у хуб шинохденбу Гэсоиле, дануьсденбу, ки Гэсоил партияре не фирмунди, дуьруьсде одомини, рабиетире шенде, партизан бири, эй советская власть хун хушдере тигъи сохди.

Бэгъдовой е ченд мегъиге Фомичев нэчогъ бире, э отпуск рафд. Гъе э и туьтем э газет, Гэсоил кор сохденбугъо, е келе гъэлетиш ведиромо. Дуьимуьн секретарь райком, холуй эн Бебе Шамаилов, дуразе Тенхуьм, комики э кумеки Гэсоилевоз э пой веромореву, огол зе Гэсоиле э бюро райком. Инжо Гэсоиле эз партия ведекуьрде, партбилете восдоруьт.

Гъемей эн и коргъо э ёр Гэсоил омо. Э ёр эн у омо, чуьтам хъэркет сохдебуге эри восстановить бире э партия, имид доревуьруьтгъо юре, дениш гуфдиревуьруьтгъо. Гъе гъечи денишире-денишире мундебу рафде. Имогъой э хуней Гэзизигъо омор и гофгъоре шиновусде, у

ёгъин эрзо фирсорени бисдо э Масков. «Ме э партия эз дуъли — жуни, — дарафдем, — думит сохд ГӀэсоил, евош-евош э хуне рафде, — мере экиш кешире не овурдебу. Ме бовор сохденум э коммунизм. М' те муърде мирам рэхь коммунизмаре. Екиреш ихдиёр нисди, мере эз и рэхь эй пиш сохде».

Эз е ченд минутиге, ГӀэсоил э хуне оmore, нуьшд эри когъоз нуьвуйсде э ЦК партия.

## Дуьимуьн бэхш

### ХУМОР

Имогъой ихдилот сохум, эйчуь хьэлово биребуге Бебе э Рэхьмон.

Песини рузгъой васал 1941 муьн сал бу. Хиникигъо рафде, гермигъо оmoreбуьруьт, э бодондоргъо гуьл, э хоригъо савзе вероморебуьруьт. Рузгъо оmore-оmore дураз бире, чуьшме дир дарафденбу. Гьомбор шороби колхоз бу э зевер шегьер, э рачеберачей богъгъой Кичиргин гуфдиренигъо жиге. Гьовой шохьонгум бу. Бебе э гьомбор тэхьно добу. Е кем дорихмиш бире, ведиромо, нуьшд э сер тукунеи, спичке зере, папрус кеши, дурере зеверо вешенд. Э чум Бебе вохурд чуьтам асму э зеверсер богъгъо гӀэтоше хуно гьирмизи биребуге, чуьнки чуьшме э посой богъгъо офдоре эз унжо эденбу элов хуьшдере шенде э гьово. Гьирмизии оmore-оmore э зерди чарусденбу, е кем зулоте ежирейге ранггъо эденбуьруьт вежегъисде э гьово. Бебе перт бире, э гьово дениширебугъо туьтем э гушию сес «шохьонгум эхэйрбу» дерафд. Сере чарунде, Бебе дирени э пушою омори поисди холуй Тенхьум ишу—гӀожиз, сер гъуз, осгъугъой сифетию эз мунде жигеш ведирофдоре, чуькле чумлегъою диеш доруне дарафде, хиегъгъой кемерию буруне ведироморе.

— Э гъуьбеттуь э хэйр бу, холуй Тенхьум, — гуфди Бебе, песде дениши э гъуьндуьре лэгъэре балай холушу, э муш хурде килэхь бухореию, э малади буьруьтгъо е хэйли мэхьэл маз зере не оморобуьруьтгъо чекмегъою, сере жумунде, мугу:

— Тэхьэр гуфдиренуьтгъоре хуно: молуви беглер апарди, жомолуве не улди, холуй Тенхьум?

— Туь имогъой э сер — тенме денишире, гуфдире?

Ежире тэхъле-тэхъл хэндүүсд. Бебе мугу:

— Бошгу дие, ведекуърди-ведекуърде туьре эз секретари. Гьемише бегем секретарь райком бие боши?

Тенхьум нуьшд, ведешенд эз куьф кисей томокуре, гъейлере пур сохде, спичке зе.

— Мере эз секретари ни ведекуърдуьт, е кем хундеи мибисдоге мере. Хьэйф, эвэхдию не хундум.

— Хунде дие, холуй Тенхьум. Туь мере эгъуьл дорен-бирики хун гуфдире. Дие туь зйчуь не хундей? Гъеле коммунист бире жиге...

Дурей гъейлере зверо вешенде, Тенхьум мугу:

— Мере имид бу бегем секретарь райком мибошум гуфдире? Сениг'эт ме бу бил зере...

— Сиб г'эрму фурухдеш, — хэндүүсд Бебе.

Холу г'оси бисдо.

— Э иллере дениш о, имогъой э хуькуьм меревоз одоми бирей туьш мере серкуш зарел! Ченгъэде вэхд сиб — г'эрму фурухдем? Бебе келебейме фэхъле бири, меш гьемише фэхъле бирем..

— Де имогъой чуьни? — мугу хэгьерзоре. — Генеш бура фехълеи туьре сох э колхоз дие. Биле эз дес туь ведешендегор нисдики.

— Эгъ, — десе кешире, гуфди Тенхьум, — имогъой эз кул г'эсб э кул хэр офдорере хуно бире. Хэлг э ме руьхшенд мисоху. Мугую: варафд, варафд зверо, секретарь райком бисдо, имогъой офдо раси гулу-гулу э хори. Ме чуьтам бурам эй бил зере?

Бебе э мэхътелиревоз сере жумунд, мугу:

— Э холуй Тенхьум, туь г'эйбе эз ки жусдей? Минкин биребире не хундегориш туьни, кор секретарире э райком эз сер не бердегориш туьни, песг хэлгъ чуь тэхсири!..

Гъе и гоф э лэг'лэ дери, ебойге Бебе дирени е тикме, сову э кул вери, омо э пушошу поисд. Сер Бебе мугуиге лилов хурд. У э чумгъой хуьше суьфде бовор не сохд. «Хумор, — гуфди у э дуьл хуьше. — гъисмет бэхдевер». Хумор е чуькле когъозе доре э Бебе, мугу:

— Ме зй шороб оморем, эз бэхш трудоденгъойму.

— Бошгу, гегей, кеш э гьомбор!

— Ме иг'эре мипоюм, — гуфди Хумор, — ги совуре деки, ведировун.

— Песде туь э ме бовор сохдени, гегей? — пуьрси Бебе, — Белки ме фурмундум, кем декуърдуьм?

— Хьэлол туь вегуьрдиге, чуй гуьм?

Эз дуьл Бебе шори гирошд. «И чуй хуб гоф сохдени. Глэсел эдей рихде эз ловгьюю». Эз зир чум денишире э гьирмизие ловгьюй Хумор, э гуьле гуьле булиши эз зир гьирмизине жакет дуьлу бугьо, э саре добоне зерде тифлигьюю, совуре восдо дарафд э гьомбор. Тенхьум ченгъэде дениши э Хумор, шинохде не дануьсд юре, гьингъэде думит дебу э дуьлию. Песде руй бире, мугу:

— Духдер кини туь, хэгьерме?

— Бебейму муьрди, — жугьоб до Хумор.

Э нум бебешуре гуьрдеки эз чумию похли-похли глэрс омо.

— Эле, гьечу гу дие, — гуфди Тенхьум, — бебешму дусдме буки. Мегирис, хэгьерме.

Хумор э улойге чарусд, Тенхьум не винуь гуфдире глэрсгьюй чум юре. Тенхьум гене кисере ведешенд эз куьф, гьэйлере пур сохд, спичка зе.

Гьовой руз эденбу оmore-оmore тор бире. Эз лой боггью эденбуьруьт десде-десде колхозигью эз кор оmore. Хумор гуш воно э ихдилот эз звер фураморенбуьруьтгью колхозигью, шинохд сес Рэхьмоне.

— У гофгью нэгьюули, — эденбу гуфдире Рэхьмон.— Ишмуре воисдениге жофой корсохгью сук бу, бегьер онгур зиьд бу, гьимет онгур ужуз нуьшуь э колхоз, биьйт и куьгьне боггьюоре тозе сохим, тегьенггьюоре рядовой корим, э боггью трактор дешеним, э кумекиму машингьюре биьрим.

— У гьеле э и зури биренигью кор нисди, — эденбу гуфдире ки буге.

— Гьеме э иму кор вери, — жугьоб до Рэхьмон.

Угьо оmore куьнд бисдоки, Рэхьмон шинохд Хуморе.

— Эле, Хумор, туь инжо чуй сохде?

— Дедей эй шороб фирсори. Пой, гьейсэглэст мурайм.

Хьэрмэхгьюй Рэхьмон рафдуьт, ю посид. Бебе совуй шоробе ведировунде, дирени Рэхьмон не Хумор глэсел руьгъэре хуно эдете гоф сохде. У гьечи бисдо э и туьтем, кем мундебу совуй шороб эз десию офдоре хуьрд бирени. «И шэхьиту эз же омо инжо ведиромо?» — гуфди э дуьл хуьшде Бебе.

— Ги, гегей, дуз паздегь литири.

Песде э Рэхьмон денишире, мугу:

— Дуз э хуне бер деки духдер гьуншире.



— Туь не гуфдирекиш мидекуьнуьм, — жугьоб до Рэхьмон, совуре восдоре эз дес Хумор.

— Эле, гІэйби, ме миберум о, — гуфди Хумор.

— ГІэйб эйтуь нисдики. Биё!

Угьо гьеле дегь поиш не вечиребуьруьт, Бебе шэгь-гъэ зере хэндуьсдгьо.

— Гьич э эзини зенчее жогьил ижире духдер миёв? Духдер эдей гуфдире гІэйби, мевеги совуре, ю эдее совуре э кул воноре. Э зугьун уруси ижирегьоре «баба» гуфдире. Гьич э «баба» духдер миёв, жон холу?

— Ме эдем дире, хэгьерзоре, чум туь э и духдер домунди, — гуфди Тенхьум.

Бебе хэндуьсд, мугу:

— Вэхи дарайм э гьомбор, е пейле шороб ху, песде бурайм э хуне.

— Песде Либо чуйтам? — пуьрси Тенхьум, э гьомбор дироморе, э пушой товуш лампе е пейле шороб хурде бэгьдо.

— Либо э жере-жегьендем, — жугьоб до Бебе. — Ме бегем Либоре хосденуьм!

— Эле, одомигьой бебешму, сэхьибгьой либо хьозуригьошуре эдет дире ки. Дедешму гуфди эме. Шолуме эз шори жиге нисди туь доморику эдей бире гуфдире.

Бебере жин гуьрд.

— Шолумлемиш сохо Шолум, зерде руьшгьо, ковре чумгьо. Мере герек нисди. Туь шиновусдей меселей азербайжанире: туьки сары, гуьзи гуьг, диши сейрек. Эз и одоми зобуте одоми э гІуьлом нисди. Шолуме хуно духдериш рыжини. Нивою мере, нивою! Дануьсди!

Декуьрд шороб эй хуьшдеш, эй холушуш, мугуиге шоробгьой колхоз эн бебешуни.

Энжэгь нимешев, лул пиён, пой эз пой офдоре, омо Бебе э хуне.

Сенем, дедей эн Бебейгьо, э хьэловиш добуге, чумию э хов невобу. Сес пое-пой куке шиновусде, у вэхуьшд, дере вокурд, лампаре товуш сохд.

Песде виники пиёни кук хуьшдере, э дуь пенжере-воз сифте гьэрмэгь кеши, энгуьшде гІэнж гуьрд. «Ме гьечи мундеинжон, бебешмуре хуно э хэнжел Хьэимше меевоз миёсдуьм венжире оморе». Дие Бебе женг не гуьруь гуфдире, Сенем зур-зур хьэловгьоре дуз сохде, мугу:

— Бие, дегерд!

— Бошгу, бошгу! — гуфди Бебе, э парталгьоревоз рафд э хэлов дегешд.

— Вой эй дедей туь, — мугу евошлей Сенем, — ме э туьревоз себэхь гоф мисохум.

Дие бегем хисире дануьсд Сенем! Пенж минутиш не кеши, Бебе сер гуьрд эри пих зере, песде э гъэд хов эри гоф сохде. «Биё, гегей, биё, ди совуй туьре, шороб декуьнуьм», — эдебу гуфдире Бебе. Сенем вэхуьшд, э сер хэлов нуьшд, десе э гуш воно. Дие сес не омо эз Бебе. «Э киревоз гоф сохдебу ярам и?» — пуьрси эз хуьшде Сенем. Те пушойсебэхь чум Сенем э хов не рафд. Хэйли вэхд хурузгьо эденбу г'уь-г'уь зере, у хисигьо.

Сенеме хэбер сохд сес зен гьомхуне э хунешу дебугьо.

— Э Сенем, куьмуьр омор и э хъэет восдорониге, — гуфди у.

— Нивою, герек нисд! — хъэрой сохд Сенем эз хэлов вэхуьшде.

Э сес дедешу хэбер бисдо Бебеш. Серию эденбу сэхд дорд доре.

— Дедей, мере эйчуь хэбер не сохдей, кидан э склад одомигьо оморет лениширетге?

— Дедей миро туьре, ме теи сэбэхь не хисирем ки. Текей мубу гьечи эй? Хурдени, серхуш бирени, те нимешев чумгьой дедей туь кур бире. Вес нисди беге!

— Гене сер гуьрди, весси! — мугу Бебе, гъэд-гъуд бире парталгьой хуьшдере э дуз сохдеки. — Эжи, е пейле чой гьисдиге биёр!

— Пой, гьейсэг'эт эз гьомхуне мидировунум.

Сенем е чойден чой дировунде эз гьомхуне, э миробой бэглириевоз норе э пушой кук, дениши чуьтам Бебе чой хурдениге. Песде терсе-терс руй бире, эз Бебе мугу:

• — Гъэдой туь э синей дедей, гъэгри мебош, хэ-лефме, е гоф пуьрсуьм эз туь. Э киревоз гоф сохденбири туь э хов, гегей-гегей, гуфдире, совуй шороб пур сохде!

Э ёр Бебе омо дигьне шороб бердей Хумор, эз корвогошден Рэхьмон, холуй Тенхьум...

— Ме кесе хов чи недирем...

— Дедей миро туьре, Шолум миросгьой бебешму е алагуьзлуье духдер хуьшдере э туь бенд сохди гьишде. Те кей денуьшуь духдер хэлгь?

Э ёр Бебе омо зердгьирмизие муйгьой сер Либо, зер-

де пиггогьюю, чил-чиле сифетию, гьолинде занигьюю, Бебе ловгьоре шефд сохд, гьошгьоре дуллу.

— Ме гьеле той зен хосде нисдуым, — мугу Бебе эз Сенем.

Оммо у эй зен хосде хьозур бу. Энжэгь уре воисденбу Хумор. У гьони чуыш мисохд, ченгьэдеш гири хэржи мисохд е одоми э пушо офдоре, э ки сэхьибгьой Хумор рафде, метлеб юре дуетмиш мисохдге.

Гьечи, Хумор э дуыл дери, вадарафд Бебе э и себэхь васали эз хуне. Гьич Хумор эз ёр эн у ние вадарафденбу ченд рузгьо, ченд оринегьо. Е гиле суьфден рузгьой гьеминон, э дерьёгь эй тен шушде рафдеки э Бенил вохурде, Бебе гуфдиребу:

— Мере э туьревоз е гофи, кеш э ресторан, туьре гьуногь сохум, умэхьэли ихдилот сохум.

— Согь боши, мере гьуногьлугьги туь нивою, — жугьоб до Бенил. — Е дов гьуногьлугьги туь э серме коровурди. У гьуногьлугьги туь ни бисдоге, белки эз редакцияш ведекуьрде ниоморум.

— Э-э, весси, туь мунош, — мугу Бебе, — куьгьне коргьоре очмиш месох.

Песде Бебе ихдилот сохд, чуь метлеб дериге э дуьлию, Бенил шэгьгьэ зере, хэндуйсде, мугу:

— Туь ебо бура э гузги дениш, кечеле сер туьре виши. Бегем у шэгьме хуно товуш доренигьо духдер той туьни? Бегем туь ние дануьсде, чуь жире жогьиле, хубе гьэил э уревоз дусд гьисдиге?

— Э-э, — мугу Бебе. — У расдекиш гьэили гьеле. Рэхьмон бегем гьеле зен хосде? У мугу эй хунде эдей рафде, э агрономи.

Бенил вэхуьшд, нуьшд э сер гьумгьо, туьртуьр сохд эз десгьой хуьшде гьуме, дениши э лой ковре лос бире мундебугьо дерьёгь, мугу:

— Тен шушдениге, вэхи, дарайм. Ихдилотигере бигьил. Эз ме туьре илчин нибу.

Эз Бебе гоф не ведиромо. У вини, чуьтам гьуьндуьре балай Бенил жэгьгьэ хуно э гьэд глов дарафде, симов зерезере дур бисдоге эз пушой чумию.

— Бошгу, виним гьери, — гуфди Бебе. — Е леле басар шелени, е шеле басар лелени.

## СУЬФДЕИ РУЗ ДОВГЮ

Гьеминониш гене омо, чуьшме сер гуьрд эри сухунде, хуьшг сохде савзегьой сэхьроре, бичинчгьой э бичин дарафдуьт. Э онгурбогьгьой Дербенд колхозигьой эри капарус шенде дарафдуьт.

Руз екишобот, бисддуймуьн июнь ГӀэзиз гьемишеинере хуно зу вэхуьшдебу. Э торики-товуши э дерьегь рафде, тен шушдеш вогошдебу, гьеле суьфделе э сер дерьегь чуьшме ведироморобу.

— Э зен, эй Божи, — хьэрой вегуьрд ГӀэзиз, — Рэхьмоне хэбер не сохи! Ние дире туь, руз воромори!

Божи э гьейвуй хуне нуьшде, эденбу дуразе журубгьоре кешире э пойгьой хуьшде. У еново дениши э гьуьндуре балай шуьвер, э и туьтем келе руьшгьой хуьшдере тимор сохденбугьой, мугу:

— И чуь хьэрои, эгьуьбеттуь эхэйр? Эз туь бегьэй екиш гьечи зу э кор ние рафде...

ГӀэзиз э мэхьтелиревоз денишире, мугу:

— Эй духдер гьэбиле, туь чуь нэгьуьл хунде? Ме э богь ки рафденуьм э кор? Э богь Менешир Огьо нен Хьэнукой Овшолум ние рафденуьм. Э богьгьой колхоз иму эдем рафде!

— Бошгу, бошгу, бура туь, ме гьони хэбер мисохум Рэхьмоне.

Рэхьмон ведиромогьой эз хуне, дедешу э е газет пучунде дуь нунеш, тикегьой пени не хоегьореш, веноробу э сер стол.

— Пой гьейсэгӀэт, хэлефме, е десде кишниш пиэзиш чуьнуьм эз богьче.

— Ме муьчуьнуьм, — гуфди Рэхьмон фураморе э хьэет.

Хьэет Рэхьмонигьой гьечу хуб гьурлугь сохде оморенбу, богьэ хуно биробу. Э ело тут дор, э ело емиш доргьой, э ело онгур, э е лойге онордоргьой. Оммо э гӀэрегьой доргьой савзе пиэз, дуруп помодур кошде оморобу. Гье э хьэет Рэхьмонигьой вогосиробу хьэет Хуморигьойш. Э гӀэрей эн угьой боруш недебу. Энжэгь ерх гӀови жуоро сохденбу эз еки хьэетгьой эн угьоре.

Рэхьмон э сер савзе-пиэзгьой гьуз бире, дуразе снегье муйгьой сер хуьшдере э десевоз зверо вешенде, эденбу пиэз чире, эз песой дор сес Хумор омогьой.

— Дирей, чуьтам келе бириге туь кошдейгьой тегьенг?

Рэхьмон сере тик гуърде, вини чуйтам сипре пенжегьой Хумор гуърдетге шив зере вороморигьо тегьенге.

— Хушегьой онгуриш гуърди эй, — гуфди Хумор. — И суьфден хушегьоре туь биё хури, чуйнки и тегьенге туь кошдей.

Э ёр Рэхьмон омо у руз, эз и се сал пушо Хумор гуфдиребугьо юре э хьзет онгур кошде воисде гуфдире ве песде ю кумеки сохдебугьо эри кошде тегьенгьоре.

— Бошгу,—хэнде-хэнде гуфди Рэхьмон.—Бигьил расуьт онгургьо. Эз дестуь мухурум.

Э хэндуйсдеки чумгьой Рэхьмон екем хьир биренбу, э ю денишире Хуморе хьэзиш оморенбу.

— Туьре имбуруз кор нисди э хьисоб? — пуьрси Рэхьмон эз Хумор. — Оло сохдере варасдейт. Нуьш е кем э хуне. Имуш эи зуригьо марасим капарус шендере.

— Шохьонгум зу биё, — евошлей гуфди Хумор ве хэнде-хэнде видовусд рафд э лой хунешу.

Рэхьмон десе гьово гуърде, жумунд.

— Зу миём. Е книг веги бигьил эз библиотека эй хунде. Островскире биёр, «Как закалялась сталь». Согь боши, те шохьонгум!

Эз бисд минутиге, Рэхьмон суке шеи сетин э тен вери ,гердеверие чекмегьой брезенти э пой вери, э е дес шопкере, э е десиге э бухче бесде, дедешу доригьо нунгьо чигьоре, эз келе рэхь богьгьо эденбу зури-зури рафде э кор.

Э Дербенд ки бириге, дануьсдени чуйжиренге рэхь богьгьо. Эз ён есиёв гуърде, дуз тейте совхоз Карл Маркса гиросде, диеш зулоте те куьндигьой Хошмемзуьл гIэре не доре гьони машингьо рафденуьт, жуьр-бе жуьрегьо: автобусгьо, грузовойгьо, легковойгьо, колхозигьош э кор э машиновоз рафденуьт. Оммо умогьойгьо гьеле э Дербенд гьейсэгIэтинере хуно омбар машин небу. Омбаре колхозигьо э пееде мирафдуьт рэхь богьгьоре. Себэхьгьой мунде не шохьонгумгьо рэхь богьгьо гьечу одоми пур биренбуьруьт, чуйтам э руз мигIид екиймуьн май кучегьой шегьер хэлгь пур бирениге. Пире, руьш верие мердгьо э келе килэхьгьоревоз не жогьиле хэндеруе гIов-гIэил, гIэруьс-духдер, ранги-рангие парталгьо вокурде, дуь э эеки мехсере сохде. Гьемин ужире бу и руз себэхь бисдуьмуьн июниш. Э ён есиёв оморе расики, э Рэхьмон вохурдуьт Ахмед кук председатель колхоз Оди-

гюзел, гудеге жогъиле колхози Рамазан, бие зен гъуругъи Анаханум э е дезде духдергъой азербайджаниревоз, келе мерд Эсеф гъэлейхэнжели э гӀэрей е дезде духдергъой тати.

Рамазан гъемишеиней хуьшдере хуно эдебу мӀгӀни хунде. Уре раче сес вобу, ве у «сегогъ» хунденге жун одоми лерзиренбу. РӀхьмон эденбу томоше сохде, чуйтам эз Рамазан пушо дебуьруьтгъо жем-жогъил ве гӀэруьс духдер сес мӀгӀнире шиновусде евош рӀхь рафденбуьруьтге, хуб э гуш ишу дарав гуфдире сес Рамазан. Те богъ колхоз рӀхь кем мундебу. РӀхьмон эз дури вини, чуйтам бешу ГӀэзиз э звер гьендэгъ поисде, томоше сохдениге э кор оморенуьтгъо членгъой бригадай хуьшдере.

— Баракеллогъ ишмуре, — э руьхшендиревогъу гуфди ГӀэзиз, жогъилгъо куьнд биренге эз ю, — ишму сес мӀгӀни Рамазане шиновусде, кореш фурмуш мисохит..

— Эйчуь, лелей ГӀэзиз, бегем иму дир омореим? — пуьрси Ахмед.

— Мере сӀгӀэт нисди, — жугъоб до ГӀэзиз. — СӀгӀэтме чуйшмен.

У гъово гуьрд сер хуьшдере, бирмунд чуйшме хӀйли звер вороморевугъоре.

— Кешит, вегирит машингъоре, капарус декинит, — гуфди ГӀэзиз. — Ме пезде ихдилот мисохум эришму, чуйтам иму э девр Никалай э богъгъой Менешир Огъо кор сохденбиримгъо мӀхьӀл торики-товуши, шуш нефес гуьрде э кор оморенбиримге.

— У девр Никалай бу, лелей ГӀэзиз, — чумгъоре хӀндунде мугу Ахмед, — гъони девр эн имуни, девр колхози...

ГӀэзиз дуразе руьш хуьшдере сӀхд гуьрде, гӀоси бире мугу:

— Эй бирорзере, мере гъӀгър меди, бегем э богъгъой колхоз онгур эз хуьше вороморе. Гъери э вӀхдию капарус меше, э вӀхдию бил мезе, э вӀхдию гӀов меди. Винуьм умӀхьӀли, дуьмбура, эз же мухуриге туь нун не онгур!

РӀхьмон вини чуйтам бешу хуьршлуь биреге, мугу:

— Э бе, гӀӀилгъо э туь дениширет, Ахмед эдей мӀхьӀсере сохде.

— Туьш лӀгӀӀӀи туьре ги, гъурумсогъ! — мугу ГӀэзиз эз РӀхьмон. — У э туьревогъу мӀхьӀсере сохугу. Ме гӀӀилле

нисдуым. Ме ишмуре хуте мисохум, чуйтам зу э кор бийтге.

Жогьилгьо винируйт, ки келе мерд глоси бири, гоф не сождут. Гьер мерд машине вегуурде, капарус пур сохде, эз душгьо гировунде, э кемер веноре, сер гуурдуйт эри капарус шенде э сер тегьенггьой онгури.

Руз оморе-оморе эденбу лап герм бире. Пушой пишнеи бире Рэхьмон сэхд эрэгь сохдебу, шопкере эз сер вегуурде, сер бирэхьне эденбу кор сохде. Песде эз лой дерьёгь е раче шогьвор омо, Рэхьмон сере тик гуурде мугу «Пегь, чуй рач серин бисдо». Богьгьо, Рэхмонигьо капарус шенденбуурьугьо э пошней догь бу. Зофруво миденишириге эз унжо, хуб мивинири лос биригьо ковре дерьёгье, зофруи богьгьо не келе рэхь эз Дербенд э Белижи рафденигьоре. Рахьмон е кем вэхд тик поисде, томоше сохде зофруи богьгьо ве фирегье дерьёгье, ебойге дирени эз келе рэхь чарусде э богь диromo е дуь — глэсбе небесде линейка. Э сер линейка э ён председатель колхоз Ахмедов вобу е жогьиле одоми, пура сифет, тозе кастум э тен, когьозгьо э дес дери. Э пушорэхьуй Оди-гюзелигьо видовусд Глэзиз. Линейка оморе куьнд бисдоки. Рэхьмон хуб дениши э тозе одоми э председателлевоз бугьо, шек сохд шинохэ сифети гуфдире. Песде угьо эз линейка фураморутки, тозе одоми гуфдики «Руз э хэйрбу, лелей Глэзиз, кеф туь чуйтами», Рэхьмон кем мундебу хээррой дешенде: «Эле, и Шиминики!» Глэзиз гьул Шимире гуурде, э лой Рэхьмон овурде, мугу:

— Э ёртуь мунди, э вишегьой Белижи, э вэхд бичингьо эз глов мар веди биребугьо, глэйилле э гьэд глов дарафдебугьо, Мердэхэй Овшолум мара э хэнжелевоз зеребугьо? — пуьрси Глэзиз эз Шими.- У глэйилле ини, Рэхьмон кук мени.

Шими шори сохде, куьнд бисдо, дес кеши эри дес Рэхьмоне гуурде. Рэхьмон дениши э капарусевоз пури биригьо дес хуьшде, гьул хуьшдере кеши э лой Шими.

— Иму е кем вэхд э еки э школаш хундейм ки, — гуфди Шими.

Э ёр Шими омо у е кем вэхд э школа хундебугьо, песде э Масков рафде эри хунде э Глэсоилевоз э Марасейка вохурдебу...

— Туь имогьой э же бире, бирорзере? — пуьрси Глэзиз эз Шими.

— Э наркомзем Догьисту,

— Агрономи туь дие?

— Эри, лелей ГІэзиз. Оморем богъгъошмуре эри дире. — Песде э лой Одигюзел денишире, мугу: — и куьгъне богъгъои дие, хьовир Ахмедов?

— Инжо гъеле куьгъне богъгъои, — жугъоб до Одигюзел. — Тозегъо, рядовой кошдеймгъо э лой зофруни.

Одигюзел, Шими, ГІэзиз дарафдуьт э гІэрей тегъенгъо, Шими гъуз бире, сер гуьрд эри дире, чуйтам бегьер гуьрдетге тегъенгъо, вини ченд хуше э гьер тегъенгъо вериге, чуйтам капарус шенде омориге.

Вэхд чи хурдей пишней биребу. Колхозигъо кура бире э серини, э зир луьгегъой келе тутдор, се одоми, чор одомини суьфре дешенде, эденбуьруьт нун хурде. ГІэруьс духдер эз мерд-муле жейле бире, гъирогъ кеширебуьруьт хушдере, нуьшде, Шими е келе чор куьнже сенгъэ доноре э зир, нуьшдебу э ён ГІэзиз нен Одигюзел. Э гоф сохдеки э Одигуьзелигъоревоз, Шими эз зир чум диренбу, чуйтам дуь жогъиле ГІэруьс э еки гуши-гуши сохде, э ю дениширенбуьруьтге.

— Шинохдени киниге, Дербендимуни эй, — эдебугуфдире еки, эз зир чум хэндуьсде.

— Гьеркиш гъисди, кидан бебей ченд гІэилиге, — жугъоб до униге.

— Эле, вой эй нохогъой бирорунме киниге, — мугу суьфдеи духдер, жэгъгли кешире э сер хэгьергили, — бегем ме э у дуьлевоз гуфдиренбуьруьм!

Игъо игІэре гоф сохде, нун хурде, Нэхьум, е дуразе чубугъ э дес дери, шуш нефес гуьрде, куьнд бисдо э ён Одигюзел, э гуши-гуши чуйниге гуфди, песде гъемееки винуьруьт эз чум Нэхьум чуйтам ГІэрс омоге. Одигюзел гъебо эз жигей хуьшде вэхуьшд, э мэхътелиривоз денишире э Нэхьум мугу:

— Туь мэхсере сохде, небуге егІэлмиш бирей!

— Эле, туь чуй гуфдире, хьовир председатель, э ужире коргъоревоз мэхсере мибу?

ГІэзизигъо э мэхътелиривоз пуьрсиренуьт:

— Чуй бири бегем?

— ДовгІо, — мугуиге гирисдере хуно гуфди Одигюзел.

Суьфде омборгъо бовор не сохдут. Угъо дануьсденбуьруьт Нэхьум мэхсеречини, кими мэхъэл одомире фурмунде. Песде дируьтки чуйтам Нэхьум могъбул поисде э ишу денишириге, гъемееки дуьлхуьрд бисдорут. Э и туь-



тем эз лой совхоз Карла Марксиш одомигъо оморут. Хэ-бер расундут, ки шову пушой себэхъ гъушунгъой фашистская Германия довго вэхузунде, шишире э хори-гъойму диромори гуфдире, самолетгъой Германия э сер шегьергъойму бомбагъо шендет гуфдире.

— Бебейме вой, — гуфди Гэзиз, — гене довго!

Одигюзел Гэребечире хъэрой зере, мугу:

— Зу бош, линейкаре хьозур сох, — песеде э лой Гэ-зизигъо денишире, мугу:—Ишму паника не сохде, кор-ишмуре сохит, ме не агроном бурайм гъери э шегьер, би-ней коре даним. Хьовиргъо, дуъл ишмуре гурунд месохит, кор ишмуре сохит.

Одигюзел не Шими э линейка венуьшде, рафдуьт э шегьер. Э и вэхд эз репродукторгъой радио, э кучегъой шегьер вобугъо эденбу зур бе зур сес оmore, чутьам фашистгъо, дуьзде хуно шиширет э хориму дироморетге, чутьам Красная Армия тембихъ дорениге гъушунгъой фашистгъоре, чутьам угъо эз ченд жигегъо серхъэд имуре гиросдетге: Эз и сесгъой радио, эз гъовой хэлгъ э кучегъой шегьер кура биребугъо, Одигюзелигъо ёгъинире дануьсдуьт.

— Ижире коргъо, хьовир Юсупов, — гуфди Одигюзель эз Шими, — довгош бисдо.

— Эри, — сере гъуз гуьрде, жугъоб до Юсупов. — Меш гъечу буге биё вогордум з Махачкала. Командир запасуьм мс. Э военкомат биё бурам.

Эз дуь сэгъэтиге Шими э вогун вобу. Ченгъэде машин зури-зуриш рафденбуге, Шими гъечу дануьсденбу ёвош-ёвош эдей рафде, гъечи дуъл энэ эденбу тэгъди сохде. Э и дэгъдэгъэ э пушой чум эн у оморут поисдут самолетгъо, эз гъовон бомб шенденуьтгъо, салдатгъо э сер танкгъо гранат шенденуьтгъо, дигъгъо, элов гуьрде сухденуьтгъо, э ёр эн у омо жогъиле зениу, духдерлею, военкомат, жуьре бе-жуьре суротгъо эденбуьруьт гиросде эз пушой чумгъой жогъиле агроном.

Шими эз пенжерей вогун дениширебу э торик биренбугъо гъово, э тек-тук веги биренбуьруьтгъо астарাগо.

Гъемин и торики шохьонгум Хумор э лерз офдоре, поисдебу э пушой гъопуй хъэет, дениширебу э вогош-дей Рэхьмонигъо.

## БУРА, РЭХЬ НИК...

Сер шев бу. Божн дедей Рэхьмонигьо э и песини рузгьо, довгю сер гуурде энлоревоз гьошдуллу биребугьо, эз пушотенней хуьшдеш лэггэр биребугьо, гьуьж диромореигьой сифотию гужлуть биребугьо, лампей электрире сухунде, э пушой пенжере е келе эдиолс кешире, нуьшдесу дес э чуне веноре э вараюнде хуней хуьшде. «Могьгьул эз у рузгьо э и рузгьо оморебирим расире», — гуфди э дуьл хуьшде Божн. Расдекиш, пушотенне рузгьой Божн нен Гэзиз эже и рузгьо э же. Э жигей пелуь-пелуье ризе-ризе порхолле келе гуьле-гуьле сумогь, гьипгьирмизи, гьэтоше хуно сухденбугьо, э жигей ленге хуурде столле, келе стол, дегуурде гьнсдигьо э зар-зарие серстоллиревоз, э жигей тэхчине—гузги дерие фирегье шифоньер партали, эжигей мегез хурде куьгьне гузи дивори, раче трельяж эн гузгин. Э сер радиой дивори приемник, тозе патефон, рач вараюнде оморе сипре краватгьо, э сер краватгьо холинчегьой тикини... Гьемей эн и чигьоре Гэзизигьо сохдебуьруьт э колхоз кор сохде бэгьдо. Кукиш оморе расире, пушой домор сохде бу, духдер уже гьэруьс биребу. Чуь хубе руз оморебу эри э жогьили руз не дирбугьо, етим келе биребугьо Божн. Чуьтам ниесде дерд кешире у, эхи довгю дердгьо овурдесу эри хэлгь, эхи е теке куклею Рэхьмониш себэхь миьсде рафде э довгю...

Гьечи дес э чуне нуьшде э хуне, э ёр эвурде гирошде рузгьоре, Божн эз хьэет е раче сес мэгьни шиновусд.

Бура, рэхь ник, шор биевош туь  
эриме.

Э туьревоз эдей рафде и дуьлме.

Эн туьни ёр, гьемей жунме,

гьуьмуьрме.

Вогорд биё. дениширем, соймиши.

Божн э пой вэхушд, гьутинере э пенжере вено мугу:  
— Вой эй ме, Хумор эдей хунде и мэгьнире эй  
Рэхьмон...

Песде э бел келегьэиревоз гьэрс чумгьоре темиз сохде, гене оморени нуьшдени э хори. Эз хьэет гене оморени сес мэгьни.

Дуьлме герми туь могорди гуфдире.  
Игид бегем эз дес дуьшме офдоре,  
Э синейтуь орденгьоре веноре,  
Мией дуьлшор эки ёртуь, соймиши.

Пэхьни мебош э песогоь, э куьнжгьо.  
Варас женге, биё гене э инжо,  
Чуме рэхуьм, дениширем, соймиши.  
Эйтуь Ватан кумек мубу э унжо.

И гофгьоре шиновусде, дуьл Божи гурунд бире. У гене гиристе, гларс темиз сохде, гуфдирени:

— Войш, дедей гьурбу эри туь хэлефме. Жунлей дедееш, ношумолеюреш мибери э хуьшдеревоз.

Э и туьтем э хуне дироморени Глэзиз, килэхьэ эз сер вегуьрде дуьллу сохдени э гьиче, жибгьой гьобой хуьшдере буш сохде, гуфдирени:

— Гене чуьни, духдер гьэбиле, гьош-гьобогь туь имогьоиш дуз не бири?

Божи шефд денишире э гьуьндуьре балай шуьвер хуьшде, гуфдирени:

— Весси, весси! Гьош-гьобогь дуьллу не бире, вэхуьшде ни вежегьуьм. Э чуь гужгьо, чуь белогьоревоз е теке куке дошдем, келе сохде. Э сой бэхдевере дедегьо мереш имогьой е шори дире, гларуьс э хуне дирувунде воисденбу. Оморе расире офдуме кукме эдей э довго рафде, глов-глэтош миёсте берде Гитлере э гьисди кес юревоз, э кук духдер бебеюревоз. Ме гьеле гьош дуьллуш не бошум!

Глэзизе воисд хоши гуьруь зене. Куьнд оморе э ки ю, мугу:

— Ой зен, чуь биё сохде биёв, дие и кор бири. Е эйму нисди. Гьемей гьуьлом э гьэд гуниле барут дери гьеймогьой.

Божи дуь десе веноре э сине, э гьово денишире, мугу:

— Худо гьечу сохо ки, Гитлер гунилее сине гердо э кук духдер бебей хуьшдеревоз!

Глэзизе хэнде гуьрд. У мугу:

— Туь лово не хосдекиш мубу. Бегем э метелегьо не шиновусдей: гьерки эй кес чол векед, ю мофдону гуфдире.

Божире воисденбу чуй буге гую, винирени Рэхьмон дирома э хуне сер бирэхьне, сипре ризе-ризе шеи э тен, е гуылиш э десию дери.

— Хумор бу, хэлефме, э туьревоз? — пуьрси Божи.

— Эри.

— Огол зере эй чуй не дировунди э хуне? — гуфди Гээзиз.

Божире гээгьр омо, шефд дениши, мугу:

— Э мерд, ме эдем дире, туь келе бире-бире, эдей эз эгъуыл сук бире. Духдер хуней хэлгъ мэхуьзуь э хуней кук мидиров!

— Эй духдер гээбиле, — хэндуйсд Гээзиз, — эгъуыл-ме сук не бири, туь пир бирей. Эз куьгьне девргьо гоф сохде туь.

— Э-э-э, — шефд денишире, мугу Божи, — э туьре-воз эй гоф сохде мере рури нисди. — Э лой Рэхьмон денишире, мугу: — гээдой туьре вегиром, е гоф гуьом этуь, гээгьри мобош.

— Гу, дедей.

— Туь имогъой, рэхь туь ник, эдее рафде. Дедей миро туьре...

Покурдени гээрсгьой чумгьой хуьшдере.

— Э зен, — гюси бире Гээзиз, — гээрс тигьи месох э рэхь гээил!

— Туь гоф месох! — хээррой вегуьрде Божи э сер шуьвер, пезде э Рэхьмон денишире, гуфдирени: — Биё туь хэлефме у духдер хэлгэ немид-немид мегьил, биё уре имишев эйтуь хосдехунд сохим бигьилим.

— Туь не гуфдирекиш Хумор миденуьшуь э у, — гуфди Гээзиз.

Божи гюси бисдо, чумгьою хун вечи мунд.

— Э мерд, бебей туь э гьовре сухо, туь э жигей хубе рэхь норе эй гээил туь, эз рэхь ведешенде юре?

Дер вокурде оmore, шуш нефес гуьрде э хуне дироморени Гуьлбике. Э тению дуразе булиши маркизет, э сер ю ковре келегэи, дуь гуьл гьутинею тов-тови.

— Вой эйме гердо, туь себэхь рафдени, Рэхьмон?

— Эри. Гьеме эдей рафде, меш эдем рафде.

— Вой эй дедей Рэхьмон, — гене чумгьоре покурдени Божи, — эдей рафде. Имуре воисдени имишев сэхьибгьой Хуморе виним, гээдот гюьлом гьисдигьоре хуно хосдехунд сохим, е чи дегирим э сер Хумор. Туь бура

ебо, зу-зу — сер тен туьре дегиш сох, чуьш бисдоге эй глэруьс хосде эдейт дарафде.

Гюльбике ченд гиле лово хосде эри Рэхьмон, шори сохде, вадарафдени э куче. Шегьер торик бу. «Кур гердо чумгой Гитлер, — гуфди э дуьл хуьшде Гюльбике, — глүьломе э торики дегьшд».

— Э Гюльбике, пой меш биём э туьревоз, духдерме, — эз песо хьэрой дешенд Глэзиз.

Рэхь эн угыо бу эз лой кантор колхоз. Оморе э кантор расиреки, Глэзиз мугу:

— Туь е минут пой, ме гьери вуьнуьм Одигюзел дериге. Гьемин Одигюзелиш, Бебеш, бухгалтер колхозиш нуьшдебуьруьт э иловлей стол, эденбуьруьт хьисобгьо сохде. Глэзизе дире, Одигюзел мэхьтел мунд, мугу:

— Хэйр гердо, Глэзиз, туь э и дири э чуь гьурлугь оморей?

Глэзиз екем э хуьшде домунд, думит сохд, чуьтам гуюге, песде э Бебейгьош денишире, мугу:

— Себэхь глэил эдей э довгло рафде. Имуре воисдени имишев духдер гьуншире хосдехунд сохим эри Рэхьмон. Дануьсдиге, биё туьш э лойму.

Гофгьой Глэзизе шинире Одигюзел шори сохд, оммо дуьл Бебе варафде-фирамо, мугуиге э мазалай Бебе е кутуки раси. У шек сохд, ки Хуморе эдет хосде гуфдире.

— Туь дануьсдени, Одигюзел, — гуфди Глэзиз, — Рэхьмон не Хумор эз глэилировоз экинуьт...

— Сэглэтгьою ник бу, — гуфди Одигюзел.

Гьемеш шор бисдорутге э хэбер Глэзиз, Бебе пешму бисдо, гьошгьою дуьлу. Глэзиз вадарафдки, Одигюзел эз Бебе хьисоб эз подвал доре шоробгьоре пуьрсики, Бебе гьэриш-гьэриш сер гуьрд эри жугьоб доре.

— Дивисд литире э Тенхьум дорей эй фурухде? — гуфди Одигюзел.

— Эри, — жугьоб до Бебе.

— Имогьой ченгьэде биё домуну туьре эз сиегье шороб?

Бебе э думит домунд, хьисобгьоре фурмуш сохд. Одигюзел глоси бисдо:

— Бегем туь хьисоб туьре ние нуьвуьсде!

— Нуьвуьсденуьм, — жугьоб до Бебе, эз куьф ведешенде книжкере.

Тейте Одигюзел кор хуьшдере варасде, Глэзиз не

Гуьлбике вогошдуьт, хьозури ишуре винире е чорек шороб, е дуьгуьр крепдешин эй гIэруьс вегуьрде, пезде гьерсееки дарафдуьт э хуней хуморигьо. «СэгIэтию ник» — гуфдире, э посой ГIэзизигьо вадарафд Божиш.

— Рэхьмон э хуне де? — пуьрси эз куче Ахмед.

— Эри, эри, дара, хэлефме, — гуфди Божи.

— Диро, Ахмед, — шори сохд Рэхьмон, гьул Ахмеде гуьрде-гьери, чуй хэбери? Нуьввьсдуьт туьре э артеллерия?

— Эри. Туьш миеди э имуревоз э артеллерия оmore.

— Чуй бешгьэи, — гуфди Рэхьмон. — Э гьер жонш гьурлугь сохдим, гьэрд имуре биё дим. Себэхь рафдегоргьо омбари?

— Хэйли одомини. ГIэилгьой колхозини, корсохьгьой рэхь мошини. Эз завод «Огнини», студентгьои, оммо гьобоне Бебе когьозгьо овурди, дуьлию хэреби гуфдире. Эдей гIэмелгьо сохде.

— Нибу эде, — гуфди, Рэхьмон.

Ечи ме дирем.

— Э и руз э сер вилоет иму дуьшме оморигьо руз, неужели гьисди ужире одомигьо энжэгь эй жун хуьшдере дошде хьэрекет сохденуьтгьо?

Ахмед хэндуйсдени.

— Беге гьеме одомигьо еки бире? Пенж энгуьшд одомиш ежире нисди.

Рэхьмон э думит домунд, сере жумунд.

— Э Рэхьмон, бебе оголи туьре, — омо сес Гуьлбике эз буру.

— Чуйни? — пуьрси Рэхьмон, э буру ведироморе.

— Оголи!

Гьул Ахмеде гуьрде, Рэхьмон дарафд э хуней Хуморигьо. Э сер суьфре нуьшдебуьруьт Одигюзел, ГIэзиз, Гуьлбике, дуь мерд-одомигьой Хумор, э ён кинле нуьшде эденбу гушдгьо буржунде дедей Хуморигьо Мелке. Хумор сере гьуз гуьрде, сифете э косинкеревоз пэхьни сохде, нуьшдебу э е куьнж хуне. «Оморут, — гуфди Одигюзел, — вегирим имогьой пейлегьоре омборекбу сохим, шоре метлебгьо хогьим эри гIэруьс не домор».

— Э шоре метлебгьо расойт э гьеме дигьгьо—жэгI-метгьоревоз, — гуфди Мелке.

Гьеле гьово гуьрде пейлегьошуре не хурдебуьруьт Одигюзелигьо, э хуне диromогьо Нэхьум.

— О—омбарак бу, сэгІэтию ник бу, эри небирегор-  
гьош гердо!

Одигюзел э Нэхуым денишире, мугу:

— Туь гене пиёни?

— Эз же, дори мере бегем гьобоне Бебе, складчи туь!  
Ме е пейле э хуней Писэхь—гьэндейгьо хурдем. Кук бири  
гІэруьс эн уре, э омборек бу рафдебуьруьм.

— Дие гьечу буге нуьш,— гуфди Одигюзел, — декин-  
нит гьери е пейле эри Нэхьумиш!

— Гьечи дие, — шори сохд Нэхьум, —гьэдой гІэил-  
гьой туь биёво э синей Нэхьум.

Хурдени, кун пейлере моч сохдени, песде вэхуьшдени,  
диги-диги зере вежегьисдени. У песде э кин Рэхьмон нен  
Ахмед куьнд бире, гуфдирени:

— Ишму себэхь, Рэхьмон, эдейте рафде. Худо э гьул-  
гьошму гьувот дешено. Фашистгьоре куьшде, шор биё-  
вошит э кин бебегьо, дедейгьошму. Омон, жон Рэхьмон,  
дуьл туь динж бошгу. Хуморе иму согь-саламет мидорим  
эй туь. Э жун тэхьле руригьой холей Мироти!

Хумор хэндусдени, Мелке э зир зугьу гуфдирени:  
«Лухьлухьуьт дараво э у руригьой туь, гене пиёни»...

Хэйли шев рафде, гьуногьгьо согьбоши гуфдире,  
э сэхьибхунегьо сер зере, вадарафденуьт. Себэхьими  
Рэхьмонигьо, Ахмедигьоре эй рэхь сохде гьемееки раф-  
денуьт э вокзол. Оморени э вокзол Бебеш. Э дури поисде,  
у дирени, чуьтам гьирке сохде, гиридениге Божи, чуьтам  
гІэйбе-гІэйб, сере гьуз гуьрде гІэрсгьой чуме темиз сох-  
дениге Хумор. Гьип-гьирмизи биренуьт чумгьой куьгьне  
партизангьо Одигюзел нен ГІэзиз, эн гьемме инжо кура  
бирегоргьо, рэхь сохдегоргьо. Энжэгь Бебе э тегьними  
поисдебу, дуразе папрусе э лэгІэ доноре. ГІэре бир у чуме  
чару сохденбу э лой Хумор эз зир чум дениширенбу э  
Рэхьмониш, комики э сер пилонгьой вогун поисде, э  
Хумор денишире, десе жумунденбугьо ве мижегьой чум-  
гьой хуьшдереш хуьсуьндебугьо, гІэрс оморе тигьи небу  
гуфдире.

— Бурайт, рэхь ник, шор биёвошит!—гуфдурут рэхь  
сохдегоргьо, паравоз дуду зере, бугь хьэрзо сохде, ма-  
шин э рэхь офдоренге.

## ГЬЕР МЕРД Э НУБОЙ ХУЪШДЕ

У руз гьеминон, довгю сер гуьрдебугьо, Шими во-гошд эз Дербэнд, рафд э Махачкала, эз машин фураморе, шохьонгум торикиш буге, ебо э хуне не рафд, видовусд э военкомат рафд.

— Ме политрук запасуьм, — гуфди Шими э дежурни командир вохурде, — ме хьозурум эри рафде э довгю.

Дежурни фегьм сохд карточкегьой Шимира, вини документгьоре, мугу:

— Ишмуре броняи, хьовир Юсупов. Герек бисдоге, огол мизеним.

Шими сере гьуз гуьрд, думит сохде мугу: «Э и руз, четине руз, фашистгьо э сер Ватан иму омorigьо, ме э хуне чуьтам нуьшуьм?» Песде гене чарусде пуьрси эз дежурни:

— Э военкомевоз гоф сохум, белки фирсо мере?

Дежурни хэндуйсде, мугу:

— Хьовир Юсупов, герек бисдоге, огол мизеним. Согь бошит!

Шими сере гьуз гуьрде, вадарафд эз военкомат, рафд э хуне. Гьово сэхд торик бугеш, зен Шими Сипро, чуькле духдерлей хуьшдере э гьужогь гуьрде, могьбул поисдебугьо э домой дер гьопу, шинохд эз сес пойгьо шуьвере.

— Папа омори, папа, — гуфди у э г'Эил. — Иму пара бисдоримки. Гуьломе думон дегуьрди, эжеи туь, геде?

Шими вегуьрд духдере э гьужогь, моч мохд, мугу:

— Гьичиш нибу, Гитлер хуьрд мисоху кемер хуьшдере.

— Себэхь туьш рафдени, папа? — пуьрси г'Эил, Шимийгьо э хуне диромореки.

— Гьеле себэхь ние рафденуьм, духдерме, гьеле э китуьнуьм.

Не себэхьиш, не персебэхьиш гьеле Шимира военкомат огол незе. У рафд э кор хуьшде, гьемишенере хуно рафде оморе сохд э районгьо, э колхозгьо. Сери ебо радио шиновусде е небуге э газет хунде фашистгьо гене е шегьеригеймуреш вегуьрдет гуфдире, Красная армия гужлуье оборонительни женгьо эдей берде гуфдире, дуьл Шими пар-пар мисохд «Те кей, — гуфдиренибу у, — Киев, Минск, Днепропетровск»... Омо гьеминониш ги-рошд, Шимира огол незе военкомат, поизиш омо. Фашистгьо э Ростовиш оморут расируьт. Энжэгь имогьой нубо



оморе расиребу э е паре э запас мунде одомигьо. Омо нубо раси э Шимиш.

Эй Шими эз военкомат хэбер омогьо, у э хуне не добу. Э песини рузгьой Октябрь э командировка рафде э район Дербенд, у омореву э Эгълеби.

Хинике руз бу. Асму сиегов зере, эз гьово эденбу хуьрде-хуьрде чиг рихде. Шими э линейке венуьшде, э посой глэребечи нуьшде, гердевуней палтуй бобрики хуьшдере вешенде, шопкереш сэхд шиширебу э сер гьиргьире муйгьой сер хуьшде. Линейке рэхь боггьой Дербенде гиросде, э куьндигьой мост Рубас-чой омореву расире. Эз мост э гиросдеки, дирени еки э кул глэсб вери, плащ брезенти вокурде, гьирмож э дес дери эдей глэсбе гьей сохде.

— Ини, председатель колхозиш э чули, — гуфди глэребечи.

Шими хуб денишире э глэтлуй, дирени Глэсоили. Мэхьтел мунд Шими. Эхи у шиновусдебу Глэсоиле эз партия ведекуьрдет гуфдире. «Веди биреники гене партия э Глэсоил ихьдибор сохдени, гьечи председатель колхоз нориге юре» — думит сохд Шими ве шори сохд, дануьсде и коре. Песде, куьнд бире эз глэтлуй мугу:

— Руз эхэйрбу, лелей Глэсоил, иму э китуь э колхоз эдейм оmore. Ме дануьсдеш ние дануьсденбуьруьм туь председатель биренре.

Глэсоил дениши, шинохд Шимире, гьуз бире эз сер глэсб, дес до гьуноггэ.

— Эри, бирорзере, председателуьм, — Шими хуб денишире э сифет Глэсоил, гузетиш сохд, чуьтам пир бириге у, чуьтам дерзе-дерзе тик вороморетге сипре руьшгьо э лэггэре сифетию, чуьтам доруне дарафдетге чуькле чумгьою. Глэсоил вини чуьтам Шими денишириге э ю, гуйге варасире э дуьл Шими деригьо гофгьоре, мугу:

— Хэлефме, довгюи гьони. Жогьилгьо э фронт рафдет. Э колхоз домундет пире мердгьо не зенгьой хэйлогьги, хуьрде-хуьрде глэйллегьо. Четини хоригьоре гьурлуйгь сохде, э вэхдию коргьоре эри варасде эз сер ние берденим. Гьеле тум поизиреш коше не варасдейм.

Дие Шими э дигь не рафд. Мугу:

— Биьйт гьери коше хоригьоре виним, коше не оморигьо хоригьореш бирмун э ме.

— Егиле мурафдим э хуне, нун чи мухурдим дие, — гуфди Глэсоил.

— Песде, лелей ГЭсоил, песде, — гуфди Шими. — Биё ебо кор имуре варасим.

— Гьечу буге бригадиреш огол зеним, — мугу ГЭсоил.

— Бошгу.

Дуз те шохьонгум Шимийгьо гешдуьт э змигьо. Энжэгъ торик биренге оморут угьо э дигъ, кура сохде, гоф сохдуьт э бригадиргьо, активистгьоревоз, песде ГЭсоил теклиф сохд Шимире э хуне.

— Кифлетме э Дербенди, — гуфди ГЭсоил, рэхь доре Шимире, диловунде э сара хунелей гуьли, э диворгьой комики э рафгьо вобу жерге-жерге бодиегьо, бишгьобгьо, э хорию сипре ризе-ризе порхол не нимдергьо, — инжо ме э кироюм, э хуней эн и келе зен.

Эз доруни хуне ведиромо е пире зен, шев э хэйрбу до, мугу:

— Хьэлол гердо туьре хурде ширгьой дедей, чуйтам тоб доре туь согъ руз нун не хурде!

ГЭсоил чумгьоре хэндунде, мугу:

— Ме э шуьггэм дедей омбор хурдем. Туь имогьой, холей Милко, эриму е чорек шоробиш, эзу герме нунгьой-туьш биёр...

Келе зен вадарафденге, Шими мугу:

— Чуйтам бире, лелей ГЭсоил, кифлет э Дербенд, туь инжо э дигъ?

— Ки дануьсде те кей ме инжо мибошумге? — гуфди ГЭсоил. — Дуьл ме эдей пара бире, мереш воисдени э фронт бурам э жигей Бенево кукме поюм, гьэгьре эз фашистгьо ведешенуьм...

Дие ГЭсоил гоф сохде не дануьсд. Шими вини, чуйтам чумгьой эн у тар бисдорутге, чуйтам мижегьой чумгьою вежегьисдуьтге. Шими сере гьуз гуьрде, мугу:

— Белки, лелей ГЭсоил, Бенево согъ бу, эйчуй фикир сохде?

— Чуйтам согъ мубу, хэлефме, у э граница бу, э ён Брест-командир погранотряд бу. Гье у суьфдеи рузгьо пуч бири. Эриму извещениеш омори. Оммо ме э дешешу ние гуфдиренуьм.

Шими дие гоф не пуьрси. Келе зен диromo, суьфре дешенд, тозе нунгьой тонуи не вобуржунде картушке но, буржунде таранкегьо не глов гуьрде керевуьзгьо но. ГЭсоилигьо гьеле суьфделе сер гуьрдебуьруьт эри нун хурде, эз сельсовет шуш нефес гуьрде гьэреулчи омогьо.

— Э ГӀэсоил, эз шегьер телефон зерет. Агрономе эдет гешде, Юсупова.

Шими усэгӀэт э пой вэхуьшд...

— Пой, меш эдем оmore, — гуфди ГӀэсоил.

Шев гъедерсуьз торик бу. Маладгъо, лухьмегъоре шишире, Шимийгъо чутьамиш бисдоге оморут э сельсовет. Шими вегуьрд трубкей телефоне.

— Менуьм, Юсуповуьм... чуь? эз Махачкала? Гье... Военкомат оголи? Гъо-гъо... Бошгу... Оморум...

Телефоне норе, Шими дениши э ГӀэсоил.

— Нубоймеш омори. ГӀэребечире огол зере гереки. ГӀэсоил гъэл дешенд э герден Шими, моч сохд юре.

— Шор вогордош, хэлефме!

Не денишире э торики не малад, гье э и шев, Шими вогошд э Дербенд, эз Дербенд э Махачкала.

Эз дуь рузиге у э е ченд хьэрмэхьгъойгей хуьшдерво, э вогун венуьшде, эз лой Боку, песде э пирохутевоз те Красноводск эз унжо гене э вогуневоз рафдебу э Урал, э училище. Эз лой Ростов рэхь небу, чуьнки э Ростов оmore расиребуьрут немецгъо.

## Э ВИШЕГЪОЙ УРУСИЕТ.

ГӀэзизе хундоргор, эгер туь бирейге э хоригъой Уруснет, э гӀэрей Масков нен Ленинград, э лойгъой Калинин нен Новгород, э куьндигъой дерьегъ Селигер е ненге нуькерей Волга сер гуьрденигъо жигегъо, биё вини чуьжире келе буьзуьрге вишегъоютге унжо, чуьжире раче мержгъо ве меидузигъо яравуьш сохденуьтге у хоригъоре, чуьтам э нефес одоми мегӀжуьмлуье эвир дироморениге. Оммо Шими омогъо вэхд э н жигегъо, суьфден рузгъой маиш буге, зверсергъой гъуьндуьре доргъоре ригазгъой чуьшмеш тимор сохденбуьруьтге, эвир гъово инжо темиз небу. Гъушунгъой фашистгъо э ён шегьер Старая Русса оmore ведироморе; Красная Армия тембихь доре поюндебу немцгъоре инжо, ве сес тупе-туп, туьфенг, миномёт, сес танкгъо ве самолетгъо гӀэре не доре лов биренбу э вишегъо.

Шими училищере варасде, оmoreбу э Северо-Западный фронт шеи—шовол военни э тен вери, пилотке э серию, э е дес чамодане гуьрде, э е десиге шинеле, у эз машин фуроморе, эз келе рэхь чеп зере, э више дарафде,

зури-зури — рафд э лои штаб фронт. Дуьл эн у эденбу гуп-гуп сохде. «Э frontiш оморум», — гуфди у э дуьл хуьшде. Е хэйли рэхь рафде бэгдо у вини э гьэд више чуккле хунслегьой тэхдеире, э раче бе рачею вохурд е красноармеец, комики бирмунд э ю э коми хунегьо деруьтге корсохгьой политуправление. Инжо Шими миёсде доре когъозгьой хуьшдере, эз инжо уре миёсдуьт фирсоре э часть.

Дежурный командир дефирсо Шимире э ён батальонный комиссар.

— Унжо батальонный комиссар Фомичев дери, — гуфди дежурный, — дара э у ди когъозгьой туьре.

Шими дироморе сэггэт белли до батальонный комиссара, э сифет ю дениширени, шинохэ одомире хуно омо эри ю очугъэ сифетию, шоре чумгьою, зерд тегьере муйгьою ве чухури добугьо э расди гьутунею... «Э же дирем бу ме ире?» — Думит сохд Шими.

Фомичев э тигъэтевоз хунд когъозгьой Шимире, виники у эз Догъистуни, Дербендини, шори сохде мугу:

— Хьовир политрук, туь дербендини?

— Эри, хьовир батальонный комиссар.

Фомичев эз жигей хуьшде вэхуьшд, куьнд омо эки Шими, эз гьулию гуьрде, нуьшунд юре э сер скамейка, юш нуьшд.

— Туь мере ние шинохде, меш эхи э Дербенд кор сохдем, секретарь райком бирем е взхд...

Шими имогьой сер гуьрд эри шек сохде э же дириге батальонный комиссара.

— Дан ки, хьовир Юсупов, меш эз хоригьошмуьнум, — гуфди Фомичев.

Песде э пой вэхуьшде, рафде э жигей хуьшде нуьшде, мугу: — гьери гу. Кей оморей эз Дербенд, чуьтами гьони унжо... Кире шинохде туь...

— Ме, хьовир батальонный комиссар, э Дербенд кор ние сохденбуьруьм песини салгьо. э Махачкала кор сохденбуьруьм. Оммо пушой э армия оморе, рафдебуьруьм э командировка. Э колхоз рафдебуьруьм, э Эгълеби, унжо председатель колхоз Ггэсоил Бинаеви.

Нум Ггэсоиле шиновусде, Фомичев шори сохдере хуно бисдо.

— У редактор газет бугьо, — гуфди Фомичев. — Чуьтами кор эн у, э партия восстановить сохди уре?

— Миёсд восстановить сохде, — гуфди Шими, — эз у

гуфдиребуьруьт бура е кем председатель колхоз кор сох, бирмун хуьшдере э кор... Омо имогьой довгош бисдо. Э колхоз мердгьош не домунди. Четини кор колхозиш. Гьеле гуиге у мунди беспартийни.

Фомичев э думит домунд, чуь коре буге э ёр овурд, сере жумунд, мугу:

— Бирени, э сер одоми кор оморени. Оммо Гэсоил темизе одомини.

Хэйли ихдилот сохде э Шимиревоз, Фомичев егилейгеш когъозгьоюре дире, мугу:

— Эйме оморенигьо, хьовир политрук, туь стихигьо нуьвуьсденбири, э газетгьо ме нум туьре омбар хундем...

Шими гэйб кеши, гьирмизи бисдо, сер фушенде, мугу:

— Гэре бир нуьвуьсденбуьруьм.

— Гуш вени гьечу буге, — гуфди Фомичев, — э фронт иму тозе армия гуьрд бири. Э у армия биё газет ведиров. Унжо одомигьо гереки э газет. Мурай корреспондент кор мисохи...

Шими мэхьтел мунд.

— Эхи мере э женг дарафде воисде, э боевой подразделениегьо. Ме э довго оморем.

Фомичев хэндуьсд.

— Редакцияш боевое подразделениеи. Гьони э у редакция е писатель эдей рафде, маскови. Гьердущму эеки мурайт.

Фомичев зинг зере, огол зе дежурнире, до когъозгьой Шимире.

— Ги, нуьвуьс эри политрук Юсупов направление э редакцией армейский газет. Э писатель Масловез эеки муьфуьрсит.

Песде дес Шимире гуьрде, мугу:

— Согъ боши, эй дербендигьо эз ме Шолум муьнуьвуьси. Эри Гэсоил ёгьин!

Бэгьдовой чор рузиге, себэхь-себэхь, Шими э кишд бесде тапинжей «ТТ» — ре, эз душ гировунде сумкей алатире, э дес гуьрде картай хоригьой Северо-Западе, эденбу эз Гэрей вишегьо эз ён болотагьо — луьхьмегьо рафде э лрой пушои жергегьой фронт, эз комилоки э гуш Шими оморе дарафденбу сес тупе-туп, сес бомб шендегьо эз самолетгьо.

Имбуруз е ченд дивизиягьой Красная Армия миёсде наступление сер гуьрде эри зере ведешенде эз ён Старая

Русса жиге гуърде нуьшдебуьруьтгьо гъшунгьой фашистгьоре. Редактор газет огол зере э ки хуьшде, буйругъ доребу Шимире бурав э еки эз дивизигьо, гье имбуруз нуьвуьсуь, а газет фуьрсуь статья. Шими гьеле э довго суьфделе бу, у э газетиш суьфделе сер гуьрдебу эри кор сохде, у ние дануьсденбу гьеле чуйтам женг гиросдеге э пушой жергегьо, чуй жире статьяре э редакция фуьрсуьге. Оммо пуьрсиреш гъэиб омо юре эз редактор.

Буйругъ вегуьрдки, е гофиш не гуфдире, Шими зуризури хьозури хуьшдере винире, шинеле э сер гъул воноре; рафд э лой женг берденбуьруьтгьо дивизиягьо. Гъере-бир эз ён Шими оморе мигирошдуьт машингьо, эз сер рэхгьой тэхден э гъэд гловолуье хоригьой вишеи гировунде оморебугьо (и рэхгьой тэхденре «гать» гуфдиренбу инжо), эз ён Шими мигирошдуьт тек-тек красноармейцгьош, туьфенг э душ вери, э гъурлугъ ишу рафде. Ве ченгъэде Шими куьнд биренбу эз рафденбугьо дивизия, унгъэде эденбу келе бире сес тупе-туп, сес моторгьой самолетгьо. «Э хьисобевоз сер гуьрди наступление», — гуфди э дуьл хуьшде Шими. Эри, наступление сер гуьрдебу. У эз у кориш мэгълуьм буки, э рэхъ Шими эденбу вохурде эз пушой жергегьо вогошденбуьруьтгьо яралуье красноармейцгьо, дес кимигьо беседе бу, екигьо эденбуьруьт ленгуьсде, еккегьойгере э машиневоз берденбуьруьт. Дуьл Шими лерзи. У днеш тенги сохд гуре-гур бежид бисдоки. Чуйш бисдоге, рафде герек бу.

Више варасд, Шими ведиромо э мейдузи. «Бобо вой, и чуйни!»—гуфди Шими дирe э сэхьро, э посой тепегьо гъэдерсуьз омбаре тупгьо, зениткагьо, минометгьо, одомигьо видов-видов эз ило э уло. Бирден гуш Шими бенг бисдо эз сес зениткагьо тарпетарп туп шендуьтгьо э гьово. Сере гьово гуьрде, Шими дирени э зверсер тупчигьо, э гъилгъили асму эдей самолетгьо гешде. Эи туьтем ки буге эз душ Шими зере, венгесд юре э е чухури.

— Ние дирe туь! — хьэрой вегуьрд у одоми, — самолетгьой немцгьо эдет бомбить сохде. Вогос э хори!

Расдакиш гьеле и одоми гоф хуьшдере не варасдебу, гушгьой Шими бенг бисдогьо, серию гиж хурдгьо, у гьечу дануьсд гром-гром бисдо, бирэнгъине зе, хори-гьово лов бисдо. Партепарт бомбагьо э хори расире, лов бире-бире эденбу пара сохде. Гьечи гиросд е ченд минут—гогь сес бомбогьо, гогь сес зениткагьо. Омбар терсире,

Шими гъеле-меле сере тик ние гуърденбу, э чухури вого-сиребу мунде. Песде сокит бисдоки, у одоми десе зере э кемер Шими, мугу:

— Политрук, вэхиз!

Шими сере тик гуърд, чарусд вини э кию э чухури дегешди е огъиле мерд, формай старший батальонный комиссар э тению вери, хъире чумгъо.

— Вэхиз, — гуфди у, — кини туь, э же рафде.

Шими гуфди киниге, э — же рафдеге. Старший батальонный комиссар хэндее лов бире, мугу:

— Кидан туь гъеле тозеленге, э довго не бирей.

— Не бирем, — жугъоб до Шими гъэйбе-гъэйб.

— Гъэйгъу нибу, хуте мибоши, — гуфди мерд. — Ме начальник оргинструкторски отделением политотдел армией, фамилий ме Егорови. Кеш э меревоз. Меш эдем э дивизия рафде.

Э рафдеки Егоров ихдилот сохд эри Шими самолёт-гъой дуьшме оморе вэхд, чуьтам хуьшдере гуърде герекиге, эз лой дуьшме туп е ненге миномет шенде оморениге, чуь биё сохуге. Пуърси эз Шими чуьжонниге, шинох бисдо э уревоз, хъэз омо юре эз Шими. Э дивизия оморе расире сэгъэт, Егоров деберд Шими э кй начальник политотдел, шинох сохд, эз унжо е связной красноармейца вегуърде, Шими рафд диеш пушо, э женг сохденбугъо полк.

Гъээмей командир полк э гъирогъ више, э куьнди-гъой болотагъо бу. Хэйли руз рафдебу, гъовош дегуърде, эденбу чиг оморе. Связное хъэрэ сохде, Шими диромо э гъээмей командир полк, белли до. Э и туьтем командир полк эденбу э телефоновоз гоф сохде, у Шими ре дире, сере жумунд, гоф хуьшдере сохд э телефоновоз

— Чуь? — пуърси командир. — Гъемееки дегешдейт э болотагъо. Минагъо омбар де? Танкгъош гиросше ние дануьсденуьт? Чуь сохум? Те шев биё дегердит!

Шими эденбу дире, чуьтам командир полк э гоф сохдеки гъирмизи биренбуге, эз пушонию эрэгъ рихденбуге, у эденбу шиновусде, чуьтам у хуьршлуь бире, нифри сохденбуге. Э у куьнжигей гъээме трубкейгере гуърде э гуш веноре, нуьшдебу красноармеец — телефонист. У э Шими денишире, чум зере юре, эденбу гуфдире: егънь коргъо четини, командире можол туь нисди. Эз дуьл Шими «ох» варафд, у мугу э дуьл хуьшде: «Ме чуь со-

хум имогьой, ме буйругь редакторе чуйтам бегьем сохум, ме э газет чуй нуувуьсуьм?».

Виники командире можол э юревоз гоф сохде нисди, Шими сере гъуз гуьрде эз гъэзме ведарафд. Гье э и туьтем эз лой немецгьо сес миномет шенде омо, э куьндигьой гъэзме мина офдоре, сес сохде, лов бисдо. Шими усэгIэт офдоре, э гъэд глов дегешд. Песде вэхуьшд, гьемею малади, э думит, дес э чуне нуьшд э сер е кутуки.

Пушой шохьонгум бу. Гьово оморе-оморе эденбу торик бире Эз дуьл Шими шивиш эденбу гирошде. Гирисдени гуьрдебу уре. «Э же бурам, э киреоз гоф сохум?».

Гьеме исэгIэт э пушо, э куьндигьой позициягьой немцгьо дегешдебуьруьт. Себэхьмунде наступлениере сер гуьрде, хэйли пушово рафде, красноармейцгьо диренуьт э зир пойгьо минагьо дери. Дие рафде не бисдо, дегешдуьт. Имогьой дениширебуьруьт те торик бире, э торики сапергьо гирорут, минагьоре лов сохут, песде гене полк наступлениере беруь.

Шими э думит нуьшде э ён гъэзме, э пушою омо поисд е гьуьндуьре лэгъэре командир, э петлицагьой шеию дуь шпал вери.

— Кире гешденит, хьовир? — пуьрси у эз Шими.

Шими бирден эз хов хэбер бирере хуно, э пой вэхуьшд, мугу:

— Ме политрук Юсуповуьм, корреспондент армейски газет. Мерд дес юре гуьрде, мугу:

— Ме батальонный комиссар Панюшкинуьм, комиссар эн полкуьм. Хубе вэхд гьисмет не оморей э иму, хьовир Юсупов. Наступление гьеле-луьге мунди. Немцгьо минагьо омбар дешендет э пушо. Те шев бире полк биё дегердуь пою. Гьеле эй э газет нуувуьсдей ишму чи нисди, хьовир.

Дуьл Шими гурунд бисдо, серию гъуз. Панюшкин дире гьовой Шимире, мугу:

— Дуьл туь гурунд мебугу, хьовир. Имишев пой инжо, хис э гъэзме, э жигейме, себэхьмунде е кор мэгIлуьм мубу, немцгьоре эз лулейгьой мари медешеним. Умэхьэли е чи муьнуувуьси.

«Чуй хубе одомини», — гуфди э дуьл хуьшде Шими. Лов-буз ю, гъэдерсуьз шефд бугьо, е кем дуз бисдо.

— Туь е минут пой инжо, — гуфди Панюшкин, — ме дарам э ки командир полк, ведиром.

Эз бисд минутиге Шими нун чи хурде, нуьшдебу э



пигьсуэзевоз товуш сохде оморебугьо гъэзмей комиссар, эденбу шиновусде ихдилот Панюшкине эз товуней игиде коргьо, сохдетгьо боецгьой эн и полк э поюндеки наступленийей фашистгьоре, шишире оморебуьруйтгьо э хори Советиму.

— Имогьой душьмере поюнде, дегердунде э неме вишегьо, иму giroшдейм э наступление, кем мунди гьуьмуьр фашистгьо! — гуфди у.

Хэйли шев рафде бэгьдо комиссар теклиф сохд эз Шими дегерд хис гуфдире. Ю рафд э позициягьо.

И шев полк не хиси. Сапергьо хоригьоре темиз сохдуьт, себэхь мунде зу-сери гене сер гуьрд наступление. Энжэгь шохьонгум полк хэйли пушо рафде бэгьдо, е ченд дигь эз дес фашистгьо азад сохде оморе бэгьдо, Шими нуьвуьсде фамилегьой игиди бирмунде командиргьо не красноармейцгьоре, хьэрекет сохд эри зу-зу вогошде э редакция статья нуьвуьсде.

Шев торик бу. Више лос бу. Гьэре-бир эз лой фронт оморенбу сес туп е небуге миномет шенде. Э рэхьиш одоми ние вохурденбу. Дуьл Шими мугуиге э жигею недебу, у тип тэхьно и торике вишере эденбу рафде. Песде гьеебо пою э лугьонди офдо, те сугьре зани э лухьмее глов дарафд. Гьэриш чекмегьою глов пур бисдо. «Бебеймевой, — гуфди у, — имогьой чуй сохум?» — дие нуьшде. чекмегьоре векенде, глове тигьи сохде, питовигьоре не жарунд. Гье гьечу жаб-жаб глов э гьэд чекмегьо, рафд рэхь хуьшдере. У юш ние дануьсденбу гьони, чуй сохденбуге. Э дуьл эн у терс дебу, ки э ю гоф миьв эз редактор, эйчуй э вэхдию статья нуьвуьсде не дориге.

Хэсде, менде, юхуьле-будуре нимешев омо раси у э више, редакция шалашгьо зере поисдебугьо. Эз часовой бэгьэй гьеме хисиребу.

— Туьни, хьовир политрук? — пуьрси часовой, — гьечи нимешев эйчуй оморей?

— Эгь, мепуьрс! — гуфди Шими.

Энжэгь имогьой чекмегьоре векенде, глове тигьи сохде, хуьшге портянкегьо беседе, партал эз тен не векенде, дегешд хиси у. «Гене хуби, материал семе бири эй статья», — эденбу гуфдире э хисиреки Шими. Мугуиге екем шор биребу у. Оммо себэхьмунде э редактор вохурде, биразин эн уре дире, омбар пешму бисдо Шими.

— Пери себэхьмунде рафдейгьо э дивизия, имогьой овурдей заметкере, — гуфди редактор. — Песг газете э

чуьревоз биё ведешеним иму? Фурмуш месох, хьовир Юсупов, инжо довгӀои. Хисире-хисире иму фашистгьоре дорбодогъун сохде ниданнм.

Шимире воисденбу гую, ки ю гьеле суьфделен гуфдире э довгӀо э газетиш те имогьой кор не сохди, тегьер кореш гьеле бегьем ние дануьсде, оммо гоф сохде не дануьсд — мугуиге э бугъозию омо е гулум поисд.

И ихдилот э биреки поисдебируьт э Шимиревоз оморегуьо писатель Маслов, секретарь редакция капитан Смирнов, начальник отдел Васильев, угьош дануьсденбуьруьт Шими тозен, кумекн сохде воисде э ю, оммо дире чуьтам хьуьршлуь бириге и э Наполеон ухшеш зеренбугьо, Наполеоне хуно десгьоре гуьрденбугьо гудеге батальонный комиссар Павлов, угьо лэгӀэшуре гуьрде поисдебуьруьт. Энжэгъ совещание варасде бэгъдо, Маслов э гьирогъ огол зере Шимире, мугу:

— Гьэйгъу нибу, земляк, думит месох. Довнге э меревоз мурайм. Ме момухум э туь, чуьтам зури-зури, хуб кор сохде герекиге.

Шими дениши э хэндуйсденбугьо ковре чумгьой Маслов, э очугъэ муйгьой серию, эз зир пилотка ведироморегуьруьтгьо, э фирегье душгьою, мугу:

— Согъбоши. Ненге мере воисденбу бурам э Фомицев гуум э строевой часть фуьрсуй мере...

Маслов эз куьф ведешенде «любительский» тутуне, мугу: — Э ишму, э Догъисту, э метлегьо гуфдиренуьт: эз хэбер гьингъэр хуби. Биё гьери папрус кешим.

Маслов вини чуьтам хэндуйсдуйтге ловгьой Шими, шор бисдорутге шагьбалутие чумгьой ю.

## ШИМИ ВОХУРДЕНИ Э АХМЕД

Э район Старая Русса нен дерьёгъ Селигер поюнде оморегуьруьтгьо, мара хуно луле гуьрде э хори пэхьни бирегуьруьтгьо гъушунгьой Германия гьеле-меле жуш хуьшдере ние доренбуьруьт.

Чен гилегьо гьеминон не поизи эн гьозори нуьгьсади чуьлдуьимуйн сал унжо бирегуь женггьо, хэйли диггьо, районгьо эз дес фашистгьо азад сохде оморегуьруьт. Оммо бегьем гъушунгьой гитлеровцгьо унжо дорбодогъун сохде оморут э март гьозори нуьгьсади чуьлсеимуйн сал.

... Гьеле э чулгьо, вишегьо верф хьэл не бирегуь. Гьо-

вой рузгор хиник бу. Маслов не Юсупов, э еки куьнде дустгьор, сумкегьоре эз душ гировунде, килэхьгьоре хуб э сер гушгьо шишире, тапинжегьоре э песой кемер бесде, эденбуьруьт рафде эз тенге рэхь више. Э зир пой эн угьо жэгь-жэгьуре хуно эденбу хирч-хирч сохде верф. Эз ён Шимийгьо зури-зури зере гирошденбуьруьт машингьо э песогьошу дебесе келе тупгьо, кими машингьо пур телэгэ ешигьой снарядгьо, э кимигьойге вебуьруьт солдатгьо.

— Ведини, себэхь келе наступление мубу, себэхь э телеграф миди нуьвуьсде чигьой туьре. Де имогьой туь усто бирей.

— Чувь туьни учитель бугьо, усто нибу? — шори сохде хэндуьсд Шими.

Э пушо, э миглей више веди бисдорут танкгьо, машингьо.

— Ме оморем расирем, — гуфди Маслов. — Танковой полк инжои. Стрелковый полк туь екем дуртеи. Миофи?

Ловгьой Маслов э хэнде варафд.

— Ме порине политрук Юсупов нисдуьм, — гуфди Шими, — Ме имогьой капитан Юсуповуьм.

— Дие гьечу буге, согь боши, капитан Юсупов. Рэхь туь ник!

Хьовиргьо гьэл дешендуьт э герден еки, моч сохдуьт екире, гьер мерд рафд рэхь хуьшдере.

Шими омо э юре герек бугьо, полк лап э въздию. Э келе мейдузи, вадабура оморевугьо эз чор тараф э гьуьндуьре доргьой вишеревоз жерге-жерге поисденбуьруьт взводгьо, ротагьо, батальонгьой эн себэхь э наступление рафденигьо полк. Э пушой десдегьой солдатгьо гьирмизине глэлем полка э дес гуьрде, поисдебу знаменосец — сержант: сип-снегье чумгьою, гьолинде ловгьою не гиргине чуню шинох оморут эри Шими. Э ён глэлем, сере тик гуьрде поисдебу командир, эн полк подполковник Фадеев. У э тигьэтевоз дениши чувтам туьфенггьо, автоматгьоре сэхд э дес гуьрде, чумгьоре э ю деноре поисдетге, раче-раче жовоне солдатгьо. Чумгьой эн угьо мугунге эденбуьруьт гуфдире: «Бебей му туь, подполковник Фадеев, иму хьозурим э желдиревоз эри эжиге овурде буйругь Ватане. Бер имуре пушово эри азад сохде хори Советимуре!» Фадеев руй бире э поисдегоргьо, мугу:

— Хьовиргьо солдатгьо ве офицергьо, гьони гоф ми-соху начальник политотдел дивизия подполковник Пономарев.

Э пушой гIэлем омо поисд е сара огьиле подполковник, чумачару сохд гьеме поисдегоргьоре, килэхьэ ве-гуьрд эз сер. «Эле, — э мэхьтелиревоз гуфди ки буге, — муйгьой сер мерд верфе хуно сипинуьт». Эри, Пономарев келе мерд бу, пир бу, у куьгьне коммунист бу, гьеле те революция бире э партия дарафдебу. Пушой довгIо сер гуьрде — Пономарев кор сохденбу э Масков, э еки эз институтгьо, профессор эн кафедрай марксизм — ленинизм бу у. Оморе довгIо сер гуьрденге, фашистгьо шишире э куьндигьой Масков оморе расиренге, куьгьне коммунист эрзо до, добровольно э десдей народни ополченцегьо нуьвуьсд хуьшдере, туфенге э дес вегуьрде, столицей Ватане, Москве эри гьэлхэнд дошде рафд. Фашистгьоре э ён Масков тембихь доре, лов тум сохде оморе бэгьдо, Пономарев формой командири вокурде бисдо политработник, Уре суьфде норут инструктор, ве песде начальник политотдел дивизия.

Гьони э и више, э и хинике руз март, верф э хори бугьо, у килэхь хуьшдере эз сер вегуьрде, э лой солдатгьо денишире, десе э лой фронт, э лой Запад кешире, мугу:

— Хьовиргьо солдатгьо ве офицергьо, бироргьо ве кукгьойме, э ишмуревозум ме, гуш дорит э ме, денишит э лой фронт, гуш венит чуй сес омореге эз уло. Э песой фронт дигьгьо, шегьергьоймуни, унжо фашистгьо оморе, хэребей венгесдет. Э садсалгьоревоз бебегьо, келебебегьойму вокурдетгьо шегьергьоре вачарундет, мурдал сохде. Унжо одомигьой советиму деруьт. Белки ишмуреш унжо дедегьо, хэгьергьо, зенгьо одохлугьо мундет. Э угьо эдет гуж сохде фашистгьо. Хьовиргьо, гуш дорит сес эн угьоре, уни гуш дорит, угьо эдет гирисде, божэхь дешенде. Дедегьо хэгьергьошму гIэрс э чум вери эдет минет сохде э ишму: э жеит ишму, кукгьо, бироргьой иму, шуьвергьо, одохлугьойму, эжеит ишму, биёйт. азад сохит имуре, чумгьойму сипи бисдо, биёйт хилос сохит имуре. Шиновусденит ми ишму, хьовиргьо солдатгьо, биёйт хилос сохит имуре, эдет гуфдире дедегьо хэгьергьошму...

Шими э е гьирогь поисде, эденбу нуьвуьсде гофгьой Пономареве. Э нуьвуьсдеки десгьой Шими эденбуьруьт лерзире, жендек ю эденбу биз-биз бире. Песде сере тик

гуърде, Шими вини, чуьтам чумгьой кими солдатгьо глов-глови бире мундетге, чуьтам гьутинегьой г'элемэ э дес гуьрдебугьо сержант э г'эрсевоз тар бисдорутге.

Гоф хуьшдере варасдки, Пономарев гьуз бисдо э пушой гьирмизине г'элем, э сугьре зани нуьшде, е бел г'элемэ э дес вегуьрде моч сохд, песде э сугьре зани нуьшде, моч сохд г'элемэ командир полкиш. И сироте э диреки, мугуиге э бугьоз Шими омо е чи поисд, эз чумгьою г'эрс омо. Г'эйб кешире, сифете посово чарунде, у ейлугьэ вегуьрд, чумгьоре покурд. Энжэгь умэхьэли г'элемэ э дес гуьрде поисдебугьо сержант, Ахмед кук Одигюзел шинохд Юсупове, кем мунд эз лэглэю ведироморени «Хьовир Юсупов!» Ахмед хуьшдере гуьрд, энжэгь дуьлию лерзире мугу «Ме чуьтам гоф мисохум э уревоз».

Э и туьтём Фадеев мэглумь сохд, ки митинг варасд гуфдире. Оркестр марш зе, батальонгьо десде-десе сергуьрдуьт э сес музикевоз эри гиросше эз пушой гьирмизине г'элем. Фадеев не Пономарев э ён г'элем поисде, эденбуьруьт томоше сохде, чуьтам игиде кукгьой Ватан, сере тик гуьрде, гиросденуьтге. Э и туьтём эз г'эрей десдегьо, эз пушой г'элем гиросденбуьруьтгьо е жогьиле солдат видовусд ведиромо, гьэл дешенд э герден Пономарев, моч сохд юре.

— Согь боши, подполковник, согь боши, бебейму! Туь гьони имуре дуьл дори, туь гьони имуре гьувот дори, туь гьони имуре паргьо дори. Иму азад мисохим одмигьой советимуре!

И солдат Иван Захаров, ю эз Сибириш буге, э немцгьо вегуьрдетгьо дигьгьо хэгьер-бирорюш не добуге, себэхьмунде наступление сер гуьрденге, командир буйругь доре сэг'эт эз гьеме пушо эз окоп хуьшде вэхуьшд, туьфенге сэхд э дес гуьрде рафд эз песой танк иму, фашистгьоре эри хьэл-хьовут сохде.

У себэхь наступление сер гуьрдгьо, Шими э гьэзмей эн командир полк дебу. Суьфделе себэхь очмиш биренге, тупгьо минометгьойму туп шенде, сер гуьрдебубуьруьт эри лов-тум сохде передний край обораной фашистгьоре. Е хэйли вэхд гиросше бэгьдо, самолетгьоймуш— оmore, бомб шендуьт э сер эн угьо. Песде Фадеев . буйругь до, танкгьо буравтгу гуфдире пушово, эз песой танкгьо рафдуьт э пехоте дебирегоргьо.

Шими поисдебу э е гъундуьре жиге, э ён Фадеев, эденбу дире, чъуьтам солдатгъойму е дуразе риз гуьрде, гъэд гуьрде хуьшдере эз песой танкгъо рафденбуьруьтге пушово. Э и вэхд ебойге зинде бисдорут тупгъо минометгъой фашистгъо. Угъо лап омбар сер гуьрдуьт эри миномет шенде. Кими солдатгъойму дегешдуьт э хори. Танкгъо пушо рафдуьт, ишу песо мундут. Э и туьтем эз же омоге омо ведиромо Маслов. Гъич э Шимиревозиш гоф не сохде, у омо эки Пономарев не Фадеев, мугу:

— Хъовир подполковник, угъо чъуь сохденуьт, бегем ние дануьсденуьт гъонуне: дуьшме миномёт шенденге, песо поисде гъэмел ниёв, пушо биё бурав, чъунки тикегъой мина лов биренге пушово рафде. Фадеев гъечунигеш гъосибу. Мугу э дуьл хуьшде: «И кини, и эз же омо инжо ведиромо. Хуте сохдегор омори». У эденбу дире э пушо яралуь биретгъо не эз гунилей дуьшме муьрдетгъо солдатгъоре, дуьлию эденбу гурунд бире. Гъоси биребу Пономаревиш.

— И чъуь кори, — гуфди у, — гъечу буге ме рафдуьм э пушо гъони, ме мэхуьзунум солдатгъоре!

— Хъовир подполковник, — гуфди Фадеев, — ишму чъуь сохденит, поит, марайт...

Пономарев руьхшенд тегъери хэндуьсде, мугу:

— Туь мере эз кигъо хъисоб сохде! Бегем ме лэгъ-лэгъуьм, хэлгъэ агитировать сохум, хуьшдере э сундугъ дорум? Туь пой э жигей туь, ме рафдуьм!

Ве Пономарев э хуьшдеревоз вегуьрде е автоматчика, видовусд пушово эз сер верфгъо. Э песой Пономарев хуьшдере гъуз гуьрде-гуьрде, видовусдуьт Маслов не Юсуповиш.

— Солдат, эйчуь дегешдей, — гуфди Маслов душ е солдате шувунде, — дегешдиге диеш зобу мубу, мина мирасуь э туь. Кеш пушово.

Гъемин гъечи эденбуьруьт гуфдире э солдатгъо Пономарев не у командиргъойге. Пономарев ю хуьшденню гъечи рафденбу пушово, ки дие жогъиле солдатгъоре гъэйб омо посо поисде эз келе мерд. Ки зури-зури пушово рафдге, согъ мунд, ки дегешде э песо мундге, е яралуь бисдо, е муьрд.

Эз е кем вэхдиге танкгъо не пехотейму хэйли пушово рафде, азад сохдуьт эз дес фашистгъо е ченд дигъгъоре. Шими вини, чъуьтам эз подвалгъо ведироморе е пуст е остгъу бире зенгъо духдергъой уруси, гъэйлгъо э гъу-

жогъ вери, гIэрс э чум гъэл дешенде э герден солдат-гьойму, моч сохденбуьруьтге угьоре. Гъемин у солдат эз Сибирь Иван Захаров, подполковнике моч сохдебугьо ленгуьсде-ленгуьсде оморе, е гIэиллей дигьире вегуьрд э гъужогъ, моч сохд, етике шекер эз куьф вегуьрде, до э десню. Куьнд бисдо е жогъиле лэгъэре зен, ковре чум-гьо, сере э сер синей Иван вено, мугу:

— Ме мугум туь шуьверме Фомай...

— Мегирис, хэгьер, шуьвер туьш миёв!

Шими не Маслов хьозури дире, эденбуьруьт э телеграф рафде, эри э редакция информация доре, пушой Шимире гуьрдгьо гъемин у сержант, гIэлем полк э десню дебугьо.

— Мере ние шинохде? — э хэндеревоз пуьрси у.

Шими гене дениши э сержант, шек сохд э же дириге, мугу:

— Гьелбетте туь эз Догъистони, оммо фурмуш сохдем э же диремге.

— Э Дербенд, э колхоз Рэхьмонигьо, э ёртуь мунди оморебиригьо, довгIо сер гуьрдебугьо руз?

— Гьо-о-о, — шори сохд Шими, гъэл гуьрде Ахмеде, — туь кук Одигюзели?

Масловиш шори сохд.

— Землякгьоит?

— Эри, — гуфди Шими, — шинох бош. Рэхьмон жеи. Гьич дире бирей?

— Не дирем, — жугьоб до Ахмед, — оммо шиновусдем э фронт иму биё бу.

Имогьой игьо инжо мунугу, ме ихдилот сохум, хундегор, эз товун Рэхьмон.

## РЭХЬМОН Э ДОВГIО

Суьфдеи мегьгьо довгIо сер гуьрдебугьо, Рэхьмон э Ахмед не е ченд гIэилгьойгей дербендиревоз оморебу э Западный фронт, э куьндигьой Смоленск, немцгьо э шишире омореки Рэхьмон яралуьш биребу. Песде хэйли вэхд э госпиталь домунде бэгъдо, Рэхьмон вогошдебу э полк хуьшде, комики имогьой женг берденбу э северо-западный фронт.

Э и хоригьо, фронт поисде, гъушунгьо не пушо рафденбуьруьт, не посово. Согъ зимистуй эн 1941—1942 муьн

сал гогъ эз лой немцгъо, гогъ эз лой гъушунгъойму сес туп не миномёт шенде оморенбу, разведчикгъо э лыжагъо венушде шевгъо мигирошдуът э разведка, гIэре-бир снайпергъо гунле шенде душмере мизеруът. Оммо наступление не бу. Гъушунгъой немцгъо гъолок бире, поисдебууът, лугъонде окопгъо, гъэзмегъо векенде, э лугъонди хори бине зере пэхъни биребууът. Гъушунгъойму инжо гъеле хъозур не бууът эри э наступление гирошде. Э и вэхд Армией Советиму эденбу дорбодогъун сохде фашистгъоре э куьндигъой Москов. Инжо поюнде душмере, игиде кукгъой Совети гирошдебууът э наступление, эденбууът пиш сохде, хъл-хъовут бире гъушунгъой Гитлере.

Э Северо-западный фронт зимисту сокит гирошд. Омо васалиш. Е ченд дивизиягъой Северо-западный фронт песеде гирошдуът э наступление, азад сохдуът е ченд дигъгъой советире, хэйли одомигъоймуре. Гъеминониш омо. Гъеминон 1942 муьн сал. Полк, Рэхъмон дебиренбугъо оборона гуърдебу. Э гъирогъ эн е више, э пушой е гъуьндуьре тепеи. Э песой эн тепеи лугъонде окопгъо векенде, нуьшдебууът немцгъо. Эз лой немцгъо гIэре-бир виз зере гунилегъо оморе, гирошденбу эз зверсер Рэхъмонигъо, кими мэхъэл эз лой окопгъой немцгъой сес музик миомо, сес патефон зере, сес мэгIни хунде.

— Эле, виниш, виниш, — гуфди Рэхъмон э хьэрмэхъ хуьшде Федор, — фриц шовол бирэхъне ведиромори эз окоп.

Федор е кемлей сере гъово гуърде эз окоп, дирени е немец шоволе векенде, э тэхъно трусикевоз мунде, кателок э дес дери, эдей э пушой гъэзмегъошу гешде.

— ГъейсэгIэт ме уре э у гIуьлом муьфуьрсуьм, — гуфди Федор, гъэлэж гуърде, гуниле шенд.

Немец сес гунилере шинире, усэгIэт дегешд э хори. Эз окопгъойму те окопгъой немцгъо дур не бу. Гуниле шендей солдатгъоймуре дануьсде, немцгъош сер гуьрдуйт эри гуниле шенде, минагъо шенде.

— ЛэгIэй сеггъоре вокурди, — гуфди Рэхъмон эз Федор.

— Бигьил, ненге угъо гъечи дануьсденуът э курорт оморет, — гуфди Федор. — Угъоре динжи дире мегьил гъич. Гъеле туь гуфдиребирики, чуьтам нуьвуьсдиге одохлуй туь. «Рэхъм ме берит э фашистгъо».

Эри, одохлуй Рэхъмон, Хумор нуьвуьсдебу и гоф-



гьоре. У нувьувьсдебу гене: — «зу-зу пиш сохит душьме-гьоре, биёт э хуне». Гене э ёр Рэхьмон омо гофгьой Хумор, э пушой чумию оморуйт поисдуйт раче сиегье чумгьою, лэггэр биригьо, зерд биригьо сифет ю, у ичбеле балай ю. «Эжен туь гьони, Хумор, — гуфди э дуьл хуьшде Рэхьмон, чуй сохде туь гьони? «Дие у руз эз ёр не вадарафд Хумор. «Рэхьмон ведешенд эз гьултугь когьозгьо эз Хумор оморотгьоре, хунд ебо, дуьбо, себо... «Кей мувьувьнуьм ме туьре! — мугуфди Рэхьмон, — ве мувьувьнуьм ми ме туьре, севгилиме?»

Руз эденбу шохьонгум бире. Эз кухни э термосгьо дери эри шохьонгуми солдатгьо герме боршиш омо. Рэхьмон не Федор суьфделе нуьшдебуьруьт эй чи хурде, командир отделение Судаков оморе гуфдигьо:

— Себэхь женг биренини, хьозур бошит!

— Наступление? — шори сохде, пуьрси. Рэхьмон. — Весси дие инжо нуьшдеймгьо — те кей мунденини инжо фашистгьо!

— Наступление гьеле бирени нисди, «разведка боем» биренини, — гуфди Судаков.

Гьошгьой Рэхьмон дуьлу бисдо.

— Наступление кей мубу эй?

— Мубу, — жугьоб до Судаков.

Командир дивизия полковник Шахов огол зере командиргьой полкгьо нен батальонгьоре, гуфдиребуки э участкей эн батальон капитан Орлов сэбэхь эдей разведка гировунде гуфдире. Командиргьо мэхьтел бире, пуьрсуйруьт:

— Гьэмел ниёв ми ебоо шев одомигьо фирсоре, даним чуйжире гьувотиге унжо немцгьоре. Тупгьо эженге, минометгьо, пулеметгьо эженге, белки э пушо минагьо дери. Эхи ебо хуб недануьсде позицией дуьшмере, чум руз э пушой гьэтош дешенде гьэмел ниёв одомигьоре...

Шахов гьоси бисдо, мугу:

— Немец гьечу дануьсдени, иму гьожизим. Бигьил у дануьки иму гьожиз нисдим, гьечу дануьки иму эдейм э наступление гирошде. Динжи доре герек нисди дуьшмере, биз-биз сохде гереки уре!

— Хьовир полковник, — ёвошлей гуфди Орлов. — Гьэмел миёв е гоф гуьом?

— Нэги, — хьэрой вегуьрд Шахов. Орлов э гьоси бире ковре чумгьой Шахов денишире, фикир сохд: «И зарифат сохденигьо нисди. Лэггэймере гуьруьмгьо хуби».

Сёбэхьими, гьеле чуйшме эз песой доргьой више ведн  
небу, тупгьо минометгьойму тарпе-тарп глэтош тигьи  
сохдуьтгьо э сер окопгьой немцгьо. Фашистгьоре э песош  
е жергегьойге окопгьо бире бебей. Командиргьой фа-  
шистгьо приказ дорут солдатгьошуре гьеле-луйге пе-  
сово буравт, э у окопгьойге пэхнуь бошут. Тупгьо ве ми-  
нагьойму умогьой офдоренбуьруьт э сер тигьие окоп-  
гьой немцгьо ве эз фашистгьо лап кем пуч бисдо одоми.  
Артподготовка варасде сэглэт. Шахов приказ до, нас-  
тупление сер гирит гуфдире.

Гъэзме, командный пункт эн Орлов бугьо, командир-  
гьо пур бу. Шаховиш инжо дебу, командир полкиш, е  
чендигьойгеш. Эз туьрак денишире, чуйтам солдатгьойму  
пушово рафдуьтге, Орловигьо диренуьт еки-еки солдат-  
гьойму эдете офдоре, дураз бире э хори.

— Пушово, пушово! — хъэрой сохд Шахов.

Орлов вини, чуйтам эз лой немцгьо сэхд гуниле шен-  
денуьтге пулеметгьо, э кор оморутге тупгьо, миномет-  
гьо, чуйтам хун берде, ленге-ленг песово вогошденуьтге  
солдатгьо. Шахов э лой Орлов денишире, э гъэгьревоз,  
мугу:

— Ме эз инжо команда муьдуьм, туь бура э пушо,  
вэхуьзун солдатгьоре!

Дуьл Орлов суьхд эз гъэгьр, оммо у гоф гуфдире не  
дануьсд. Приказ гьисд приказ. Рафд э сэхьрой женги,  
диromo э пушой жергегьо.

— Хьовир капитан, э пушо минагьои, — гуфди е ко-  
мандир рота. — Е хэйли одоми э сер минагьо варафде  
лов тум бирет. «Бобо вой, — гуфди Орлов, — солдатгьой-  
ме пуч мибошут имбуруз». Оммо немцгьо эденбуьруьт  
шенде туп, миномет, пулемет, туфенг. Муьрдегоргьо эден-  
бу муьрде, яралуь бирегоргьоре санитаргьо эденбуьруьт  
ведеберде, оммо батальон рафде э окопгьой немцгьо ра-  
сире ние дануьсденбу. Солдатгьой немцгьо уже эз песои  
окопгьо гиросдебуьруьт гене э пушоигьо... Угьо эз окоп-  
гьошу хуб дирембуьруьт рафденбуьруьтгьо солдатгьой-  
муре, гъэлэж гуьрде, зеренбуьруьт э гунилеревоз. Гьечи  
туьфенг э дес дери, сере гъуз гуьрде, пушово видовусде,  
Рэхьмон хэйли рэхь рафде бэгьдо, черх хурде офдо.

— Санитар, эжи санитар, хъэрой сохд Федор.

Эз песо э хори гилгез сохде-сохде санитар омо э лой  
Рэхьмон, вини: сифотгьоюре хун берди, чумгьою вамаси-  
ри. Зури-зури бесд, мугу:

— Кеш!

Чуьтам кеш? Рэхьмоне мугуиге луьнг не вебу. Э ост-гуйй занюш гуниле расиребу. Оммо эз лэгІэй ю гоф ние ведироморенбу. Санитар не дануьсд ведеберде Рэхьмоне. Немцгьо куьнд буьруьт. Угьо гене мизеруьт менгесд. Мунд инжо Рэхьмон те шохьонгум торик бире. Гьово торик бисдоки ведеберд уре санитар.

Руз giroшд. «Разведка боем» гьичиш не до Шахове. Энжэгъ нием батальон пуч бисдо-муьрдгьо муьрд, яралуь бисдогьо яралуь. Муьрд командир отделение Судаков, э вишегьой Северо-Запад гьовре бисдо гІэйл дербенди Шемей, э Рэхьмоневоз э е госпиталь гьисмет бисдо капитан Орлов.

Бэгъдовой е ченд оринейге, екем хуб бире бэгъдо, Орлов мугу эз Рэхьмон:

— Гьемей эн у пучигьо эз Шахов бисдо. Хуьшдере эденбу бирмунде. Бегем разведкаре ужире гировунде?

## СИРОТ ХУМОР

Рэхьмон не Орлов э госпиталь омбар домундебуьруьт. Ченд бо Рэхьмон когъоз фирсоребу эз инжо, ченд бо когъоз вегуьрдебу эз Хумор, эз бебейгьошу. Э мегъ сентябрь хуб бире, Рэхьмон эденбу гешде э богъ эн госпиталь. Чуькле кулок вокурде, доргьой више эденбуьруьт мугуиге мэгІни хунде, чуьшме эденбу е рач эвире герм сохде. Инжо ние оморенбу не сес тупе-туп, не сес пулемёт, автомат. Энжэгъ гІэре-бир эз сер шегьер giroшденбуьруьт самолетгьойму, э лой фронт, э сер немцгьо эй бомб шенде рафденбуьруьтгьо.

«Чуь хэбери бу гьони эз Дербенд, — гуфди э дуьл хуьшде Рэхьмон, — э сер скамейка нуьшде. — кидан Хуморигьо э богъчирегьош дарафдетге». Песде э пушой чум эню чуь кориге омо поисд чигьрет эн кечеле Бебе, э ёрию омо ГІэсоил хьовир бебешу, эз дуьл Рэхьмон ох варафд. У эз куьф халат хуьшде ведешенде, эденбу куьгьне когъозгьой Хуморе хунде, медсестра Люба хьэрой сохдгьо:

— Рахманов, эйтуь посылка омори. Биё!

Рэхьмон шори сохд, вэхуьшд, рафд э лой Люба.

— Эй согъ боши, хэгьерме, — хэндуьсд Рэхьмон, де-нишире э раче сифет не ковре чумгьой Люба, — гьери виним чуьниге.

Посылкаре векенде, винирени онгур пури. Э сер онгургьо вери когъоз, э гъэд когъоз дуй сирот Хумор.

— О-о-о! — Шори сохде, хэндуьсд Люба.

Рэхмон не дануьсд, э чуй мэхьтел бисдоге Люба—э онгургьо ненге э сиротгьой Хумор.

— Зен туьни? — пуьрси Люба.

— НэгI, гьеле одохлуни.

Песде вегуьрде е ченд хуше онгур, до Любора.

— НэгI, согъ боши, — жугъоб до Люба, чуме не вегуьрде эз сирот Хумор.

— Веги, веги! — гуфди Рэхмон. — ненге гъэгъри мибошум.

Люба хэндуьсд.

— Гъэгъри мебош мегуьруьм. Согъ боши!

Рэхмон гъич э палата не дарафде, ебо когъоз Хуморе хунд «Э ёртуь мунди у тегъенг, туь эйме э хъэет кошебиригьо, — нуьвуьсдебу у. — И хушегьой онгур эз у тегъенги. Бегъергьой жофой туьни. Ху. Согъ бош. Хуб бош. Зу варасит довгоде, пиш сохит дуьшмере, биёт э хуне... Эгер туь мидануьсдиге, Рахмон, эз дуьлме гьони чуй гиросдеге... Кей муьвуьнуьм ме туьре...» «Рэхмон дирени е жигей когъоз чуьлкини. «Инжо гIэрс чум Хумор тигъи бири, э сер когъоз» — шек сохд у. Э бугъоз ю култе омо поисд, гирсдени гуьрд юре.

— Младший сержант Рахманов, и чуьни?

Рэхмон чарусде, дирени Орлови. Э пой вэхуьшд.

— Посылкан, хьовир капитан, эз одохлуйме. Вегирит онгур хурит.

— Игьо чуьни? — пуьрси хэндуьсде-хэндуьсде Орлов, э сиротгьо денишире.

— Сиротгьой одохлуймени.

Орлов вегуьрд, фэгъм сохд, шори сохд. Песде э палата дарафде э еки, эй онгур хурде э нуьшдеки, Орлов мугу:

— Мереш бу зенме, Вера.

— Имогьой чуй бири уре? — пуьрси. Рэхмон.

Немцгьо бердет э Германия. Э Украина зигъисден-бирим иму. Вера э вэхдию не дануьсд вирихде эз Смоленск, тейте немцгьо оморе. Немцгьо эз Смоленск пиш бире бэгъдо эйме хэбер омо эз одомигьойму. Вераре немцгьо э гужевоз бердет э Германия.

Ведешендени эз куьф дуй сироте, ю не Вера веригьоре, бирмундени э Рэхмон.

— Рачи зентуь, хьовир капитан.

— Рачи, согъ мундиге...

Песде гуфдирени:

— Веги е сироте эйтуь.

— Согъ боши, — шори сохде Рэхьмон, — веги е сирот Хумореш э туь. Ки дануьсде, хьовир капитан, белки ме муьрдуьм, муьнуьвуьсит эй Хумор, нни адресиш э песой сирот вери...

Орлов мугу:

— Сироте мегуьруьм, сирот туьш мере гьисди, э еки могосунум сирот туь нен одохлуй туьре. Оммо муьрде герек нисди, муьрдеире э ёр меёр.

— Бегем э дес иму дери, хьовир капитан.

Э ки Рэхьмонигьо оморут е ченд яралуьгьойгеш, Рэхьмон гьуногъ сохд ишуре э онгур.

— Хурит, одохлуйме фирсори, — гуфди Рэхьмон, шори сохде.

## ШИМИ СУРОГЪ СОХДЕНИ РЭХЬМОНЕ

Эз госпиталь ведиромореки сирот одохлуре Рэхьмон э гьултугъ шеи, э ён дуьл хуьшде пэхьни сохденбу. Ченд гилегьойгеш яралуь бири Рэхьмон, ченд гилегьойгеш э госпитальгьо дебире, гье, гене э пой взхуьшде э женг Рафди. Оммо сирот хосдегорию гье э юревоз бири, э гьэд эн комсомольский билет. Гьэре бир Рэхьмон мугуфди э хьэрмэхь ю: «Дануьсденит ме эйчуь эз ярагьо зу хос биренуьмге? Э синейме хьэйкел дери — сирот хосдегор». Юш михэндуьсд э гоф хуьшде, хьэрмэхьгьоюш.

Сирот Хумор э сине дери, Рэхьмон гиросд рафд хоригьой Украинере, омо ведиромо э Румыния, э Венгрияш. Поизи эн гьозори нуьгьсади чуьлчоримуьн сал бу. Батальон Рэхьмон дебиренбуьго, хэйли пушово рафде, поисдебу э ён эн е нуькере. Э у гьирогьигей нуькере фашистгьо омбаре тупгьо кура сохде, обороней хуьшдере пуш-пушоки хуб, муьхькем гьуьч сохде, ние гьишденбу гиросде гьушунгьоймуре. Шев бу. Э е хуней ранжбери, пушой пенжерегьо э одеялгьоревоз вадабура, э гьирогь стол телефоне э дес гуьрде, нуьшдебу солдат Иванов. Э ён кровать тэхдеи, сер гьуз, дес э чуне нуьшдебу е сара, жонлуье, очугьэ руе капитан Орлов. Гьэре бир эз

куче оморенбу сес туп шенде, снаряд с ненге минагьо лов бире. Солдат эз зир чум деншире э капитан, эденбу дире, чуьтам у гьэгьр кешире, ловгьой хуьшдере гIэнж гуьрдениге. Расдекиш э келе думит добу капитан. «Иму гьечу дануьсдебирим, не поисде мигирорим нуькерере, — гуфди э дуьл хуьшде Орлов, — ме медан немцгьо инжо сэхд бине гуьрде бебейки». Э и туьтем, э куьндигьой хуне, э буру лов бирени снаряд, эз гуж эн у хуьрд биренуьт шишегьой пенжере.

— Хьовир капитан, ишмуре оголи, — гуфдире телефонист, трубкаре доре э Орлов.

Капитан вегуьрдени трубкаре.

— Менуьм, второй. Чуьни, хьовир первый? Эри, одоми фирсорейм э разведка. Имишев чуьтамиш бисдоге биё даним биней тупгьо нен дуьруьжде пулеметгьой эн угьоре, песеде эри огневой налет сохде, вачарунде, ги-рошде. Хуб, бошгу...

Трубкаре дорени э Иванов, десе э чуне веноре, гешдени э хуне. «Гьм, — гуфдире Орлов, — иму фашистгьоре э гьирогь Волга тасундейм, бугьмиш сохде, иму келе нуькерей Днепра гиросдейм, дуьшмере пиш сохде, имогьой и чуькле нуькерелей эн игьо рэхь имуре гуьрденини?».

Э и туьтем э хуне дироморени Рэхьмон, э душию погонгьой сержанти, пушонию беседе э бинтевоз.

— Хьовир капитан, — белли доре гуфдирени Рэхьмон, — фашистски офицере гуьрдейм оворде. Дировунум?

Орлов суьфде э мэхьтелиревоз даниширени э беседе пушони Рэхьмон, песеде куьнд бире, гуфдирени:

— Молодец! Сэхд яралуь бирей?

— НэгI, кемлеи, — жугьоб доре Рэхьмон.

Орлов э дуьдесиревоз гуьрдени дес Рэхьмоне, шори сохде, гуфдирени:

— Дировун пленнире.

Лейтенант фашистгьо диromo сер герде хуьрд, лерзире-лерзире. Сифет ю бу лэгьэр, балай ю гьуьндуьр, парталгьой ю малади, зерде руьшгьою нечире.

— Фамилия, нум туь? — пуьрси Орлов эз пленни.

У сере жумунде, мугу:

— По-русски не... не-не, русиш ниht шпрейхин...

— Ниht, ниht, — гIоси бисдо Орлов, — э дигьгьой-

муре талаш сохдеки, «матка, млеко, matka, яйки» гуфдире хосденбиритгьо дануьсденбирит зугьун урусире!

Пленни сере жумунд, мугу:

— Нихт, нихт...

— Гъэйгъу нибу, имуре гьисди зугьун туьре дануьсдегор. Э лой Рэхьмон чарусде, мугу Орлов: — Деберире э ки Золин, бигьил екем гоф векенуь, песде э полк фирсоре гереки.

— Хуб, — жугьоб до Рэхьмон. — Кеш!

Немец лерзире-лерзире вадарафд.

— Гъм..., — гуфди Орлов. — э плен офдоренге, бэГэвече биренуьт...

Эз е дегь минутиге, Золин гоф сохде э пленниревоз, пуьрси дануьсд жиге тупгьо, пулеметгьой немцгьоре. Угьоре эри эз бине лов сохде, миёсде е ченд одоми нуькерере гирорут, буравт э бине бузи дуьшме, кор хуьшдере сохут. Рэхьмон э командир взвод хуьшде гуфди, ихдиёр хогуь эз капитан Орлов эри фирсоре юре. Капитан огол зере Рэхьмоне, мугу:

— Туь гьеле гьони оморей эз задание, яралуь бирей, эже фуьрсуьм туьре?

— Хьовир капитан, — гуфди Рэхьмон, — эз гофгьой пленни ме варасируьм эже пэхьнуь сохде оморетге дуьруьжде пулеметгьой эн угьо. Рэхьэ ме хуб шинохденуьм, чуьнки э разведка бирем...

— Хуб, — гоф Рэхьмоне бурри Орлов. — гьечу буге э хуьшдеревоз веги Огневеш, е солдатигереш. Энжэгь хьитиёт...

— Шиновусдум, — жугьоб до Рэхьмон.

Рэхьмон хьэрмэхьгьой хуьшдере — Огнев не Микеладзере вегурде, рафдени э задание, Орлов е кем э думит нуьшде, песде вэхуьшде рафдени э ки начальник штаб хуьшде.

— Хьовир капитан, — гуфдире э Орлов дениширенигьо солдат ю Яковлев, — туь согь руз чи не хурдей. Пой хурек биёрум эй туь дие...

— Нивою.

— Зурбои валлагь и капитан иму, — гуфди Яковлев. Орлов вадарафдки, — не хурдени, не хисире. Гье э думит дери.

Э ён телефон нуьшдебугьо солдат Иванов сере тик гуьрде, мугу:

— Ме не туьни э жигей эн у мибисдоримге, имуш не мухурдим, не михиси. Эсанти беге, хэйли хоригьоре ве-гуьрдейм, оморейм пушово, батальонгьойге хэйли пушо рафдет гене, иму и нуькерере гирошде ние дануьсденим...

Песде Иванов сере тик гуьрде, дирени э хуне диromo Шими. Солдатгьо белли доренуьт э душ Шими погонгьой капитанире дире, оммо юре ние шинохденуьт.

— Капитан Орлов инжо бире? — пуьрси Шими.

— Бэхшлемиш сохит эри пуьрсире, ишму кинит? — пуьрси Яковлев.

— Ме корреспондент эн газетуьм, Юсупови фамилияйме.

— Эхи иму ишмуре ние шинохденим, — гуфди Яковлев. Шими лов э хэнде веберде, ведешенде дорени удостоверением хуьшдере.

— Имогьой шинохдум, — хэндуьсд Яковлев, — нуьшит, хьовир капитан, бэхшлемиш сохит. Гьурлугь солдатини. Гьони капитан Орлов миёв.

Шими нуьшдени, чуме-чару сохде э ило-улей хуне, гуфдирени:

— Чуьтами коргьошму, ченгьэде пушо рафдейт имбуруз?

— Бэхшлемиш сохит, хьовир капитан, гуфдире нида-ним. Ихдиёр нисд.

— Дузи, гьечу хуби. Мегу э гьер одоми. Оммо ме корреспондентуьм, ме гьемере дануьсденуьм. Биё да-нуьм. Санигэт мени. Газет чуь чиниге дануьсдени туь?

— Хунденуьм е кемлей, — хэндуьсд Яковлев. — Пес-де э лой дер денишире, гуфдирени: — ини капитан имуш омо.

Шими вэхуьшдени, когьоз хуьшдере бирмундени э Орлов. Командир батальон когьозе хунде, вогордунде, дес Шимире гуьрдени, теклиф сохдени эй нуьшде.

— Э гужевоз офдем ишмуре, — гуфди Шими. — Шев торики. Е солдат, рэхьэ шинохденигьо овурд мере.

— Ишмуре гиснеш мубу, — гуфди Орлов. Песде э лой Яковлев денишире, мугу: — Эри хурдейму чи биёр.

«Э худо шуькуьр, — гуфди э дуьл хуьшде Яковлев, э вадарафдеки, — э хотур гьуногь юш мухуру».

— Мере гисне нисди, — гуфди Шими.

Орлов мугу:



— Э иму гІэдоти: ебо гъуногъэ биё хоруним, песде э юревоз гоф сохим.

— Хубе гІэдоти, — тэгІриф до Шими.

Яковлев хурек диловунд, суьфре дешенд, Орлов не гъуногъ сер гуьрдуьт эй хурде.

— Омбар мипоит э батальон иму? — пуьрси Орлов.

— НэгІ, себэхьмунде биё вогордум э редакция. Мере воисдени е очерк нуьвуьсуьм эз товун е игиде солдат батальон ншму.

— Э батальон иму игидгъо омбар деруьт. Еки ини э пушошму нуьшди: телефонист Иванов. Дануьсденит чуь сохдиге? Эзи дуь орине пушо тел телефон бурра оморebu. Торике шев бу. Иванов рафд эри гешде бурра оморebuгъо жигей теле. Э далда, э кулегъо дуь фашист пэхьни биребуьруьт. Сес пой Иванова шиновусде сэгІэт, угъо гъов кенде оморут э серию. Иванов нетерси. Вепичи. Бугъоз екире тасунд, еккере э кордеревоз сула сохд. Теле гъуьч сохд. дуьшмегъореш куьшд. Хубе игиди?

— Хубе игиди, — гуфди Шими, гъеме гофгъой Орлове нуьвуьсде.

Песде Орлов мугу:

— Еккеш гъисд имуре. Дагестанини.

— Дагестани? — Шори сохде пуьрси Шими.

— Эри. У э разведка рафдебу ебо. Немцгъо дире разведчикгъоймуре, гъов кенде оморebuьруьт э сер ишу. Офдоребу женг, деди-деди. Э гъэд эн и женг у екем яралуь бире, офдоребу э гъэд меитгъо. Фашистгъо шишире оморенге э серию, э гІэмелевоз э муьрдеи вонори хуьшдере. Дие дуьшмегъо дес не зерет э ю. Песде фашистгъо вогошденге э окопгъошу, у вэхуьшди эри оморе. Э и туьтем э ю вохурдет гене дуь солдат дуьшме. Вепичири э угъоревоз: екире куьшди э бейбутевоз, еккере э лэгІэю ейлугъ доноре, яралуь сохде, кешире эз хори, овурде. Игиди?

— Эри, — гуфди Шими, э нуьвуьсдеки. — Фамилей эн у чуьтами?

— Рахманов... нумиюш Рахмани...

Шими ток зере одомире хуно, эз жиге вэхуьшд.

— Рахманов? Эжеи у?

— Чуьни бегем? — э мэхьтелиревоз пуьрси Орлов.

— Ме уре шинохденуьм, хьовир капитан, у Дербендиму биё бу...

— Эри, дербендини, — гуфди Орлов. — Гьеммише

эз сереботи Дербент ихдилотгъо сохде у, одохлуш гъисди мугу юре унжо...

— Хумор, — гуфди Шими.

— Эри, эри, Хумор... мэгІнигъош хундени, нум дух-дере гуърде.

— Эжи у? — пуърси Шими.

Орлов ихдилот сохд, чуьтам Рэхьмон имишев дуи-муьн гиле рафдиге эри заданиере бегьем сохде, чуьтам угъо дениширетге э вогошдей эн у. Э и туьтем телефонист сере тик туърде, мугу:

— Хьовир капитан, ишмуре оголи.

Орлов вегуърдени трубкаре.

— Эри. Чуь, Дот лов бисдо! — шори сохде, хэндуьс-дени. — Рэхь очугъ бисдо? Ой молодец, Рахманов! Дир не сохде, гирорит нуькерере, гьони имуш оморим!

Песде, элой Шими чарусде, шори сохде, гуфдирени:

— Хьовир капитан, земляк ишму гене игиди бир-мунди. Нуьвуьсит эз товун эн у е хубе очерк!

## РЭХЬМОН ВЕДИ НИСД

У шев батальон чое гирошде, екем пушово рафде, омо поисд гене э ён эн е чуькле дигъ. Э и дигъ немцгъо сэхд бине гуърдебуьруьт, эз тупгъо, миномётгъо, пуле-мётгъо гІэтош шенде, э пушо танкгъо ведефирсоре сол-датгъоймуре ние гъишденбуьруьт пушово рафде. Рэхь-мон э хьэрмэхьгъой хуьшдеревоз дегешдебу э хори, э куьндигъой дигъ, кем-кем эденбу э лапаткеревоз окопиш векенде, эй пэхьни бирей хуьшде, оmore гуниле не ра-суь э ю.

Шими э Орловевоз э песо бу, э ён е тепеи нуьшдебуь-руьт. Шев ниме бу. Немцгъо э гьово ракетегъо вешенде, эденбуьруьт товуш сохде дире гьушунгъоймуре.

— Дегердит! — хьэрой вегуърд Орлов.

Шими у не гуфдирекиш уже дегешдебу. Эи ченд сал-гъой довгІо у усдо биребу, чуь сохуге дануьсденбу э гьово ракете диреки. Е кемлей э гьово денишире, Шими дирени э, зверсер ишу е десде ранги-рангие гьирмизи, савз, кову зерде гиргине ракетгъо э десдей гуьл ухшел зеренуьтгъо лампегьоре хуно дуллунуьт. Песде виз зере эз гьово омо сес миномет шенде, песде э куьндигъо сес сохде офдо лов бисдо миномет. Э гуш Шими сес буьруьж

раси. Э и туьтем е лейтенант шуш нефес гуьрде, э чорченги оmore, мугу:

— Хьовир капитан, лейтенант Петров сэхд яралуьни, сержант Рустамов муьрди.

— Яралуьре зу-зу бигьлит ведеберде, — буйругъ до Орлов. — Эз гьеме гуит хуб дегердуьт э хори, хуьшдере мебирмунит. Гьони эйму кумеки миёв эз полк, батальон-гьойгеш куьнд эдет бире, артиллерия глэтош мокуну, кумеки мисоху.

Песде э Шими мугу:

— Гьейсэглэт Рахманове винире ниданит, капитан, у э пушо, э хори дегешди. Хубе вэхд не оmoreйт э батальон иму.

Шими э думит домунд. Уре гьечу воисденбу Рэхьмоне винире. Оммо минкин небу. Шев торик, э гьово ракетгьо, тарпа-тарп туп не гуниле э ило-уле. «Поюм те себэхьбу?» — гуфди э дуьл хуьшде Шими. Оммо те себэхьиш у инжо мунд, Рэхьмоне дире не дануьсд. Себэхьмунде зусери артиллерияйму туп шенде э сер немцгьо, эз илойге танкгьойму оmore, солдатгьош э пой вэхуьшде, пушо рафдуьт. Шими миёсде э редакция рафде, э газет заметка доре. Гьечи Рэхьмоне не дире, у могьбул вогошд э редакция, статья нуьвуьсд, газетеш фирсо э Дербенд эри Гэзизигьо.

Эз е ченд рузиге, э дорун Венгрия нуькереи Тиссаре гирошде бэгьдо, Шими гене омо э батальон Орловигьо Хинике руз зимисту бу, батальон бэгьдовой е ченд женгьо э е дигь поисде, эденбу форигьэти вегуьрде. Ире гуфдиребу э Шими корсохгьой штаб дивизия. «Чуь хуб — шори сохд Шими, — имогьой мидануьм винире Рэхьмоне, гьони уре вэхд мубу». Гьовой Шими гьони хуб бу, у гьич э машиниш не денишире, гьэише бесд э сер шинель, тапинжере бесд, сумкере эз душ гировунде — тэглди сохд рафд э дигь батальон Орловигьо дебугьо. У эденбу думит сохде, чуьтам гьони миёв Рэхьмоне муьвуьнуьге, чуьтам гьэл гуьрде юре, моч мисохуге, газет нум ю веригьоре э ю мебирмунуге. Оммо, нэгл. Э батальон омоки, э жигей шор бире, Шими могьбул бисдо. Э ки Орлов дироморе сэглэт, э дуьлию зеде раси. И вэглдогьойге Орлов юре шори-шори гьобул сохденбуге, гьони гьошгьой майор (имогьой Орлов майор бу) дуллу буьруьт. Шими мэхьтел мунд, эз ю гоф не ведиromo. Орлов дениши э

шагьбалутие чумгьой Шими, э лугьонди дерие чуню, э гьиргьире муйгьо эз зир килэхь веде бугьо, мугу:

— Нуыш, хьовир капитан, нуыш, чьуьтам гуюмгеш э туь ние дануьсденуьм. Земляк туь вир бири...

— Чуй! — мугуиге е одоми вегуьрде хьуьзуьме зе эз сер Шими. — Вир чьуьтам!

Орлов гьэл гуьрд эз душгьой Шими, кеши, нуьшунд уре э сер кравать тэхдеи, э хуне добугьо, сере гьуз гуьрде, ихдилот сохд.

...Шев миёсде наступление сер гуьрде, эри нуькерере гирошде. Оммо руз, пушой пишнейгьо, секретарь партбюро огол зере Рэхьмон не е ченд боецгьойгереш, мугу:

— Ишмуре начальник политотдел огол зери, эри партбилет доре. Бурайт, зу вогордит!

Эз и е орине пушо Рэхьмон э партия вегуьрде оморёбу, ве имбуруз э хьэрмэхьгьой хуьшдеревоз у гьечу рафд э политотдел эри партбилет вегуьрде, мугуиге эденбу э гьэруьси рафде. Диеш шор бисдо дуьл Рэхьмон э кин полковник дарафде, партбилет вегуьрде ведироморе бэгьдо.

— И партбилете э сер сине эри гердунде туь верзирей, — гуфди э Рэхьмон полковник э билете дореки. — Иמיד сохденим, ки эзиновлейге диеш хуб мибирмуни хуьшдере.

Рэхьмон эз зир чумгьо дениши э ковре чумгьой полковник, согьбоши гуфди ведиромо. Э рэхь рафдеки эз дуьл Рэхьмон ченд-жире коргьо омо гирошд: четинигьой довгю, э женггьо яралуь биригьо, когьозгьо эз Хумор оморигьо, э пушой чумгьою омо понсд чигьрет богьгьой Дербенд, эн пире дедешу, гьуьндуьре балай бешу, э сиегье бэгли ухшеш зеренбуьруьтгьо чумгьой Хумор одохлу ю. Гье ебо эз лэгиэю омо келе-келе ведиромо Хумор эри ю хундебугьо мэгнигьо.

— Бура рэхьник, шор биёвош, туь ёрме.

Эн туьни, жон, гьемей жунме, гьуьмуьрме...

Хьэрмэхьгьо э юревоз буьруьтгьо, мэхьтел бире, гуфдируьт:

— Эй баракеллогь, Рэхьмон, гьечи дие, е хэйли вэхд сес мэгни туьре не шиновусдейм...

Рэхьмон гьирмизи бисдо, дие сес не сохд. Автомат хуьшдере хуб э душ дуз сохде, бежид рафд рэхь хуьшдере.

— Хун, хун Рэхьмон, — гуфдирут хьэрмэхьгьо.

Эз синей Рэхьмон энжэгъ ох ведиромо. Чув кориге дуыл эн у гурунд бисдо. «Мере чув бири?» — пуьрси эз хуыште Рэхьмон. Песде э батальон омоки ве командир мэглуым сохдки, имишев торики биренге эдейме нуькере рере гиросде гуфдире, дуыл Рэхьмон шек сохд. «Кидан чувтам мубуге имишев», — гуфди у.

Гьовой шохьонгум бу. Асмуй Венгрия кову бу. Энжэгъ эз кими жигегьой асму эденбу лембере хуно гешде сипре булутгьо. Э дури, э зверсер эн е дигъ гьово гьирмизи бу, мугуиге эденбу глэтош гуьрде сухде. Рэхьмон э окоп хуыште дегешде, э сухденбугьо асму денишире эденбу э ёр оворде шегьер дедей хуыште Дербенде, менглуе шевгьо не шевгьлуе шохьонгумгьоре, дес Хуморе гуьрде, эеки э богъ гешденбуьруьтгьоре. Гьечи Рэхьмон э думит дери, торикиш бисдо. Гьирмизин асмуш гиросд, э зверсер окоп астарাগьош омо дуллу бисдо. «Хьэл гердо дуыл Гитлер, — гуфди Рэхьмон, — одохлугьоре эз еки журо сохд, дедегьоре эз кукгьо, шуьвергьоре эз зенгьо, бироргьоре эз хэгьергьо. Те кей мубу! Гьеле-меле жун хуышдере нис доре дуьшме. Эхир мубу ми и довгьоре!»

Ижире гофгьо омбар оморенбу э дуыл Рэхьмон, иллогьки пушой э женг дарафде. Чуьнки у э гьэд чор сал довгьо омбаре зэхьметгьо диреду, ченд сад километрагьоре, ерэгъ э душ вери пееде рафдебу, ченд гиле яралуь бире э госпитальгьо дегешдебу. Кими мэхьэл уре гьич имидиш ние биренбу ю зинде медиров гуфдире эз женг. Оммо приказ бире сэглэт эри вэхуыште э атака е ненге э разведка рафдеки эри фашистгьоре гуьрде, у гьеме дердгьоре фурмуш мисохд, пегьлуьвоне хуно видовусде, гунилере э гуш не гуьрде, пушо мирафд. Гьемин гьечи терс э дуыл недери, вехуышд у эз окоп хуыште, командир буйругъ доки эри э лодкагьо венуыште, нуькере рере гиросде.

Э у лойгей нуькере нуышдебуьруьтгьо дуьшмегьо не хисиребуьруьт. Угьоре хэбер бире эз сес, э гьово ракетегьо вешендуьт, товуш сохдут, песде эз гьово э нуькере тийгьи бисдорут парта-парт снарядгьо, минагьо, гунилегьо. Артиллеристгьоймуш сер гуьрд эри шенде туп э сер немцгьо. Келе деди-деди сер гуьрд э и торике шев зимисту. Лодка, Рэхьмон вобугьо э миглей нуькере бу. Рэхьмон не ефрейтор Николаев эденбуьруьт гьэлэгъ зере. Ракетагьо гьечу товуш сохдебуьруьт гьоворе, ки Рэхьмонигьо эденбуьруьт дире, чувтам э ило-улей лодка,

э сер глов тигьи бирениге гъургъушу. Э сер Рэхьмонигь шэхдей глов варафденбу.

— Эл-эле!—Бирден буюруж ведиромо эз Николаев.

Эз дес эн у гъэлэгъ офдо, жэндекию гъэд бире эз сер лодка, серию э сер глов дуллу бисдо.

— Гирит уре! — гуфди Рэхьмон эз солдатгьо.

Гье и гоф эз лэглэй Рэхьмон ведиромере сэглэт, е келе сес виз зерере хуно омо, мина ноле зере офдо, Рэхьмон сесиш сохде не дануьсд, чуютам лодка чаруьсде, гьеме э лодка дебирегоргьо офдорутге э гъэд глов. Ки буге эз песо хъэрой дешенд:

— Хьовир лейтенант, лодкай Рэхьмонигьо батмиш бисдо!

Майор Орлов э и дэгъдэгъэ, э сер лодкай хуьшде вери, эденбу дуьл доре боецгьоре, зури-зури гирорут нуькерере. Ченгъэде четиниш буге, ченгъэде немцгьо глэтош шенденбируьтгеш, батальон гирошд нуькерере, Орлов э атака вэхуьзунде ротагьоре, шиши рафд э сер фашистгьо, хьэл-хьэлим сохд ишуре, вегуьрд жиге окопгьой ишуре. Орлове минкин не бисдо эри фэгъм сохде, хьисоб сохде, ченд одоми пуч бириге, ки согъ мундиге. Немцгьо э пушо ведешендуьт танкгьо эри шишире оmore э сер батальон Орлов.

— Хьозур сохит гранатагьоре эри зере танкгьоре! — буйругъ дорут командиргьо.

Эз у лойге артиллеристгьойму туп шендуьт э сер танкгьой эн немцгьо. Те себэхъ женг не варасд. Эхириш немцгьо се сухде танкгьо хочверигьоре гьишде, вирихдуьт. Себэхьмунде пушо рафде, дигье вегуьрде, одомигьоре шуморде бэгъдо, Орлов дануьсд, ки Рэхьмон не хьэрмэхьгьою э лодка вебуьруьтгьо нисдуьт. Гурунд бисдо дуьл командир, езугъбери сохд у, хьэйф омо юре. «Чуь хубе сержант бу Рахманов, — гуфди Орлов. — Неужели у пуч бисдо!» Гирошд е ченд руз, эз Рэхьмон сурогъ не бисдо, эз Рэхьмон дес вегуьрд Орлов.

Имогьой Шими оmoreки, у ихдилот сохде, чуютам вир сохдиге Рэхьмоне, мугу:

— Ме гьич ни гуфдурум Рэхьмон пуч мибу. Чуь биё сохде биёв? Довгюи. Нуьвуьс эри бебей эн угьо. Туь шинохдени, гьечи нуьвуьски э игидиревоз пуч бири гуфдире у.

Орлов вини, чуютам чумгьой Шими тар бисдоге, дуьлюш гурунд бисдо, э бугъоз ю омо чуьниге поисд.

— Ме чуйтам нуувуьсуьм? — пуьрси Шими. — Дедей эн угьо жингир мубу, одохлюю...

Орлов десе э кемер зере-зере, э хуне гешде, е хэйли гоф не сохд. Песде мугу:

— Довг1ои, хьовир капитан, довг1ои.

Гье имбуруз Шими когъоз нуувуьсд эри Г1эзиз, эз Рэхьмон хэбер нисди гуфдире, чуй бириге юре мэг1луьм нисди гуфдире. Юш юхуьле-будуре вогошд рафд э редакция, е келе корреспонденция дешенд э газет, чуйтам батальон Орлов нуькерере гирошде, пиш сохдиге фашистгьоре эз лой Тисса.

### «КИМЛЕРЕ ВОЙ, КИМЛЕРЕ БОЙ»

Хумор эри Рэхьмон хосдехундиш буге, и ченд салгьой довг1о Хумор э одохлуй хуьшдеш дениширебуге, Бебе Хуморе фурмуш сохде ние дануьсденбу. У омбар хьэрекет мисохд эри дире Хуморе э шегьер, эз дур семе денишире э у раче гьошгьо, чумгьою, э у инчегеле балай духдерию, оммо Хумор э кучегьо ние гешденбу. Пушотинегьоре хуно у дие э гьомбор эй шоробиш ние оморенбу. Имогьой Мелке дедей Хуморигьо мирафд э гьомбор э ишу расиренигьо шоробе эри овурде. Кими мэхьэл Бебе серсоне хуно бире, гьомборе сэхд мисохд, э богь мирафд э у имидиревоз, ки Хумор мидобу гуфдире э Г1эрей корсохэ Г1эруьс духдерегьо.

Егиле гьечи, э вэхд богьгьоре ологь сохде, Бебе эз пушой есиёв гирошдеки э ю омо вохурд Либо. Эз дурине юре дире, Бебе мугу: «И гьэлифо эз же омо вохурд эме». Песде Либо куьнд бисдоки, Бебе виники сипре чил-чиле сифет юре, гьирмизине муйгьой сер юре не донбуле чумгьой юре, воисд юре туф шенуь гирору. Оммо Либо гьул юре гуьрде, мугу:

— Гьечи мубу, туьре хуно жогьил? Кей имид дорей мнэй гуфдире эй экино рафде?

Гьошгьой Бебе дуллу бисдо, хун ю дуьши, оммо гуьрд хуьшдере у, зобуне гоф не гуфди.

— Дениш, миём. Гоф мерд, гофи.

Дес юре гуьрде, вирихд. У омо, э богь, эз дур дениши э Хумор, томоше сохд, чуйтам гьупи зереге, мугу э дуьл хуьшде: «Хьэйф нисди э эзини гуьзел гьупи вегуьруь э дес, кор соху, у назуьшменде десгьой хуьшдере гьэлпе-

гьэлпе соху!» Ченд гилегьойгеш оmore э богъ, томоше сохдебу э кор сохдей Хумор Бебе. Оммо зугъу не бу уре эри оmore, гоф сохде э Хуморевоз. У одохлуй кесиге бу.

Эй гӀэзизе хундегор! Оmore дире туь, чужире шор биребуге Бебе шиновусденге эз Рэхьмон беде хэбер омори гуфдире! Когъоз Шими э ГӀэзизигъо расиренге эз товуней вир бирей Рэхьмон, фэгъире Божи э хун дегишдебу сер-сифет хуьшдере, Гуьлбике хэгъер ю согъэ жиге не вегъишдебу э жендек хуьше, колхозигъо — сер гуьрде эз председатель Ахмедов не вадерефде те делхэке Нэхьум эз хьэифбери сохде вомундебуьруьт, Хумор рузберуз эденбу эз дерд хьэл бире... Оммо Бебе имогъой имид сохдебу, метлеб ю миворов гуфдире. У рафде офдебу куьгъне дусд хуьше Бениле, яралуй бире эз довгӀо вогошдебугъоре, берде гъуногъ сохде, шороб доре, гуфдиребу:

— Худо и духдере эй ме гуфдири. Туь эриме илчи миӀ боши.

— ТэгӀди месох, хьовир, — жугъоб до Бенил. — Гьеле Рэхьмон белки, согъ бу, белки э плен добу...

Бебе шэгъгъэ зере, хэндуьсде, мугу:

— Плен? Ха-ха-ха-ха, плен гиден гелмезе рэхьи.

Оммо у ченгъэде хьэрекет сохд эри дефирсоре Бениле э хуней Хуморигъо, у рази не бисдо. Песде Бебе хэлово бисдо э Тенхьум холушу. Уш атказ сохд. Эхириш, чорей эн у дедей Сенем бисдо.

— Бошгу, хэлефме, ме мурам э ки Мелке.

Рузгъой васал бу. Доргъо э хьэет Мелкейгъо вебуьруьтгъо хуб велг лов сохдебуьруьт. Тегъенггъош е рач келе бире, чордогъ зеребуьруьт. Мелке э хуне э тэхьно дебу. Сенем сер-сифот хуьшдере пучунде. Божи не вуьнуь гуфдире юре, эз хьэет гиросше, э хуней Мелке дарафдгъо. Те ю оmore ебо Сенем э Мелке мэгӀлуьм сохдебу эй чужь оморениге. Уне гуьре, Сенем оmore, ихдилот духдере хосдеире сер гуьрденге, Мелке мугу:

— Евошлей гоф сох, диворгъореш гуш вери. Гьечунигеш Божи э хуни-хэмири дери. Шев руз эдей хуьшдере куьше.

— Духдер эри кук офире омори. — гуфди Сенем. — Меш дануьсденуьм Хумор одохлу бу эй Рэхьмон кук гъунши туь. Чор сал денишири. Де имогъой хэбер омори — пуч бири. Дур гердо, хуьшг бире поисдени нисдики е алагуьзлуье духдер туь. Туь дануьсдени, чуьтам дош-



демге, воровундемге е теклей мере. Э худош, э бендеш гІэѳни. Е дес ю гъѳнфит бири, е дес ю мармалад. Худо мебуру, жогъил ю, жовогъил ю, хундегор ю, пул сохдегор ю.

— Худо гъоим доро е теклей туъре.

— Е падшогъ-падшогъ зедеи гІэилме. Э зар не звруъшуъм пучунде миѳв Хуморлейтуъ... Духдер туъш имогъой оmore расире духдери. Дне пой мезе э мозол гІэилтуъ...

— Дедей миро Хуморе,—мугу Мѳлке.—Кире мою бе-ди гІэил хуъшде? Эхи биѳ э юревоз гоф сохум.

— Ихдиѳр духдер эдес бебе-дедей дери, — мугу Сенем.

Эз лой хъэет сес оmore, Мелке мугу:

— Эле, худо зено эхдуър зерегоргъой гІэилгъоймуре. Шинирени, сес Божини. Э хъэети. Имогъой Хумориш миѳв.

— Де гъечу бугѳ ме бурам. Гоф сох э духдер туъревоз.

Сенем э вадарафдеки, гъич диреш не вини, чуътам Божи, сифетгъою гъеме гъэлпе-гъэлпе, э гъейвуй хуне нуъшде, ѳине куфде гирисдениге.

— Войш, дедей миѳсде муърде туъре, гІэзизе балайме. — Песде зани куфде, домо вокурде гирисдени: — кире гІэзизе хѳлефгъо муърдиге, комини дедейгъо мере хуно хъэсрет э дуъл мунде, ярай хос небирени вегуърдетге, биѳвтгу э меревоз домо вокунутгу, гирисуътгу, во-о-ой.

Э и туътем э хъэет дироморенуът ГІэзиз не Хумор. Угъо эдет эз кор оmore эз богъ. Божи гирьѳре поюнде. вѳхуъшде дарафдени э хуне. ГІэзиз гІоси бире, сере жумундени, гуфдирени э Хумор.

— Дара, духдерме, э хуне, дуъл туъре гурунд месох, Худо кумек мубу.

Хумор сер тен хуъшдере дегиш сохде, нун хурде бѳгъдо, Мелкере воисдени гоф соху эюревоз. Оммо лѳгІэ вокурде ние дануъсде. У дениширени э зердов зеригъо, е пуст е остгъу биригъо сифет Хумор, езугъ оmore юре, дуъл юре гурунд сохде. Эхи у дануъсдени, чуътам Хумор хосдениге Рѳхъмоне...

Пушой гъово торик бире Хумор э хъэет ведиреморе, э зир доргъо нуъшде, ведешендени эз куъф когъоз, эз дов-гІо оморигъоре.

— Вой эй ме вой, — гирисдени Хумор. — НэгI, ме бовор ние сохде туь пуч бирей гуфдире...

Бирден гьирке зере, гирисдени, песде э ило-уле дениширени, кес дирениге юре. Вэхуьшдени, гIэрсгьой чумгьоре темиз сохде, вадарафдени э куче. Э домой дер гьопу э Хумор оmore вохурдени Нэхьум.

— Шевлейтуь эхэйр бу, хэгьерме!

— Эгьуьбет туь э хэйр, чуй воисде туьре!

— Эле, инжимиш мебош о, мере согьи саламети туь нен одохлуй туь воисде. Эн кечеле Бебе нэгIо, эн Рэхьмон!

И гофгьо э Хумор сэхд дегмиш бире, у хьуьршлуь бире, пуьрсирени:

— Туь чуй гуфдире, и чуй гофгьои?

Нэхьум энгуьшде э ловгьо воноре, ило-улоре чуме-чару сохде, ёвошлей жугьоб дорени:

— Ш-ш-ш, евош, сабуьр сох. Туь, хэгьерме, биё дани, ки мере эз гьеме коргьо хэбер бире гуфдире: ме эз гьеме зу дануьсденуьм э коми хуне гIэруьси нуьшунде омorige, э коми хуне гьуьдуьши дериге, мило э хуней ки биреге, войги туьре ме уреш дануьсденуьм, коми бердоре зене чуй гIэил мубугеш—кук небуге духдер.

Хумор тоб доре ние дануьсденбу, эхир гофгьой Нэхьум кей мубуге.

— Туь дуьл мере эйчуь хьэл сохде, гоф туь чуйни эхирию? — пуьрси Хумор.

Нэхьум куьнд бирени э ки гуш Хумор. Э вини Хумор варафдени буй шороб эз лэгIэй Нэхьум. Духдере воисдени нифри соху, вирихуь. Оммо эз елойге уре воисдени дануь, чуй гуфдиреге Нэхьум.

— Дануьсдени чуйниге, — гуфдире эхириш Нэхьум.— Ме шиновусдем, ки гьобоне Бебе, э гьомбор шороби деригьо, трудоденьгьой колхозникгьоре эз серюш эз дуьмюш бурра дуьздиренигьо, эз довгIо гIэмел-чемел сохде поисдигьо, уре воисдени туьре эй хуьшде хогьу...

— Те умогьой гIов гIэтош бери уре!

— Худо шиново, хэгьерме, эз лэгIэй туь Ебо гуш дор: у сес дешендики, Рэхьмон пуч бири э довгIо, дедей Мелке духдере эдей э ю доре...

Эз доруй хьэет ведироморени сес Мелке:

— Э Хумор?

— Гьой, оморум, — жугьоб доре Хумор.

— Омон фурмунде ней о! — гуфдире Нэхьум.

Ченгээде э дуыл Хумор келе дердгьош добуге, эз гофгьой Нэхьум хэнде гуърде юре. «Е дуыл сухундегор мереш бири, — мугу духдер, — чуьтам гуфдиренуьтгьоре нуно, эй муьггуьжуьз дире мундем».

Э хуне дарафдеки Хумор эз зир чум дирени Божи эдей э гьейву ведироморе. Сесе гьуз гуърде, зерени ги-рошде.

— Дедей миро туьре, э Рэхьмонлейме! — гIэрс тигьи сохде гуфдире Божи.

— Весси, э Божи, сес туьре Хуморигьош мишинову эй, — гуфди ГIээзиз. — Эйчуь гурунд сохде дуыл гIэиле. Худо келен. Э ёртуь мунди пор эз Ахмед Одигюзел хэбер оморевугьо веде нисди гуфдире. Хэбер омоки согь-саламети.

— Мере ужире мозоллуье дедей мизендге, дердгьой-ме чуь бу. Войш, вой эй ме вой!

— Ужире коргьо омбар бире, — гуфди гене ГIээзиз. — Э когьозиш ки не вери ёгьин нэхогь Рэхьмон монухьо бири гуфдире.

— Те умогьой глов-гIэтош миёсде берде беди гIэилгьоймере ки хосдеге!

Те ехэйли шев рафде ГIээзизигьо э гьейву нуьшденуьт. Ебойге шиновусденуьт сес келе-келе гоф сохдей Мелкене Хумор эдей ведироморе. Песеде оморени сес гирисдей Хумор.

— Шинирени? — пуьрси Божи эз ГIээзиз.

— Туьре герек нисди, вэхиз э хуне дарайм.

ГIээзиз шек сохденбу э гIэрей Мелке не Хумор гоф мубу гуфдире, чуьнки э гуш эн у дарафдебу сес, чуьтам Бебе не Сенем ченд одомигьоре гIэре не доре дефирсоренуьтге эй пучунде сер Мелкере. Угьо чуь гофгьош гуфдиребуьруьт: Рэхьмон пуч бири, довгIош эдей варасде, духдер туь чор сал денишири, одохлу согь мумундге генеш мидениши, пуч бIре бэгьдо, эйчуь хуьшг сохде гьишде духдере... филон, фешмокон. И ихдилотгьоре шинире, ГIээзиз, дануьсденбу э хуней Мелкейгьо гоф мубу. Уре ние воисденбу Божи шинову, дануь. У хоши гуьрде, кеши деберд Божире э хуне.

## ПЕСИНИ РУЗ ДОВГЮ

Гъушунгъой дуьмуйн Украинский фронт азад сохде, темиз сохде хоригъой Венгрире эз дес фашистгъо, ги-рошде серхъэд Чехословакияре, азад сохде шегъергъой Братиславаре, Брноре, эденбуьруьт дорбодогъун сохде дуьшмере ве куьнд бире эз столицай Чехословакия — Прага. Пушой довгю варасде, суьфдеи рузгъой май батальон эн майор Орлов эденбу женг берде э фашистгъоревоз э куньдигъой шегъер Влашим. Фашистгъо окопгъо векенде э гъирогъ е келе више, эз ён комики гиросденбу автомобильгъо рафденигъо рэхъ, тупгъо, миномётгъо ве пулемётгъо норе, ние гъишденбуьруьт гиросде гъушунгъоймуре.

Командир дивизия приказ дореду полк Орловигъоре атаковать сохут ве ёгъин вадабура хъэл сохут э гъирогъ више луле гуьрдетгъо дуьшмегъоре. У руз солдатгъой Орлов не у батальонгъойге э атака възхуьшдебуьруьтгъо, Шими гене оmore гъисмет биребу инжо. У поисдебу э тепен, э наблюдательный пункт эн командир артиллеристгъо ве э пушой чум эн у э сер перзине ве ди биренигъоре хуно, ве ди бу, чуьтам снарядгъойму рафде э сер окопгъой немцгъо офдоре лов биренбуьруьтге, чуьтам дуре э тузевоз гъэриш бире э гъово варафденбуге, чуьтам назуке доргъо эз бине офдоренбуьруьтге. Песде Шими вини, чуьтам солдатгъойму те умогъой э хори дегешдебуьруьтгъо, э пой възхуьше, «ура» дешенде видовусдугте пушово, чуьтам эз лой немцгъо гуниле не снарядгъо оморугте ве хэйли солдатгъойму э пушой окопгъой немцгъо офдоругте. У вини гъемчун солдатгъойму гене э пой възхуьше, штыкгъоре гъово гуьрде, пегълуьвоне хуно хуьшдере э сер фашистгъо шендуьтге.

Штыковой женг омбар не гиросд. Немцгъо не вововусдуьт. Шими вини, чуьтам омбаре солдатгъой Гитлер ерэгъэ э хори шенде десгъоре гъово гуьрде, пушово оморугте. Гъемин э и туьтем э наблюдательный пункт эз пушо телефон зере, хэбер дорут, ки майор Орлов сэхд яралуь бире, э сер сэгътношумо вери гуьфдире. И хэбере шиновусдки Шими, мугуиге е одоми эз сер ю, хэнжеле зе. «Эле!» — гуьфди Шими, видовусд э пушо, эз и дуь минут пушо женг гиросденбугъо жиге.

И бу хъэшдимуйн май, е руз мунде те довгю варасде. Омбаре одомигъо сер хуьшдере норут э и хоригъой биро-

рие Чехословакия е руз. мунде те довго варасде. Оммо хэйли одомигьо пуч бисдорут гъеле нуьгьимуьн маиш, э руз победаш. Гитлер уже мергимуш хурде муьрдебугеш, Геббельс э гъур дарафдебугеш, генеральный штаб фашистская Германия гъул кеширебугеш э когъозгьо капитулировать бирет гуфдире, оммо е пара генеральгьой фашистгьо, э хоригьой Чехословакия буьруьтгьо руьхсет ние доренбуьруьт солдатгьошуре эри э плен доре хуьш; дере. Расди омбаре солдатгьой Германия шиновусдебуьруьт довго варасдеире, шор бире, туьфенггьоре шенде, десгьоре гьово гуьрде, десде-десде оморенбуьруьт э плен. Оммо е парагьо, беде фашистгьо гъеле-меле ергъэ ние шенденбуьруьт.

Шев нуьгьимуьн май Шими хисиребу э више, э командиргьой батальон Орловигьоревоз. Себэхъ зусери хэбер бире, у дирени э гьово ранги-рангие ракетегьо вери, эз дури сес «ура» сес мэгИнини.

— И чуй кори? — пуьрси у.

— Победа! Победа! — шори сохде, эденбуьруьт хъэрой дешенде эз гьерло одомигьо. — Довго варасди, Германия капитулировать бири!

Шори Шимире гъэдер не бисдо. Уре мугуиге пардушгьо воромо. Гъэл гуьрде, моч сохде экию буьруьтгьо командиргьо не солдатгьоре, у видовусд э келе рэхъ эри рафде э редакция бугьо дигь. Гье бурав гуфдире, у гьони редакцире офденбу? Гьеме эз жигегьошу вэхуьшде и руз, эденбуьруьт рафде э лой Прага. Шими хэйли гешде, редакцияре не офде, э миглей е келе рэхъ ведироморе, дирени ингъэдей э рэхъ одоми гьисди: э машингьо, э гъэребегьо, э кул гъэсбгьо, э пейде рафдегоргьо. Э ён эн е дигь оморе расире, Шими вини десдей солдатгьойму эз куче гирошденбугьоре. Эз хунегьо зенгьой чешкагьо буханкегьой сипре нуне не бодиегьой шире ведировунде, гъул солдатгьоймуре гуьрде, гуфдиренбуьруьт:

— Пой, хэлефме, ги ху и пейлелей шире, туь жунимуре хилос сохдей эз дес дуьшме, туь азад сохдегормени...

Е пире зенле, лэгъэр, кемер гъэд, муйгьой серию шире хуно сипи, похли-похли гъэрс тигьи сохде, эденбу гуфдире:

— Худо зиёд сохо ишмуре, кукгьой Уруснет. Ишму имуре эз торике гьовре э товуше гьуьлом ведировундит!

И гофгьоре Шиновусде, Шиџиш гуфди э дуьл хуьшде: «Гьич э гьуьлом инсонгьо фурмуш нисохут, чуйтам солдат Уруснет жун хуьшдере доре, азади овурдиге эри миллионгьой жофокешгьой Европа нен Азия»...

## ХЬОВИРГЬО ВОХУРДЕНУЪТ Э ЕКИ

Э гьирогъ шегьер, э миглей е раче више э парк ухшеш зеренбугьо эденбуьруьт руьгь-руьгь товуш доре келе пенжерегьой хунегьо — именьей гьошире немец, ченд салгьо э Чехословакия бине зере огьоеи сохденбугьо. Пушой гьушунгьойму куьнд бире, и шегьере вегуьрде, гьошире немец гурунире гьишде, сукире вегуьрде, вирихдебу э Южная Америка. Гьемин э и именье жиге гуьрде поисдебу еки эз госпитальгойму.

Еки эз герме рузгьой май бу. Суьрхине чуйшме э гьилгьили асму гешде, эденбу тимор сохде э ригазгьой хуьшдеревоз гьиргьире келлегьой вишере. Эз гьэрей доргьо гирошде, уьшуьгь чуйшме ранги-бе-ранги сохденбу мейдугьо, аллеегьо не гуьлгьо э пушой хунегьой госпиталь вебуьруьтгьоре. Э е аллея, э пушой гуьлгьо, сер хуьшдере э кемер скамейка веноре, нуьшдебу Ахмед кук Одигюзел. Э тен эн у вебу халатгьо, шоволгьо э тен нечогьгьо вебиренигьо, оммо эз ранг руй ю мэгьлуьм бу ки, гьовой ю имогьой хуби гуфдире.

— Победа, эхириш омоки победа, — гуфди Ахмед.— Имогьой шелей хэлгь сук мубу, дьл хэлгь шор мубу. Эй кипеегьлие Гитлер, туь миьсди эз и бисд сал пушо мергимуш хурде, гуьгьбегур бире!

Е кем сере веноре э сер кемер скамейка, Ахмед чуме хисунде, э ёр овурдени Ватан дедеи хуьшдере, бебе-дере, хьовиргьо — хьэрмэхьгьой Дербендире, гирошде рузгьой довгьоре, четинигьоре, песде гьуз бире, гуьрдени эз яралуье зани хуьшде.

— Эле ле-ле, дорд доре ние поисдеки. Кей хуб мубу и занеме! Могьгьул хьэрзо мисохдуьт мере, мурафдуьм э хуне.

Гене сере э сер скамейка венорени. Э пушой чумию оморени чигьрет сифет бебешу, снегье бигьгьой ю, келе чумгьой ю, фирегье душгьой ю. Песде сер гуьрденуьт чумгьой Ахмед эри э хов рафде. Э и туьтем эз лой госпиталь, сипре халат э тен вери, назуке пойвокугьо э

пой вери, куьнд бирени е назуке, сипре гъуьндуьре си-  
нее зен хэйлогъи.

— Шев э хэйр бу, сержант! — хэндуьсде сестра.

Ахмед нэхэбереки хуьшдере вешенде, гуфдирени:

— Руьхшенд сохде туь э ме, Вера?

— Худо мегуё, — хэндуьсде Вера.—Руьхшенд эйчуь?

Песде гузетмиш сохде, чуьтам Ахмед э ю денишириге,  
мугу:

— Гьечу эйчуь дениширей э ме?

— Хьэз оmore мере эз туь...

— Эз ме?

— Эри, эз у ковре чумгьой туь, эз у гендуьмие муй-  
гьой туь, эз у глэселе ловгьой туь, эз у ширмогъие дон-  
дугьой туь, эз у глэсуьлменде хосиет туь...

— Весси, весси, — десгьоре берде-овурде, хэн-  
дуьсде-хэндуьсде гуфдире Вера. — Ме эдем дире туь  
ошугъ бирей эме. Эз кеевози?

— Мехэнд э ме. Эз дуьли гуфдиренуьм.

— Песде меш этуь ошугъ бисдорумге, чуьтам му-  
бу? — пуьрси Вера.

Ахмед шори сохде, мугу:

— Диеш хубте.

Вера сергъуз бисдо, дуьл ю гурунд бисдо, мугу:

— Глэмел ниёв.

— Эйчуь?

— Шуьверме гъэгъри мубу, — ловгьой Вера гене э  
хэнде варафд.

Ахмед мэхьтел мунд, сере тик гуьрде пуьрси:

— Эле, туьре шуьвериш гьисди?

— Эгер согъ мундиге, гьисди, — эз синей Вера ох ве-  
диromo.

Э пешмуни офдо Ахмед, мугу:

— Ме туьре духдер хуне дануьсденбуьруьм.

У минет сохд э Вера, ихдилот соху, чуьтам шуьвер  
биреки ю гъечи омори инжо гьисмет бириге.

— Довго сер гуьрденге, шуьвер ме лейтенант бу, —  
гуфди Вера. — Иму зигьисденбирим э Украина. Те не-  
мецгьо оmore ме вирихде недануьсдуьм. Немецгьо оmore  
ренге, мере гуьрдуьт, дешендуьт э лагерь. Песде вену-  
шунде э эшелон э зенгьойгеревоз фирсорут эри кор  
сохде э Германия. Э рэхь ме шендуьм хуьшдере эз сер  
вогун. Кем мундебу ме э зир вогун домундени. Чуьта-  
миш бисдоге, вирихдуьм. Песде мере гене гуьрдуьт. Э е

десдейгеровоз фирсорут э лой Австрия. Гене дубореш вирихдуым. Оморум э и шегьер Чехословакия, э хуней эн е чех пэхьни бисдорум. Туь дануьсдени-зугьун чехгьо э зугьун уруси ухшеш зере. Чехгьо хэлгъ имуре хубиш хосденуьт. Мере кориш доруьт, пэхьниш сохдуьт тейте ишму оmore ведироморе инжо. Ишму оморитки, рафдуьм эки начальник гарнизон, ихдилот сохдум э серме оmore гьозиере. Мере фирсорут эй кор сохде э госпиталь.

Ахмед чуме не вегуьрде эз сифет Вера еки-еки эденбу гушдошде гьеме гофгьой юре. «Езугъ», — гуфди э дуьл хуьшде Ахмед, песде пуьрси:

— Имогьой шуьвер туь эжеиге ние дануьсде?

— НэГІ. Нуьвуьсдем э Масков. Гьеле хэбер нисди Дениширем. Белки туь дире чи бирейге шуьвер мере. Орлови фамилею.

— Орловгьо омбари э гьуьлом, — гуфди Ахмед ве э думит домунд.

Э и туьтем ки буге эз лой госпиталь Верае хэрой зе.

— Вера Павловна, зу-зу биё!

— Оморум! — жугьоб до Вера, видовусде эз ки Ахмед.

— Иш гьечи, — ох кеши Ахмед, — мен сене бенд богьлемишдуьм...

Гьечи э думит дери, э гуш Ахмед е сес мэГІни азербайджани омо э гьовой мугьамат. «И ки биё бу», — гуфди э дуьл хуьшде Ахмед. Воисденбу юре э пой вэ-хуьзуь, дирени еки халат э тен вери, сери ю бесде, расди гьул э гипс бесде эдей мэГІни хунде-хунде э лой ю куьнд бире. «Эле, и Рэхьмоне хунои», — гуфди Ахмед. Песде у куьнд биреки, Ахмеде мугуинге пардушгьо вероморе.

— Эде, туь Рэхьмони?

— Эри, туь Ахмеди?

Шори эн игьоре гьэдер ние бире? Рэхьмоне воисдени гьэл дешенуь э герден Ахмед, оммо Расди гьул э гипс деригьо ние гьишде. Ахмед ю гьэл гуьрдени Рэхьмоне, моч сохденуьт екире.

— Ахмед! — Рэхьмон дениширени э сиегье чумгьо, сиегье гьошгьой Ахмед, сифете венорени э сифет ю. — Ме гьечу дануьсденуьм э хов дирейм екире, эхириш варад довго, эхириш гьуьгьбагур бисдорут Гитлер не хьэрмэхьгьой ю! — сере тик гуьрде, дениширени э гьово



нефес кешире, гуфдирени: — Пе-егь! Эвир гьовош темиз бири!

Хьовиргьо нуьшденуьт э сер скамейка, э рач еки.

— Рэхьмон, ме туьре э госпиталь те имбуруз эйчуь не дирем? — пуьрсире Ахмед.

— Мере ди овурдет инжо.

— Гьери ихдилот сох, — гуфдире Ахмед, — туь э же бири эхи! Эриме эз хуне хэбер оморики, Рэхьмон пуч бири гуфдире. Ки лов сохди песг ижире хэбере?

Рэхьмон мэхьтел бире.

— Чуьтам, ме пуч бирем гуфдире! И чуь кори? Ки биё нуьвуьсуь? Расди ме хэйли вэхд когъоз не нуьвуьсдем. Не мере эз хуьшдеш хэбер не бири. Гурунд бу хьол ме, гьем сэхд яралуь, гьем чум вокурде не дануьсдем, хэйли вэхд зугьунме э кор не омори.

— Гьечи чуь кор омори э сер туь?

— Э серме, бирор, келе коргьо оморебу. И giroшди-гьо зимисту, э Венгрия гьисдики иму миёсдим giroшде е келе нуькерере. Шев торик бу. Э лодкагьо венуьшде, сес не сохде, десде-десде сер гуьрдим эй giroшде. Фашист-гьо шиновусдуьт. Э гьово вешендуьт ракетегьо, товуш сохдут. Песде сер гуьрдуьт парта-парт эй шенде тупгьо не минагьо. Шэхдегьой глов э гьово варафде, тигьи биренбуьруьт эсер иму. Оммо е доне солдат иму ние терсиренбу. Кими лодкагьо уже эгьирогь нуькереш расиребуьруьт. Ебойге мугунге э серме е кутуки раси, гьогь бисдорум. Дие мере эз хуьшде хэбер небисдо. Песде, бэгъдовой ченгъеде мэхъэлиге, чумгьойме очмиш бире, диренуьм ме дегешдем э сер кравать, э гъэд сипре простинегьо, э ёнме нуьшди е жогьиле сестра, эдей гуфдире:

— Эхудо шуькуьр, чумгьоре вокурд.

— Мере воисд пуьрсуьм э серме чуь кор омориге, гоф сохде не дануьсдуьм, зугьунме мугунге лол бу. Сестра гъэлемдеше до э ме, э хэтевоз сер гуьрдуьм эй гоф сохде. Духдиргьо мере дируьтгьо мугу, олхоин бош, лап хуб мибоши, хуб мибоши, хуб мисошим туьре. Оммо ме бовор ние сохденбуьруьм ве уне гуьре э хуне когъозиш ние нуьвуьсденбуьруьм. Мугум, кидан песою чуь мубуге. Нуьвуьсуьм лол бирем? Умэхъэли дедейму хуьшдере муькуьшд, Хумор жингир мибисдо...

Ахмед сере жумунд, мугу:

— Келе коргьо оморе бебей эсер туь!

— Де имогьой четинигьо giroшдет, — жугьоб до

Рэхьмон. — Эи зуригьо, бирор, гьердуюеки мурайм э хуне. — Песде денишире э Ахмед, мугу: — туыш эхьисоб келе четинигьо дирей?

— Дне мепуьрс... Старая Русса, Курская дуга, Харьков, Днепр, Днестр, Бухарест. Будапешт, Братислава... Дуз яздегь танкгьой дуьшмере сухундем... Меш ченд гиле яралуь бирем. Э-эгь, дие у рузгьо рафдуьт, э хотур екире дирей биё е бенд мэгни хуним. Суьфделе лэглэре вокурде Ахмед мэгни хуну гуфдире, оморени Вера.

— Ох, чуй раче сес вери туьре, сержант. Э коми зу-гьу хунде?

Ахмед чуме не вегуьрде эз Вера, пуьрсирени:

— Гьич э Дагестан бирей?

Э и туьтем Вера дирени, чуьтам Рэхьмон дуь чум хуьшдере э мэхьтелиревоз э сифет ю денори гьишдиге.

— Гьечи эйчуь дениширейт, нечогь? — пуьрси Вера.

— Ме ишмуре э жеиге дирем, — гуфди Рэхьмон, — оммо э же диремге, э ёрме нисди.

Вера душгьоре вешенде, гуфдирени:

— Одомигьо э еки ухшеш зере. Белки еккейгере дирейт?

— НэГІ, нэГІ, — жугьоб до Рэхьмон, — ишму чуь-жоннит?

— Эз Украина, эз Донбасс.

— Фамилешму чуьни?

Вера хэндуьсдени.

— У зиёдини. Фамиле эйчуьни?

— Ние воисдеге могуит, — гьэгьри бирере хуно гуф-дирени Рэхьмон.

Вера гьирмизи бире, мугу:

— Нечогь, гьэгьри мебошит, фамилейме Орловаи.

— Чуь, Орлова?

— Эри. Чуьни бегем?

Рэхьмон зур-зур-ведешендени э бесде нисдигьо дес хуьшдеревоз эз куьф халат е книжка, эз гьэд книжке ведешендени е сирот, гьемею локо-локо эз э гьэд глов дарафде.

— Гьери винишит! — бирмундени сироте э Вера.

Вера сироте вегуьрде, дире, мэхьтел мунде.

— Эз же омори ишмуре и сирот?

— Капитан Орлов дореду мере ерёвурд.

Вера куьнд нуьшдени э ки Рэхьмон.

— Ишму шинохденит Орлова?

— Чутьтам нишиноху? У лап хубе командир ме, хубе дусд ме бу.

— Бу? Имогьой? — тоб не доре пуьрси Вера.

Рэхьмон сере гьуз гуьрде, мугу:

— Ние дануьсденуьм. Ме эз зуревоз э госпитальгьо деруьм. Мере эз хуьшде хэбер не бири ченгъэде вэхд. Оммо ишму дуьлпесо мебошит, Вера. Орлов согь саламети. Гье э и фронт иму мубу. — Эз Чехословакия миофит уре. Э штаб фронт бурайт, унжо мугуют...

Э и туьтем Рэхьмон дирени Шими формой майори э тению вери, сумке не фотоаппарат э гердению дери омо поисд э пушошу.

— О-гьо, эле, ишмунит. — чумгьоре суьфде хисунд, песде, вокурде, гене гоф сохд Шими: — Рэхьмон? Ахмед? Ме хов диренуьм небуге и уёгъини?

Рэхьмонигьо э пой вэхуьшденуьт.

— Хов нисди, хьовир майор, — гуфди Ахмед. — Имуним.

— Бобовой! — шори сохд, г1эрс тигьи сохд, синесов бисдо Шими э Рэхьмон не Ахмедовоз. — Ме ишмуре пуч бирейт гуфдире дануьсдем ки.

Песде е муьшд зере эз сифет хуьшде, гуфдирени:

— Чуь хэре кор сохдум ме, ме эйчуь нуьвуьсдуьм эй Г1эзиз Рэхьмон пуч бири гуфдире!

— Туь нуьвуьсдей! — мэхьтел мунд Рэхьмон. — Туь мере гьич э довг1о диреш не дирей ки...

— Э-э-э, не дирем. Муьвуьнуьруьмгьо хуб мцбисдо. У ихдилот сохд, чутьтам у шев э батальон оморевуге, чутьтам эрию унжо ихдилот сохдебуьруьтге эз товун игидигьой Рэхьмон, ведешенд газитеш, бирмунд, гуфди чутьтам дуборе оморенге шиновусдебуге беде хебере ве командир батальон гуфдиревуге нуьвуьс гуфдире хэбер э Дербенд.

— Фэгьире Орлов гуфди нуьвуьс гуфдире...

Вера те имогьой лос бире, шиновусденбугьо, мугу гьебо:

— Орлов, имогьой эжеи у?

Шими хуб дениши э сифет Вера, синемиш сохде, пуьрси:

— Ишмуре эйчуьи, шинох ишмуни? 1

— Шуьвер мени.

— Чуь!

Сер Шими гъуз бисдо, мугуиге е одоми дуьпутере зэ эз ю. Вера вэхуьшд, гъул Шимире гуьрде, вогоси э ю.

— Майор...

Сифет Шими гъирмизи бисдо, чумгьой ю тар бисдорут.

— Хьэшдимуьн май, е руз мунде эй победа, эз дес дуьшме муьрди...

Е буьруьж эз Вера ведиромо, сес ю э гьемей више лов бисдо. Вера офдо э хори. Рэхьмон не Ахмед хуьшдере шендуьт э посой ю. Дес Рэхьмон бесдебу.

— Туь пой, — мугу Шими.

Ахмед не Шими гьово гуьрдуьт Вераре, нуьшундуьт э сер скамейка. Ахмед ленге-ленг рафд, глов овурд. Песде сестрагьойге ведироморе, дебердуьт Вераре.

Шими, Ахмед, Рэхьмон хэйли вэхд, эз лэгIэшу гоф неведироморе, сергъуз нуьшдуьт, мугуиге угьо ёс гуьрдуьт эри куьнде хьовир ишу Орлов.

— И пушогьо, хьовиргьо, ме е солдате диребуьруьм инжо: Лезги бу, эз дигь Усух-Чай. Дануьсденит чуй гуфдиребуге у? У эйме е мэгIни хунд э зугьун азербайджани: гезмеге гъэриб ерлер ехши дуьр, уьлмеге уьз ватануьм ехши дуьр...

Рэхьмон е келе ох кешире, мугу:

— Хубе мерд бу Орлов.

— Езугьи э Вера. — гуфди Ахмед. — Уре тэхьно гьишде гIэмел ниёв.

...Игьо гьеле инжо мунугу, имогьой, гIэзизе хундегор, ме ихдилот сохум эй туь, чуй буге эн рузгьо э Дербенд, э ватан дедей игид иму Рэхьмон кук ГIэзиз.

## МЕЛХЪЭМ ЯРАГЬОЙ ДЕДЕЙ

Сер шев бу. Бэгъдовой чор салгьой довгIо имогьой э кучегьой Дербенд эденбуьруьт лампегьой электри товуш доре. Пушотеннегьоре хуно э Ленински куче жем-жогьил, гIэруьс-духдер эденбуьруьт гешде. Пушой кино-театр «Родина» одоми пур бу. Эз репродуктор сес шоре мэгIнигьо эденбу оmore. Энжэгь могьбул бугьо дуьл Хумор бу. Шохьонгум эз кор вегошде, э Гегей хэгьергили хуьшдеревоз э ихдилот поисде, те торик бире поисдебу э диш хунешу ве энжэгь эз зир чум дениширенбу, чуйтам мозоллуье гIэруьсгьо гъул, шуьвергьо, одохлу-

гьошуре гуърде, э гешд рафденбуърютге. Песде гье ебо эз синей эн у е келе ох ведироморе. Гегей мугу:

— Туь текей мухури гьечи хуьшдерей? Э сифет туь хун не домунди ки, духдер...

— Валлагь мере э и гьуьлом мундеш ние зонсде, — гуфди Хумор.

— Эле, мемуно эхдуър зерегоргьой гїзил дедей туь книге! Чуь биё сохде биёв эй? Худо эйтуь гьечи нуьвусди...

Ченгьэде Гегей хьэрекет не сохд эри дуьл доре Хуморе, э гуш эн у не дарафд. Сер эн у гиже хуно биребу мунде, дуьл эн у эденбу пар зере вирихде. Те имогьой уре ҫмид бу Рэхьмон согьи гуфдире, оморе довгїо варасди эз Рэхьмон е хэбер не бисдоки, э дуьл Хумор ченд жире шекгьо офдо. Те довгїо варасде Хуморе е кем тоб семе буге, довгїо варасде бэгьдо у эй хуьшде жиге ние офденбу.

— Ме и дерде хьэл сохде варасде нидануьм, — гуфди Хумор.

Э хуне у омо сер дуллу, хэсде, пойгьою гьургьушу. Эз кор хэсде не биребу Хумор. У хэсде биребу эз дерд, эз думит.

— Эжен туь, духдерме? — пуьрси Мелке, — гьечи дир эйчуь!

— Э гешдегьо буьруьм, э сейл, — эгьэгьревоз жуьгоб до Хумор.

Песде винире э сер стол е келе бухчей темизе молгьоре — бастонгьо, эвруьшуьмгьо, сердегигьо, пойвокугьой лак, пуьрси:

— Игьо чуьни дедей?

Мелке менехьэфи соегь э сифет Хумор денишире, мугу:

— Дедей миро туьре, чигьой гїэруьсворини дие, эз хуней Сипройгьо...

— Чуь?! — е хьэрой вегуьрд Хумор, — эз ме не пуьрсире мере э шуьвер дорей! Туьре чуь ихдиёри? Мере одохлуни. Одохлуйме Рэхьмони. Небуге фурмуш сохдей!

— Эле, хэлеф бирор миро эхдуър зерегорун гїзилгьоймере, — десгьоре лов сохде гуфди Мелке. — Евош гоф сох, Божийгьо мишиновут о, диворгьореш гуш вери о.

Хумор бухчегьой чигьоре эз сер стол э хори шенде, хуьршлуь бире, гирисд, рафд дегешд э хори хуне, э сер

тэхте-палас, сере пэхьни сохде, гьирке вокурде, гирисд. Мелке хуьшдере шенде э сер Хумор, гьуз бире э ён сер ю, мугу:

— Э духдер, те довго варасдеш дениширейм. Согь мибисдоге, те имогьой могошд Рэхьмон. Нэхогь Рэхьмон киниге глов-гэтош бери юре э кук духдеревоз. Мере бегем ние воисде мозол туь? Мере бегем ние воисденбу согь-саламет биёв ведиров Рэхьмонлей туь? Де имогьой эйму худо ижире нуьвуьсди. Текей мидомуни э хуне? Песде, вой эйме гердо, хосдегориш нибу туьре...

Хумор э лой дедешу не денишире, мугу:

— Эз хуне пиш сохде мере? Жигей туь тенги? Воисдениге мадарам мурам. Эйтуь мунугу хуне!

— Эле, дедей миро туьре! — Мелке э дуь десевоз гьэлпе кеши сифет хуьшдере. — Эз лэгэй туь чуь гофгьо ведироморе. Туь не бире руз ме мегердо. Нумлей-муре э беднуми меведебер, во эй ме!

Хумор вэхуьшдени э пой, темиз сохдени гэрсгьой чуме, сер хуьшдере бесдени. Э и дэгьдэгьэ э хуне диromорени Гегей, сер тен хуьшдере дегиш сохде, темизе гуьле-гуьле булишиш э тен, сипре дуьгуьр э сер, саре добоне туфлигьо э пой.

— Хумор, кеш е кем вадарайм э куче дие, те кей э хуне нуьшде поисде?

— Эри, эри, духдергьойме, — гуфди Мелке, — Вадарайт, екем гердит. Егиле е пейле чой-чи хурит.

— Ме хурдем, — гуфди Гегей, — Хумор хуругу.

— Мере нивою, — мугу Хумор. — Кеш.

Духдергьо э куче ведиромореки, пушой ишуре оморе гуьрдени Нэхьум.

— Омбарак бу, гегей Хумор, — мугу у. — кечеле Бебе мугу дедей Мелкешмуре фирмунди гуфдире шиновусдем.

— Чуь! — Гюси бисдо Хумор.

— Эле, гьэгьри мебошо. Ме э хуней кечелигьо бэхшей шороб мереш хурдемки.

Песде э овозевоз гуфдирени:

— Кечеле пири зен хосди, гьемере темэхь венгесди. Эз пэхьникиме дефирсори илчигьоре. Гьечу дануьсди мере хэбер нибу. Хубе кори! Э шегьер эй духдер хосде илчи дарав, Нэхьуме хэбер небу... Гьуь... У коре э герде мегуьруьм ме? Э гьержой шори-ники бисдо, мило-

суьгуьдо бисдо, ме биё дебошум, омборокбу сохум, гуьдуьш э лэгIэ вегуьруьм.

— Весси туь мунош, Нэхьум, — гуфди Гегей, — би-гыл бура рэхь туьре.

Нэхьум э гуш Хумор куьнд бире, мугу:

— Омон о, рази мебош, екиреш ихдиёр нисди рази-менди туь небире эри э шуьвер доре туьре. И девр Николай нисди, и девр Совети...

Хуморе эй хэндуйсьде дуьлиш небуге, ловгьой ю э хэн-де варафд.

— Э худо шуькуьр, е рэхь норегор, дуьл сухундегор мереш гьисди.

— Гьэгыри мебош, жон Гегей,—гуфдире, сара балай Нэхьум бочка гулу-гулу рафденигьоре хуно песово рафд, эз пушой Хуморигьо дур бисдо.

Э и герме шев май Бебе нуьшдебу э хьовиргьой хуьшдерево эри шороб хурде, имид бире, диртегьо эри бэхшгьо доре рафде э хуней Хуморигьо. Оммо Божи дедей Рэхьмонигьо э сиегьи геймиш бире, сер сифетю гьэлпе-гьэлпе, хуни бире, нуьшдебу э гьейву, эденбу ноле зеренигьоре хуно, евош-евош гирисде, зани куфде. ГIэзиз сес гирисдей Божире шиновусде, диеш дуьл ю гурунд биренбу, эй хуьшде жиге ние офденбу. Эхириш у мугу:

— Эзен, туь худой туьре хосдениге весси. Текей муькуьши хуьшдерей?

— Вой эри ме вой,—мугу Божи.—Кимлере вой, кимлере бой, хэлефме. Екигьо жун хуьшдере дорет, екегьойге эдет хьэз сохде! Вой эй дедей Рэхьмон. Руригьой дедей туьре согьолмиш ки мисоху, хэлефме! Эри ярагьой дедей туь мелхьэм ки мубу, хэлефме! Худо, худо... э хуни Гитлер не домундигьо сике э кечеле Бебеш ни-домуну.

ГIэзиз гIоси бире. мугу:

— Э зен, туь жун рафде рэхь бебей туь, весси, екем хомуш бош!

Божи э гуш не гуьрде, домо вокурдени, гирисде. ГIэ-зиз тоб ние доре, эз гьул Божи гуьрде, дебердени юре эз гьейву э хуне.

Гьово те имогьой лос бугьо, екем кулок вокурде. Фирегье луйгегьой тут доргьо не бэгли доргьой хьэет ГIэ-зизигьо евошлей жуьмуьсьде, мугунге эдете гуши-гуши сохде. Э зверсер доргьо, э гьово, эз миглей булутгьо

менг ведироморе, мугуиге эдее чум зере эз эсвер. Э хъзет дироморенуьт Рэхьмон не Ахмед, парталгьой солдати э тен вери, э синегьошу орденгьо ве медальгьо. Э дес гьердуюшу чемодангьо де.

— Нэхэбереки медара, — гуфди Ахмед, — митерсуь дедешму.

— Бошгу, — жугьоб до Рэхьмон, оммо чум ю э лой хуней Хуморигьо домунд.

Ахмед синемиш сохде, мугу эз Рэхьмон:

— Данувденуьм дуьл туь эдей тэгИди сохде одохлуре эй дире. Оммо ебо дедей пушои. Кеш э хуне!

Сесе шиновусде эз хъзет, Божи хъэрой дешенд эз хуне:

— Кини унжо?

— Менуьм, Ахмедуьм, — жугьоб до Ахмед, — кук Одигуьзел.

— Хош оморей, хэлефме! — гуфдире Божи не ГИэзиз гьердуюеки ведироморе, диренуьт э Ахмедовоз Рэхьмонниш поисди.

— Эле, Рэхьмон! — эз шори сес ГИэзизе шинохде ние бире.

Божи гьов кенде, шендени хуьшдере э сер Рэхьмон.

— Вой эй дедей туь, Рэхьмонлейме, жунлейме, жи-герлейме. — Сер ю офдорени э сер синей Рэхьмон, ГIэрсгьой шори чумгьою тигьи биренуьт э сер орденгьо, медальгьою.

— Эри ярагьой дедей мелхьэм омори, хэлефме. Вой эй дедей туь, чум дуьшмегьо кур гердо, туьре пуч гуфди-ребуьруьт...

Гьэл гуьрдени, моч сохдени Рэхьмонеш, Ахмедеш.

— Э зен, ме э туь не гуфдиребуьруьм Рэхьмон согьи, миёв? — гуфдирени ГИэзиз.

— Кешит ебо э хуне, кешит, — мугу Божи гьэле не ве-ебо эз торике гьовре э товуше ГIуьлом ведировундики, Рэхьмонлейме...

Рэхьмон тимор сохде сер дедешуре, гуфдирени:

— Мегирис, жон дедей, мегирис.

— Кешит ебо э хуне, кешит, мугу Божи гьэле не дешенде эз герден Рэхьмон.

Ахмед э гуш Рэхьмон куьнд оморе, мугу: «Вера э куче поисди, ме бурам. Песде э лой божийгьо чарусде, гуфди:



— Ишму дарайт, меш варам зевер э хуне, дедейгьойму дуьл посои ишмуре хуно.

— Тел эйчуь незеребирит? — пурси Г1эзиз.

— Гьечи хуби, нэхэбереки! — хэндуьсд Ахмед, чемодане вегуьрде э дес. — Бебейгьойму хубут?

— Гьемеш хуби, хоси, — жугьоб до Г1эзиз, — бура.

Дие у не гуфди, ки Одигизюл сэхд эз дуьл г1эзорлюь бире, дуь мегь э хьэлов дебири, дие гьувот небире юре, эрзо дори эз председатели эн колхоз ведиромори. «Бигьил бурав э хуне, унжо мидануь» — гуфди э дуьл хуьшде Г1эзиз. Ахмеде рэхь сохде, Г1эзизигьо э хуне дарафдуьт.

Гьемей эн и сесгьо, ихдилотгьо э гьейвуй Г1эзизигьо биреbugьоре шиновусдебу Мелке дедей Хуморигьо. Эз г1эйб у хуьшдере бирмунде, хош омори ние сохденбу Рэхьмоне. Энгуьшде э донду деноре, хуьшдере бибине-бибине сохде, у эденбу гуфдире: «И чуь кор бисдо ме сохдум? Ме э гоф Хумор эйчуь неденишуьруьм! Мере худо эз келлей сер миёсде зере, — те имогьой незериге. Ме нум духдермере э беди эйчуь ведебердуьм! Вой эйме вой, эй мунде рузгьойме вой». У эденбу хуьшдере хурде, сер хуьшдере куфде. «Ме э руй Божийгьо чуьтам миденуьшуьм, э худо!»

Песде чигьо, эз хуней Бебейгьо оморигьоре бухче сохде, Мелке евош-евош дуьзд эз хьэет вадарафденигьоре хуно, вадарафд эз г1эрей доргьо, Божийгьо не вуьнуь юре. Дуп-педуз чигьоре берд Мелке э хуней Бебейгьо. Мелке омогьо гьеле Бебейгьо э сер суьфре вебуьруьт, пейле-пейле буьруьт. Лерзире-лерзире э хьэет дироморе, Мелке сес сохд:

— Э Сенем, гьери е минут инжо ведиро!

Сенем зурн-зурн ведироморе эз хуне, теклиф сохд:

— Диро, э хьэет эйчуь поисдей, гьэбиле? — Песде бухчере дире э дес Мелке, мэхьтел бисдо: — игьо чуьни:

Ловгьой Мелке лерзируьт.

— Дие мепуьрс, жон Сенем, — гуфди у гирисде соегьи, — гьисмети, Рэхьмон омори, согь саламет. Эй кук туьш духдер офд миёв.

— Чуь! — е хьэрой вегуьрд Сенем.

Э сес хьэрой, Бебейгьо ведироморут. Оммо Мелке бухчере норе, дие инжо не поисд, г1эсбе хуно видовусде, э хуне рафд.

Э хъет диромореки, Мелке дирени Рэхьмон не Хумор э е гъирогъ э зир доргьо поисдет. Хумор э десевоз тимор сохде сифетгьо, синегьой Рэхьмоне, эдей гуфдире:

— Мере имид бу, туь могорди гуфдире. Оммо и ченд мегь имуре гIэрс э чум эйчуь гьншиди? Бегем е когъозлеш фирсоре ние биренбу, э жендек дедешму гушд не вомунди, э сифетме нен хэгьер туь хун не домунди...

— Ой Хумор, — мугу Рэхьмон. — туьре хэбер нисди чуь коргьо э серме оморевуге.

— Кими гIэруьсгьо не денишире э е шуьвериге рафдет. Белки меш мигьншдуьм мирафд? — пуьрси Хумор.

— Миоморум эз хуней эн у шуьвер медировунд туьре. — жугьоб до Рэхьмон, — Ме туьре э кес нигьншдуьм.

Мелке шори сохде-сохде э хуне дарафд. «Э худо шуькуьр, гьечи варасд и кор. Вой эйме биребу» — мугу у.

Хэбер Рэхьмон омореи зу лов бисдо э шегьер. Хэйли шевиш рафдебуге, э хуней ГIээзигьо сер гуьрдуьт эри оморе, кура бире хэгьер-бирор, гьовум-гьэрдеш, дусдошне. Оморут Гуьлбеке э шуьвер хуьшдеревоз, Эсеф гьэлейхэнжели э кук хуьшде Хьэнуко не гIэруьсезов, диртегьо шоре хэбере шиновусде, омо ГIэсоилиш-лэгьэр, хиегьой кемер ю эз пинжек мэгIлуьм, ранг ю зерд.

— Сер чум ишму руьшуьм бу, эй хэгьерме Божи, эй бирорме ГIээзиз, — мугу у, — туь хош омореи, хэлефме, Рэхьмон!

Гьэл гуьрде Рэхьмоне, се гиле моч сохд ГIэсоил.

— Гирор нуьш, ГIэсоил, гирор, — теклиф сохд Божи, э дорун хуне жиге доре ГIэсоиле.

Эз довгIо сер гуьрде эйлоревоз ГIэсоил гIэре-бир диренбу ГIээзие. У биренбу э Эгьлеби, председатель колхоз. Песде нечогъ бире, эз Эгьлеби оморебу, е хэйли вэхд э хьэлов домунд. Е бобот бире бэгьдо, ГIэсоил рафд дарафд эй кор сохде э Уполминзаг. Рузгьою гье эденбу гиросде э командировкагьо, э дигьгьо. ГIэре-бир э шегьер дебиренбугьо рузгьош, э хуне кор биренбу юре — э хуне гIэйлгьо дебу, нечогъэ зен дебу. Оммо хэбер Рэхьмон омореиरे шиновусде сэгIэт, ГIэсоил суьфделе эз командировкеш оморебуге, хэсдеш буге, зури-зури э хуней ГIээзигьо омо.

— Ме туьре эйме эз кук кемте ние дануьсденуьм, — гүфди Гэсоил эз Рэхьмон.

— Беневолейтуьш шор биёво! — мугу Божи.

Гэзиз шефд дениши э Божи. Гэсоил мугу:

— Бенево дие ниёв. У пуч бирен э ме зу мэглуьми.

Е хэйли вэхд эз екиш сес неведиромо. Гэзиз ловгьой хуьшдере глэнж гуьрд, омбар гэгьри бисдо эз Божи ярай мерде эри тозе сохдеи. «Гофе жигеюни эхи, эгъубеттуь эхэйр», — мугу э дуьл хуьшде Гэзиз. Белки инжо нуьшдегьоргьо гье гьечи гоф не сохде мипоисдуьтге, оммо э и дэгьдэгьэ э хуне омо диромо Нэхьум.

— Гьэдой Рэхьмон э синей Нэхьум, — гүфдире у эз дер дироморе сэгIэт, дуь десе э сер сине веноре, — туь хош омори, софо овурд. Сер чум ишму руьшуьм бу, бирорме Гэзиз, хэгьерме Божи.

Куьнд бире, дес Рэхьмоне гуьрде, моч сохдени.

— И, туь чуь сохде! — гэгьри бире Рэхьмон.

— Гэгьри мобош, гэзиз, эз хосдеи дуьлмени.

Песде куьнд бирени эз Гэсоил.

— Туьреш хош винуьруьм, лелей Гэсоил...

Гене чуь буге эденбу гүфдире, лэгIюре зе Гэзиз.

— Хуби, туь мунош, э Нэхьум. Нуьш. — Песде э лой Божи чарусде, гүфдирени! — Гьери веги биёр чуь дериге э хуне.

Ю эз буфет вегуьрде, чорекей шоробе норени э сер стол, Гуьлбике овурдени пейлегьо. Божи закуске овурде, Гэзиз пейлегьоре шороб пур сохде бэгьдо, Гэсоил пушой шоробе хурде иловлере чуме-чару сохде, гүфдирени:

— Мере гIэйб месохит, Гэзиз, эхи гьэбилешму, Мелке не де инжо.

Божи гьош-гьобогьэ дуллу сохде гүфдирени:

— Уьзигьэрен, эзу ние дироморе.

Рэхьмон э мэхьтелиревоз денишире, оммо Гэзиз гIоси бире гьошгьоре дуллу сохде э сер Божи.

— Гьони миёв Мелкеш, — гүфдире Гэзиз, — ишму пэйлегьоре вегирит!

Нэхьум э пой вэхуьшде, пейлере тик гуьрде, мугу:

— Э шори игидгьой Ватан иму, э согьи Рэхьмон нен хьовиргьою, эриму шоригьо никигьо овурдетгьо, э шори Рэхьмон не Хумор одохлуй ю.

— Ой согь боши, Нэхьум! — гүфдире Гэзиз.

— Охойш! — шори сохде Нэхьум э шоробе хурдеки. — Гьечидие, мелхьэми...

Э и дэгьдэгъэ э хуней Глээиз шори дебиренигъо, э хуней Бебе офдорени женг.

— Ме э туь не гуфдиребуьруьм, туьре э одохлуй кесевоз кор мебугу! — хьэрой вегуьрде Тенхьум э сер Сенем хэгьер хуьшде. — Э гоф эн и nebude кукевоз эз сер вада-рафдебири!

— У э туь кор нисди, холу! — жугьоб до э жигей дешу Бебе. — Иму дануьсденим кор имуре.

— Гьечуни, ишму дануьсденит? Э ме кор нисди? Ме ишмуре герек нисдуьм. Шоробгьой колхоз кем оморенге, кор туь э прокурор офдоренге, герек буьруьм туьре? Эри эз гьэземет хилос сохде? Имогьой герек нисдуьм. Э довго эй не рафде, дургуне справкегьой духдири эри овурде герек бируьм туьре, имогьой герек нисдуьм?!

Жингьой Бебе воромо, холушу бишэГрие коргьоюре гуфдики.

— Туь имогьой мере терсунде. Бура мэглуьм сох. Э меревоз туьш мурай э гьэземет. Туь овурдей дургуне когьозгьоре. Гьемере мугуюм герек бисдоге.

Сенем сер хуьшдере куфде, гиридени:

— Эле, дедей миро туьре, евошо. Э хунейме глэтош ме дешенито!

Тенхьум кисей томокуре ведешенде, гьэйлере пур сохде, суьгьруьсдени:

— Гьеле гуфдурум э ю, хуне хэреб угъли. Бегем духдер кеми э шегьер. Э чужо туьре воюгьо духдергьо эдей гуфдире: биё мере бер! И биёбуригьо хуби имогьой?

— Гьеле ме муьвунуьм, — гуфди Бебе, — ме гьэгре ни дегьилуьм э у кучуке Рэхьмон. Ме ни бэхшуьм э у Хуморе!

Тенхьум глоси бире, гьэйле кешире, пуьрсирени:

— Бегем Рэхьмон эз дестуь кешири вирихунде духдере? Гьерчуь сохдей туь сохдей э у. У чуж сохди э туь! Туь гьем э у беди сохдей, гьемиге э Шолум кухолей бешму. Духдер эн у Либо ченд сал имид бири денишири э туь?

Бебе визор оморе эз гофгьой холушу. У вэхуьшдени, гьэиш хуьшдере бесдени, шапкере веноре э кечеле сер хуьшде, гуфдирени:

— У гофгьой туь, холу, гьони екиреш герек нисди.

Гьерчуь туьре воисд гу. Оммо ме ни бэхшуьм Хуморе. Гъэгрме-гъэгъри.

Э и гофгьоревоз у вадарафдени э куче, рафдени э лой центр шегьер, дуразе папрусе э лэгІэ деноре, дуре лов сохде. Э кучей Ленин, э ён кино оmore расире сэгІэт э гуш Бебе дарафдени сес мэгІни эз келе репродуктор оморенигъо, сес хэндей жемжогъил, гІэруьс-духдер э куче гешденуьтгъо. Ченд духдергъо оmore гиросше эз пушой Бебе-сиегъе чердегъо не сипре гъутинегъо, инчелбегъо не гъуьндуьре балагъо. Еки эн угъош э пушой. Бебе рач ние оmore. Сирот Хумор оmore поисде э пушой чум энду, дуьл ю сэгІэр хурде. Сер ю гиж бире, ох кешире, ловгьоре гІэнж гуьрде. «Бошгу дие, — гуфдире, у,—ме кук бебейму нисдуьм, те поже эз пой офдоре пиш не сохдумге Рэхьмоне».

\* \* \*

Имогъой э туь мэгІлуьми, ГІэзизе хундогор, эйчуь Бебе дуьшме буге э Рэхьмоневоz. Ченгъэде мэхъэл э песой эн у гешде, у эденбу е вогънеле офде эри чугъули сохде, э кор венгесде Рэхьмоне.

Эз довгІо варасде хэйли вэхдиш гиросшебу. ГІэруьси Рэхьмон нен Хумориш биребу, Бебеш Либо духдер зерде Шолуме хосшебу, гьердушуре гІэилгъош биребу, Бебе эз колхоз вадарафде, э тозе кор дарафде — заготовителиш биребу, оммо гъэгър э дуьл Бебе гье домундебу. Рэхьмон гыч шекиш ние сохденбуки э песой ю, э чугъули ю еки эзини одоми поисди гуфдире. Чуьтам ГІэсоил шек не сохдебуге Бебе кук гъобоне Шомоил кулак, эрию чол векендебуге, Рэхьмониш шек ние сохденбу, Бебе эдей э посою гешде гуфдире. Ве ченгъэде хъэрекет мисохд Бебе эри е гІэйб офде эз Рэхьмон, бурав эз дес ю чугъули соху, ние офденбу. Чуьнки Рэхьмон эз довгІо вогосше, сер гуьрд эри кор сохде э колхоз, бисдо хубе корсох, песде рафд э курсгъой агрономи, хунд, омо, бригадир бисдо, хуб кор сохд. Юре секретарь партийная организациа вихдуьт. Энжэгъ оmore э поиз 1953 сал, эз ворушгъо онгургъо пуч биренге, э руз мигІидгъо е пара колхозигъо коре дегъишденге, Рэхьмон эй лекция хунде ГІэсоиле огол зеренге, Бебере вогъне бисдо. У шори сохд, сер гуьрд эй чугъули сохде, эй Рэхьмон.

Имогъой виним, чуь биреге песой чугъулигъой Бебе, э чуь метлеб расиреге у...

Э ЕН БОРУГЬОЙ НОРУН-ГЪЭЛЕ

Э ёртуь мунди, ГӀээзизе хундегор, у себэхь понзи гьозори нуьгьсади пенжогьимуьн сал, ГӀэсоил дуьл хуьрд бире, эз хуней ГӀээзизигьго вогошде рафдгьо э хуне, нуьшдгьо эри эрзо нуьвуьсде э ЦК партия? У руз Рэхьмониш омбар могьбул биребу. Э гьейвуй хуне нуьшде, у дениширебу э перде кешире оморебугьо асму, э сайлове хуно тигьн бире, доргьой хьээте шушденбугьо воруш. Э дуьл эн у э и дэгьдэгьэ жире-жире коргьо оморенбу, э пушой чум эн у чигьрет эн ченд шинохэ одомигьо оморенбуьруьт поисде: чигьрет ГӀэсоил нен кечеле Бебе, эн Мукоил нен Якубов, эн Мамедов нен Ахмед кук Одигьозел... Мугуиге Рэхьмон эденбу гоф сохде гогь э еки эн угьоревоз гогь э еккеревоз. «Эйчуй гьечи эхи, — эденбу гуфдире э дуьл хуьшде Рэхьмон, — эхи ме е зобуниш не сохдем. Ижиреш кор бирени?» Ингьэдей э дуьл Рэхьмон гьэгьр дебу, Шемей гӀзил хуьшдере фирсоре гьишдебу папрус овурде, сер гуьрдебу эри папрус кешире.

— И чуй кори, Рэхьмон, папрус кешире сер гуьрдей? — гуфди ГӀээзиз.

Рэхьмон жугьоб недо, энжэгь «эгь» гуфдире, десе жумунд, понсд.

— Вадара герд эри туй, — гуфди ГӀээзиз, — воруш эдей поисде, гьово эдей очмиш бире.

Рэхьмон дурей папрусе ведешенде, сере тик гуьрде, э асму дениши. Воруш поисде, булутгьо эденбуьруьт сейрек бире. Ээ гӀэрей булутгьо эденбу веди бире э гунебохэн ухшеш зеренбугьо гиргине чуйшме.

— Офдолегьой хуьреми, Евдо бебей Бинеми, — хьэрой дешенде, э овозевоз гуфди Шемей.

ГӀээзиз хэндуьсде, мугу:

— Туь и гофгьоре эз же дануьсде?

— Дедей Божи гуфдиребу, — жугьоб до гӀзил.

— Чуй геде, чуй воисде туьре эз дедей Божи, — хьэрой дешенд эз хуне Божи, хуб не варасире гоф невей хуьшдере.

— Гьичиш нисди, туьре герек нисд, — жугьоб до ГӀээзиз.

Еки эн и гофгьош мугуиге ние дарафденбуьруьт э гушгьой Рэхьмон. У дарафд э хуне, вегуьрд плащ хуьш-

дере, вокурд, вадарафд э куче. «Эже бурам?» — мугу у. Э ёр ю омо хьовир салдатию Ахмед ве Рэхьмон э илоуле не денишире варафд зеверо, э лой звери мэхъэлегьо. Э ёр Рэхьмон омоки, Ахмеде дуь чуькле духдерлегьои гуфдире, дарафд эз рэхь э пассаж, дуь шаколадиш восдо, доно э куьф хушьде.

Звери базаре гирошде, э ён школай Музахария оморе расиренки, Рэхьмон миёсде чарусде э лой хуней Ахмедигьо рафде. Оммо чуь кориге уре э лой хушьде кешируьт гьуьндуьре боругьой Норун-гъэле, уре воисд ебо варав э сер гъэле, шегьере томоше соху. Э томоше сохдеш верзиренбу. Эз пилонконгьой сенгьи варафде э сер хьофд метро гьуьндуьри гьисдигьо ве дуь метроним гьолиндии ю гьисдигьо боруй сенгьи, Рэхьмон ебо чумечару сохд гъэдимие гъэле, эзи гьозори пенжсадсал пушо вокурде оморигьоре ве песде дениши э лой шегьер, комиреки эз дуьло вадабурат фирегьуне богьгьой онгури, дуь лойгере догь ве дерьёгь. Эз гъэле э дениширеки шегьер ухшеш мизе э е келе самолет, гъэнетгьой комики дураз биребуьруьт э гьирогь дерьёгь, сер ю расиребу э глов дерьёгь ве дуьм ю э Норун-гъэле. Чуь раче дузе кучегьо, чуь келе серине доргьо, чуь хубе тозе хунегьо, заводгьо ве фабригьо, школагьо вохурденбуьруьт э чум Рэхьмон. «Шегьер деденме, шегьер гъээзиме». — мугу Рэхьмон. Песде Рэхьмон фурамо эз сер бору, эз очорчи ихдиёр вегуьрде, дарафд э дорун гъэле, гешд гъэришгьой вачарусдигьо хунегьой хоне, мечите, инчегьуьзгьо дебиренбугьо хунегьоре, э зир хори добугьо гъээземете, хьомуме ве уьзге жигегьойгей Норун-гъэ-лере...

Руз пишней эденбу бире, Рэхьмон эз гъэле ведиромогьо. Э домой дер гьопу э Рэхьмон омо вохурд Одигюзел.

— Рэхьмон, туь инжо чуь сохде?

— О, руз эхэйр бу, лелей Одигюзел, — мугу Рэхьмон, — гьечи эй гешде вороморем. Ахмед э хуне де?

Одигюзел хуб дениши э сифет Рэхьмон, мугу:

— Бегем туь э хунейму дироморе ние дануьсде? Эз куче пуьрсире хьовире?

— Бэхьишлемиш сох, лелей Одигюзел, мере э хунешму оморе воисденбу.

— Воисденбу. Ме гуфдиренге? Хуб, хуб, кеш дарайм!

Э ён гъопу оmore расире сэгIэт, Одигюзел десдечуре зере э дер, хъэрой дешенд:

— Эй Сурия-хонум, эй Вера-хонум, вокунит!

Гъопу вокурде омоки, Рэхмон не вини не Сурия-хонуме, не Вера-хонуме. Э пушорэхъуй келебебе видовусде ведироморут дуй чуйкле духдерлегьой Ахмед, эврушуймие гъиргъире муйлегьо, ковре чумлегьо, гиргине сипре гъутинелегьо, гуьле-гуьле кутэхэ булишилегьо э тен вери.

— Эльмира, Людмила! — шори сохде, дес духдергьоре гуьрд Рэхмон, песде эз куьф ведешенде гьеркишуре е шаколад до.

— Спасибо, согъ бошит, — гуфдурут гIэилгьо.

— О-о, Рэхмон, туь хош оmoreй! — эз сер гьейву хъэрой дешенд Ахмед, — воро инжо.

Одигюзел не гIэилгьоре э пушо рэхь доре, эз пилонконгьой сенгьи варафд э гьейву Рэхмониш. Дедей Ахмедигьо Сурия-хонум хош омори сохд Рэхмоне, дедейгьошуре не гIэилгьоре пуьрси, э сер стол тозе серстули кешире, овурд симовор чое но, пейле бишбогъэ но.

— Вера э кори? — пуьрси Рэхмон.

— Эри, хэлэфме, имбуруз нубой эн уни э больница, э кори, — жугьоб до Сурия-хонум, песде гъул гIэилгьоре гуьрде, огол зе: — Биёт ишму э ило нуьшит, эйшму эдем жура дешенде суьфрере.

ГIэиллегьо вежегьисде-вежегьисде, шори-шори рафдуьт, Рэхмон томоше сохд, чуьтам келе зен невегьоре гъурлугъ сохдениге, э думит домунд, э ёр овурд э суьфдеи рузгьо, довгIо варасденге Ахмед Вераре овурдебугьо, Сурия-хонум бирази биребугьоре.

...У шев эз довгIо оmoreбугьо, Рэхмоне э хуне декуьрде, Ахмед гъул Вераре гуьрде шори-шори видовусдебу э хуне вороморе.

— Дедей, ме оmoreм! — гъопуре куфде, хъэрой дешендебу Ахмед.

— Дедей гъурбу эри туь, оmoreй Ахмедлейме! — сес шори ведиромо эз доруй хъэет.

Эз хъэлов вэхуьшде, э кул хуьшде е суке чире дегуьрде, видовусде ведиромореху Одигюзелиш. Гъопуре вокурде сэгIэт Сурия-хонум гъэл дешенд э герден Ахмед, моч сохд юре, гIэрсгьой шори тигьи сохд. Песде еново чарусде, дирени е зен хэйлогьи поисди.

— И кини, хэлефме? — пуьрси Сурия-хонум.



— Вераи, гІэруьс овордем эри туь, — гуфди Ахмед, — шинох бош.

— Чувь! — гьошгьой Сурия-хонум дуллу бисдо, у неки шинох бире, воисд юре е божэхь дешенуь, пиш соху Вераре. «Эле, и чувь кори, гуфди э дуьл хуьшде Сурия-хонум, — иму эри эн и духдер дирейм, нумгир сохдейм, бэхшгьо бердейм. Духдер хэлгэз имид сохдейм. И вегуьрди эз довгІо зен оворде?» Сурия-хонум дуьл хуьрд бисдо, сер ю э сер синею дуллу бисдо, мугинге гьич э вогошдей кукиш шор не бире, у юхуьле-будуре эз пилонконгьой сенгїи э гьейву варафд. Одигюзеле хьэз не омо эз коргьой Сурия-хонум. Келе мерд куьнд бире, дес Вераре гуьрд, хош омори сохд, сумке э десию добугьоре вегуьрде, мугу:

— Кеш э хуне, духдерме, кеш!

Вера зугьун азербайджанире ние варасиренбугеш, шек сохд, ки дедей Ахмедигьо биразини. У синемиш сохд гьемчун, чувтам э дуьл хуьшде гьэгьр кеширениге Ахмед. Дуьл Вера мугинге лерзи, чумгьою тар бисдорут. Бегем бежебежеи? Нешинохэ шегьер, нешинохэ жигегьо, зугьуре неварасире, сэхьибгьой гедеш рази небире, чувжире зигьисдеи мубу? Э келе думит домунд Вера. Э сер суьфре нуьшдеки, уре ишдогь не бисдо эри чи хурде. Э чонголе вегуьрдеки, десгьой энэ лерзируьт.

— Ху, духдерме, ху, — теклиф сохд Одигюзел.

Ахмед эз лэгІэ гоф ние ведировунденбу. Энжэгь эз зир чумгьо дениширебу, чувтам дешешу сер гьуз э хори дениширебуге. «Бошгу, гьеле гоф ни гуюм. Чувьш бисдоге дедеи. Гьэгьри нисохум юре». Имишев эри хуней Одигюзел келе шориш буге кукию омори гуфдире эз довгІо, шев Одигюзел хуб не гиросд. Энжэгь жогьилгьо гьерки э е хуне жиге дешенде хисире бэгьдо, лампегьоре торик сохде, Одигюзел э ён кравать Сурия-хонум омор мугу:

— Э зен, и чувь кори туь сохдени? Э жигей шори, ёс дешендей э хуне!

— ГІэтош мере гужлуь месох, — жугьоб до Сурия,— хун мере эз мунде жигеш сиегь месох.

— Ой зен, бигьил куьгьне гІэдотгьоре, хуьрд месох дуьл кук туьре. Чор сал э довгІо бири у, яралуь бири, хун тийгьи сохди.

— Бошгу, бошгу, дегерд хис, — мугу Сурия-хонум.

Гоф не сохд дие келе мерд. Оммо омбар думит сохд. «Гіэйбе кори, чуй мугую гіэруьс. Ох, гіэйбе кори».

У шев Вера хисире не дануьсд. Чумгьою гье хьэрзо бу, дуьл ю эденбу пар-пар сохде. Э пушой чум ю жире-бе-жире сиротгьо оморенбу: эз бомбагьой немцгьо дегесире сухденбугьо дигь ишу э Украина, э гунилей фашистгьоревоз зере куьшде оморенбугьо пире бешу, эз дерд серсу биренбугьо, нечогь бире муьрденбугьо делешу, ченд салгьо э рузгьой довгю эз Ватан оворе бире, эз дес немцгьо ченд гилегьо вирихде, э бэшгьэ улкегьойге гьули-гьэревоши сохде, е лугьо нун хурденбугьо ве песде э у руз победа э Чехословакия, э госпиталь Шими хэбер расундгьо э ю шуьвер ю Орлов те е руз эй довгю варасде эз гунилей дуьшме муьрди гуфдире...

Ахмед эз дуьли — жуни хосд Вераре. Бие-зен мундигеш, вегурд уре, овурд э шегьер дедеи хуьшде. Вера шор биренбу еки эзини хубе одоми гьисмет бири гуфдире эю. Мугу: «Имогьой тозеден сер муьгуьруьм зиндегунире, дедей гіэйлгьош мибошум, э кор мидарам кориш мисохум, Ахмеде эз дуьли жуни михогьум». Вера недануьслебу дедей Ахмедигьо гьечи бирази мубу гуфдире. «Имогьой чуй мисохум ме? — мугу э дуьл хуьшде Вера. Э гьэд болушгьо сере пэхьни сохде, евошлей-евошлей гирид, дердгьой дуьл хуьшдере эри тигьни сохде.

Хов нисе оморенбу. Пушой себэхь, хурузгьо гіуьгіуь зегьо вэхд, Вера евошлей-евошлей эз хьэлов вэхуьшде э бузпой вадарафд э хьэет, нуьшд э сер пилонконгьой сеньги. Гьово кем-кем эденбу товуш бире. Гьуьндуьре боругьой норун-гьэле эденбуьруьт веди бире. Келлей догь э зерсер Дербенд вобугьо э булутгьо пичиребуьруьт. Эз хьэетгьой гьуншигьо сес хьов-хьов сеггю эденбу оморе. Песде е кем гьово очмиш бисдоки, куче товуш бисдоки эз дури, эз песой гьирхляр-гьопу сес балабан нэхирчи омо. Э хьэет, э зир гьуьндуьре гьейву гов мэгІ зе. Вера э пой вэхуьшд, дирени э зофру гов бесдеи. Эи туьтем Сурия-хонум эз хуне ведиромо, бедире вегурде э лой гов фурамо эри шир дуьшире. Э посой келе зен фурамо Вера.

— Дедей, ди бедирере ме дуьшуьм гове, — мугу Вера эз Сурия-хонум.

Келе зен шефд дениши э Вера.

— Ме дедей туь нисдуьм, герек нисди мере туь дуьшигьо шир!

Гъирмизи бисдорут шову зерд бире мундебугьо сипре гьутинегьой Вера. Герме похлигьой г1эрс тигьи бире, кобоб сохдуьт назуке пусд сифет юре. Сер герде хуьрд вогoшде, э гьейву варафд у. Э пушорэхьу ю ведиремо шову ховсуьз мундебугьо Ахмедиш.

— Бэхшлемиш сох э ме, Вера, — гуфди Ахмед. — Гьеме коргьо дузелтмиш мубу. Келе зени. Чуьш бисдоге деден. Ние воисде мере женг сохде. Сабуьр сох.

— НэгI, нэгI,— мугу Вера. — Ме эдем дире инжо жигейме нисди .Ме туьре г1эйб ние сохденуьм. Ме могордум. Мурам э Украина...

— Чуь! — мэхьтел бисдо Ахмед, — у кор нибу. Ме туьре бегем эри вогордунде овордем?

Ахмед сер гуьрд эри хоши гуьрде Вераре. Угьо тен ишуре вокурде, э куче вадарафдуьт, э лой гьэле рафдуьт эри гешде. Э гьуьндуьри догь варафде, Ахмед бирмунд э севгили хуьшде сал бе сал келе биренбугьо шегьер Дербенде, раче дузе кучегьоюре, фабригьо-заводгьоюре, богьгьо бисдугьоюре. дуразе гьэдимие боругьой сенгьи эз догь дуз те дерьегь тик поисдебуьруьтгьоре.

— Туьре хьэз миёв эз шегьер иму, — гуфди Ахмед,— дедеймуш дусд мубу э туьревоз, хубе хэгьергилигьош мубу туьре инжо, гьеме коргьо хуб мубу...

Вера нуьшдебу э сер е келе сенгь, гоф не сохде дениширебу э лой ковре дерьегь, э лой эз гьэргьи дерьегь сер ведешенде веди биренбугьо чуьшмей себэхьи.

— Дирей, чуьшме эдей ведироморе, — мугу Ахмед,— у чуьшме эримуни, зиндегунимуре эри товуш дорен.

Имбуруз, себэхьиш, персебэхьиш Ахмед хоши гуьрде Вераре гердунденбу э хуьшдеревоз, берденбу э шегьер, э кино, э лой Рэхьмонигьо, дуьл доренбу юре, гьемчун хоши гуьрденбу дедешуреш. Омбар гоф сохд э зен хуьшдеревоз Одигюзелиш.

— Ахмед чуьклеле нисди, — гуфди у э Сурия-хонум, — у чор сал э довг1о бири, г1уьлом дири. И куьгне девргьо нисди эри туь э войгей туьревоз у зен хогьу. Хосдей дуьл хуьшдере оворди...

— Зигуьгу, энжэгь э меревоз кор мебугу ишуре, — жугьоб до Сурия.

— Э хуней бебей туь г1этош дараво, — мугу Одигюзел. — Эхи и духдер хэлгь гьэрибе одомини. Уреш дуьл доре воисде. Ловгьой туь огьу вечире мундеки, у фэгьир г1эйб кешире эхи!

Одигюзел омбар гуфди, Сурия кем шиновусд. У войгей дуъл хуьшдере сохд. Э гІэруьсевоз гоф нисохд кор хунере сохде нигъишд, гов дуьшире нигъишд. Энжэгъ Вера эз пэхъники хисур зу мэхуьшд, хьэетгьо жигегьоре жару мизе, гІов миовурд, гІэтош кинлере моно. Песде Вера э кор дарафд, э больница, себэхъ мирафд, шохьонгум миомо.

Диеш Сурия гІоси бисдо эз гІэруьс у духдер зенди. «Куьл гъуим бошуве, — мугу Сурия-хонум, — кук мере эз сер ведешендей оморей, е кук семе зенд дие»... Гьэгъри гьэзоб эз дуь салиге Вера е духдеригеш зенд. Сурия эз мунде жигеш хьэле-жигер бисдо. Духделегьо рачиш буьруьтге, тикмере хуно, динжлегьош буьруьтге, Сурия гъич хэндее лов ние биренбу. Э гІэилгьо мидениши, е жигелешу дор мидоге Сурия хуьшдере муькуьшд, эз лэгІэй хуьшде мекенд э лэгІэшу чи мидоно. Оммо э Вераревоз дуьл ю гъич дуз ние биренбу. Эхириш омо Верара е кук бисдо. Гьовой Сурия дегиш бисдо, ловгьою э хэнде варафд. Вера гІэил э гъужогъ вери эз больница омоки, Сурия бэгъдовой ченд салгьо гьэл дешенд э герден гІэруьс, моч сохд юре.

— Бэхшлемиш сох э ме, духдерме, — гирисд Сурия, — ме келе зеюм, нехундегорум, вой эриме, мере гІов-гІэтош миёсде берде, кеф ишмуре хуьрд сохдебуьруьмгьо.

— Э худо шуькуьр, — шори сохд Одигюзел, — эгъуьлменд бири зенме.

...Ижире коргьо — гьозиегьо оморебуьруьт э сер Ахмед нен Сурия. У руз Рэхьмон э хунешу оморебугьо, Вера э кор бу, чуькле кукле э доруни хуне хисиребу.

— ГІэилгьой туь чуьтамуьт, дедешму чуь сохде? — пуьрси эз Рэхьмон Сурия-хонум.

— Хуб догІочинуьт.

Оммо Ахмед э сер-сифет Рэхьмон денишире, эденбу дире гьовой Рэхьмон очмиш нисди. Екем нуьшде, чой-чи хурде бэгъдо, Рэхьмон не Ахмед вадарафдуьт э куче, варафдуьт э сер боруй гьэле, нуьшдуьт.

— Гьери гу э дуьлтуь чуь дериге, — мугу Ахмед.

Рэхьмон суьфде э хуьшде домунд, песде еки-еки ихдилот сохд. чуьтам юре э райком огол зеребуге инструктор Якубов, чуьтам тэхсири воноревуге э сер ю эри онгургьой колхоз пуч бирен, эри руз кипур мердгьо э кор не вадарафден, эри э ГІэсоил лекция тапшуьрмиш сохден. Гуфди гене, чуьтам Бебе — заготовитель вэхуьшде

критиковать сохдебуге юре... Ахмед папрус кеши, думит сохд, мугу:

— Эри онгургьо пуч бирей тэхсири э туьш вери, э Мукоилиш вери, э гьемеймуш вери. Дуз критиковать сохде.

— Эле, туьш гьечу гуфдире! — Гюси бисдо Рэхьмон. Ахмед десе тик гуьрде, мугу.

— Пой, сабуьр сох. Туь секретарь парторганизацияи. Эри хэлгъ э кор не ведиромореиш туь тэхсири. Имуш, гьеме членгьой партия тэхсирим. Усол кор гировунденим э глэрей колхозигьо. Оммо эз товуней Глэсоил лекция хундеи, ногьогъ критиковать сохде туьре угьо. Глэсоил дуьшмен партия нисди, Глэсоил эй кор партия жун хуьшдереш муьдуь. Уре бебейму хуб шинохде.

Песеде е кем думит сохде, мугу:

— Эз у кечеле Бебе туь хьитиёт бош. Эйме у е жулике одоми оmore. Фитночини. Э туьревоз уре куьгьне гьэьргьош гьисди, эз товуней Хумор.

— И ченд сал гирошди, имогьоиш гьэьгре гуьрди поисде?

Ахмед хэндуьсде, мугу:

— Элчэгъэ одомигьо ужире биренигьоре туь ние дануьсде беге? Ухубе одоми мибисдоге, хэлгъ э довго гьисдики, дургуне когьозгьо сохде, инжош нипоисд.

— Эри, туь дузи, Ахмед.

Рэхьмоне э хуне рэхъ сохде, Ахмед мугу:

— Туь солдат бирей, Рэхьмон, четинигьо омбар дирей. Мерде хуно пой э жигей туь, глэйб туьре э герде веги, дуьшмен туьре тембихъ ди!

«Глэйб туьре э герде веги, дуьшмен туьре тембихъ ди» — и гофгьой Ахмеде ченд гиле вогогьруш сохде-сохде фурамо Рэхьмон эз звери мэхьэлегьо. У эз миглей шегьер не рафд э хуне. Эз ён звери базар черх хурд, эз посомэхьэлегьо гирошде, думит сохде-сохде эденбу рафде. Омбаре коргьо омо э дуьл эн у: гирошдигьо богьчирегьо, собранней партийный актив, вэхуьшде гоф сохдегьой кечеле Бебе, себэхьмунде Глэсоил оmoreбугьо эз товуней кефсуьзи хуьшде гоф сохдебугьо. Песеде э ёр энумо, ки отчетно-выборное партийное собрание биренини гуфдире. «Эй отчет материалгьо хьозур сохде гереки, — мугу э дуьл хуьшде, — бурам э лой контор, членгьой бюроре кура сохум, хьозуримуре виним».

## ГЪИРЪЕТ ВЕ НЕНГЕ ПУЛ

Пенжерегъой хуней ГӀэсоилигъо э лой куче бу. Кравать ГӀэсоил хисиренбугъо э ён пенжере бу. И песини вэхдгъо ГӀэсоиле гъеле-меле хов нисе оморембу. Сер шев э хъэлов мидегешдгъо, те нимешев чумгъою э хов ниварафд. Э шевни ченд бо гъе мэхуышд, муьнуышд, газет мухунд, журналгъо фегъм мисохд. ГӀэдот эн у бу гъеммише хунде газет «Правда» не журнал «Коммунисте». Песде и песини мегъгъо дорд дореигъой шуьгъэмийош бежид биребу. Шевгъо инжимиш мисохд юре шуьгъэм.

Е шев гъечи эз шуьгъэм гуьрде юре, пар-пар сохде, гогъ э илой душ, гогъ э илойгей душ эденбу чарусде ГӀэсоил.

— Бебейме вой! — сес ведиромо эз ю.

Евдит э хори хуне, э сер нимдер хисиребу.

— Чув бири туьре, мерд? — мугу Евдит, хэбер бире эз хов.

— Гъичиш, гъичиш, хис, гӀэилгъоре хэбер месох, — ГӀэсоил пэхъни сохд дорд дорен шуьгъэм хуышдере, инжимиш не бошут гуфдире гӀэилгъо не зению.

ГӀэсоиле гъеле э хуне домундебу дуь гӀэруьс не бире чуькле духдерлегъо. Се духдер эн у гӀэруьс бире э шуьвер рафдебируьт, келеи кук ю э довгӀо пуч бире, чуьклеи зен хосде э Уруснет биренбу. «Е гиле тейте муьрде и духдерлегъореш гӀэруьс мисохдумге», — мугуфди э дуьл хуышде ГӀэсоил. Гъэрез ки и шев поизи ГӀэсоил те пушой себэхъ инжимиш бисдо эз шуьгъэм, энжэгъ пушой товуш бире чумгъою э хов варафдуьт. Себэхъ мунде ГӀэсоиле хэбер сохд сес гирье, сес гъейвой-гъизар эз куче оморенбугъо.

— Гъейвой-гъизар, Нэхьумлейму вой, гъейвой-гъизар!

Зури-зури вэхуышде, сер-тене вокурде, ГӀэсоил мугу:

— Э Евдит, кидан Нэхьум муьрдиге.

Песде чарусде, дирени Евдит э хуне недери.

— Нэхьум муьрди! — гуфдируьт э ГӀэсоил эз куче видовусде дироморутгъо духдергъой ю.

Нэхьум, гъе у Нэхьум э колхоз Рэхьмонигъо добугъо, дуьлшоре Нэхьум, э шори — никигъой хэлгъ э омбаракбу рафденбугъо, э межлуьсгъой хэлгъ шори венгесденбугъо Нэхьум, э гъунши ГӀэсоилигъо дебиренбу. И песини вэхдгъо уре паралич зере, хьол ю омбар гурунд бире-

бу. «Фэгъире Нэхъумиш муьрд», — гуфди э дуьл хуьшде ГӀэсоил, вадарафде э сер мито. Э куче, э пушой гьопуй Нэхъумигьо дебиренбугьо хъэет одомигьо пур бу. Эз хъэет эденбу ведироморе сес жуьрай зенгьо, сес гьейвой-гьизар. ГӀэсоил рафд, поисд э е гьирогь, э ки десдей колхозигьо. Э и туьтем ГӀээизиш омо поисд, сер гьуз э ён ГӀэсоил.

Эз ён гьопу, хьире чумгьой хуьшдере вокурде, эденбу томоше сохде ГӀэсоил не ГӀээизе раби Хьэим, гье у сара раби Хьэим, комики у руз, Николай эз тэхд офдоренге, ГӀэсоил э митинг гоф сохденге, хьэрой дешенде, гуфдиребугьо «РошогӀ», песде Мердэхэй Овшолум десдечуре э душ ю веноре, гуфдиребугьо: «Гоф ме сох, эз лэгӀэй туь гьеле буй шир эдей оморе». Раби Хьэим имогьой келе мерд биребугеш, келе дуразе руьшгьою бегьем сипи не биребуьруьт. Сара бала, хьире чумгьо, ковре макентош э тен, килэхь бухоре э сер, десдечу не туро э дес дери, поисдебу у е огьоре хуно. Э ён раби Хьэим дуь-се келе мердгьо руьшверигьо поисдебуьруьт. Чум зер мердгьоре, э лой ГӀэсоил бирмунде, мугу:

— Э ёр ишму мунди чуй раче нумаз хунденбуге э у куьгьне девргьо ГӀэсоил? Хуне хэреб буьлдуьрчин бу дие!..

— Сес эн у гьониш хэреб не бири, — гуфди е келе мерд.

— Рази мибисдоге гьониш гене мибисдо уре хъэзон, норе — гуфди еккейге. — Туь имогьой, раби Хьэим, эн иму доени. Гьечиш гьечуш имуре хъэзон гереки. Огол мизерим ГӀэсоиле э хъэзони мномоге.

Сере гьуз гуьрд раби Хьэим, думит сохд, песде э дуьл хуьшде хэндуйсд. «Чуй эжеб мубу ГӀэсоиле гене э рабиети вогордундимге...

Бири-бире коммунист. Имогьой ченд салгьо у э партия не дери. Ведекуьрде омори. Диеш хуб эриму. Хьуьрмет дин-догӀот мавар уре э куьгьне сенигӀэтию, рабиети вогордундимге. У мэхьэли э нумаз оморегоргьош зиьд мубу, жем-жогьилиш э лой дин миьв, гелир нумазиш зиьд мубу»... Келе шори офдо э дуьл раби Хьэим. Хьире чумгьою вежегьисдуьт, серию гуьндуьр бисдо, эз ёр эн у вадарафд э же омориге ю гьони, дие гуш эн у э лой гирьей зенгьо не бисдо...

Э и туьтем ки буге хьэрой дешенд.

— Эй зену, варасит гирьере, асму вечири мунде, миьв

воруш тигъи мубу. Те воруш оmore миторе ведеберде воисде.

Раби Хъэим э гъово денишире, расдекиш дирени: асмуре булут шишири, думон дегуърди, эдей зофруво фураморе. Эвир гъовош неми, мугунге гъони сайлов тигъи мубу.

Е ченд жогъиле мердгъо миторе э душ веноре, ведировундут, рафдуът зеверо, э лой гъоврегъо, эз песошу келе мердгъош. Гъэсоил не Гъэзиз ёвош-ёвош, ихдилот сохде-сохде дебуъруът э песои жергегъо.

Жэгмет э гъироъ шегьер оmore расики, сер гуърд воруш. Е хэйли одомигъо эз нимерэхьи вогошдуът песово.

— Не вогорди туъш, — мугу Гъэзиз эз Гъэсоил, — туъре хьол нисди...

Гъэсоил не вогошд. У вешенд гердовуней назуке палту э тени ю вобугъоре, сэхд шиши э сер хуъшде шопкере, пой вечи, посо не муну гуфдире эз хэлгъ.

Мито депичире оmore бэгъдо, раби Хъэим э сер гъовре поисде, сер гуърд эри туро хунде. Гъэсоил э биразиревоз денишире э раби, чум зере Гъэзизе, лунг но эри вогошде эз сер гъоврегъо.

— Гъисдигъо гъэдоти, — мугу евошлей Гъэзиз э гуш Гъэсоил, бегем сэхьибгъой муърде рази биренуът эри нумаз не хунде?

— Пес мундет, — жугъоб до Гъэсоил, — текей мифурмунут и рабигъо жэгмете! Вес нисди бегем.

Екиш эз рабигъо, келе мердгъо не винуъруът, чуътам Гъэсоил ишуре инжо гъишде, вогошде рафдге эз сер гъоврегъо.

Раби Хъэим гъечу дануъсдебу Гъэсоил те эхир поисди э сер гъоврегъо ве гуш дошди туро хундеюре. Песде шохъонгум Гъэсоиле э овилхуне, э гъэрей мердгъо диренге, дуъл раби Хъэим диеш шор бисдо, мугу: «Егъин Гъэсоиле кешире э лой дин овурде гереки».

Эз и руз е ченд руз гиросде бэгъдо, е руз гъовой шохъонгум Гъэсоил нуъшдебу э сер тукунеи, э пушой хунешу. У эденбу гушдошде эз радио оморенбугъо сес мэгини хундей Рашид Бейбутове эз Баку, томоше сохде вози сохдей гъэиллегъой мэхъэлеире. Э и туътем э кию куънд оmore дуъ келе мерд, сипре руъшгъо сер зере, гуфдурут:

— Шохъонгум туъ э хэйр бу, Гъэсоил!

— Э гъуъбет ишму эхэйр, — жугъоб до Гъэсоил. — Чуъ хэбери, Шафадие?



— Хэйри, — жугьоб до Шафадие гуфдиренигьоб мерд, сара бала, келе сипре руьшгьоб, чуйкле чумлегьоб, гьэлуьш э пой, келе гьолине килэхь э сер. — Имуре э туьревоз е гьурлугьби, Гэсоил.

— Э меревоз! — мэхьтел мунд Гэсоил.

— Эри, — жугьоб до Шафадие, тесбихьгьоре вежегьунде э дес. — Имуре жэгмет фуьрсори.

— Коми жэгмет, эй чуй кор?

У мердиге, те имогьой лэггэ гуьрдебугьоб мугу:

— Кутэхьижуре не гуи, эгьуьбет туь эхэйр, имуре жэгмет фуьрсори э туьревоз гоф сохим бией эйму хьэзон пой...

— Чуй!? — мугуиге и одоми е дегенегире зе эз герден ю, — ишму небуге э ме руьхшенд сохденит...

Гьошгьой Гэсоил дуллу бисдо, лэггэре жендек ю лерзи. — Руьхшенд ние сохденим, жон Гэсоил, — мугу Шафадие. — Э гьемеш мэглуьми, ки туь имогьой ченд салгьои э партия не дери, коммунистгьоб ведекуьрдет туьре эз десдешу, дие эзинбэгьдойге эз туь чуй коммунист биренини, бие пушой муьрде руз туь вогорд э дин туь. Раби Хьэим мугу иму мибэхшим э Гэсоил куьгьне Гловунгьой юре, копоре мисохим, бигьил биевгу жэгмете гьурлугь сохугу.

Гьер гоф Шафадие гуфдиренбугьоб ченд е гуниле кори сохденбу э Гэсоил. У эжигей хуьшде нуьшде тоб недо. Вэхуьшд э пой, лерз вено юре.

— Раби Хьэим ишму мере усол шинохе, — гуфди Гэсоил. — Ме е Гловуниш не сохдем. Не ме эз рэхь коммунистиш не вадарафдем. Гловун сохдигьоб раби Хьэими.

— Эле, туь чуй гуфдире, эгьуьбет туь э хэйр, — мугу Шафадие. — Иму эйтуь эдейм хуби гуфдире. Туь гьони э у канторгьой хуькуьмет кор сохе, эдей пенжсад — шасдсад монет пул вегуьрде э мегьию. Хьэзон поисдиге. се гьозор муьзд эдей норе эйтуь жэгмет. Текей юхсул мумуни, эгьуьбет туь эхэйр, е кем семе, пушой муьрдеруз семе эйтуь хуб зигь дие!

— Весси! — хьэрой вегуьрд Гэсоил. — Ме эдем дире, ишму гьурлугьчигьой нумаз нен дин-доглот эз пул омбар дире эгьуьлменд не бирейт. Мере герек нисди пул ишму. Ме номус мере, гьирьетмере, идеямере, идеяй партиеймере э пул нифурухум! Ишму мегуит, ки гьони э куьф Гэсоил партбилет не дери, уре мубу фурмунде, эз сср ведешенде, элой дин-доглот кешире. Нэгл. Шефди, дур-

гуни дин-догIоте ме эз и пенжогъ сал пушо, эки раби ЕгIэнгил хундеки э сер офдорем. Дин ме гьони дин Маркси, дин Ленини, дин коммунизммаи. Мере екиш эз рэхъ Ленин ведешенде видануь. Ишму гьелеш пес мундейт. Ведини, ки эз ишму дие одоми нибу. Оммо ини, ки жемжогъиле семе мефурмунит!...

ГIэсоил лэгIэ ние гуьрденбу. Шафадийеигъо э оморошуш пешму бире, вэхуьшдуьт эри рафде.

— Ники ние дануьсдеге, мун эжигей туь, — мугу Шафадие э рафдеки. — Э ники беди омори. Эз у коргъо э шуьгъэм туь гьичиш нидавав.

— Никишму эришму мунугу. Бурайт э раби Хьэм гуит: ГIэсоиле э пул восдоре нидани. ГIэсоил гьеле те зинде гьисдигъо, биё женг беруь э дин-догIотевоз, варасуну э пес мундегоргъо, чуйтам ишуре рабигъо фурмунденуьтге.

Шафадийеигъо дие не поисдуьт. Э зир зугъу фугъунде-фугъунде, сер герде хуьрд, вогошдуьт оmore рэхъ ишуре.

Оммо ГIэсоил гьеле-меле хомуш бире ние дануьсденбу. Лерзирей жендек энуние поисденбу. «Провокатор, — гуфди у э ёр оворде раби Хьэиме, — ебо виниш э чуьжире гофгьоревоз оморетге э киме. Э ме езугъбери эй сохде оморет. Се гьозор! Э пул восдоре воисди игьоре гьирьетмере, идеяймере. Илле хуби эриме». Э ёр эн у омо и пушогъо фирсоригъо эрзо э ЦК партия. «Гьичиш нибу дир-зу ме партбилет мере мегуьруьм. Ме умогъой шефде чумгъой раби Хьэиме кур мисохум», — мугу э дуьл хуьше ГIэсоил.

Гьово эденбу торик бире. Э кучегъо лампегъой электри дегесуьруьт.

— Э ГIэсоил, дироморе е пейле чой-чи не хури, — и сес—сес Евдит бу.

— Эдем оmore, — жугъоб до ГIэсоил. — Кеш, оморум.

## ШЕФДЕ РЭХЪ

Э миглей куче, э пушой хуней Бебейгъо е дезде хьофхьэшд сала куклегъо эденбуьруьт футбол возире. Э дуьлой куче хуьрде сенгълегьоре кура сохде, гьопу хьисоб сохде, поисдебуьруьт дуь саре, чоьгъэ гIэилгъо, формай

школаи э тен ишу вери, гъирмизине галстукгьой пионери э герден ишу дери. Еки эн и вратаргьо бу зерде муйгьо, чил-чиле сифет, савзе чумгьо ве эз гъеме зиёд хьэрой дешенденбу э футбол возиреки.

— Рыжий, рыжий, сэхд ги тупе! — гъэгър доренбуурьт уре э томоше кура биребуурьтгьо гъилгьой мэхэлен.

— Поит ишму, — муьшде гьово гуърде, жугьоб мидо рыжий, — ме ишмуре хуб мисохум.

Э у туьтем, дуй гъил эри туп чалашмиш сохденбуурьтгьо, рыжий э ён гьопу э гъэсд поисдебугьо, зен Бебе, Либо эз хьэет сес сохде, хьэрой дешенд:

— Э Шомоил, инжо биё о, зу бош, э Шомоил!

Шомоил е дэгъдэгъэ сере тик гуърде, э дедешу денушь гуфдире, туп омо эз гьопу гирощд.

— Гол, гол! — хьэрой офдо э куче, — рыжий чекмечини...

Гъилгьо фите-фит зеруьт, хьэндуйсдуьт. Шомоил жинленмиш бисто, воисд юре бурав вепичуь э гъилгьоревоз, оммо э гуш ю дарафд гене сес дедешу:

— Э Шомоил, туьре худо вегиро ебо, эжеи туь, муй дедей веке!

Чорей Шомоил не бире, эрэгъ пушонире темиз сохде, видовусд э хуне.

— Текей огол зенуьм туьре! — е бибине векед Либо эз Шомоил, — пиёнискее бебешму гене веде нисди. Телгирамм омори эрию. Видов бура э Ленински, э пушой кино гъисдиге виниш. Унжо небисдоге э хуней Бенил бура, шинохдени Бениле, у э бебешмуревоз оморебугьо мерде, эйтуь тапинжей гъили овурдебугьо?..

— Эри, — жугьоб до Шомоил, видовусде рафд.

Руз эденбу шохьонгум бире. Гьово дегуьрдебу гьовой воружи бу. Тейте гъил рафде бебешуре огол зере овурде, чигиш сер гуьрд эй тигьи бире.

— Чуьни гене! — гъоси бисдо Бебе, э хуне дироморе, эз тен хуьшде плаще векеде э сер тэхд шенде.

Либо гоф не сохде, эз сер стол вегуьрд, телеграмме до э шуьвер хуьшде. «Чоримуьн ноябрь ведиро э пушой вогун маскови, э удесине жиге Тенхьум». Либо синемиш сохд, чуьтам ловгьой Бебе э телеграмма хундеки шефд бисдорутге, чумгьою хуни-хуни бисдорутге.

— Э боле домундем имогьой эз дес Тенхьум! Э лэ-гІэй эн<sup>и</sup> лезет офдори эз проводникгьо, ире пул воисде, ме биё гуьгьоюре темиз сохум!

Дедей Бебейгьо Сенем эз доруни хуне гофгьой куке шиновусде, ведиромо, мугу:

— Туь и гофгьоре эй холуй Тенхьум гуфдире? Туьре гІэйб ние оморе!

Бебе шопкере вегуьрд эз сер. Кечелию веди бисдо.

— Холуй Тенхьуме гуьрде дешендге, туь мурай э посою? Небуге мере муьфуьрси?

— Дедей миро туьре, — мугу Сенем, — холу э песой туь гешденбугьо мэхьэлгьо, эз ёртуь вадарафди?

— Э-э, весси!

Бебе э думит домунд, чутьтам имогьой шев нимешев э станцией Огни рафде, Тенхьуме эз вогун фуравунде, пура чемадангьоюре э шегьер миёруге. И суьфдеи гиле небу Бебе э песой холушу рафденбугьо. Эз умогьой, эз райком ведекуьрде оморе бэгьдо, Тенхьум е хэйли вэхд корсуьз мунд. Э колхоз рафде, бил зере эрию номус омо. «Эз кул гІэсб э кул хэр офдоре бире у», — мугуфди у. Эри келе гьурлугьгьо сохде, хундеи не бу уре. Е хэйли корсуьз мунде бэгьдо, э Бебе минет сохд э председатель колхозевоз гоф соху, шороб дуь э ю эй берде фурухде. Э Дербенд шороб фурухдереш Тенхьум э герде ние вегуьрденбу. Хуьрди оморенбу эрию. Гьэрез ки Тенхьум шороб вегуьрде, е ченд салгьо рафд э дигьгьой Догьисту эй фурухде. Тегьер гуфдиренигьоре хуно одомире хурде-хурде темэхь оморе. Пейле-ним-пейле эз шоробгьо зиёди мунде, эз шоробгьо гьэзенж дире, пул винире, темэхь сохде, Тенхьум сер гуьрд эри шефди сохде, муьшдерире фурмунде. Рузгьой е рузгьо дуьзди эн у гуьрде омо. Тенхьуме эз партия ведекуьрдуьт, э гьэземетиш нуьшундуьт. Дуь сал э гьэземет нуьшде бэгьдо, э Дербенд во-гошде, холу гене э хэгьэрзоре минет сохд, е кумеки соху э ю. Имогьой Бебе эз колхоз ведироморе, заготовитель биребу. Шинохгьош омбар бу юре. Гьечи сохд, ки гІэмел сохд, вогун шороб вегуьрд, э проводники фуьрсо Тенхьуме. Вогун шороб хьуькуьмете э бердеки, Тенхьум э хуьшдеревоз берд эй фурухде сиб-гІэрму, сир-пиёзиш. У чигьоре фурухде, э Дербенд парче миовурд эри фурухде. Е гиле хуьрде суьрхлегьош овурдебу, фурухде. Хубе гьэзенжиш биребу юре. Гьечи лезет офдоре э лэглэй Тенхьум, офдо у э рэхь проводники.

Е гиле э пура чемадангъоревоз э омореки, э вокзал Дербенд омо э пушою поисд дуй милиционер.

— Чуйни? — пуърси Тенхьум.

— Кеш э имуревоз э отделение.

— Эйчуь, ме эз командировка оморем эхи...

Сес Тенхьум э милиция бердеи зу-зу раси э шегьер, Сенем хэгъерию муй вкенд, шивниш дешенд, э пойгьой Бебе офдо. Нифри офри сохде дедешуре не холушуре, Бебе рафд, шинохгьой хуьшдере гешд, чуйтамиш бисдоге гэмел сохд, холуре эз милиция ведировунд. Оммо Тенхьуме тубо небисдо. У гене рафд э «проводники». Расди и дес э тэхьно не рафдебу, э Хьэнуко кук Эсеф гъэлейхэнжелиривоз рафдебу. «Э Хьэнукоревоз хуби, — гуфдиребу Бебеш, — у член партиян, гьемиге член колхози, э уревоз шек нисди». Эзу бэггэй имогьой Тенхьум кор хуьшдере хьитиёт сохденбу. Э пура чемадангъоревоз оморе э вокзал Дербенд нифурамо. Е хэйли чигьоре посылка мисохд, мифуърсо э сер хэгьер, холе, гэме. Угьонигере мегуърд, миомо, мифурамо э станцияй Огни, эз унжо э автобус менуьшд миомо э Дербенд. Эзу бу имбуруз телеграмма оморобугьо эй Бебе э пушорэхью ведиров гуфдире.

— Э боле домундем, — мугу Бебе. — Дне, вегирит биёрит чуйниге ишмуре хурим, бурам. Те нимешев э Огни биё нуьшуьм, э вогун денуьшуьм.

Сенем суьфре дешенд, гюш-егъни но, гирфинкей эргъи овурд э пушой кук хуьшде, чуй менэхьэфигьош сохд, Бебе гюси небу гуфдире. Оммо рази небугьо Либо бу. У дануьсденбу — эхир эн и коргьо э ники нивадарав, уре ние воисденбу шуьверию эри кор кес э кор офдону, Войге, Шолум бебешуш оморенге эз товуней коргьой хуьшде. Либо мугуфди э шуьвер хуьшде: «Хьитиёт бош». Эз товуней Тенхьум гьич ние воисденбу Либоре Бебе бурав сере дерди кешуь.

Бебе эз хуне вадарафдгьо, гьово торик бу, ворушиш эдебу бежид рихде. Келе чекмегьо не плащ брезенти вокурде, Бебе видовусд э лой автобус. «Тэгиди сохум, ненге песде автобусиш нимуну», мугу у эдуьл хуьшде. Э Огни оморе расиреки, Бебе думит сохд те вогун оморе, чуй сохуге. «Мидарам гьеле э буфет муьнуьшуьм», — мугу у. Е гирфинке пиво вегуърде, э сер стул нуьшдебу Бебе, кибуге оморе эз душ ю гуьрдгьо.

— Туь инжо чуй сохде, Бебе?

Бебе чарусде, дирени э склад глорди дебиренигьо глэил Дербенди Салмани.

— Гьурлугьи мере, — жугьоб до Бебе. — Туь? Имогьоиш э хуне не рафдей?

— Нэгл, — хэнде-хэнде жугьоб до Салман. — Э склад мере эри проверять сохде оморебу е мерд, эз уполминзаг. Глэсоил эй, у келе мерд, пушоте э келе гьурлугьгьо дебугьо.

— Шинохденуьм, — гуфди Бебе. Нум Глэсоиле шиновусде, чумгьой Бебе хун пур бисдо. — Гьери, чуй бисдо. Гуьрд дуьздигьой туьре? — мэхсере сохд Бебе.

— Ме ужире гьурт нисдуьм. Эз ме чи кем ниёв. Грам те грам э жигею бу. «Маладец, мугу, эз ме у. Гьемише гьечи хуб кор сох, товаришь, мугу». Меш шор бисдорум. Актгьо-чигьо нуьвуьсде варасде бэгьдо, Глэсоил э глэребе венуьшдеки гьэллет бире мугум: «Лелей Глэсоил, ги е нуьгь-дегь кило глорд четвери венуьм э глэребе, бер эри глэилгьо». Бой-бой-бой, оморе дирэ инжо чуй биребуге! Фурамо Глэсоил эз глэребе, глоси бире, гьов кенд омо э серме. «Гьурумсогь! — мугу эз ме, — мере руьшве доре туь!» «Руьшве эйчуй, лелей Глэсоил, мугум ме, эз ме глорд чи кем не омори ки. Эри глэилгьо эденбуьруьм доре дие»... «Э иллере дениш!—мугу у. — Глордгьо эн бебеш-муни ненге эн хуькуьмети? Чуй ихдиёри туьре глордгьой хуькуьмете эри доре? Ме гьони туьре э милиция муьдуьм». Мэхьтел мундум, минет сохдум, э гужевоз хоши гуьрдуьм юре э рэхь декуьрд.

Бебе гоф не сохд. Энжэгь пиво декуьрде, эз Салман мугу:

— Нуьш ху!

— Ижире мердгьо ме кем дирем, — гуфди Салман, хэндуьсде, — хэндуьсде, — зурбои у Глэсоил.

Салмане э рэхь декуьрде, Бебе ведиромо э буфет э куче, папрус дегесунде поисд э перрон. Воруш поисдебу, оммо гьово торик бу. Эз дури эденбу оморе сес хьов-хьов сохдей сеггьо. Е хэйли вэхд гиросдки, эз станци ведиромо е гьирмизине шопке э сер верие мерд, зингиле э ён дивор дуллу бугьоре е ченд гиле шувунд.

— Коми вогун оморе? — пуьрси Бебе.

— Эн Масков.

Дуьл Бебе е кем шор бисдо, песде думит сохде, мугу: «Имогьой шелегьой эн игьоре шев нимешев э чуйревоз миберим э шегьер?»

Гье э и туьтем э гуш бебе сес мотор автомашин дарафд. У видовусд э песой станци, винирени омо поисд е грузо-вик, шофер не е мердиге юк фушендуьт эз машин. Бебе э гьирогъ огол зере шофере, мугу:

— Эн кини машин?

— Эн совхоз, — мугу у.

— Э шегьер вогошде?

— Эри.

— Гьечу буге е кемлей пой, гьони вогун биёв. Ченгъэ-де муьзд туь гьисдге мидим. Зиёдиш мидим.

Шофер суьфде рази не бисдо, песде дики Бебе омбар минет эдей сохде, мугу:

— Бошгу, энжэгъ ме инжо нидануьм поисде. Машине миберуьм е кем дурте. Миёйт унжо, э песой эн у келе ху-негьо.

Эз лой Мамедкала омо сес дудуй паравоз. Бебе видовусд э перрон станци, вини эз дури келе товушгьой зури-зури, мугуиге пар зере эз гьово оморенбугьо паравозе. Е минутиш не кеши, эвир гьоворе пара сохде, бугъ лов сохде, гушгьой одомире бенг сохденигьо сес сохде, дуразе машин омо раси э станци. Бебе чуме чару сохд эри дире холушуре. Ебойге эз лой песини вогунгьо сес Тенхьум омо:

— Э Бебе!

— Инжоюм, сес месох, — мугу Бебе видовусде э сес холушу.

Чор пура чемадангьо эдес дери, лэгъэре гьуьндуьре Тенхьум не гьолине, фирегье синее Хьэнуко кук Эсеф гьэлейхэнжели фураморут эз вогун.

— Кешит, э у ло грузовик поисди, — гуфди Бебе, гьич хош омориш несохде холушуре.

— Дедейгьо, г'Эзилгьо хуб хосуьт? — пуьрси Тенхьум.

— Хуби, хуби, — недуьл-недуьл жугьоб до Бебе. — Тэг'Иди сохит, шофер ненге ниденуьшуь.

Гьечи э и шев поизи, эз жой эй фурухде овурде молгьой холуйгьошуре э машин веноре, ишуре э кузов венуьшунде, ю э кабина э ён шофер нуьшде, гьэгьри-гьэгьри омо Бебе э шегьер.

— Э коми куче? — пуьрси шофер оморе э ён гьопуй Кофори расиренге.

— Э лой муьлк Хочи, — мугу Бебе.

Э у холушу гуфдиребу э хуней хуьшде беруь гуфдире.

Чуьнки Тенхьум терсиренбу э хунешу рафде. У дануьсденбу э посою гешдегоргьоют, кидан, белки э милиция хэбер бири вогошдею, миьвт гьэреул мипоют. Те себэхь очмиш бире Тенхьум юш э хуне не рафд.

Эз машин фураморе, чигьоре дебердуьт э хуней Бабейгьо, Сенем хош омори сохд ишуре, овурд суьфре дешенд.

— Эз рэхь оморе одоминит, — мугу у, — нуьшит. Глошгьо епирэггьогьоймуш гье гьечу домунди. Вой эйме гердо, кини хурдегор? Бебе ки э хуне бегьем чи ние хурде, Шомоилеш ишдогь нисд. Эдем хуьшдере куьшде, ху хэлефме, эдем гуфдире, ние хурде.

— Гьичиш нибу, гьечу келе мубу мурав, — мугу Тенхьум, пезде э лой чемадангьо чарусде, гуфди: — гьери воку, Хьэнуко, у зерде чемадане, эй Шомоил е хубе бэхш овурдейм о...

Хьэнуко вэхуьшд эз сер стул, келе зерде чемадане вокурде, ведешенд е жуьфд зерде ботинкегьой гьэили.

— Игьои?

— Эри, эри, угьо эй Шомоили, — мугу Тенхьум.

Эз сес гоф эн игьо хэбер бисдо э доруни хуне хисиребугьо Либо зен Бебе. «Э хори даравошит ишму, — мугу у э дуьл хуьшде, — э ботинкегьой гьэилиревоз эз сер ведешенденит Бебере! Гьейсэгьэт оморе милиция э хуне дироморе, чигьоре гуьрдге, чуй мисохит?» Омбар бирази бу Либо эз Тенхьум не Хьэнуко, чорею мибисдоге мехуьшд гьони, пиш мисохд угьоре эз хуне. Эз сер кравать сере тик гуьрде, Либо вини, чуьтам Тенхьум не Хьэнуко пейле зеруьтге э Беберевоз, чуьтам шор бисдорутге домбуле чумгьой Хьэнуко ве гьутинегьой духдер хунере хуно гьирмизи бисдорутгьо гиргине гьутинегьо ве пезде пейлей шоробе э бугьоз вешендеки чуьтам северо гьэд бисдорутге дуразе сиегье муйгьой серию.

Бигьоре мерди валлагь, — гуфди э дуьл хуьшде Либо, — бебей ченд гьэили, паздегь сале кукке хуно мунди: дуразе сиегье муйгьо, тов-товие шумоле гьутинегьо, е жигелей гьутинеюш гьуьж не диромори. Бебере хуно нибуки. Э гьемеревоз женг гуьрде, эй хуьшде дуьшмегьо гьэзенж сохде»... Оммо э дуьл Бебе э и дэгьдэьэ е метлебгьойге дебу. У дире, чуьтам кеф Хьэнуко куьк гьисдиге, е дуь пейлейгей ичку гене пес-песоеки доре юре, пуьрсире чуьтам рафдуьт э Уруснет оморотге, чуй фурухдут, чуй овурдутге, мугу:



— Мере, Хьэнуко, песеде э туьревоз гофи.

— Эз холу пэхьнуьки? — пурьси Тенхьум, екем пиён бире. Чувкле гиргинее чумлегьой эн у эз ичку хурде гьирмизи биребуьруьт, гьовой куьк. Эз гьэйлею ведироморенбугьо дуре хунере буй пур сохдебу.

— Гьеме коргьоре э холуш ние бире гуфдире, — жуьгьоб до Бебе.

Песеде эз хуне вадарафденге, суьфде Тенхьуме рэхь сохде, песеде е кем э Хьэнукорсвоз 1ешде, Бебе мугу:

— И орине э колхоз ишму отчетно-выборное партийное собрание биренини. Райкоме фнкири Рэхьмоне эри вегуьрде эз секретари. Омбар келегед бири. Гьеме коргьоре вачарунди. Туь дануьсденики, чуьтам уре э райком критиковать сохдиге. Э ки дори лекциягьоре? Э Пэ-соил... хьэ-хьэ-хьэ...

Хьэнуко дерд эн и гофгьой Бебе негуьрд. Э ёр Хьэнуко омо, чуьтам пор эз проводники вогошденге, Рэхьмон э пушой жэгмет, э пушой коммунистгьо, эн колхозигьо юре биёбур, гьэрэхэрмон сохдебуге. «Туьре г1эйб ние оморе, — гуфдиребу Рэхьмон, — туь коммунист бире-бире, эжигей хэлгэз хубе тербиет доре, хубе коргьо вомухде хуте сохде, э ехэн председатель колхоз вепичирей, отпуск вегуьрдей э проводники рафдей, оммо колхозе эри богьгьоре ологъ сохде одоми вес не сохди»... Э партийное бюро умогьой Хьэнукоме жире-бежире г1эйбгьо доревуьруьт, биёбур сохдебуьруьт. Эз гьеме зиёд Хьэнукоме Рэхьмон гьэрэхэрмон сохдебу. И коргьо э ёр Хьэнуко оморе, у мугу э дуьл хуьшде: «Лап хуб, ме имогьой муьвуьнуьм коминиму миберуьге!» Песеде гьул Бебере гуьрде, мугу:

— Лап жигеюни уре эй ведекуьрде.

— Коммунистгьой колхоз рази бисдоге, — мугу Бебе.

— Эйчуь ние бире?

— Тараф эн уре гуьрдегоргьо омбар дери э колхоз.

— Иму гьечу мисохим, ки тараф энуре гуьрдегоргьо кем дебу...

И гофгьой Хьэнуко э дуьл Бебе шори венгесдуьт. У ведешенд, е «Казбек» до Хьэнукоме, гьердуьшу кешуьруьт, песеде дес екире гуьрде, журу бисдорут.

Пушой себэхь эденбу бире. Хурузгьо эденбуьруьт г1уь-г1уь зере. Бебе шори-шори эденбу вогошде э хуне. Оммо дуьл эн уре э хуне дироморе сэг1эт могьбул сохд Либо зен ю. Бебе дироморе, партал векенде, э сер кра-

вать дегердуй гуфдире, Либо сифет хуьшдере э лой дивор чарунде, гьирке зе гирисд. Бсбе мэхьтел бире, пуьрси:

— Чуй бири туьре?

— Чуйк чоне миёсдуьм сохде ме эз дес туь. Те кеи гьечи!

— Омбар муьр-муьр месох, гоф туьре гу, чуйниге!

— Эхир-эхир э сер туь, е кор миёв. Туьре чуй дери э коргьой алвари эн угьо. Проводники веги, шороб ди, эз вогун чемандангьоре биёр... Эхир-эхир чуй мубу!

Бебе вэхуьшде, э сер кравать нуьшде, мугу:

— Бебешмуре, Шолуме шороб доренге хуби, э бебешму кумеки сохденге хуби?

— Меди бебеймуреш, месох кумеки. Туьре гІэилгьои, туь себэхьи гІэилгьой туьре герд.

— Мере эгъуьл меди. Туь бебешмуре бер ди эзу эгъуьлгьой туь.

Либоре гъэгър омо эз и гоф. У вэхуьшд эз кравать, е нимдер дешенд э хори хуне, дегешд.

— Э хори даравош туь, — мугу Бебе, — дира гуьрдей э хори дегешде? Эз киме вирихди гуфдире, лап терсунди мере!

— Туьре терсунде? Туьре ме эй чуйюм? Ошнегьо пури туьре.

— Бур, бур-сес туьре—мугу Бебе, э у хунейге денишире, — хэбер мисохи гьемере!

Дие Бебере хов не омо. Чум хьэрзо дегешде у э ёр оворд ченд жире гиросше коргьоре, песде э пушой чум ю омо поисд чигьрет сифет, раче бала не гьуьндуьре синей Хумор, у шев гІэруьси, жендек юре лерзундгьо раче хунширине чумгьой Хумор. Песде э ёр ю омо чил-чиле сифет зен ю, зерде муйгьо — пиглогьою, челеге хуно гиргине биригьо жендек ю... «Э иллере денише, — гуфди э дуьл хуьшде Бебе, — гьеле э иревоз эдем зигьисденуьм, э худой хуьшдеш шуькуьр ние сохде. Муьр-муьриш эдей сохде. Э ошногьош мара мугу. Гье эзу расди мунош туь э зерде бебешмуревоз. Туьре сэхд муьгуьруьм мипоюм, э ошнегьо нирам. ГІэсел гердо Тамара... Э ки Тамара одоми нирав?»... У сер гуьрд эри эзир зугьу гоф сохде э ошней хуьшде Тамараревоз, э буфет кор сохденбугьозе-невоз, э ёр оворде гиросше кефгьо-хьэзгьой хуьшдере. Гье гьечи думит сохде, чум Бебе верафд э хов.

## ТЕ ХОНОХО ДУЪЗДЕ ГУЪРДЕ...

Клуб колхоз Рэхьмонигьо э гъирогъ шегьер, э ён богъгьо бу. Велггьой келе гъэребэчдоргьо не гъобогъдоргьо э пушой клуб вебуъруйтгьо зерд бире, еки-еки эденбуъруйт э хори офдоре. Лугъонди поиз бугеш, гъово очугъ бу. Чуьшме сер догъгьоре черх хурде рафде, эденбу э дури пэхънуь бире.

— Эле э гъово дениш, — мугу Рамазан эз колхозникгьо э партийни собрание оmore, э пушой клуб поисдебуъруйтгьо, — э зеверсер иму булутгьо кура бирет, оммо э уло, э «Огни» гъово эдей гъэтош гуърде сухде.

Э ён клуб поисдегоргьо сере тик гуърдуьт, расдекиш диренуьт: э дури э лой завод «Огни» гъово гъип-гъирмизини, оммо зеверсер ишу гъеме булути.

— Войгей ишму бисдо, ини ворушиш омо, — гуфди Ахмед.

Э сер энугьо е ченд чигиш рихд, песде поисд.

— Пушотегьо хэлгъ мугуфди: и коргьой худонни, — гуфди Рамазан.

— Пушотегьо ченд одоми хундегор дебу э Дербенд — пуърси Ахмед. — Биология, естествознание, химия, физика дануьсденбуъруйт бебегьо, келе бебегьойму?

Э и туьтем эз песой диш ведироморе, омо Хъэнуко. Ахмедигьо хэйли вэхд недиретгьо Хъэнукове, хъэрой вегуърде, гуфдурут:

— О-о — Хъэнуко, туь хош оmoreй!

— Согъ бошит, — недуьл-недуьл жугъоб до Хъэнуко.

— Гъери ихдилот сох, э же рафди, эз же оmore, чуь дири э у дуре хоригьой Дальний Восток.

Хъэнуко дуразе папрус «Казбек» э лэгъэ вегуърде, эз зир чум дениши э хэнделуье сифет Ахмед, э сиегье чуькле бигъгьою не эгъуьлменде чумгьою, мугу:

— Гъони вэхд эн у ихдилотгьо нисди. Воисдге туьре, песде мугуюм.

— Дер клубе вокурде, ведиромо Рэхьмон:

— Диройт, хъовиргьо!

Песде у Хъэнукове винире, мэхьтел мунд. Уре хэбер небу эз вогoшде оmoreн Хъэнуко. Уре воисденбу э Хъэнуковоз гоф соху, пуърсуь эз ю, те кей гъечи коммунист бире-бире эз коргьой колхоз домунде э ило-уле муравге, гъэйб дуь юре, песде э отчетни доклад хуьшде гую э собрание эз товуней бишэгъэрие коргьой Хъэнуко: Де

имогьой дир бу эри гоф сохде э Хьэнукоревоз. Хьэлгь кура бире, собрание эденбу сер гуьрде оморе. Рэхьмон мугу э дуьл хуьшде: «Бошгу, е рузиге э партбюро огол мизеним, гоф мисохим э Хьэнукоревоз». Оммо Хьэнучо ужире шэхлнту не бу. Тегьер гуфдиренигьоре хуно, тейте хонохо дуьзде гуьрде, дуьзд омо хонохоре гуьрд гуфдире, Хьэнучо метлеб но эй хуьшде имишев вэхуьшдени, келе-келе гоф сохдени, Рэхьмоне сэхд критиковать сохдени.

Иллогьки шор бисдо Хьэнучо, виники э президиум собрание э ён председатель колхоз, инструктор райкоме Якубове. Э ёр энучо омо ихдилотгьой Бебе, Якубов огол зере Рэхьмоне глэйб доригьо, Бебе ченд гиле э ки Якубов рафде жире-бе жире ихдилотгьо сохдигьо. «Лал-имишев жигеюнни эри усто сохде Рэхьмоне, — гуфди эй хуьшде Хьэнучо, — бенд глове эз сер ю бурра гереки».

Эз зир чум, э охмуриревоз дениширебу Хьэнучо э Рэхьмон у э доклад сохдеки. «Э иллере денишо, — мугу э дуьл хуьшде Хьэнучо, — э глэруьси рафденигьоре хуно геймиш бири оморе»... Эз расдекиш Рэхьмон хуб геймиш биребу оморе. У вокурдебу ковре кастум хуьшдере, э сер сипре шеи эврьюшьюми, деноребу гуьле-гуьле галстук. Руьш чиребу, келе муйгьой сере хуб гьижуьм вегуьрдебу. Э ён трибуне поисде, доклад сохдеки, товущ электри расире э сифет ю, жигей ярай сифет келе веде биренбу.

Рэхьмон э тегьнимиревоз ихдилот сохд, чуйтам партийни бюро вихде оморе бэгьдо, кор гиросьддебуге э колхоз, э глэрей колхозникгьо, чуйтам имисал коргьо гиросьддиге э колхоз, чуй везифегьо сентябрьский Пленум ЦК партия нориге э пушой колхозгьо. У гуфди гьемчун эз товуней кемсуйгигьой колхозиш, эз товун э кор неведиромореи хэйли колхозникгьо, э рузгьой миглндгьой жугьури, эз товуней пуч биреи омбаре бегьер онгур...

— Э и кемсуйгигьо, хьовиргьо, тэхсири вери гьемчун э имуш, э членгьой партбюро, — гуфди Рэхьмон. Ме не у членгьойгей партбюро кем кор гировундейм э глэрей колхозникгьо...

Ахмед, э пушой жергегьо нуьшдебугьо, рази бисдо эз гофгьой Рэхьмон, оммо Хьэнучо э руьхшендиревоз ловгьоре шефд сохде, мугу эри хуьшде: «Э и бижи эн ире денишо, еглни эдей пуш-пушоки пушоймуре гуьрде. Глэйбгьоймере, еглни, ме-ведировундум, де ишмуре гоф

нисди. Нумир туь нигирору, туь чогыолиге меш туьлки-  
нуьм»...

Гьеле бегьем Рэхьмон докладе не варасдебу, Хьэнуко  
десе гьово гуьрде, гоф пуьрсигьо.

— Туь, хьовир, Рэхьмон, сер имуре мепучун, — мугу  
Хьэнуко, — туь егиле гу онгургьо эйчуь пуч бириге парт-  
бюро чуь сохдиге онгургьоре эй пуч не сохде.

Жендек Рэхьмон лерзи эз гофгьой Хьэнуко. Де одо-  
миге мипуьрсиге и гофгьоре, дуьл Рэхьмон гьечу нисухд.  
Оммо Хьэнуко! Э ёр Рэхьмон омо, чуьтам пор эз правле-  
ние ихдиёр не вегуьрде Хьэнуко шоробгьой хуьшдере ве-  
гуьрде э Уруснет рафдебуге, е мегь эз кор колхоз домун-  
дебуге, пезде партбюро Хьэнуко выговор дордебуге. Э  
ёр Рэхьмон омо гене, чуьтам имисалиш пушой богьчире-  
гьо Хьэнуко оmore э Мукоилевоз женг гуьрде, э ехэнию  
вепичире, э гужевоз справка вегуьрде, э Уруснет раф-  
диге.

Гьони зугьун Хьэнуко дураз бири, юре правлений  
колхоз ихдиёр дори гуьфдире эй шороб берде. Э ёр Рэхь-  
мон омо гене, чуьтам рузгьой мигидгьо Эсеф бебей Хьэ-  
нукойгьо э кор не ведиромордебуге. Омбар гьэгьр венгесд  
э дуьл Рэхьмон гофгьой Хьэнуко. Туьндлемиш бире,  
хуьшдере гуьрде не дануьсде, Рэхьмон мугу эз Хьэнуко:

— Урусгьоре е меселеи. Угьо гуьфдиренуьт: гов кеси-  
геш мэгI зеге, энтуь ние зенуь. Туьре эз хуьшде биё гIэйб  
биёв, хьовир Хьэнуко...

— Эле, и чуь гофгьои! — хьэрой вегуьрд Хьэнуко, —  
дирейт, хьовиргьо? — дениши у э лой коммунистгьо. —  
Гьемише гьечини и. Е доне одоми гIэйб юре гуьфдире ние  
дануьсде. Туь беге инжо огьои, хони? Туьре бегем кри-  
тиковать сохде гIэмел ние оmore!

Председатель собрание Мукоил гьэлемдеше э стол  
зере, е ченд бо, мугу:

— Хьовир Хьэнуко, у энтуь гоф пуьрсиреки не бисдо,  
прения бисдо. Гоф мидим туьре, нуьш!

— Ме муьдуьм жугьоб эн уре, — мугу Рэхьмон. —  
Партбюроре келе кемсуьгигьои. Иму недануьсдейм хуб  
тербиет доре е пара одомигьоре. Дузи. Песг туь эже би-  
ри? Туьш коммунистики. Суьфде ебо туь шендей коре,  
рафдей эй шороб фурухде, бебешму рузгьой кипур э кор  
не оmore. Туь чуь кумеки сохдей э партбюро?

Э и туьтем эз ён призидиум собрание э пой вэхуьшд  
Якубов.

Десе э лой Рэхьмон кешире, у мугу:

— Гьечу гІэмел ниёв жугьоб доре, хьовир Рэхьмон. Инжо отчет эн Хьэнуко нисди, отчет партбюрои.

Мукоиле, Ахмеде не е пара коммунистгьойгере хьэз не омо эз гоф Якубов. Оммо угьоре гІэйб омо гуфдире э у, туь дуз нисди гуфдире. Чувш бисдоге эхи инструктор райкоми... Тоб недо энжэгъ келе мерд Одигюзел, бебей Ахмедигьо. Уре кефиюш небуге, э отчетно-выборное собрание омореву. Кор ние сохденбугеш, инжо э партучет дебуге келе мерд. Десе гьово гуьрде, у мугу:

— Эй жогьиле хьовир Якубов, Хьэнукоге ихдиёри эй гуфдире ногьогъ-ногьогъэ гофгьоре? Мере гьеле воисденбу Рэхьмоне гІэйб дуьм, кемсуйгигьой Хьэнукоге эйчуь не гуфдириге. Хьэнуко те кемсуйгигьой гуфдире омореву, ю вэхуьшди э сер Рэхьмон? Ногьогъ ние гуфдиренуьт, ки э метелегьо: тейте хонохо дуьзде гуьрде, дуьзд мугу вэхуьшдебуге хонохоре гуьрде...

— Ме дуьзд нисдуьм, ишмунит дуьзд! — хьэрой дешенд Хьэнуко.

Э зал офдо хьэрой-хьэрой. Председатель гьэламдеше зере э графинке, хьэрой дешенд.

— Хьовиргьо, сабуьр. Гьемешмуре гоф муьдуьм. Сабуьр сохит. Гьеле ебо кире пуьрсуйш гьисдиге, пуьрсит эз Рэхьмон.

Сесгьо ёвош бисдо. Якубов э Рэхьмон денишире, мугу:

— Гьери гу вуьнуьм коми агитатор эз коммунистгьой колхоз антирелигиозни суйгьбетгьо гировундиге?

Рэхьмон э дуьл хуьшде мугу: «Варасиренуьм эз же омореве гоф туь, хьовир Якубов»...

— Небире гофе гуфдире нидануьм, хьовир, Якубов, — жугьоб до Рэхьмон. — Э гІэрей агитаторгьой колхоз иму антирелигиозный кор дануьсдегор недери.

Якубов хэндуьсд, мугу:

— Э колхоз пенжогъ коммунист дерики, агитатор эз жой биё биёв экишму? Ижире партийни кор гировунде гІэмел ниёв. Иму гьечи хисире мундимге, салиге эз имисалине зиёдтеш пуч мибошут онгургьо.

Песде Якубов виники ю зиёди эдей гоф сохде, гьеле прения сер гуьрде не омори, э Мукоил денишире, хэндуьсде мугу:

— ГІэйб месохит мере, ме тэгІди сохдум эй гоф сохде. Кор ишмуре сохит.

Мукоил вараси, ки э дуъл Якубов эй Рэхьмон хуби не дери. «Эхъисобевоз райкоме воисдени Рэхьмоне ве-гуурде эз секретари, — гуфди э дуъл хуьшде Мукоил, — имогьой чуьтам биё бу кор?» Ченгъэде Мукоил хуб да-нуьсденбугеш, ки Рэхьмон дузе корсохи гуфдире, эз у гьич е шефдиш ниведиров гуфдире, дуъл Якубове дануьс-де сэгIэт но эри хуьшде зиёди Рэхьмоне тэгIриф недоре-ни. «Якубов представитель райкоми, — мугу э дуъл хуьшде Мукоил, — мере чуь дери эри хуььжет сохде э уревоз»...

Ве прениягьо сер гуьрденге, Хьэнуко, Якубов не е ченд одомигьойге Рэхьмоне сэхд критиковать сохденге, ногьогъэ хьэшогьош э сер Рэхьмон вешенденге, Мукоил лэгIэ вокурде, лэгIэй эн угьоре не зе. Мэхьтел мунд келе. мерд Одигюзел, мэхьтел мунд Ахмед кук эн уш.

Э тигъэтевоз эденбу гуш дошде гофгьой Якубова, эн Хьэнуко нен е пара одомигьойге Рэхьмоне критиковать сохденбуьруьтгьоре бригадир Рамазан. Эз е ло у эденбу дире, ки кими одомигьо зиёдие гофгьо эдет гуфдире, ом-мо эз е лойге у шор биренбу гьечи Рэхьмоне гьирмизи дире эрэгъ сохде диреки. Эхи ю бригадир бире, э Рэхь-моневоз ченд салгьо бэхьс берде, сер ведеберде ние да-нуьсденбу. Гьемме сал бригадей Рэхьмон эз бригадей Рамазан гьинорлуь ведироморенбу, ченд гилегьо Рэхь-мон бэхшгьо, е салиге ордениш вегуьрдебу. Чуькле балай гьэгьр гире Рамазан ченгъэде э песой Рэхьмон мивидо-вусд, рафде расире нидануьсд. Келе бэхили оморенбу Рамазане, оммо очугъ мэгIлуьм ние сохденбу.

Имишев, э собрание шинрики гофгьой Якубова, эн Хьэнукорое, синемиш сохд, ки Мукоилиш мейл Рэхьмоне ние гуьрде, лэгъэре снегье гьутинегьой Рамазан ранг гьирмизине шоробе хуно бисдо, чуькле дуьллею шор бисдо, мугуинге ю э парусдек чарусде, паргьо воромо юре.

— Ме эйшму е гоф гуьм, хьовиргьо, — мугу Рама-зан, гоф вегуьрде эз председатель. — Рэхьмон, гьелбет-те, хубе корсохи, зобуне бригадир нисди, оммо и песини вэхдгьо омбар келегед бири. Дуь-се сал колхоз хубе бегьер вегуьрди гуфдире, сер эн у келе бири. У гьечу дануьсдени колхозникгьо гьечу тербиетлуь бирет, ки дие э угьоревоз кор гировундеш герек нисди. Не доклад, не лекция, не суьгьбет, не кино, не газет...

— Дургу эйчуь гуфдире туь! — хьэрой вегуьрд Ахмед эз жигей хуьшде. — Бегем э колхоз иму кор тербити гировунде ние оморел!

Председатель гьэлемдеше зе э шише.

— Сабуьр!

— Диренит, — мугу Рамазан. — Гоф сохде ние гьишденуьт.

Бегем ме, хьовир Ахмедов, эз туь кем хосденуьм Рэхьмоне? Туь эйчуь мешет бире! Дугьри суьзи диенде, кечелуьн боши ёнедуь.

— Туь э сер туь дениш, песеде гу киниге кечел! — мугу Ахмед.

Э зал офдо хэнде. Расдекиш муйгьой сер Рамазан сейрек бире, мазалей сер ю эденбу товуш доре.

— У меселеи ме гуфдиренуьмгьо, — жугьоб до Рамазан.

— Меселере жигеюни, — мугу е жогьиле зен, э песон жерге нуьшдебугьо.

— Дирейт ишму игьоре, — мугу Рамазан. — Беге мере ихдиёр нисди эри критиковать сохде? Инжо собрание нисди бегем? У дениши э Якубов.

— Гу, гу гоф туьре, — ихдиёр до Мукоил.

Рамазан гене сер гуьрд эри гешде чуь кемсуьгигьо дириге эз Рэхьмон э ёр овурде фурмуш бире гьозие гьэдергьоре, хуьрд сохде Рэхьмоне э пушой коммунистгьо.

Эз дуьли Хьэнуко биренбу гофгьой Рамазан.

— Дузи, лап дуз гуфдире Рамазан, — шори сохденбу Хьэнуко.

— Дуз нисди, — эхириш тоб недоре вэхуьшд мугу Одигюзел. — Расди, имисал хэйли бегьер пуч бири, онгур кем бири. Э вэхдию чире не омори, кара гуьрди, э колхоз зарали расири. Бегем е тэхьно Рэхьмон, тэхьно партбюро тэхсири э и кор! — Одигюзел э пой поисде, дуь десе э сер десдечуш венорбуге, жендекию эденбу лерзире. Веди бу, чуьтам жуьмуьсденбуьруьтге сипре, хэйли вэхд чире не оморетгьо дуразе руьшгьою. — Ме эдем дирe инжо юлдаш Мукоил лэглэре глов пур сохди, поисде. Веди бирени, ки у разини э гофгьой Хьэнуко нен Рамазан, гьеме гьэгьргьошуре э сер Рэхьмон тигьи сохденуьтгьо. Песг председатель колхоз юлдаш Мукоил эжебу? Правлением колхоз эжебу? Агрономгьо эже бу? Эжеи мердиетишму? Эйчуь вэхуьшде гьэлетигьошмуре ние гуфдиренит!



Сэхд расируът и гофгьо э Мукоил. Эрэгъэлуь бисдо келе гьирмизине пушони эн у. Чорею не бисдо. Вэхуьшд, гоф сохд, э герде вегуьрд г'эйбгьой правленнере, критиковать сохд хуьшдереш, Рэхьмонеш, гьечи сохд ки не Якубов бирази бу эз ю, не Одигюзелигьо, тегьер гуфдиренуьтгьоре хуно — не шиш ёнсуьн не кобоб. «Гьечи хуби, — мугу э дуьл хуьшде Мукоил, — ме хуьшдере зобу эйчуь сохум».

Эхириш преннягьо варасд, Рэхьмониш песини гофе гуфди, жугьоб е пара одомигьоре до, кемсуьгигьоре э герде вегуьрд.

— Иму кемсуьгигьоймуре пэхьни ние сохденим, — мугу у. — Кор сохугьо одоми, гьэлетиш мубу. Бири, гьэлетигьош бири имуре. Имид мисохим, ки тозе вихде биёвгьо партбюро рэг'ид мисоху кемсуьгигьоре...

Песде сер гуьрде омоки эри нум гуьрде кире вихуьтге э партбюро, Якубов гене г'эйбгьой Рэхьмоне гуфди. Уре ние воисденбу Рэхьмон вихде биёв. Оммо омбаргьо э хуьжет поисдуьт, гьишдуьт нуьвуьсде нум Рэхьмоне э список. Нуьвуьсде омо гьемчун Ахмед, Мукоил, Сулейманова, Исаев. Рэхьмон дес гьово гуьрде, гоф хосде, минет сохд юре хэреб сохут гуфдире эз список, еккегьойгер вихуьт гуфдире, чуьнки у вини эз райком оморигьо одоми — Якубов э гьэришуюни. «Э хьисобевоз райкоме рази нисди ме секретарь бире, — думит сохд Рэхьмон.— Э гужевоз поисде, кор сохде нибу ки». Оммо ченгъэде Рэхьмон минетиш сохдге, уре эз список пузмиш не сохдуьт.

Голосование гирошд. Членгьой бюро вихде оморут Рэхьмон, Ахмед, Мукоил, Исаев, Сулейманова. Собрание варасд, членгьой бюро поисдуьт эри вихде секретарь. Де имогьой гьеме коммунистгьоре имид бу, ки гене Рэхьмон мумуну гуфдире секретарь, чуьнки омбардеки коммунистгьо эри эн у сес дорebuьруьт. Оммо членгьой бюро э тэхьно домундеки, Якубов хьэрекет сохд эри варасунде э угьо Рэхьмоне герек нисди гуфдире вихде. Энжэгь е Ахмедов омбар хуьжет сохд э Якубевоз, тараф Рэхьмоне гуьрд. Угьониге гоф ние сохденбуьруьт. Секретарь партбюро вихде омо Ахмед, заместитель Сулейманова.

...Хэйли шев гирошдебу членгьой бюро эз клуб ведиморорутгьо. Менг дарафде, гьово торик биребу. Ээ лой дерьёгь кулок вокурде, велгьой доргьо е рач эденбуь-

руът мугуиге мэгIни хунде. Еки-еки хуышге велггьо э хори офдоре, эденбууруът э зир пойгьой Рэхьмонигьо жэгъ-жэгъ сохде. Эз дуыл Рэхьмон эденбу ченд жире хэёлгьо — мэхьшовогьо гиросхде. «Метелегьо дуз бире бебей, — мугу у э дуыл хуышде, — мен сениичун мугу муърдеки, сен менуын пойпичеки. Ме эз дуыли-жуни кор сохум, тэхсириш э сер ме вебу?»... Гьеле э дуыл добугьо гофе бегьем не гуфди Рэхьмон, Якубов омогьо гьул юре гуърдгьо.

— Туь, Рэхьмон, эз ме гьэгьри мебош...

— Мере э туьревоз чуй кори?

Э торики у ние диренбу, чуьтам хэндуйсденбууруьтге ловгьой Якубов ве тов-тови биребууруьтге шегьбалутие чумгьою.

— Э ме кор не вери, — гуфди гене Якубов. — Ме чуйкле одомилеюм.

Рэхьмон жугьоб недо. — «Чуйкле одомилегьо келе ховгьо дире», — мугу у э дуыл хуышде.

— Чуйкле келе, э ме чуйни эй! Туь войгейтуьре бегьем сохдей, дие эйчуй вепичирей мунде э ме? Туь гьечи дануьсдени мере секретарь не вихдейт гуфдире, гьэгьри бирем? Гье ме нибошум ки. Бигьил еккейгеш бу дие. Мере эз гофгьой туь гьэгьр омо. Гьеме гьэйбгьой колхоз э гоф туьревоз э ме вери...

— Эле, гьечу нэгI, гьэззи туь муно? Гьич э дуыл ме ужире гофиш не дебу. Туь не варасирей...

— Ме гьеле кар не бирем.

Хэйли рэхь рафдебууруьт угьо. Эз песошу оморенбугьо Ахмедигьо куьнд бисдорут.

— Пэхьникие гофгьошму не варасд? — пуьрси Ахмед.

— Гьэззи туь муно, имуре пэхьникие гоф нисди, — мугу Якубов.

— Дие гьечу буге, бурайт эй хисире. Согь бошит!

Ахмед дес ишуре гуърде, варафд э лой хуне. Рэхьмон не Якубовиш журо бисдорут. Оммо Рэхьмон э хуне не рафд, фурамо дуз э лой вокзал. «Белки э ресторан серине пиво бисдо, бурам е кружке пиво семе хурум», — мугу у.

Рэхьмон энжэгъ оморе расире э вокзал, эз пилоконгьо варафде, э гиросхденигьо зал дироморе сэгIэт, швейцар эденбу дер ресторане сэхд сохде. Э сэгIэт денишире, Рэхьмон мугу:

— Гьеле зуники, эйчуь сэхд сохде,  
Швейцар келе мерд бу, гьуьндурье одоми, формен-  
ни шопке э сер вери.

— Туь кук Г'ээзиз нисди? — пуьрси у эз Рэхьмон. Ме  
лелей Хьызгьийеюм о, гирор, гирор.

Дер ресторане вокурде, Хьызгьийе дефирсо Рэхьмоне.

— Согьбоши, лелей Хьызгьийе! — мугу Рэхьмон.

Шев омбариш рафдебуге, э ресторан гьеле одоми  
омбар добу. Столгьош гьеме занят бу. Чуме-чару сохде,  
Рэхьмон дирени э ён гьирогъи стол, э зир пенжере, е  
тэхное одоми нуьшди. Э хори зал, э ён пойгьой эн и  
одоми е чуькле чемоданиш гьисди. Шинох омо эри  
Рэхьмон и одоми: гьир-гьире сейрек бире муйгьой сер  
ю, жиге лербегьо э сифет ю вебугьо, гиргине чунею э  
г'эрею лугьонди добугьо... «Эле, и Шиминики!» — шори  
сохд Рэхьмон ве дердгьо-дуьлесдигьоюш усэг'этте эз  
ёрию вадарафдуьт. Шимиш Рэхьмоне винире, шинохд.

— Рэхьмон, биё гьери инжо! — мугу Шими.

— О — о, Шими, туь гьечи инжо чуьтам? — гуфди  
Рэхьмон, дес Шимире гуьрде, — э шегьер оморей, э иму  
не вохурдей. Э хуне не оморей, э колхоз семе оморе  
дие...

— Ме э Дербенд не оморем, — жугьоб до Шими, —  
э дигь Гьосум буьруьм, унжо тозе богьгьо деиенди кол-  
хоз. Миёсдум кумеки сохде э угьо. Гьони э машин кол-  
хозевоз оморем эз дигь. Эз е сэг'этиге скорый поезди.  
Мугум венуьшуьм бурам э хуне.

Рэхьмон сере жумунде, мугу:

— Гьечу мубу? Одоми эз лой ватан хуьшде биёв, зе-  
нуь, гирору, хэгьер-бирор, дус ошнереш не винуь?  
Гьэгьри мебошо, туь эз ме келеш гьисди, мере ихдиёр  
нисди эри дэг'ино зере туьре.

Шими хэндурьсд, мугу:

— Ихдиёри туьре гьерчуь воисд эй гуфдире, — песде  
чуме-чару сохде, сипре пушосине э сине вобугьо, пегьль-  
воне хуно э ресторан зури-зури гешденбугьо жогьиле чо-  
гъэ зен официанткаре огол зере минет сохд: — эй эни  
хьовир иму гьерчуь бисдо биёр, хэгьерме.

— Дири, ресторан эдей сэхд бире, — мугу офици-  
антка.

— Дануьсденуьм, хэгьерме, — э тегьер минет сохде  
дениши Шими э дуь гуьл гьутинею гьирмизи бире мун-  
дебугьо официантка. — хотур имуре мегьил, ме эз жой

оморе одоминуым, куыгъне дусдгъой довгтон э еки вохур-  
дейм, мегыл хотур имуре.

— Зугъун туь ширини, — хэндуьсд официантка ве  
видовусд э лой кухни.

Рэхмон, чуме не вегуьрде эз Шими, пуьрси:

— Туь имогъой гъечи эз гъирогъ шегьер оморени ви-  
рихде?

Шими чуме-чару сохд ило-улей келе зал ресторане,  
э руьгъэние рангъоровоз нуьвуьсде оморебуьруьтгъо  
гуьле-гуьле диворгъо не гъуьндуьре сергъовигъоюре, э ёр  
овурд глэнлигъой хуьшдере, чуьтам э бебешуревоз э вок-  
зал миомоге, гъемин э и зал шевгъо э вогун оmore миде-  
нишиге, чуьтам э Москов эй хунде рафдебугъо руз инжо  
юре рэхъ сохдебуьруьтге дусдгъо, хьовиргъо.

— Ме миём э и зуригъо э Дербенд, — мугу Шими эз  
Рэхмон, — мере командировка мубу, миём ёгъин.

Пиво декуьрде, пейле зере э Рэхмоневсз, э ёр овурд  
у дусдгъо-шинохгъоре, хьовиргъой fronti не дигъи-  
жэгметигъоре.

— Эри, туь мунош, гъери эз Глэсоил чухъ хэбериге гу,  
уре гъелеш э партия восстанавить не сохди?

— Фирсори эрзо, — жугъоб до Рэхмон, песде е келе  
ох ведиромо эз синею. Не дануьсд Рэхмон пэхъни сох-  
де дерд хуьшдере. Шими мэхътел мунд, пуьрси:

— Хэйр гердо, эз синей туь ох веромо?

Рэхмоне ние воисденбугеш, э дуьл деригъоре ихди-  
лот сохд. Шими гуш вено, папрус кеши, мугу:

— Гъичиш нибу, э и гъуьлом эй зигъисде е интересиш  
нибисдо, эгер ужире гъознегъо э сер инсонгъо ни омоге.  
Зиндегуни хуьужетсуьз, гъовхосуьз, э глэрей еки гоф не-  
бире ние бире. Туь чуьтам те имогъой бебейтуьре хуно  
темиз бирейге, эз дуьлижуни хуькуьмете гъурлугъ сох-  
дейге, генеш гъечу кор туьре сох. Эз бригадире ки туьре  
не ведекуьрдет?

— Гъеле нэгл.

— Генеш ни ведекуьнуьт. Туь гъечу сох, ки бригадай  
туь нишоне бу эй гъеме корсохгъо, денуьсди?

Э и дэгъдэгъэ эз буру сес паравоз омо, мугуиге ши-  
виш дешендере хуно, вогунгъо оморут поисд э пушой  
вокзал.

— Дие ме биё бурам, — гуфди Шими, официанткара  
хъэрой зе эй пуле доре.

— Туь кеш, ме муьдуьм, — гуфди Рэхмон.

Шими хэндуьсд, мугу:

— Ме гъуногъ нисдуьм.

Бегьем те сурои эй гоф сохде вэхд не бисдо куьгъне дусдгьоре. Э вогун венуьшунде, дес Шимире гуьрде, Рэхьмон рэхьник сохд Шимире:

— Рэхьник, дениширем э туь!

## ДУЬЛ ДИ ХУЬШДЕРЕ

У шев э колхоз Рэхьмонигоь отчетно-выборное партийное собрание гирошдгоь, Хумор гье чуме рэхь шуьвер хуьшде бу. Шохьонгум эз кор вогошде, сер тен гІэилгьоре шушде, чи доре, хисунде ишуре, Хумор е книг э дес вегуьрде, сер гъуз нуьшдебу э сер стул. Эй книг хунде уре дуьлиш небу, дуьл эн у э песой Рэхьмон бу егІни чуй мубуге э собрание, чуйтам мигироруге гъэгъ-хьисоб Рэхьмон, чуй гьимет муьдуьтге коммунистгоьй колхоз кор сохдемун Рэхьмоне... Хумор книге э пушой хуьшде норебу, егІни зен хуьсуьрию Божи гьелеш не хисиребугьо не гую, гІэруьс гьечи корсуьз, тип-тэхьно эйчуй нуьшди поисдиге. Оммо Божиш чорзани зере, э сер нимдер, э пушой кинле нуьшдебугьо, эз зир чум денишире э гІэруьс хуьшде, эденбу дире, ки у гьич велггоьй книге ние вешенде, гье э е велг денишири поисде.

— Эйчуй нуьшдей поисде, духдерме? — Гуфди Божи, — Шев эдей ние бире, себэхьмунде гене э кор биб бурай?

Хумор э сэхде думит дебугьо, нэхэбереки шиновусде гофгоьй Божире, хуьшдере вешенд, е кем зердов зеребугьо раче сифетию гьирмизи бисдо.

— Эри, эри, вэхизуьм дарам дегердуьм, шев нимен.

Эз синей Хумор е келе «ох» варафд, у э доруни хуне дарафдеки. «Вой эйме гердо, — гуфди э дуьл хуьшде Божи, — и песини рузгоь нэхогъ эн игьо лап юхсул бирере хуноют»...

Рэхьмон эз ресторан вогошдгоь омогоь, э хуне деби-регорггоь гьемееки хисиребуьруьт. ГІэзиз гьемишеиней хуьшдере хуно сер шев дегешдебу, Божиш хэйли шев рафдеки, Хумор э дору дарафде бэгъдо, дегешд хиси. Рэхьмон омбариш ичгу хурдебуге, пиён не бу, у асталай дергьоре вокурде, екиреш хэбер не сохде, э буз-пой

гешде-гешде, дарафд э дору, партал хуышдере векед, дегешд э хьэлов.

— Э Рэхьмон, — сес сохд Божи эз буруни хуне, — эйтуь глош бугълеме вери э сер стол. Вегуьрде не хури?

— Ме хурдем, — евошлей жугъоб до Рэхьмон. — Хисит.

Себэхьмунде, Хумор эз хов хэбер бисдогъо, Рэхьмон э сэхде хов дебу. Хуморе ние воисденбу хэбер сохде юре, оммо куьнд бире эз ю, дире чуй беде буй шороб-эрэгъи эз лэгъэй Рэхьмон оморениге, мэхьтел мунд. «И чуй кори? — мугу Хумор, — ме ижире коре теимогъой эз Рэхьмон не дирем»... Гъовой Хумор дегиш бисдо, у дуьл песо бисдо. Дуразе булиши пешми э жендек ю рач нуьшденбугъоре вокурде, э пушой гузги шифоньер поисде, муйгъой сере шуне зере, дес-руй шушде, дироморе. Хумор хэбер сохд Рэхьмоне.

— Э же бири шову, э собрание ненге э гъэруьси?

Рэхьмон чумгъоре вокурде, дениши э зен хуышде, ви ни чуйтам эз дуьл гуп-гуп сохде, варафде — фураморениге гъуьндурь синей Хумор, чуйтам гъэтош вешендетге дуь гуьл сипре гъутинею. Десе дураз сохде, Рэхьмон гъэл гуьрд эз миглей кишди Хумор, кеши э лой хуышде. Хумор хуышдере ведешенд эз дес Рэхьмон, гъэгъри-гъэгъри дениши э ю, мугу:

— Чуй кори, имогъой э пиёнискеи сер донорей? Гъич э меш ние гуфдире чуйтам шову собрание гирошдге. Бегем туь э собрание не бири?

— Буьруьм, — сере гъуз гуьрде, жугъоб до Рэхьмон. — Докладиш сохдим. Эри гъеме кемсуьгигъой колхозиш, эн правлениеш, эн Мукоилиш ме тэхсиркор ведироморум...

— Туь?

— Эри, дие, мугу, туь секретарь партбюро бире нидани. Дие бовор не сохдуьт э ме эй секретарь бире...

Сере э сер болуш венгесд, э думит дегешд. Хумор е кем вэхд гъогъэ хуно поисде, песде мугу:

— Песде чуйни, хуышдере эйчуй хурде туь. Бигъил имогъой еккейге бугу секретарь. Эзун и пиён бирей оморейгъо, имогъой и коре офдей?

Рэхьмон вэхуышде, э сер кравать нуьшде, мугу:

— Туь гъечи дануьсдени мере думит секретарь не вихдеи гуьрди? Гъемише гъе е одоми нибуки секретарь. Мере дерд е кориге гуьрди. Одомигъо гъисдуьт, гъэдуьр

одомире ние дануьсденуьтгьо. Бегем Мукоил ние дануьсде, чуьтам ме эз дуьли кор сохденбуьруьмге, бегем гье у дуьмбура Хьэнуко кук Эсеф гъэлейхэнжели ние дануьсде, чуьтам ме хьэрекет сохденуьмге? Гьемеш дануьсдени, чуьжире шефде коргьо сохдениге Хьэнуко. Е парагьоре ние воисде хуьшдере зобу сохде, шефдигьой Хьэнукоаре эю гуфдире, тембихь доре юре. Ме ченд гиле э партбюро огол зерем Хьэнукоаре, гуфдирем: ше у шефде коргьой туьре, мера эй шороб фурухде, хуб кор сох э колхоз. Хьэз не омо юре. Вэхуьшд э собрание жуьрбе-жуьре хьиллее гофгьо гуфди. Мукоил? ЛэгIэре гуьрдебу поисде. Мэхьтелуьм... Валлагь зурбои. Мен сениичун муьрдеки мугу, сен менуьн пойпичеки. Ме жун мере, гьувотмере дуьм эй коргьой колхоз, мереш зобуне корсох гуют?

— Хумор виники, чуьтам Рэхьмон э хуьшде кеширениге и коре, дие эй пиен бире омореиш гоф не сохд.

— Гьичиш нибу, дуьл ди хуьшдере, — мугу у, оммо дуьл юш гурунд бисдо.

«Эз кул гIэсб э кул хэр офдорере хуно бире эзини мэхьэл эри одоми», — гуфди э дуьл хуьшде Хумор. Дие у Рэхьмоне дуьндуьрмиш не сохд, чой чи хурде, духдерлей хуьшдере гъэл гуьрде, моч сохде, рафд э кор.

Э пушой дер поликлинника эз гьеме пушо э чум Хумор ГIэсоил омо вохурд.

— Себэхь э хэйр бу, лелей ГIэсоил, кидан гене кеф туь нисдиге?

ГIэсоил дуь десе э сер шуьгъэм веноре, мугу:

— Пир бирем, духдерме, дие духдиргьош чоре сохде ние дануьсденуьт...

— Мубу чоре, лелей ГIэсоил, сабуьр сох! Ме мугуюм туьре зуте дефуьрсуьт э духдир.

— Согь, боши, духдерме. ГIэилгьой туь чуьтамуьт, эз Рэхьмон бирорзерейме чуй хэбери?

Хумор е кем э хуьшде домунд, песде жугьоб до:

— ГIэилгьо хубут, лелей ГIэсоил, оммо кеф Рэхьмон е кем нисд. Нечогь чи нисдио, эз кор, эз колхоз е кем дуьлхуьрди. Шову мугу э собрание гофгьо бири гене, гIэйбгьошуре э сер Рэхьмон вешендет, хубе секретарь не бири, кидан гене чуй гофгьойгеигеш. бири. Имогьой, мугу, Хьэнуко кук Эсеф гъэлейхэнжели дуьм вешенди. Э худо, худо гуж сохо э игьо. Эз дондуй кечеле Бебе хилос бири, э дондуй гьобоне Хьэнуко офдоре...

Гэсоил эз мунде жигеш могъбул бисдо, гъэгър кешки, дор доренгъой шуьгъэмию днеш гужлуь бисдо, гье э у поисде жигей хуьшде, биней диворе сэхд гуьрде, э сер е келе сэнгъ нуьшд.

— Чув бисдо, лелей Гэсоил?

— Гъичиш нибу, духдерме, гъони мигирору, гъечу гIэре-бир мере эз шуьгъэм сэхд гуьрде.

— Гъечу буге ме дарам, нуьвувсуьм туьре, хъэрекет мисохум зу дефуьрсуй туьре...

Хумор дарафдени э поликлиника, Гэсоил э думит домунде. «И беде инсонгъо ебо кей нисд мубу эз гIуьлом? — гуфдире у э дуьл хуьшде. — Гуюм Бебе э хуней куьгъне кулак Шомоил гъэрчогъи келе бири, шефд воромори. Песг Хъэнуко эхи ферзенд эн е косибе одоми, куьгъне фэхълеи. Эхи Эсеф бебей эн угъоре э хьиллес коргъоревоз кор не бири». Песде э ёр Гэсоил оморот ченд жире пушотегъо бире гирошде коргъо, хубе ве хэребе инсонгъо. «Эгъ, чув биё бу? Эз гъуьзуьргуьл бегем гъэретикон бегъем ние бире? Оммо э сэхъиб хуьшде верзиренигъо Рэхъмони. И мердимазаргъо бухову бире э пойгъой эн у ни офдорутге, Рэхъмон омбар пушо мурафд. Эгъуьлменди, зиринги, дилбоши, эз дуьли кор сохденигъо одомини».

Гэсоил дануьсденбуки и гъозиегъэдергъо э сер Рэхъмон оморотгъо э сереботиюш гъисди гуфдире. Уне гуьре у хуьшдере тэхсир кор сохденбу. «Ме имогъой келе мердуьм, гIуьмуьрме варасди, и жогъиле гIэили. Э у эйчуь бие дегмиш бошут?». Гъегене, чуьш бисдоге, чум Гэсоил чумерэхъ жугъоб эрзо э Масков фирсоригъо бу. Уре имид бу, ки центральный комитет партия э назар мегуьруь ю нуьвувсде гофгъоре, е жугъоб мифуьрсуй.

У жугъоб оmore расиребу. Гэсоил эки духдир дарафде, рентгенгъо чигъо юре фегъм сохде, дермугъо вегуьрде э хуне оmore, дирени э сер стол е открытка вери.

— И эймени, Евдит? — пуьрси Гэсоил эз зен.

— Эри, эз Маскови.

Гэсоиле мугуиге пар воромо. Дор дорегъой шуьгъэмию сук бисдорут. Чешмекгъоре э чум веноре, Гэсоил ебо тэгIди сохд эй хунде, чув вериге э открытка «Огъо», — мугу Гэсоил когъозе хунде. Э откритка вобу, ки эрзою омори э центральный комитет расири гуфдире, эи зуригъо эрзоре фегъм сохде, жугъоб мифуьрсуйт гуфдире. Бэгъдовой ченд гъэде мэхъэл шори сохде, хэндуьс-



дуьт лугьонд дарафдебуьруьтгьо, е кем э чумгьой узбекгьо ухшеш зеренбуьруьтгьо чумгьой ГӀэсоил, суке лезетлуье нефес кешире, у хьэрой сохд Ӏвдите.

— Э духдер, гӀзилгьой туь муно, е пейле чой гьисдге ди мере хурум!

— Нуьш, эдем диловунде, — жугьоб до Ӏвдит эз гьейву.

Бегем ГӀэсоил нуьшде дануьсденбу? Гьелем э ю мэгӀлуьмиш небуге, восстановить бире не бирею э партия, у эз шори жиге ние офденбу эй нуьшде, открыткаре э дес гуьрде, гогь э и лой хуне рафденбу, гогь э улонгей хуне.

— Мере хьэлоле дедей зенди, — мугу ГӀэсоил, Ӏвдит чой диловунденге. — Ме э хэлгь беди несохдем, ме гьеммише рэхь партияре дуз рафдем. Чуй менире партия эз хуьшде гьэзгьри нисоху. Ме э гьовре коммунист мурам...

— Гье у ГӀэсоили, гье у ГӀэсоил, — мугу Ӏвдит, — партия эн туь худой туьни.

— Эри, партия эн ме худой мени. Ме этуь ченд гиле гуфдирем гиснеш мумунум, тешнеш мумунум, рэхь партияре мурам. Чуйнки ме бовор сохденуьм, ки бебеймуш, дедеймуш партияи, у партия бирмунденигьо рэхьгьо гьеме дузи. Мере воисдени э муьрде рузмеш, зиловлейме кура бошут коммунистгьо, членгьой партия мере беруьт гьовре сохут...

— Гьейвой, и чуй гофгьон, мерд! Гье муьрде дери э лэгӀэй туь!

ГӀэсоил эз пейлей чой хуьп кешире, мугу:

— Гов немуьруьм ки хурди? Гьемеймуш муьрдениним. Чуй Маркси, чуй Ленини мердгьо муьрдет э гуьлом. Иму текей мундениним?

Чой хуьшдере хурде бэзгьдо, ГӀэсоил вегуьрд е том эн книггьой Ленине, Ӏн доре хуьшдере э сер нимдер, сер гуьрд Ӏвош-Ӏвош эй хунде.

## **Э КЕК ГУЬРЕ ОДОМИ ПУСТИРЕ НИ СУХУНУ**

Хинике зимисту бу, зимистуй гьозори нуьгьсади пенжогьсеимуьн — гьозори нуьгьсади пенжогь чоримуьн салгьо. Богь-бурагьо гьеле-меле ние варасденбуьруьт. Ченд гиле правлений колхоз кура бире, меслэхьэт сохдебуьруьт, ченд гиле Ахмед членгьой партбюро ре кура

сохде, гоф сохдебу, чуй сохде биё биёвге эри э вэхдию варасде богъ бураре. Гьеле миёсд богъгьо бил зере омор, глов доре омор, коргьо омбар бу, оммо гьово хиник бу, э хори верф бу.

Е бо э Рэхьмон вохурде, Ахмед э уревозиш меслэхьэт сохд.

— Эйтуь чуйтам омор, поринере хуно эй биёбур не-бире чуй сохим?

Рэхьмон жугьоб не до, гьош дуллу э хори дениши. Ахмед вини, чуйтам лерзиренуьтге мижегьой чумгьой хьовир ю, чуйтам гьирмизи бириге жиге лербей пушони ю, э довгго яралуй биребугьо. Рэхьмон жугьоб ние до-ренбу.

— Имогьоиш гьэгьр туь не гирошди? — Кидан туь гьечу дануьсдени келеети секретарире ме эз дес туь ведешендем гуфдире...

И гофгьо э Рэхьмон сэхд кори сохдуьт. У тик гуьрде сере, мугу:

— Эле, Ахмед, туь чуй гуфдире. Ме туьре эйме эз бирор зиёд хьисоб сохденуьм. Эйтуь жунмере муьдуьм.

— Дие чуйни, текей туь гьечи гьоси-гьэгьри мунденини?

Рэхьмон гене сере гьуз гуьрд, мугу:

— Ме гьич фурмуш сохде ние дануьсденуьм гофгьой Якубове, лэгьлэгьингьой Хьэнукове, лэгьере гуьрде лос нуьшдебугьо Мукоиле... Эхи меш одоминуьм, мереш дуьл дери дуьл пара бире...

Ахмед не Рэхьмон э тэхьно хуней эн партбюро нуьш-дебуьруьт, дуь э пушой еки. Ахмед эз жигей хуьшде вэ-хуьшде, омо гьэл гуьрд эз душгьой Рэхьмон, мугу:

— Туь дануьсденики Хьэнукове э партбюро выговор дорейм эри бишэгьри коргьой ю э, песой алвери рафденигьо. Э Мукоилевозиш ме гоф сохдем. Э кек гуьре одоми деноре пустире ни сухуну. Туь хуб дануьсде уре. Э угьо гуьре бегем туь дуьл хуьрд бире, э кор буш денишире, коргьой колхозе эз чум биё шени? Колхоз бегем эн Мукоил нен Хьэнукои! Э колхоз иму шешсад хуне одоми дери, чуйлпенж коммунист не сади дегь комсомолец дери.

— Гье у чуйл пенж коммунист не буьруьт бегем э собрание дебуьруьтгьо, — жугьоб до Рэхьмон.

Ахмед гене э жигей хуьшде нуьшд, мугу:

— Рэхьмон, мегьил мере келе-келе гоф сохде, э туь-

ревоз женг гуьрде. Песде ме эз туь лап гъэгри ми-  
бошум.

— Бош, — жугьоб до Рэхьмон. — Оммо эз туь гьич е  
вэхдиш дуьлхурд нибошум. Гъэдой кун пойгьой туьре  
вегиро чуй Мукоилигьо, Якубовигьо!

Ахмед хэндусд, э лой дер хуне дениши, хьэрзоиге  
ненге нэГ.

— Ш-ш-ш..., — мугу Ахмед. — ГИэйби шиновусдге  
Мукоил.

— Шиновугу. Ме ние терсиренуьм. Номусме темизи  
э пушой партияш, э пушой колхозиш. Ме гьич е зобуне  
кориш не сохдем...

— Расди, — рази бире, сере жумунд Ахмед.

Песде гьердуьшу сер гъуз гоф не сохде нуьшдуьт.  
Гене Ахмед сере тик гуьрде, пуьрси:

— У коргьо гьеме э рэхь мурав, хьовир. Ме э думит  
деруьм, чуйтам иму э вэхдию боггьоре бура, бил зере-  
реш марасимге.

— Гьич е думитиш нибисдо, келегьой колхоз иму э  
ишу гуфдире гофе мисохдуьтге. Имуре э десевоз бил зе-  
ре чуй герек бу, э садгьоревоз одоми дефирсоре э биле-  
воз? Дуь-се трактор мидарафд, э совхоз хорире гьурлугь  
сохденигьоре хуно гьеме коре мисохд. Гьеми жофой кол-  
хозигьо сук мибисдо, гьеми боггьо э вэхд ю гьурлугь  
сохде миомо, гьеми онгур ужуз муьнуьшд э колхоз, гье-  
миге бегьер зиёд мибисдо. И ченд сал эдейм гуфдире:  
биёйт векеним и пичире-пичире тегьенгьоре, рядовой де-  
шеним, эн совхозе хуно. Э гуш ние гуьрденуьт. Гье пост-  
той-постой...

Ахмед лугьонд нефес кеши. Э разимендиревоз дени-  
ши э Рэхьмон, мугу:

— У туь гуфдирегьо гьеме дузи. Боггьоре иму биё  
реконструкция сохим. У э пушо деригьо везифен. Оммо  
гьони, гьони чуй сохим!

Э гоф Ахмед жугьоб не доре, Рэхьмон мугу:

— Ини пор иму нимей план имуреш бегьем не сох-  
дим. Ченгъэде онгур гьэрдхунд мундим хьуькуьмете.  
Оммо совхоз эз план зиёд дори. Гьемешу — эз директор  
сер гуьрде, те бригадиргьо не звеновойгьо премия ве-  
гуьрдет. Эй чуй келе бегьер вегуьрди совхоз? Агротехника  
хуб гиросше. Эй чуй хуб гиросше агротехника? Тегьенгь-  
гьо рядовоют: трактор дарафдени, э вэхдию хорире  
гьурлугь сохде, э вэхдию оло сохде, э вэхдию капарус

не гугурт шенде, э вэхдню де коргьойгере сохде. Эн иму колхозигьо машинне э кул веноре, еки-еки эй капарус шенде дарафде, оммо эн совхоз трактор эз глэрей те-гьенггьо рафде шэхдей капарус нен гугурте эдей лов сохде э гьерло. Гьем зури-зури, гьем темиз, гьем сук, гьем ужуз...

Ахмед э тигьэтевоз гуш дошде гофгьой хьовир хуьш-дере, эденбу дире, ки дуьл Рэхьмон эдей эй коргьой колхоз сухде. «Хубе председатель мибисдо эз и эри колхоз», — гуфди э дуьл хуьшде Ахмед эз зир чумгьо денишире э Рэхьмон. Э и туьтем у дениши э пенжере, вини чуйтам гьово очмиш бире, чуйшме ведиромоге.

— Дирени? — шори сохд Ахмед. — Руз эдей очмиш бире.

— Токи мибисдо, могьгул э кор мадарафдим, богь-бураре марасдим.

## ВЕРФГЬО ХЬЭЛ БИРЕНГЕ

Верфгьо хьэл бире, офдо ведироморе, хоригьоре зу хуьшг сохдебу. Мегь январиш буге, мугуиге суьфдеи рузгьой васал бу. Догьгьо э зеверсер Дербенд веруьт-гьо савз биребуьруьт, савзегьо эз зир верф ведироморе эденбуьруьт шив зере зеверо варафде мугуиге угьоре чуйшме магните хуно эденбу э лой хуьшде кешире берде.

Себэхь суьфделе вероморебу. Гьеле чуйшмеш гьоворе герм не сохдебу. Е десде колхозигьо эз зусери оmore поисдебуьруьт э хьэет кантор эри э машин венуьшде, э кор рафде.

— Э ёртуь мунди, Глэзиз, — гуфди Эсеф гьэлейхэн-жели э ён Глэзиз э сер пилонгьо нуьшдебугьо, — э девр Николай э богьгьой Менешир Огьо, эн Оврогьом Нетен не эн Пинхьос Исогь кор сохденбиримгьо вэхдгьо, э машин нэго, э глэребеш эй венуьшде минкин небу имуре. Тогьор э герде дери, мушар э дес дери, тирох э пой вери, тузгьой хорире шишире-шишире мурафдим идуразе рэхь богьгьоре, хэсде, менде, рэхьэти не вегуьр-де, мидарафдим э богь, хэзеин хуьрш сохде э сер иму, эз кор пиш несоху гуфдире. Имогьой машинсуьз эз шегьериш ние вадарафденим.

Глэзиз ох кеши, э Эсеф денишире, мугу:

— Уре ме не туьни дануьсденим, жон хьовир, иму дирейм четинигьоре, кеширейм муьрсе, иму дирейм тозе

девреш. Оммо е пара жем-жогыл гъечи дануьсдени, гъемише гъе гъечи, гъейсэгІэтинере хуно бири: э машино-воз э кор рафде, э гъовои хунде, сенигІэткар бире, духдир не агроном бире, э чекмегъой хромевоз э кор рафде. И гІэилгъо гъечу дануьсденуьт, гъич э гІуьлом тирохгъош не бири.

ГІэиз дениширени э лой десдей жогъиле колхозигъо, плащгъо э тен ишу, чекмегъо э пой, э ширине ихдилот поисдебуьруьтгъо.

— Е парагъо гъеле эз колхозиш рази нисдуьт, — гуфди ГІэиз. — Ченгъэде эз колхоз эю чиш расирениге, гене чум сурои нисдуьт. Э Уруснетгъо рафденуьт эй чи фурухде, пул гъэзенмиш бире...

Эсеф сере гъуз гуьрд, дуразе сипре руьшгъой хуьшдере тимор сохде, э дуьл хуьшде гуфди: «Э жун бебейме, и эме эдей дешновунде, еГІни Хъэнуко кукме э илоуле рафде оморе гуфдире. Э метелегъо гуфдиренуьтгъоре хуно: гъуьзуьм сене деюрем, гелинуьм сен эшит. Эн иш гъечуни». Кори сохд э Эсеф гофгъой ГІэиз. Чумечару сохд Эсеф Хъэнукаре. Веди небу. «Эле, эйчуь не омори бу имбуруз и э кор?» Вонсд юре вехуьзуь бурав э хуне, эй Хъэнукаре огол зере, оммо э и туьтем э пушо омо поисд келе машин.

— Биьйт, венуьшит, — хъэрой дешенд шофер. — Зу бошит!

— Али, — мугу Рэхьмон эз шофер, — е дуь келе мерде венуьшун э ки туь э кабина. Зенгъоре э кабинагъой эн у машингъойге менуьшуним. Лелей Эсеф, бурайт венуьшит э кабине!

Ю, Рэхьмон, келе мердгъо э кабина нуьшде бэгъдо, дер машине сэхд сохд, хуьшдере вешенд э кузов.

Богъгъой колхоз Рэхьмонигъо э раче-берачей богъгъой совхоз бу. Рэхьмон э ён ГІэизигъо, Эсефигъо поисде директи, чуьтам угъо еки-еки тегъенг бурануьтге, эз лой совхоз э гуш ю сес трактор дарафде, э сер гъендэгъ варафде, Рэхьмон дирени, чуьтам е рач трактор эз гІэрей тегъенггъо рафде, хорире хиш зерениге. «Совхоз чуьтам эз иму зиьд не вегуьруь бегъер, — гуфди э дуьл хуьшде Рэхьмон. — Тегъенг буррара угъо зу варасдет, имогъой эдет хиш зере. Оммо иму гъеле биё тегъенг бурим ченгъэдейге вэхд бил зеним». Рэхьмоне имид бу, ки эгер колхоз совхозе хуно агротехнике гировундге, реконструкция сохдге, механизация бердге, эз совхозиш

бегьер зиёд мегуъруь. У фикир сохд нуьвуъсуь е когъоз эз товуней богъгъоре реконструкция сохде, фуърсуь э Совет Министров енебуге э редакция э газет эй дешенде. Оммо э дуълию омо Мукоилигъо гъэгъри мибошут гуфдире, мугуют, ки эз гъэгър нуьвуъсди, юре келеети воисде гуфдире. «Эгы!» — гъэгър сохд, луьнг шенд Рэхмон эз сер гъендэгъ, омо э лой бебейгъошу, мушаре вегуърд, сер гуърд эри кумеки сохде э богъбургъо.

Руз эденбу пишнеи бире, эз лой гъопуй богъ сес дудуй автомашин омогъо. Рэхмон сере тик гуърде, дирени э богъ диромо «Победа», поисд э ён хуней богъбончи, э зир келе тутдор, эз машин ведироморут Мукоил, Шими, Ахмед.

— Рэхмоне туь биё шинохи, — гуфди Мукоил эз Шими. — Бригадире, мере воисдени тозе богъгъо дешенигъоре э у дим эри гъурлугъ сохде.

Шими жугъоб не доре Мукоиле, видовусд э лой Рэхмон шори сохде гъэл гуърд юре, песде хъэрой сохд «лелей Гъэзиз», — гуфдире, рафд дес келе мердгъо, богъбургъореш гуърд. Мукоил екем э хуьшде домунд, э хъисоб у ние дануьсденбу, дусди э гъэрей Рэхмонигъо, Шимиигъо добугъоре. Э серевоз Шимийгъо, Гъэзизигъоре бурмунде, Мукоил э Ахмед дениши. Ахмед хэндее лов бисдо, мугу:

— Э довгъо э еки бирейм: Рэхмониш, агрономиш, меш. Дербендиним уш, кук эн у келе мерд Юсуф гуфдиренигъои, руьшлегъою руьшлегъой кечире хуно гъисдигъо. Э Гъэзиз бебей Рэхмонигъоревоз омбар гешде у. Ю Шими эз Дербенд зу рафди, эзу ние шинохде туь уре.

Песде гъемееки э зир тутдор кура бире, э ихдилот поисденге, Шими пуърси:

— Ченд гектар тозе богъ дешенде воисде ишмуре?

— Гъелелуьге имисал си гектар, салиге гене мидешеним, салтеригеш. Жэгъми ю сад гектар тозе богъ мидешеним. Зиёди хори нисди имуре. Уреш э гужгъо белогъоревоз дори имуре исполком. Дуриш дури, е сер э лой завод «Огнини».

— Имугъой э дуь лой шегьер мубу богъгъошму дие, — гуфди Шими, — э лой Араблинскиш, э лой Огниш.

— Гъэйгъу нисд, — мугу Ахмед. — Гъони машингъо гъисди эри рафде оmore. У пушотегъо хэлгъ э пееде рафденбугъо вэхдгъо четин бу.

Мукоил э Рэхьмон дениши, пуърси:

— Чутьтам оmore эри туь, Рэхьмон, тозе богъгьоре до-  
римге э туь?

Гъошгьой Рэхьмон дуллу бисдо, жугьоб недо.

— Гъэгьрини эз ме, — лов хэнде бире, гуфди Муко-  
ил, — Ме недаьнусдем туь гьечи гъэгьрегун биреире.

Рэхьмоне воисд бигьлуь игьоре инжо, бурав э ки богъ-  
бургьо, кор хуьшдере соху. Шими инжо бирей мешет  
бисдо э у. Эз екиш гоф ние ведироморенбу. Ахмед нево-  
товусд, гоф сохд:

— Рэхьмон гъэгьри нисди эз туь, Мукоил, — мугу  
Ахмед. — Туь эдей гуфдире э у тозе богъгьоре вегуь-  
руь. Оммо у эдей гуфдире биё куьгьне богъгьоре тозе со-  
хим, реконструкция гировуним. Расде гуфдире. Весси э  
билевоз кемер хуьрд сохденигьо хэлгь. Трактор дешен-  
де гереки э богъгьо, сук сохде жофой колхозникгьоре...

Мукоил бирази тегьер, мугу:

— Егьни ишму гудфдиренитгьо тозе богъгьо недеше-  
ним, зиёд не сохим богъгьоре!

— Иму гьечу ние гуфдиреним, — эхириш лэгьэ во-  
курде, жугьоб до Рэхьмон. — Тозе богъгьо дешенит. Э  
у кор екиш гъэршу нисди. Тозе богъгьо дешендере хуно,  
и куьгьнегьореш тозе сохде воисде. Дирей у келе мерд-  
гьоре? Гьеле тегьенге бурра не варасдет, э пушо бил зе-  
ре дери. Кей мизеним марасим?

Песде гуфдиренит э взхд ю богъгьо гъурлугь сохде  
не омо, бегьер кем бисдо, филон-фошмокон.

Мукоил гуш дошде гофгьой Рэхьмоне, мугу:

— Зугу э герме жиге дери.

Шимийгьо гьемееки мэхьтел мундуьт.

— Чутьтам эхи? — пуърси Шими.

— Гьевелнмуьнжи реконструкция сохде асанте кор  
нисди, гье ебо биренигьо кор нисди. Одоми гереки, хэр-  
жи гереки, взхд гереки. Ве дубореимуьнжи иму биё пла-  
не бегьем сохим. Дори имуре план сери гектар дуваздегь  
тонн, биё бегьем сохим. Богъгьоре вачарундиге, эз же  
мидим плане?

— Ме ние варасире гоф туьре, — гуфди Шими.

— Гоф эн уре эй варасире четин нисди, — мугу Рэхь-  
мон. — Гьейсэгьэт э богъгьойму э гьер гектар хьофд,  
хьэшд гьозор тегьенг вери. Рядовой бисдоге мидобу чор  
гьозор. У гуфдирени чор гьозор тегьенг ченд хьофд гьо-  
зор бегьер нидуь...

— Гьо-о-о, — хьэндуьсд Шими, — варасируьм. Э-э-эй, хьовир Мукоил, бегем е кем семе агротехникаре не хундей?

Мукоил гъэгъри бисдо.

— ГІзил нисдуьм, хундем е кем.

— Дие эйчуь гуфдире гъечу. Агротехникаре хундейге, туь дануьсдени. Тегъенгъо эз еки дур-дур бисдорутге, хурек зиёд мегуьруьт эз хори, гъувотлуь мибошут, хушегъо омбар ве келе мибошут. Ве дуборенмуьнжи хори э тракторевоз хуб гуьрлугъ сохде миёв, оло, капарус шенде, удобрение доре — гъемей эн и коргъо сук мубу, хуб, бегъере зиёд мисоху.

Мукоил эз пачке папрус вегуьрде, кешире, мугу:

— У гофгъо гъеме теорияи. Оммо эз ме райком плане эдей хосде.

— Теорияи? — Ахмед дениши э лой богъгъой совхоз. — Гъери э ёртуь биёр совхоз ченгъэде бегъер вегуьрдиге пор, иму ченгъэде вегуьрдеймге.

— Э-э-э, бигълит туь мунош, — гъэгъри бисдо Мукоил. — Порине ихдилот е ихдилотиге бу. Иму хуьшдениму техсиркор бирим.

Рэхьмон э фикир домунд. «Ире чуь гуфдире воисде э и гофевоз. И эз лэгІэй кечеле Бебе гІов хурдере хунои».

Шими э сэгІэт дениши, сере гъово гуьрд, эз чуьшме чумгъоре хисунд.

— Хуб, и ихдилоте э правление нит, меслэхъэт сохит. Эрме оморенигъош богъгъоре рядовой сохде воисде Весси э куьгъне тегъенгъоревоз богъгъоре гъурлугъ сохдеймгъо. Имогъой биёт бурайм тозе богъ дешенитгъо хорире виним.

— Биё туьш э имуревоз, Рэхьмон, — гуфди Мукоил.

— НэгІ, ме ниём, не эз бригадаймеш журу нибошум. Ме гъе э инжо кор мисохум. Мере ихдиёр дит энжэгъ богъгъой бригадей мере рядовой сохум, бегъериш чен совхоз вегуьрденигъо вегуьруьм.

Шими дениши э Мукоил, егІни чуьтам оmore эри туь?

— Э правление фегъм мисохим, — жугъоб до Мукоид.

## ПЕЙЛЕ ДУСДИ

Шохьонгум офдо дарафденге, гъово хиник булутлуь биребу. Булут унгъэде гужлуь бу, эз луьгегъой доргъо дуьгъ-дуьгъ гІов эденбу тигъи бире. Колхозигъо эз кор



рафде, э хунегьошу буьруьт. Э богъьо одоми ве ди небу. Энжэгъ гIзере-бир эз рэхъ богъьо эденбуьруьт тек-тек гирошде машингьо.

Э и хинике шохьонгум Хьэнуко кук Эсеф гъэлейхэн-жели, гердевуней ковре тозе плащ хуьшдере зверо вешенде, шопкере сэхд э сер шишире, гъуьж дироморе, поисдебу э рэхъ богъьо, э зир эн е келе гъзребечдор. Уре эденбу лерз воноре. «Эжи е машиниш оморе ние ведироморе», — мугу у. Песде вини эдей куьнд оморе е чуйкле легкой машин. Воисд юре десе гьово вегуьруь, хогъу юре венушунут э машин. Оммо виники жиге нисди, десе не вегуьрд. Машин зе гирошд. Гъэгър кеши Хьэнуко, ведешенд эз куьф пачкей «Памире», спичкере зере, сигарет кеши. Эз дури омо сес машин. Келе сес бу. «И грузовои э хьисоб», — мугу Хьэнуко. Эз расдекиш грузовой бу, юш омбар келею. Кузов тигъи бу, кабинаш фирегье кабине бу. Хьэнуко десе гьово вегуьрд, хъэрой дешенд. Машин поисд, шофер дере вокурд.

— Веги бер мере туь, мунош, — минет сохд Хьэнуко. Песде дирени эз кабина э ю чумгьоре буьхъ сохде денишири кечеле Бебе.

— Эле, туьни? — мугу Хьэнуко.

Бебе хьир-хьир зере, хэндуьсд, эз лэгIэ папрусе вешенде.

— Биё, биё, воро э киме, — мугу Бебе, — кабине келеи. Чуьтуьни дусде не венушунде, дие кире менушуним.

Хьэнуко шор бисдо, вешенд хуьшдере э кабина, десгьоре э еки совусд.

— Жэгъэ зеребу мере э хиники, — мугу у, — кипеёгълие булуте ние дире. Эз доргьо гIов эдей рихде.

— Булут хуби, — гуфди шофер, — э дерьёгъ жэгI омбар мидобу.

Бебе э хэндеревоз денишире э Хьэнуко, пуьрси:

— Туь гьечи геймиш, гейдуьрмиш эз же оморе?

— Э ферма буьруьм. Э Абасевоз эй гоф сохде. Эдем учетчик поисде э ферма.

— О — гьо! — мугу Бебе. — Ме шиновусдем туьре выговор дорет эри шоробгьо бердеи. Игьо диеш туьре вегирлуь сохдет ки. Гуьрге э геле дешенденуьт?

Шэгъгъэ зере, хэндуьсд Бебе.

— Э-э-э, туьш гофгьо гуфдире о, — мугу Хьэнуко. — Выговор ө и коревоз чуь кори? Рафдуьм э ки Мукоил, минет сохдум, мугум ме дие э бригадай Рэхьмон кор

сохде нидануым. Уре эз парторги ведекуурде эилоревоз, гуьрге хуно денишире э ме. Эн ме нен у дие дуз ниёв гьич. Терсиренуым э глэрей иму гоф чи бире, мэхуьзуым, мепуьчуым, сер-сифет юре мизенуым пара мисохум, хэ-то боло миёрум э серме...

— Лап хуб мибисдо зере пара мисохдиге, — мугу Бебе.

Хьэнуко шефд дениши.

— Мере зей, глэилгьои, хьовир... Мугум эйме эз гьеме ферма хуби, учетчики. Суке кориш гьисди. Мукоил мугу: бура э Абасевоз гоф сох, уре рази бисдоге, песде э правление миним меслэхьэте, е кор мисохим.

— Не бисдоге?

— Де уре нидануым гуфдире.

— Ним литр эрэгьи восдо, ме кор туьре дуз сохум, — мугу Бебе.

— Е литриш мосдонум, туь чуьтам мисохи?

— У туьре герек нисди.

— Кеш гье гьейсэглэт восдонум.

Машин оморе э шегьер расики, Хьэнуко э шофер денишире, мугу:

— Гьей сох э лой ресторан, э вокзол!

— Эле, туь эз расдекиш гьуногь сохде имуре? — пуьрси хэнде-хэнде Бебе.

— Гоф мерд гофи!

— Песде пиён сохде, э хуне фирсориге мере, Либо сер туьре мубуру.

— Либо сер зерде Шолум бебешуре буругу!

— Эле, хисурмере могу о!

— Э у хисуревоз гуьюмге туьре!

Оморут э вокзалиш расуьруьт.

— Дие ме бурам дие? — пуьрси шофер эз Бебе.

— Эже? — мугу Хьэнуко. — Кеш э имуревоз э ресторан.

— Нэгл, согьбошит, ме биё гьеле машине темиз сохум, эхунеш миденуьшуьт эме.

Бебе хэндуьсде, мугу:

— Бигьил бурав, худо михьило мисоху э у.

Ресторан одоми пур бу. Буфетчик, е сара, гьолине шуьгьэм, бирэхьнее сер тампина гуфдиренбугьо жогьиле геде — Хьэим, суьфделе тозе бочкей пиворе векендебу, пиво севенгьо буйкешире, шишире оморебуьруьт э

ресторан. Хьэнукойгьо зала гиросде, дарафдуьт э дору. э тэхьно кабине, чум зере официанткаре огол зеруьт.

— Дуь гирфинке пиво, ним литр эрэгъи, дуь кобоб, зокуске-мокуске, туь данигьоре хуно — гуфди Хьэнуко.

— Эрэгъи эй гьерки сад грам зиьдте гIэмел ние оmore, — жугьоб до официантка.

Гиргине гьутинегьой Хьэнуко гьипгьирмизи бисдо, ловгьою хэндуйсдуьт.

— Ебо эй гьерки сад грамм миьери, гIэселе духдер, песде гене эй гьерки сад граммигеш, песде гене... Хьэ-хьэ-хьэ...

Официантка нуьвуьсд э когьоз, вадарафд, Бебе э Хьэнуко денишире, мугу:

— Э туь лутietiш дебире бебей ки!

— Хьэ-хьэ-хьэ, бегем ме мерд нисдуьм. Бегем ме э туьревоз э сер е суьфре не нуьшдем?

— Мере гьэриш месох, — мугу Бебе. — Э ме у коргьо не дери.

— Не дери? У орине, нимешев эз хуней эн у бие зен, Тамара гуфдиренигьо ки ведироморенбу? Э вэтэгъэй «Рубас» э Лидачкалеревоз рафде оmore ки сохде?

— Ш-ш-ш..., — энгуьшде э лэгIэ вено Бебе. — Туь шпиони бегем?

Э сер стол оморут эрэгъигьо, пивогьо, кобобгьо, закускегьо. Эз зал эденбу оmore сес эстрадный музик азербайджани, сес мэгIни хунде.

— Веги, — мугу Хьэнуко.

— Э шори дуьруьсд бирен коргьой туь, — мугу Бебе. — Абас э меревоз лап дусди. Хотур мере гьич ни-гьуьлуь. Правление разиш не бисдоге, у рази муьгьуьлуь бире. Гьечи данки туь дие э ферма дери.

— Согь боши!

Е хэйли хурденге, сер ишу герм биренге, Бебе мугу:

— Оммо туь сер Рэхьмоне пара мисохдиге, туьре мерд мугуфдурум...

Хьэнуко е кем серхушиш буге, уре хьэз неомо и гоф.

— Эйчуь эхи? — пуьрси у. — ГIэрей ме нен Рэхьмоне иму миданим. Туьре э Рэхьмоневоз чуь кори?

— У туьре герек нисди.

— Гьо-гьо-гьо, дануьсдуьм, Хумор... Те имогьоиш фурмуш не сохдей... Э-э-э, туь имогьой бебей кифлети...

— Весси! — мугу Бёбе, муьшде эз стол зере. — Куьгьне ярагьоймере очмиш месох. Ненге гьовой туь инжо хуб нибу!

— Эле, эле евошо, — терси Хьэнуко.

— Игьо игIэре хурде, лэхуьрт сохде, кифлетгьошу дуьл посошу буьруьт. Иллогьки имишев дуьл посо бу Эсеф бебей Хьэнукойгьо. Уре воисденбу эз кор вогошде сэгIэт ебо э кукевоз гоф соху, пуьрсуь, дануь эйчуь э кор ние ведиромореге. Шев нимеш биребу, Хьэнуко э хуне ние оморенбу. Эхириш Эсеф эз хуней хуьшде э хуней кук дарафде, гIэруьсе огол зере, мугу:

— Э Хьэгило, и мэхьшемуье шуьвер туь эжи те нимешев! Э туь не гуфдири эжеиге?

Хьэгило партал не векенде, чум э рэхь шуьвер бире, э парталевоз дегешде э хори, э сер нимдер, чум ю э хов верафдебу.

— НэгI, нэгI, ние дануьсденуьм э жеиге, — жугьоб до Хьэгило келэгьэи хуьшдере э сер дуз сохде, э сер нимдер нуьшде. — Меш чум э рэхуьм. Чиш хиник бири мунде. Гене биё пилетере герм сохум...

Эсеф гIоси бисдо, дуразе сипре руьшгьой хуьшдере пучунд, э лэгIэ дено, ведешенд, вадарафд э гьейвуй хуне нуьшд.

— И келе бире-бире эдей молкомут бире, — мугу Эсеф. — Ире чуь бири, эхи гьечи небу пушоте.

— Хэйли вэхд сер гьуз нуьшдебу Эсеф. Ебойге дирени Хьэнуко лул пиён, эз пой э пой офдоре, дергьой гьейвуре вокурде парт сохде зере, омо диromo. Эсеф мэхьтел бисдо ире пиён дире, хуни-хуни денишире, пуьрси:

— Э гIэруьси ки бири? Э тэхьно эйчуь рафдебирн. Хьэгилоре эйчуь не бердей?

— Ме э гIэруьси не буьруьм, — жугьоб до Хьэнуко юхуьле-будуре рафде э сер тигьие хори сиро нуьшде.

— Унжо менуш, хори пурини, — мугу Хьэгило.

— Суьсд, бур сесе! — чумгьоре хисунде, гуфди Хьэнуко.

— ГIэйб биёвгу туьре! — шефд дениши Эсеф э кук. — Келе-келе кукгьо духдергьои туьре. Номуссуьз, гьирьетсуьз!

Дие вники гьони э пиёневоз гоф сохде нибу, Эсеф ихдилоте гьишд эй себэхьи. Э гIэруьс кумеки сохде, келе мерд сер пой Хьэнукоке векенд, берд дегердунд юре э хьэлов. Хов не омо имишев Эсефе. Дивонере хуно бире-

бу мунде. «Ме ингъэдеи бирем, гъеле е одоми эз ме бикэф не бири, — мугу у эри хуьшде. — И ченд салгьо э колхоз эдем кор сохде, э Гэзизигъоревоз дусди эдем гердунде, э хуьькуьмет эдем узынэгъ ведироморе. Имогъой и хуьрмет мере э хори зеренини?» Себэхь мунде тейте э кор рафде, Эсефе воисдембу гоф соху э Хьэнукоревоз. У гъеле-меле хэбер ние биренбу.

— Э духдер, э Хьэгило, хэбер не сохи уре. Машингьо муьгьюуль мурав эхи!

— Хэбер ние бире, — жугьоб до Хьэгило е не гирисде.

Эсеф ю диromo, гьюьл додо, хэбер сохд куке.

— Чуьни?

— Вэхи, э кор биё бурайм.

— Ме ние оморе.

— Эйчуь? — мэхьтел мунд Эсеф.

— Мере эдей тозе кор доре, э ферма, учетчики.

Руьшгъой хуьшдере пучунд Эсеф.

— Э и кор е хьиллеи недери ми? — пуьрси у.

— Гьич фикир мекеш, жон бебе, гъеме коргъой худо эй никини. Туь ние гуфдиренбири гьечу?

Эз Эсеф гоф не ведиромо. У терси дир мубу гуфдире. Вегуьрд сумкелей хуьшдере, нунгьо гъофунгьо деbugьоре, мушареш, видовусд э лой кантор колхоз. «Э и кор е кор дери, э биней эн и кор расире воисде», — гуфди э дуьл хуьшде келе мерд.

## ГЬЕР ШЕЮН ТОЗЕСИ, ОШНЕНУЬН КУЬГЬНЕСИ

У руз Шими э богъ омогьо диromoгьо э Мукоил не Ахмедовоз, Рэхьмон бегьем гофиш сохде не дануьсд э юревоз, унгъэде песини вэхд дуьл Рэхьмон могъбул бу. «Хубе кор не бисдо, — гуфди э дуьл хуьшде Рэхьмон, — гьич не гуфдурум шохьонгум семе э хуне биёв, гъэьб шермендеини». Песде шохьонгум эз кор вогошде э хуне оморе бэгъдо, Рэхьмон рафд э шегьер эй гешде Шимире. Эз же миофи! У э гостиница ние поисденбу, чуьнки э шегьер уре добу омбара хэгьер бирор, дусд-ошне. «Э хуней ки бурам?» — мугу э дуьл хуьшде Рэхьмон. Рафд э хуней е бирор ю, не дебу, э хуней е бироригейюш, не дебу.

Рафд э лой кино, веди небу. Э хуней хэгьбергьой ю рафд. Не офд. Хэйли гешде Шимире, не офде, хэсде-менде, Рэхьмон вогошд э хуне, пойгьоре векенд, дарафд э доруни хуне э сер диван дегешд.

— Ме дегерд, эдейм чи хурде, э туь дениширейм,— мугу Хумор.

— Гисне нисди мере, — жугьоб до Рэхьмон.

Мэхьтел мунд Хумор, мижегьой шагьбалудие чумгьюю зеверо варафд.

— Кидан э эвиревоз сурон бирейге, э богъ...

— Вомундем, чуй воисде туьре эз ме!

Те имогьой гьич э Хуморевоз хьюьршлуь гоф не сохдебу Рэхьмон.

Жендек Хумор биз-биз бисдо, гьюьндуьре синею ве рафд-фурамо.

— Ме гьич нигуфдурум туь эй келеети гьечи хуьшдере мухури гуфдире.

— Чуь! -- божэхь дешенд Рэхьмон э пой вэхуьшде.

ГІэтош эн у зиёд бисдо, жингьюю верома. Кидан гьейсэгІэт э гІэрей эн и дуь екире эз дуьли хосденуьтгью зен шуьвер чуй беди мибисдоге, эз буруни хуне сес духделешу ни омоге.

— Мама, оголи!

— Мама, — одоми омори, — хьэрой вегуьрд эз буру кук ишу Шемеиш.

Хумор зурн-зури вадарафде э гьейву, дирени Шими-ни — ковре демисезонни палту э тен вери, ковре шляпа э сер, галстук э герде, эз расди куьф палтун юш гьэм газетгью ведини. Шими поисдебу э ки ГІэзиз, эденбу хьол-руз юре, не гІэилгьоре хэбер вегуьрде. Хумор у сэгІэтте муйгьой сере дуз сохд, косинкере дуз сохд, шори сохде, хош омори сохд Шимире.

— Согь боши, чуй хэбери, Рэхьмон эжи?

— Э хуне де, кеш!

Шими эз куьф ведешенд шокаладный гьэнфитгью э дес гІэилгью до, духдерлей Рэхьмоне э гьюжогь вегуьрд. дарафд э хуне. Э пушорэхьуй Шими ведроморе, Рэхьмон мугу:

— Ме мугум туь э лойму ниёй. Ме хуьшдере хурдем имбуруз эри не гуфдиреи э туь, биё гуфдире. Песде гьемей шегьере гешдем. Э лой Хьэненійгью, эн Бетуьшигью, не рафде жиге не мундем.

Шими хэндуйсде, мугу:

— Бегем туь огол низериге, ме ние оморенбуьруьм? Бегем ме туьре фурмуш сохдем. Ме э гІэилигьо е мете-ле шиновусдебуьруьм, лелей ГІэзизиш биё дануь уре. Мугуфдурут: «гьер шеюн тозеси, ошнелуьн куьгьнеси.» Бегем куьгьне дусдгьоре фурмуш сохде бире!

— Дузи, дузи, хэлефме, — мугу ГІэзизиш.

Хумор сер столгьоре вечере, дуз сохде, мугу:

— Ебо палтун туьре веке, э пой эйчуь поисдейт?

— Муьнуьшим, шев дурази, — хэндуьсд Шими.

У векед палтун хьушдере, вегуьрд шляпаре. Рэхьмон дуллу сохд палтунгьой эн уре э шкоп, жиге до юре э сер диван.

— Согь руз э Мукоилевоз э рурибуруши домундем, — мугу Шими. — Гьич рази ние бире эри реконструкция сохде богьгьоре. Гье мере плани мугу, плане биё дим мугу. Терсиренуьм мугу хьофд гьэрпузе э е дес гуьрде: тозе богьгьош дешенде, куьгьнегьореш тозе сохде.

— Уре дуз гуфдире у, — мугу ГІэзиз.

Рэхьмон э биразириевоз дениши э бебешу.

— Э бебе, пирор не пирориндеш иму тозе богьгьо ние дешенденбиримки. Умогьой эйчуь сер не гуьрд у екем семе эй тозе сохде куьгьне богьгьоре!

— Четини дие, хэлефме, — мугу ГІэзиз.

— Асант гьичиш ние бире. Тозе жэГІ гуьрде воюгьо, кун хуьшдере бие э хинике гІов зенуь...

Хумор овурд, суьфре дешенд. Божи диromo, хош омор-ри сохд Шимире, гьэжгьуй епрегьире дировунд. Рэхьмон вэхуьшд, эз буфет гирфинкей шоробе вегуьрд.

Бишгьобгьо гІош не епрегьи пур бисдо, пейлегьо шороб, гьуногь не сэхьиб хунегьо суьфделе сер гуьрдебуьруьт эри чи хурде, эз буру сес омогьо:

— Э Божи, Рэхьмон э хуне де?

Божи эденбу вэхуьшде, Хумор не гьишд.

— Пой, ме мадарам.

Хумор вадарафд, диromo э хуне э ГІэсоилевоз.

— Кеш, кеш э хуне, гьеме э хуне де, — эденбу гуфдире Хумор.

Гье эз дер диromоре, гьуногьэ дире, ГІэсоил тим-тик поисд э домой дер, эз шори чумгьою вежегьисдуьт.

— Шими? Туь хош омореи, бирорзерел

Куьнд омо, гьэл гьуьрд Шимире, шев эхэйр бу гуфди э ГІэзизигьош.

— Нуыш, лелей ГЭсоил, биё инжо нуыш, — гуфди Рэхьмон, — э сер диван.

— НэгI, ме э сер стул муьнуышуьм.

Шими э тигъэтевоз фегьм сохд пушоте чоъ бугьо, гьони назук бире, гъуьж дироморе, дуллу биригьо би-неховорей ГЭсоиле, остгъугьо э зир дуь чумгьою келе бире вероморетгьоре, вини чуьтам зерд бириге лэгъэре сифет келе мерд, ве мугу э дуьл хуьшде: «Гуйге эз больница ведироморе одомини». Оммо ГЭсоил эз больница ведироморе неки, дорд доренгьой шуьгъэм хуьш-дереш фурмуш сохдебу гьони. Э дуьл эн у шори добу. Шори дуьл хуьшдере эй гуфдире оморебу у э ки дусд-гьой хуьшде. Эз куьф е когъозе ведешенде, э Шими до-ре, ГЭсоил мугу:

-- Инн, когъоз омори эриме, э обком огол зерет ме-ре эз товней партийни корме...

Ловгьой ГЭсоил э хэнде верафд, зерди рангию му-гунге вадарфд, сифет ю очмиш бисдо. Э ГЭсоилеоз эеки шори сохдут Рэхьмонигьош, иллогьки Рэхьмон, чуьнки и гъозиегъэдергьо э сер ю оморетгьо и пёсини вэхд э сереботи ГЭсоилиш бири. Мугунге э дуьл Рэхь-мон дебире хээле дануьсде, ГЭсоил мугу:

— Мере имогьой э партия восстановить сохдге, хэ-лефме Рэхьмон, дие фитнечигьо э сер туьш зугьу дураз нисохут.

— Туь чуь гуфдире, лелей ГЭсоил?

— Эри, эри, ме дануьсденуьм, чуь гуфдиренуьмге. Бегем мере хэбер нисди чуьтар чугъулбазгьо жире-бе жире, нисди нисдие коргьоре э сер туь вешендетге? Мере имиди восстановить мибошум гуфдире. Умэхъэли зу-гьун чугъулбазгьой туьш бурра миёв. Эйтуь чуьтам оме-ре, бирорзере? — пуьрси ГЭсоил эз Шими.

— Эриме лап хуб. Мере имиди, ки туь э партбилете-воз миёй гуфдире эз обком.

— Гьечу буге, — мугу ГЭзиз, — вегирит пейлегьоре, хурим э шори бирор иму ГЭсоил!

Шимийгьо вегуьрдуьт пейлегьоре. ГЭсоил мугу:

— Э ме бэхшлемиш сохит, ичку хурде нидануьм. Е пейле чой гьисдиге, омбар рази мибошум...

Хумор э пой вэхуьшд.

— ГьейсэгIэт, лелей ГЭсоил, гьони чой герм мубу.

— Бошгу, духдерме, тэгIди нисди.

Шими пейлей шороб хуьшдере хурде, зокуске сохде



бэгъдо, егилейгеш тигъэтлуь дениши э Г1эсоил, э ёр оворд гиросде рузгьоре, Г1эсоил э келе гьуллугъгьо дебугьо — э райком партия, э горсовет, редактор газет, эй хунде э Масков гьисдики, чьуьтам книгъгой Маркс нен Ленине мэг1нире хуно эзвер сохденбуге, чьуьтам э митингъгьо э рузгьой революционни миг1идгьо ведироморе, шопкере эз сер вегуьрде, десе гьово гуьрде, «Хьовиргьо, бироргьо!» гуфдире, гоф сохде, жендек одомире лерзунденбуге. «У Г1эсоил э же, и Г1эсоил э же! — мугу э дуьл хуьшде Шими, — йир бири»... Песде чарусде эз Г1эсоил пуьрси:

— Кор туь чьуьтами гьони? Хубе жигеи кор сохденигьо жигейтуь?

— Чьуь гуьом этуь, бирорзере? Э заготзерно дебурьуьм, агент, есиёвгьо чигьоре проверка сохденбуьруьм. Инжимиши омбар бире, рафде оmore э ило уле. Келемердуьм... Имогьой мере е суке кор дорет, управдом....

Шими дуьл келе мерде эри олхонн сохде мугу:

— Е гиле э партия восстанавить бош. Эй туь е гуьнжое кор офд миёв. Вонсдге туьре пенсия мегири.

— Мере гьониш пенсия эдет доре. Корсуьз нуьшдене дануьсденуьм. Пара бире дуьлме корсуьз.

Рэхьмон хэйли вэхд гоф не сохде нуьшдебугьо, мугу:

— Бегем гье гьейсэг1эт э Махачкала рафдеки восстанавить мисоху уре?

— Эз Масков одомигьо омори, — мугу Шими, — ебо гоф мисохут э Г1эсоилевоз, чьун Г1эсоилигьо гене гьисдуьт эхи. Песде гье ебо восстанавить не сохдуьтгеш, диртегьо мисохут. Омбар дураз никешу. Эхириш ки, лелей Г1эсоил, э и зуригьо партбилет туь э туь мубу.

Г1эсоил шори сохд, мугу:

— Егиле у партбилет ме э ме расуьге, э пушой г1эилгьойме, эн дусдгьойме, эн туьш, г1эззиме Рэхьмон, уьзиёгъ ведиромге, умэхьэли муьрдуьмгеш гьэйгьу нисд.

— Эле, нохогъ г1эилгьой туь миро, — мугу Божи, — гьэргъ -инен-гьору гердо дуьшме, и чьуь гофи!

— Туь гьеле лекциягьо биё хуни, лелей Г1эсоил, — мугу Рэхьмон, — эз товуней дургунигой дин-дог1от...

Божи шефд дейиши э Рэхьмон.

— Туь, лелей Г1эсоил, — мугу Рэхьмон, — биё стаетьегьо нуьвуьси э газет эз товуней миг1идгьой дин-дог1оти, туь биё э собраниегьой жофокешгьо ведирой гоф

сохи. Сес туьре эй шиновусде хьэсрет бирегоргьо ом-  
бари...

— Худо гьишдге, — мугу Г1эзиз.

Г1эсоил хэндусд. «Худо гьишдге э гьэршуй худо  
биё лекция хунум дие?» — мугу у э дуьл хуьшде.

Э итуьтем шуьгьэм Г1эсоил дорд доре, ранг ю дегиш  
бисдо.

— Чойтуь бири, духдерме? — пуьрси у эз Хумор.

— Эри, эдем овурде.

Е тике кере э сер нун веноре, Г1эсоил хурд пейлей  
чое, дорд дорею екем сокит бисдо.

— Еккейгеш, духдерме...

Г1эзиз чум ние вегуьрденбу эз куьгьне хьовир  
хуьшде.

— И духдиргьо чуь гуфдире эз товун шуьгьэм  
туь эй?

Г1эсоил жугьоб не до, энжэгь десе вешенд-фушенд.

Хэйли шев рафдебу. Г1эилгьой Рэхьмон — Шемей  
не Марал э нуьшде жиге хисиребуьруьт.

— Деберде г1эилгьоре не дегердуни духдер! — му-  
гу Рэхьмон эз Хумор.

— Эдем деберде, — жугьоб до Хумор, оммо э дуьл  
хуьшде мугу: «И э чуь гьоворевоз гоф сохде эмеревоз?  
Пушоте г1эсел руьгьэре хуно бу, имогьой хьэрой ве-  
гуьрде э серме. Гьич ние гуфдире э хуне одомигьо де,  
гьуногьгьо де»... Дие биёбури не бу гуфдире Хумор лэ-  
г1э вокурде, гоф не сохд, оммо дуьл ю лерзи, хун ю дуь-  
ши. Сергьуз, гьош дуьллу вегуьрд еки-еки г1эилгьоре,  
деберд э доруни хуне, дегердунд э хьэлов.

— Дие вэхд рафдеймеш бири, — мугу Г1эсоил, — э  
шоригьо никигьо биём э ишму.

— Шори ники винош эз г1эилгьой туь! — мугу  
Божи.

Вэхуьшд эй рафде Шимиш.

— Туь э же, Шими? — пуьрси Рэхьмон, — пой бура  
инжо дие.

— Песде э Хьэнениейгьо чуь мугуюм? бироргьои,  
хэгьбергьои...

— Рэхьмониш эн туь еки эзу бироргьои, — мугу  
Божи.

— Гьелбетте, — гуфди Г1эсоил.

Гьэрез ки е хэйли гоф сохде, согь боши гуфдире, шев

ишму хуш бу гуфдире, Г1эсоил не Шими рафдуът. Эри рэхь сохде г1уног1г1ьоре вадарафд Рэх1мон.

Шев сокит бу, оммо думон хэсд биребу. Э г1ово астараг1о веди небу, оммо э г1уьндуьри, эз песой булутг1о е минжиг1ле г1ырог1 менг эденбу веди бире.

— Кор омбар мунди ишмуре э бог1? — пуьрси Шими эз Рэх1мон.

— Г1еле бил зере э пушо дери. Кор омбари. Хьэрекет мисохим эри э вэхд ю варасде.

— Дие сог1 боши, — дес Рэх1моне гуьрде Шимийг1о рафдуът.

Рэх1мон э хуне вог1ше диromoг1о, Г1эзизиг1о э буруни хуне хисиребуьруът, Хумор э дору эй хуьше журо жиге дешенде, дегешдебу.

Рэх1мон партал векенде, эз Хумор куьнд бире, евошлей пуьрси:

— Журо эйчуь дегешдей?

Хумор жуг1об не до, сифет хуьшдере чарунде э лой дивор, евошлей гирисд. Рэх1мон мэх1тел бисдо.

— Чуь бири туьре?

— Мере г1ичиш не бири, — евошлей жуг1об до Хумор гирисде-гирисде, — туьре чуь бириге ние дануьсденуьм ь песини рузг1о. Э г1эг1ревоз гоф сохде э меревоз, руй мере бура э пушой кес, хьэрой вегуьрде э серме... Бегем ме эйтуь г1эревошлеюм?

— Эле, и чуь гофг1оил! Туь ние дануьсде э серме чуь корг1о омориге? Туьндехуй бирем.

— Г1ич е кориш э сер туь не омори. Э сер хэлг1 эзу садбо зобуте корг1о оmore. Бегем кор биёв гуфдире, э кифлет хуьше оронгу биё гировуну?

— Ме оронгу гировунденуьм?

Э дуьл хуьше хэндуьсд Рэх1мон. У юш ние варасиренбу, ки ю гоф сохдениг1о г1ово г1эг1ри сохде гуфдире уьзге одомире. У дануьсденбу, ки г1ерчуь ю гуфди, хуби-хэреби, дедешу Божи, лэг1эюре ние зере, хэг1ер ю Гуьл-бике э е гуш шиновусдени, эз екиге гировунде. Эхи Хумор духдер кес бу, хьовир зиндегуни ю бу, муьг1бет ю бу. У г1ич шек ние сохденбу, ки э охмуриревоз гоф сохдеиг1ою г1эг1ри мисоху гуфдире г1эзизе ёр ю Хуморе.

— Хуби, хуби дие, вэхиз биё эжиг1ей туь, мугу Рэх1мон, хуьшдере хуьрд не сохде э пушой зен.

Хумор э гуш не гуьрд.

— Ние оmore?

— НэгI.

Гъэгъри-гIоси бире, Рэхьмон рафд дегешд э жигей хуьше. Себэхьмунде Рэхьмон эз дедешу нун не гьофун восдоре, э Хуморевоз гоф не сохде, вадарафд, рафд э богъ, э кор.

## Э РЭХЬ РАФДЕКИ, ПУШОВО ДЕНИШИРЕ ВОИСДЕ

Секретарь райком Мамедов имбуруз эз гьеме корсохгьо зу оморебу э кор. Дуь руз э Махачкала мунде, э обком. хэйли э ю гурунд нуьшдение гофгьо шиновусдебу эз корсохгьой сельхозотдел. «Дербенд гъэдимне район онгурбогъгьои, — гуфдиребуьруйт корсохгьой обком, — ишмуре хубе хоригьо, хубе корсохгьо, хубе опыт онгурбогъини, ишму эз уьзге районгьойге эйчуь миё песо мунит? Пор бегъере э ниеи вечирейт, гьони богъбурра не бил зере аста эдей гирошде, план тозе богъгьо дешендеш бегъем не бири... Песде те кей куьгъне богъгьо гьечу куьгъне мунденинуьт? Те кей э билевоз келе мердгьо хорире хиш зере чарунденини? Гуьломе трактор вечири, механизация эдей руз беруз зиёд бире, оммо богъгьой колхозгьошму э билевоз эдей гьурлугъ бире»... и гофгьоре э шиновусдеки, жендек Мамедове гIов шиширебу. Эй расде гоф чуь мугуи? «Эхьисобезов у агроном Шими Юсуповиш, эз Министерством сельского хозяйство оморебугьош рафди чуь гуфдире, гуфдири э обком, — мугу э дуьл хуьше Мамедов, — гьеле дербендимунит... Оморей, дирей, э колхозгьо бирей, э имуревоз гоф сохдей, меслэхьэт норей эриму? Дие бигьил бура э кор туь дие. Иму мисохим кор имуре, хьэрекет мисохим эри пушо берде коре. Дие рафде э обком гуфдире чуьни эгъубет туь эхэйр. Кидан гьеле мурав э газетгьо чигьош муьнуьвусуьге имуре»...

Э раче-берачей Мамедов, э у диворигей кабинет келе диван бу, келе гьузги дери. Э гузги денишире, Мамедов э десевоз дуз сохд гьуьжуьм сипи биренбуьруйтгьо келе муйгьой сере. Песде кнопка э дивор веригьоре шиши, дер вокурде омо, э кабинет диромо е жогьиле лэгъэре духдер, дуьгуьр э сер, ковре кастум э тен ю.

— Зугъре-Ханум, зу-зу огол зе председатель колхоз «Дербенде», Мукоилова. Гье гьейсэгIэт биьвгу. Диртегьо

огол мизени экиме заведующий сельхозотдела. Ме мугу-  
юм этуь песеде. Гьони Мукоил биёвгу.

Гьюндуьре добонгьой туфлигьой Зугьре-Ханум тонгъ  
сохд, духдер вадарафд. Эз е-дуй минутиге дироморе,  
Зугьре-Ханум мугу:

— Мукоил гьони миёв. Гирит гьелем и телеграммгьоре хунит.

Мамедов восдо телеграммгьоре, еки-еки хунде, сер  
гуьрд эри резолюция веноре э гьирмизине гьэлемда-  
шевоз.

Эз райком сес телефон омореbugьо, Мукоил э кантор  
коргьой хуьшдере варасде, э бухгалтерия тапшуьрмегьо  
доре, хьозур биребу эри э тозе богьгьо дешенде оморени-  
гьо участок эй рафде. Шофер колхоз, жогьиле г1эил  
Аликиш э домой дер поисдебу хьозур. Мамедов огол  
зереире дануьсде сэг1эт, э дуьл Мукоил шек омо. «Е кор  
гьисди э хьисоб, ногьогьи огол ни зенуь, эз Махачкала  
вогшди оморе». Зури-зури палтуре вокурде, гуш верие  
килэхь каракуле э сер шишире, ведироморе, мугу эз  
шофер:

— Зубош, э райком!

Мукоил дер кабинет Мамедове вокурде диромогьо,  
Мамедов сер гьуз, эденбу когьозгьо хунде. Келе пись-  
менный стол э пушой Мамедов бугьо эденбу эз лак тов-  
тов доре. Нуьшденигьо стулгьо э ило-улей келе стол  
буьруьтгьо кемергьошу тозе лак зере буьруьт, нуьш-  
денигьо жигешу болуше хуно нерм. Секретарь райком  
сере,тик гуьрде, дениши э Мукоил. Председатель колхоз  
пушой дироморе э кабинет, палтуре векендебу эз тен,  
килэхьэ вегуьрдебу. Мамедов вини чуйтам гьирмизи  
бириге келе бирэхьнее пушони Мукоил, сейрек биретге  
э сер ю снегье муйгьо. Ковре шовол галифе не гьултугь  
дерие руйшеини диаганаль эденбуьруьт эз темизи тов-  
тов доре.

— Нуьш, хьовир Мукоил, — мугу Мамедов, э пой вз-  
хуьшде, дес Мукоиле гуьрде.

Гене гоф не сохде дениши Мамедов э фирегье синей  
Мукоил, э гиргине хун пур бире мундебугьо гьутинею.  
«И гьечи эйчуь денишири эме, — мугу Мукоил, — э  
дуьл эн и е кор дери»...

— Кеф туь чуйтами, хьовир Мамедов? — пуьрси  
Мукоил.

— Кеф ме зобу небу, — домунде-домунде жугьоб до Мамедов. — Кеф мере хэреб сохдуьт э Махачкала.

— Эйчуь?

— Гм... эйчуь... Э сероботи ишму.

— Э сероботи иму! — мэхьтел мунд Мукоил. — Иму чуь сохдейм беге?

Мамедов э пой вэхуьшд, гешд э ило-улей стол.

— Гьеле чуь сохдейт? Пор онгургьоб пусунде омо... , — Поринегьоб дие гирошд рафд. Ихдилот порине э собрание норе омо, техсир бирегоргьоб гьэдегьэш бисдорут...

Мамедов хэндуюсд келе-келе.

— Хуб бу мугуфдириге киниге у тэхсиркоргьоб. Кидан Рэхьмоне хьисоб сохдеге туь тэхсиркор. Политически кор не гировунди э глэрей колхозигьоб. Кор тербиетире э куьгьне раби тапшуьрмиш сохди, гьечуни?...

Мукоил эз зир чум дениши э Мамедов, фикир сохде, чуь гоф дериге э дуьл секретарь.

— Рэхьмон тэхсир бире не бире гьеле мэглуюм нисди, уре эз секретари вегуьрдейтгеш...

— Иму эйчуь, райком...

Мамедов десе гьово гуьрде, ловгьоре хэндунде, мугу:

— Сабуьр сох. Гьони ихдилот Рэхьмон нисди инжо. Ихдилот тозе богьгьоби. Ченд гектар дешендейт?

— Дегь гектар дешенде омори. Жэгими ю си мидешеним имисал.

— Песде?

Мукоил душгьоре вешенде, гоф не сохд. Мамедов нуьшд, э пушою бугьоб когьозгьоре вохорунд, чешмек венно, хунд. мугу:

— Колхоз ишмуре минкини эри дешенде дивисд гектар тозе богь.

Мукоил гьирмизи бисдо, пушонию эз эрэгь тар бисдо.

— Хьовир Мамедов, — мугу у, — туь дануьсдени имуре тигьие хори кеми, говгьоре эй хорунде гьич жиге нисд. Е дивисд гектар жуьгьден, гиьвден, чугьундурден ние корим беге эй говгьоб? Эхи ишму эз иму шир хосденит, руьгьэ хосденит...

— Иму шир хосденим, — эз зугьун Мукоил сохд Мамедов. — Шир не гуше хэлгь хосде, жофокешгьоб хосде ве иму гьэрхундим эри доре угьоре. Оммо эз товун жуьгьден, гиьвден... е гоф гуьом эйтуь. Туьре эй говгьоб

ем воисде? Суьмергъэндил кор. Хубе рэхьбергьой колхозгьо, гъэдуьр суьмергъэндиле дануьсдегоргьо емсуьз ние гышденуьт говгьоре. Пенжогь центнер суьмергъэндил вечире бире эз е гектар. Хьозур мисохи силос, кура мисохи запас туьре, те сурои ем мубу говгьошмуре.

Мукоил лугьонд нефес кеши, э думит домунд, «Ченд тозе кор биё сер гуьруьм? — мугу у, — тозе богъгьой онгури, суьмергъэндил кошде, силос хьозур сохде, гьеле мугую куьгьне богъгьореш тозе сох»...

Мугуиге Мамедов дануьсд э дуьл Мукоил добугьо гофгьоре.

— Гене е гофигеш гуюм этуь. Сер гуьрде гереки эри тозе сохде куьгьне богъгьоре.

«Дануьсдуьм мугуюгьоре», — гуфди э дуьл хуьшде Мукоил. Сере жумунде, ох кешире, мугу:

— Четини, хьовир Мамедов.

— Асант гычиш ние бире. Бебейму эйме ихдилот сохди эй революция босгьун доре чуь четинигьо, чуь зэхьметгьо кеширетге бебегьо не келеи бироргьойму. Меш е кемлей э чумме дирем, гъэилиш буьруьмге умэхъэли. Жун хуьшдере дорет э гьозоргьоревоз одомигьо эри биёвгьо хубе рузгьо.

— Ме дануьсденуьм, — мугу Мукоил.

— Дануьсде бэгъдо, дие эйчуь гышде мере эйтуь лекция хунде? Рэхь буравгьо одоми, э пушо биё денишуь. Иму эдейм гьони рафде рэхь имуре э коммунизм. Партия нори везифе гьони эри вешенде сельски хозяйстворе. Эн иму инжо чуьни сельски хозяйство? Онгур, емиш, хьэвуьж, молдори. Имуре гьони гьисди гъилм агрономи, опыт, машингьо-тракторгьо, одомигьо. Гьеме чи гьисди имуре. Минкиниш гьисди. Минкин бире бэгъдо эри пушово рафде, иму песово эйчуь биё денишим, хьовир?

Сере гъуз гуьрде, хэйли гуш дошде Мамедова, Мукоил мугу:

— Бошгу. Сен диен олсун, гъэреде гьолмогьол олмесуьн.

— Ме эз гьолмогьол ние терсиренуьм...

Мамедов гене чуьнигеш эденбу гуфдире, Зугьре-Ханум дере вокурде, мугу:

— Эз редакцияй «Дагестанская правда» одомигьо омори.

— Дировтгу, — мугу Мамедов.

Мукоил вэхуьшд э пой.

— Дие ме бурам.

— Согь боши! — мугу Мамедов э хэндеревоз дес Мукоиле гуьрде. — Фурмуш месох о, э рэхь рафдеки, гьемнише пушово дениш.

## ДУСД ЭЙЧУЬ МУБУ ОДОМИРЕ...

Зимисту варасденбугеш, гьеле шевгьо дураз буьруьт. Кими мэхьэл Ахмед сер шев э хуне зу миомогьо, Вера э кор биренбу, у э сманевоз кор сохденбу: е руз эз себэхь мундерево е рузиге эз пишней бэгьдо. Гьечи е шев Ахмед сер шев зу оморе, дирени Вера не дерн.

— Ме фурмуш сохдем Вера имбуруз дуьимуьн сманн гуфдире, — мугу Ахмед э дедешу, — мере гьеле имид бу вегуьруьм уре э кино бурам.

— Имуре бер дие, — гуфдурут духделегьой Ахмед, видов-видов оморе э герден бешешу вешенде хуьшдере.

Ахмед шори сохд, эз куьф гьэнфитгьо ведешенде, до гьилгьоре.

— Ишму гьеле чуьккелегьонит, те шаздегь сала шев э кино ние дегьише. Э и зуригьо телевизор мубу, мосдонум эйшму, э хуне мивинит...

— Те туь телевизор восдоре, имуш шаздегь сала мибошим, — мэхсере сохд келе духдер.

Песде гьемешу хэндуьсдуьт. Келе мерд, Одигюзел, э сер диван дегешдебугьо, мугу:

— Машаллогь, невейме зугьунлуьни. Ечи мубу, духдерме, эз туь.

Духделегьой гьэйб кешире, гьирмизи бире, видовусдут э ки келе дедешу, гьэнфитгьоре эз когьоз ведешенде-ведешенде.

— Ахмед, биьйт чи хурит, хэлефме, гьеле гьэруьс э и зуригьо ниьв.

— Не денишим? — пуьрси Ахмед.

— Дедей миро туьре, гье у себэхьмунде нун хурде вадарафдейгьон, шуьгьэм дедей туь эхириш лербе мубуки эз чи не хурде э вэхдию!

Ахмед хуьжет не сохд. Векенд эз тен плащ не пинжеке, дуллу сохд э гьиче шопкере, гьулгьой шедре вокошире, поисд э пушой умывальник, хуб дес-руй хуьшдере шушд.



— Вэхн туыш биё нуыш, мерд, — мугу Сурия-Ханум эз Одигюзел. — Туыреш огол не зере гьеле-меле э сер суьфре ние оmore.

— Гене сер гуьрди муьрмуьра! — мугу Одигюзел. Эдем оmore.

Келе зен кемеpe гъэд гуьрде, овурд э сер стол келе гъэжгъуй муьсире. Э вини Ахмед варафд раче буй дулме. Дулмегъош ужире дулмегъо небу о, чуькле-чуькле-легъо, гьеркишу э е велг дорушдебуьруьт. Рач э биш-гъобгъо дечире дулмегъоре, келе бишгъоб масдеш норе э миглей стол Сурия-Ханум мугу:

— Ини масдиш, вегирит зенит.

— Мере масд нивою, — мугу чуьклен духдерле, — ме масдсуьз мухурум.

Э сер суьфре э чи хурдеки екиш гоф не сохд дие. Суьфре вечире оmore бэгъдо, Одигюзел мугу:

— Имбуруз Мукоиле диребуьруьм. Гъошгъою дулла бу.

— Э райком огол зеребу юре Мамедов. Е кем нубо-юре хунди. Заданиегъо омбар дори мугу: тозе богъгъо дешенде, куьгънегъоре тозе сохде, суьмергъэндил эй ем говгъо, песде мугу эй бегъер имисалиш келе план дори дуваздегъ тон онгур эз е гектар.

— Эдем дире, гъошгъою дулла бу.

— Гъошгъоре дулла сохд гуфдире, чуь бире. Дори райком задание? Бегъем сохде вонсде. Имуре гъисд минкин эри бегъем сохдеш.

Э ёр Ахмед омо, ки ю имбуруз эз агроном план богъгъоре вегуьрди гуфдире эри дире, эри фегъм сохден участкай бригадей Рэхъмоне, тозе сохдени гъисдигъо жигегъоре. У вэхуьшд, вегуьрд э трубка гъэд сохде оmore-ребугъо плане эз куьф плаш хуьшде, дарафд э доруни хуне, нуьшд э гъирогъ келе стол, лампей электирре дегесунде. Пушой плане фегъм сохде, приемникеш доно. гуьрд Бокуре. Эз радио эденбу оmore сес мэгни хундей Бюль-бюль Мамедов. Э е келе эшгъэвоз у эденбу хунде мэгни ошугъэ эз операй «Кёр оглы».

— Погъ, бебейтуь су мегиро, Бюль-бюль! — мугу Ахмед. — Хуне хэребе расдекиш сес бюль-бюль вери дие.

Э фикир Ахмед омо, чуьтам кор сохде, зигъисдениге унжо э Баку Бюль-бюль, чуьтам э хуьшде дениширениге, сес хуьшдере гьурлугъ сохдениге. «Эхъисобевоз у

имуре хуно э рурибуруши ние дебире плангьо — обязательствогьо чигьо ние вегуърде сери гектар дуваздегь тонн онгур эй доре, эз гьер гов се гьозор литр шир эй доре... Себэхьмунде вэхуьшдени, рач э ванна тен хуьшдере шушдени, э бугьоз хуьшде дуь хоме хое вешендени... Эле ме чуь гуфдиренуьм!» Ахмед рази не бисдо эз хуьшде, эз фикиргьой хуьшде. У дануьсденбуки жофосуьз гьич е кориш ние бире: не богьдориш, не молдориш, не артистиш, не инженериш, не писателиш. Энжэгь бешгьэ ниники, хубе артисте, мэг|нихун эри бире гьеле эз жофо бэгьэй, талантиш гереки, гьер одомире талант ние бире. Гьэлети хуьшдере эгерде, вегуърд Ахмед лов сохд план колхозе, гьуз бисдо э сер стол.

Э келе сипре ватмански когьоз агроном е рач сирот кеширебу жергегьой тегьенгьоре, чуьтам веде мибошутге э участкей бригадей Рэхьмон. «Гм, ме эз Рэхьмон чуь кемуьм бегем? — бэхили омо Ахмеде. — Богьгьой бригадейме эйчуь тозе ние бу! Гьеле ме секретарь партийни организацияш гьисдуьм. Нишоне ме биё бирмунум»... Песде у думит сохд, ки суьфде биней эн и коре Рэхьмон сер гуърди, уш куьнде дуст-хьовир юни. Чуь бешгьэи коми бригада суьфде сер гуърдге. Беге гьеме эн колхоз нисди? И думитгьо-хээлгьо э мувэхь Ахмед дери, сер ю э сер стол гьуз гьисди, Вера э хуне дироморе евошлей назуке палтуре эз тен векенде, э бузпой куьнд бире, эз посо гьэл гуърд Ахмеде э дуьдеси, духдерлегьой хуне вози сохденигьоре хуно. Ахмед нэхэбереки хуьшдере вешенд, песде посово дениши, шори-шори дениши э очугьэ ранг гендуьми бугьо келе муйгьой сер зен хуьшде, э ранг дерьёгь ухшеш зеренигьо ковре чумгьой Вера, э сипре гиргине биребугьо ховорею... Чуме-чару сохде, диречи э буру хисирет бебейгьошу не гьизилгьо, Ахмед жогьиле гьизиле хуно гьужогь зе Вераре, нуьшунд э сер занигьой хуьшде, гьэл дешенд э герден ю, моч сохд эз сипре ховорею, песде эз ловгьою, песде эз гьутинею, песде эз чумгьою...

Вера хьэрекет сохд хуьшдере ведешенде эз гьэл Ахмед, евошлей зе э десевз эз сифет ю, бибине вегуърд эз синею, гуши-гуши мугу:

— Чуь сохде туь, гьизилле бирей? Бебейгьо хэбер мубу. Суьфделе дирей мере?

— Ченд салиш ме этуьревоз зигьисденуьмге, гьечу дануьсденуьм суьфделе дирем туьре. Туь эриме келе би-

рс-бире пир ние бире, гъемише жогбил мунде, рач мунде. У э хъзет иму веригьо гъуьзуьлгуьле дирей? У дорле гъеме сал тозе гуьлгьо ведешенде. Гъеме сал тозе гуьлгьо ни воромоге, у дорле дор нибисдо. Туьш эйме гъуьзуьлгуьл доре хунои. Гъеме сал тозе бире, рач бире. эшгълуь бире мереш эшгъ доре.

Вера э хуьшде домунде, е рач дениши э Ахмед.

— Гм, ме не дануьсдебей туь шогъир бирейре...

Песде гъуз бире, ёвошлей моч сохдени эз ловгъой Ахмед.

— Эгъ, — гуфдирени екем песо поисде, — и бигъгъой туь гъемише сула сохде ловгъой мере.

Гъердуьеки евошлей хэндуьсденуьт.

Вера дес-руй шушде, чи хурде бэгъдо, гене э ки Ахмед оморе, гуфдирени:

— Ахмед, и чуь плани э пушой туь гъисдигьо—План богъгъои. Гъони ижире нисди богъгъой бригада, гъечи биренини, э и зуригьо рядовой биренини тегъенгъо. Э жигей билчигьо трактор гъурлугъ мисоку хорире. Песде гъечи тозе мисохим богъгъой бригадеймереш, эн Рамазанеш...

— Суьфде эз Рэхъмон сер гуьрденит дие?

— Эри. Бинере у сер гуьрди. Хубе корсохи Рэхъмон, настоящий коммунисти.

Вера ох кешире, мугу:

— Э кор гъемешму хубит, мердгъоре дануьсде ние бире...

Ахмед мэхьтел мунд, э пой вэхуьшд, пуьрси:

— Чуь бири бегем, негуи!

— Нуьш, нуьш, — мугу Вера, стуле бирмунде. — Имбуруз пушой э больница, э кор рафде, э поликлиника дарафдебуьруьм. Дежурный врач не дебу, э кабинет тэхно, сер гъуз нуьшдебу Хумор. Рангию зердов зербу.

— Чуь бири туьре? — мугум.

Жугъоб недо суьфде, эз чумгъою омо гъэрс тигъи бисдо, песде гъирке зе гирисд, не дануьсд тоб доре. Хоши гуьрдуьм юре, пуьрсуьруьм, невоисде — гъэрез гуфди: и чендгъэде мэхъэли, эз секретари вегуьрде эилоревоз, мугу, Рэхъмон ежирейге бири хъэройчи, нифри сохде, гоф зере э одоми, гуруне гофгъо, гуниле зенуьгъоре хуно. Э шороб-эрэгъи хурдеш сер донори. У шев, мугу, эз собрание оморебугъо, лул-пиён бу...

Ахмед десе э чуне вено, сер гъуз нуьшд.

— Ахмед, дусд эйчуь мубу одомире, — мугу Вера. — У дусд туьни, гоф сох эюревоз, дэгно зе. Туь дануьсдени; Хумор не у чьтам екире хосденуьтге. Туь дануьсдени, биренгъине биренге, сайл оmore. Келе сайлгьо чойгьоре глов пур сохде, эз гъирогъ чой вадарафде, келе заралигьо овурде. Оммо пушой глове эй гуьрде, э вэхдию гъирогъгьой нуькере биё хуб гьоим сохде биёв, диворгьою гуьрде биёв. Туь варасирени ме чь гуьфдире-нуьмге?

— Ме эдем дире туьш оmore-оmore эдей шогьир бире.

Гене гьердуюеки хэндуьсденуьт гьэл дешенденуьт э герден еки...

Себэхьими, э вэхд кор, гоф не сохд Ахмед э Рэхьмоневоз. «Бигьил кор хуьшдере соху, ненге хуьршлуь мубу э кориш зарал мубу.» — мугу Ахмед. Шохьонгум членгьой эн гьердуь бригаде эз кор ведироморе, э машин венуьшдуьтки эри э шегьер рафде, Ахмед мугу эз Рэхьмон:

— Эз машин фураморики э кантор дино, мере гофи э туьревоз.

Э кабинет партбюро Ахмед не Рэхьмон тэхьно дебируьт. Куче торик бу. Ахмед эз куьф ведешенде план участкере, мугу:

— Ини план бригадей туь хуб мубу. Туь варас, педесе меш сер гуьрум.

Рэхьмон гоф не сохде, фегьм сохд плане.

— Гьеме богъгьо гьечи миё бу, — мугу у.

— Мубу, мубу ёвош-ёвош гьемеш мубу. Гьеме э иму кор вери. Хуб кор сохдимге, гьеме мубу.

Ахмед э хуьшде домунд, гьеле-меле не дануьсд, чьтам сер гуьруьге э Рэхьмоневоз ихдилот хунеире. Рэхьмонеш мугу э дуьл хуьшде: «Ире э меревоз чь гуьрлугьи бу, гьони огол зери?» Бирден Ахмед пуьрси:

— Э Рэхьмон, туь эхи и е хэйли вэхд Хуморе вегуьрде э лойгьоймуш ние оmore?

— Можол бирени?

Ахмед хэндуьсд.

— Можол екимуреш нисди. Оммо дусд-ошне биё э еки бурав биёв хьол руз екире дануь, э еки нуьшуь-вэхуьзуь. Эхи иму хьовиргьой фронтиним. Вераш туь не Хумо-

ре хэгьер бирор хуышдере хуно дануьсде. Туь дануьсдени, инжо уре екиш нисди — не хэгьер, не деде...

— Миём, — миём, худо гьишдге, чуьтам гуфдиренуьт-ге келе мердгьо.

Ловгьой гьердуюшу э хэнде варафд.

— Коргьой Хумор чуьтами э поликлиника? — пуьрси Ахмед. — Э газет нуьвуьсди мугу уре, хубе корсохи гуфдире.

— Кор зен чуь биренини! — бирден омо ведиромо эз лэгIэй Рэхьмон.

— Чуь! — Ахмед сере жумунд. — И гофе эз лэгIэй ки шиновусденуьм ме? Веди биреники туьре кор сохдей Хумор ние воисде.

— Эгь, э хуне нуьшуьгьо хуби, ненге зугьун ю дураз бире.

— Гьо, инжо ме гуьрдуьм туьре, хьовир, — мугу Ахмед хэнде-хэнде.

У гуфди э Рэхьмон, чуьтам э гуши ю хэбер дарафдиге, хьовир ю гьэгьри сохди гуфдире зен хуышдере, Хуморе, чуьтам и песини вэхдгьо Рэхьмон хьэрой-хьэройчи бириге, грубий бириге...

— Огьо, Хумор шуькеет сохди э туь! — э пой вэхуышде жинленмиш бисдо Рэхьмон.

— Евош-ёвош, — мугу Ахмед, — ме Хуморе не дирем не э сер зен туь хьэшош мевеше. Туь Хуморе зере-куфдигеш, у рафде шуькеет сохденигьо нисди. У э Вераш не гуфдири. У туьре гьечу хосденики, зобуни туьре гуьгьо одомире, э чол менгенуь. Гьич миёв Хумор эз дес туь шуькеет мисоху?

Ченгъэде Ахмед гоф не сохд, рэхь не но эри Рэхьмон, у гьеле-меле хомуш ние биренбу. Эхириш Ахмеди гоф до, ки дие гьэгьри ни соху гуфдире Хуморе. Расдекиш э хуне оmore, у воисд э хубиревоз гоф соху э Хуморевоз, бэхш-лемеши хогьу эз ю. Бегем у эй Хумор дуьшмен? Эз гIэй-лиревоз э еки келе бирет, екире эз дуьли хосдет, чор сал э довгIо мунде, э гьэд гуниле барут дери, ченд гиле сэхд яралуь бире, э госпитальгьо дебире, гьемише Хумор э дуьл ю дебири, нум Хуморе э ёр овурде вэхд, гьуьвот эн у зиёд бири, эз соконеигьо жунию азад бири. Рэхьмоне гьич мою дуьл хуьрди Хумор!

У зури-зури эз ки Ахмед э хуне омо. Хэйли вэхд ги-рошдебу, сер шевиш буге. Гьемишеинере хуно дедей Божи гьэжгьуй чире э сер кинле веноре, дениширебу э

Рэхьмон. ГЭзиз эз кор оmore одоми, келе мерд, вомунде дегешдебу хисире.

— Хумор эжи? — пуьрси Рэхьмон.

— Э дору дери, хэлефме, — е тегьер жугьоб до Божи. Э дуьл Рэхьмон шек офдо. Те имогьой келе зен гьич Хуморе пуьрсиреки ижире недуьл-недуьл жугьоб нидо. «Эхьисоб е кор гьисди», — гуфди э дуьл хуьшде Рэхьмон. Руи партале векенде, у дарафд э дору, э Хумор деbugьо хуне. ГЭзилгьо хисиребуьруьт, Хумориш эй хуьшде журое жиге дешенде, дегешдебу. Рэхьмон е кем поисд э думит, песде э лой буру дениши, «эзь» гуфдире, гоф не сохде вадарафд.

— Биё нуьш чи ху, хэлефме, — мугу Божи.

Рэхьмон гоф не сохде, нуьшд. Бегем чи эз 'бугьоз Рэхьмон рафденбу. Култе биренбу, э бугьоз ю домунде. «И чуьжире коргьои эхи?» — мугу э дуьл хуьшде. Оммо тейте дедешу хисире гоф сохде не пуьрси. «Эйчуь дуьл келе зере яралуь сохум?» — мугу у. Чи хурде бэгьдо, дарафд дегешд э сер келе кровать. И ченд шевгьо у тэхьно эденбу хисире э сер эн и буле, фирегьуне кровать гЭруьсвори Хумор. «Мэхьтеле кори», — гьем хэнде гуьрдебу Рэхьмоне, гьем гиридени. Те нимешев хов не омо юре. Нимешев, дануьсде бэгьдо, ки дедейгьошу гьемееки хисирет, Рэхьмон евошлей эз жигей хуьшде взхьушде, омо, асталай тимор сохде сер Хуморе, мугу:

— Дирей мере, эй бэхшлемиши хосде оmoreм э китуь. вэхи биё э жигей туь...

Хумор гьуьл додоре дес Рэхьмоне, мугу:

— Дес мезе эме, бура э жигей туь. Мере бэхшлемиши герек нисди.

— Эле! — мугу Рэхьмон. Хун эн у дуьши. Дуьлию лерзи. — Михьилоимеш герек нисди туьре? Меш герек нисдуьм туьре. Дие ки гереки? Белки кечеле Бебе герек бу!...

— Чуь! — Хмуор гье ебо лихьифе эз кул шенде, взхуьшд, нуьшд, — чуь!? Туьре номус гьисди, — мугу у гиридсе-гирисде, — чор сал довго шев-руз ме гЭрс хурдем, гЭрс верэхшире, чум ме э рэхь туь дебири, эз хуней гьобоне Бебе э десдегьоревоз одомигьо диромори, ме угьоре э сенгьэвоз пиш сохдем... Вой эй мунде рузгьойме, имогьой ижире серкушигьо шиновусденуьм эз туь?

Рэхьмон юш вараси, чуь келе гьэлети сохдге гьони, чуь герексуьзе гоф эз лэгГэю ведиромоге. «Дилуьм, сен

дилим-дилим улесен», — мугу у, э ёр оворде куьгъне меселере. Дие гоф эз лэгIэ ведиремореву, уре вогордунде ние биренбу... Рэхьмон перт бисдо мунд э жигей хуьшде, не дануьсд чуй гоф офуге эри хоши гуьрде Хуморе. Тейте Рэхьмон думит сохде, Хумор зури-зури вэхуьшд эз жигей хуьшде, чуйкле духдерлере вегуьрд эз хьэлов э гьужогъ, сер хуьшдере дегуьрде, видовусд вадарафд э хьэет, рафд э лой хуней дедешу.

— Хумор, ту эже рафде! — хьэрой дешенд Рэхьмон.

Дие дир бу. Хумор э хуней дедешу дебу. Э сес Рэхьмон хэбер бисдорут Божи не ГIэзиз.

— Чуй бири, геде- — пуьрси ГIэзиз.

— Хуморе чуй бириге ние дануьсденуьм, — мугу Рэхьмон, — гьэгъри бири э хуней дедешу дарафде...

— Дедей миро туьре, — зани куфде, мугу Божи, — ме эдем дире и ченд руз Хумор гьэгърини. Чуй бири бегем. чуй офдори э ГIэрешму.

ГIэзизе дие хов не омо. Партал вокурде, вэхуьшд э пой, — мугу:

— Ме дануьсденуьм чуй бириге. Кукме серсу бири. Келеети эз дес ю вегуьрде омори гуфдире, руй гьемере эдей бура гешде!

— Эле, туьш гьечу гуфдире?

— Гьисдигъо гофи. Чуй хэбери ненге, гIуьлом вачарусди бегем! Эз туь бэгъэй бегем дие кес хундегор нисди, эз туь бэгъэй бегем кес э довгIо не бири, эз туьре бэгъэй бегем кесе орденгъо-медальгъо нисди! Эйчуь вешендей хуьшдере. Вегуьрди туьре эз келеети эн коммунистгъо, ишу хуб дануьсденуьт кор ишуре. Бригадир мундейки. Сер туьре гьуз ги кор туьре сох. Бебе келебей туь гьемише келе не бирики... Косиб гIони, тирохэпой бири... Сергьуз гIожиз бири... Хуб кор сохдиге гене мивихуьт туьре...

Рэхьмон тоб не до, мугу:

— Туь чуй гуфдире, бебе! Мере келеети эйчуьни.

— Эй келегеди! — эз гьэгър жугъоб до ГIэзиз.

Рэхьмоне дие не воисд гуш дошде гофгъой ГIэзизе, оммо э руй юш не поисд. Сера гьуз гуьрде, ловгъоре гIэнж гуьрде, дарафд э хуне, дегешд.

ГIэзиз не Божи те себэхь дие не хисируьт. Э гьейвуй хуне нуьшде, зен не шуьвер, угъо дируьт, чуьтам торике гьово очугъ бирениге, чуьтам астарегъо еки-еки пэхьни

биренуьтге, чуьтам асму э сер дерьёгъ э дури зари-суьрхи бирениге.

— Тейте хэлгъ шиновусде, нум иму э биёбури вада-рафде, — мугу ГІэзиз эз Божи, — вэхи, дара, хоши ги, дирувун Хуморе.

— Эле, ме миром туьре, э гоф ме миденуьшуь бегем у?

Гене, чуьш бисдоге, Божи дендей хуьшдере гуьрде, уьгъ зере-зере, вэхуьшд эз хори, юхуьле-будуре, рафд э лой хуней Мелкейгъо. Ченгъэде минет сохд келе зен, гъэдов алим гуфди эз Хумор, сер хуьшдере куфд, сифетгъоре зе, Хумор гъеле-меле рази не бисдо эри дироморе. Эхириш, виники келе зен эдей похли-похли гІэрс тигъи сохде, сифетгъой хуьшдере гъэрмэгъ кешире, Хумор мугу:

— Бошгу, туь дара, дедей Божи, хуьшдере мекуьш. Ме мидиром песде. Бигьил екем у усто бу.

— Гъэдой туьре вегиром, эй худо, э пушой туь нен Рэхьмон миром ме.

— Дара, дара, дедей Божи, ме туьре езугъ нисохум, туь эн ме дедеймени...

Келе зен гІэрсгъой хуьшдере темиз сохд, кемере гуьрд, вэхуьшд. Мелке эз гъулию гуьрд, кумеки сохд, рэхъ сохд юре э хуне.

— Жогьилгъои дие, — мугу Мелке. — Мерд не зере э хуне гоф мубу.

Песде вогошде, диромореки, дэгІно зе духдер хуьшдере.

— Хэр бирей, э лэгІэй хэлгъ эдей хуьшдере беднум сохде.

— Бигьил, гьечу не сохде, усто нибу у. Уре усто сохде гереки. Ме мидарам.

Оммо хэйли руз дениширебу Рэхьмон. Хумор гъеле меле ние дарафденбу.

## ДОГЪ Э ДОГЪ НИЕ ВОХУРДЕ...

Эз Дербенд э Махачкала рабочи машин себэхьмунде зу рафденбу. Кими одомигъо, дуьл ишу тэгІди сохденигъо шев ховсуьз мунденбуьруьт, пушойсебэхъ торикитовуши э вогзол фураморенбуьруьт. Оммо имбуруз эри э вогзол фураморе ГІэсоил дуьвойне эденбу тэгІди сохде. Беже-бежеи беге, мерде э Махачкала, э обком партия



огол зерет, партийни кор юре эри фегьм сохде, эрзогьюю эз Масков, эз ЦК партия вогошди оmore. Эри эн и кор одоми дуьлтэгИди нибу? Юш ки? ГІэсоил. У ГІэсоил, комики э девр падшогьи, раби бире-бире эз пэхьники книгьгой Маркс хунде, гІилм коммунизмаре гьобул сохдигьо, падшогь эз тэхд офдореки, руьшгьоре чире, рабиетире шенде, жэгІмете э лой большевикгьо огол зеригьо, э партизани рафде, э дуьшменгьой советски властевоз женг бердигьо, ченд салгьо жем-жогьиле тербиет марксисти-ленини доригьо, э шегьер колхозгьо гуьрд сохдигьо, э гьэришуй дин-догІот взхуьшде, э дин-догІотевоз не кулакгьоревоз женг берде, эй хуьшде омбаре дуьшмегьо гьэзенж сохдигьо, эз дерд коммунист бирею, бебешу эз ю дес вегуьрдигьо, дедешу нечогь биригьо... Бегем эри ГІэсоил чуйкле кори кор э партия дебире не дебиреи ю! «Ме муьрдуьмки, мере коммунистгьо биё гьовре сохут», — мугуфди мигешд ГІэсоил. У гене мугуфди: «Ме э партия эй пул нен келе гьурлугьгьо не дарафдебуьруьм. Ме вегуьрдемгьо рэхь Маркс нен Ленине э гІуьлом дуз гьисдигьо идеяй Маркс нен Ленини, идеяй коммунизмаи. Э куьфме гьирмизине книжка де-бисдогеш не дебисдогеш, ме мурам рэхь коммунизмаре. Чуьнки ме дануьсденуьм — коммунизм ужире зиндегуни-ники, комиреки эй хуьшде гешденуьт инсонгьо. Рабигьо ве диндогІот гуфдиренуьт э у гІуьлом генгІидими гуфдире. Угьо дургуне гофгьои. ГенгІидим э и гІуьломи-генгІидим-коммунизмаи»... И гофгьоре гьемише мугуфди ГІэсоил-партбилет э куьф ю дерикиш, партбилет э куьф ю недерикиш. Имогьой юре э обком огол зеренге, тейте и огол зереbugьо руз оmore расире, тейте э вокзол фурааморе, дуьл ГІэсоил пулемете хуно эденбу кор сохде.

У эй рэхь хуьшде нуш не вегуьрд, себэхьмунде чоиш не хурд.

— Э мерд, туь зэгІифе одомини, шуьгьэм туь хэреби, е пейле масд семе ху, вадара, — мугу Евдит, виники ГІэсоил эдей гисне рафде.

— Масд мухурум, хотур туьре нигьлуьм, — э шориревоз гуфди ГІэсоил.

Оммо ю эз шуьгьэм десе ние вегуьрденбу, шуьгьэм ю гье эденбу дорд доре. Иллогьки себэхьмунде, э нашдови, тигьи гьисдики. Пейлей масде, хуб шекер декуьрде, хурдеки, екем рэхьэт бисдо шуьгьэм ю.

— Согъ боши лап хубе дусд, лап глэзизе дусд ме, — мугу Глэсоил эз зен хуышде, лово хогъ эриме.

Гъечи мэхсере сохде-сохде, вадарафд у эз хуне. Дуыл эн у герм бу. У дануьсденбу, чуьтам гъейсэглэт ЦК партия тигъэтлуь дениширениге э эрзогъой коммунистгъо, дузе гъэрор ведешендениге. «Ме э партия гъич е заралиш не зерем, — эденбу гуфдире Глэсоил, рэхъ хуышдере э рафдеки э вокзол—ме гъемише э партия узын-ёгъ ведироморем. Оммо бири е гъэлети. Эри эн у ме тэхсируьм. Наказать бирем и ченд сал, Весси дие.. Эй е гъэлети текей биё кешуь одоми?»...

Э вогун Глэсоил эз гъеме зу венуышдэбу. Э ён пенжере нуышде, чешмекгъо веноре, у эденбу газет «Правда-ре» хунде.

— Эле, Глэсоили ки, себэхъ туь хэйр, эже рафде?

Глэсоил сере тик гуьрде, дирени э пушою Сосун поисди. Жугъоб Сосуне доре, Глэсоил вини, чуьтам у векенде эз тен плаше дуллу сохдге э гъиче. Э тен Сосун вобу дуразе руйшейини, э кишди гъэйш не бесде. Шей э сер гъуьндуьре шуьгъэм гъечу дуллу биребу, э сер шуьгъэм бордоре зен дуллу биренигъоре хуно. Э раче берачей Глэсоил нуышде, Сосун, дуь десе э еки вогосунде, э сер шуьгъэм веноре, хъире чумгъоре э лой Глэсоил чарунде, мугу:

— Эле, Глэсоили ки, себэхъ туь эхэйр, эже рафде?

Глэсоил гуфди эже рафдеге, Сосун шор бисдо.

— Э худо шуькуьр, имогъой туьре восстановить мисохут.

— Худолугъ чуькори инжо, — гъэгъри бисдо Глэсоил.

— Эле, гъэгъри мобош о, у гофи дие. Э лэглэй хэлгъ домунди рафде у гоф. Беге ме ние дануьсденуьм коммунисте э худоревоз кор нисдигъоре? А што ви думиш...

Глэсоиле хэндеш гуьрд э гофгъой Сосун. У мугу э дуыл хуышде: «Ченгъэде жем-жогъыл э и девр советски власть хундет, одоми бирет—еки инженер, еки агроном, еки учитель, еки духдир, партийни кор сохгъо... Гуьлом ченгъэде пушо рафди, и хуне хэреб гъе гъечу нэхундегор мунд рафд. Гъеле эз райком гъэгъри биребу, юре эй хунде эдэбу норе гуфдире»... Эз ело езугъ оморенбу Глэсоиле э Сосун не хунди гуфдире, эз е лойге глэси биренбу эз у эри гъечи пес мундеи ю. «Могъгъул мухундге, е бригадир чи семе мибисдо э колхоз»...

«Сосун э ГӀэсоил денишире, мугуиге эденбу фол вешенде, дануьсде, чуй фикир сохдеге ГӀэсоил.

— Э-эй, жон бирор ГӀэсоил, — мугу Сосун, — э ёртуь мунди у салгью, колхозгью гарнизовать сохдебиримгью. Имогьюй пир бирейм, имуре кес ние шинохде.

— Туь пир нисд гьеле.

— Пир нисдуьмгеш, чуй фойден эз ме? Колхозе гарнизовать сохдегорниш ме, эз гловгьюй гӀэребинскиш вавасиригью и шуйгьэмме, имогьюй ме рядовой бэгьэй нисдуьм. Сторож.

— Хунде герек бу, хьовир, хунде. Не хундегор гьони е кориш сохде ние дануьсде. Гьони бригадиргьюш биё агроном бу, неки председатель колхоз.

— Эри о, улле дузи. Эн ме имогьюй чуйни, э пенсия рафде. Паздегь трудодень э мегьюю норет общее собрание колхоз.

— Кеми?

— Омбариш нисди.

— Лап, гьэдер юни, мугу ГӀэсоил. — Рабочий не гьурлугьчи э пенсия рафденге ченгьэдеи норме? Пенжогь процент жаловнере. Дегь процентиге эри стаж... Дие чуй воисде туьре? Колхозе организовать сохдей гуфдире, гьемей фондгьюй колхоз туьре вечире нидуйки...

ГӀэсоил не Сосун гьечи э меслэхьэт дебуьруьт, ишуре хэбериш не бисдо кей зере гирошдуьтге станциягьюй Огни, Мемедгьэле не Берекее. Рузиш е хэйли воромореву, офдон эз пенжере э вогун дироморе, е рач эденбу герм сохде сифет нуьшдегоргьоре.

— Охойш, чуй раче герми васалини, — мугу ГӀэсоил.

— Эри, эймеш герми хуб бире, — жугьоб до Сосун.

Песде ГӀэсоил газет хунд, Сосун гуш вено.

— ... Э обком ГӀэсоил омореву бисд минут те занятие сер гуьрде. ТэгӀди эн юре гьэдер не бу. Эхириш вэхд бисдо, ГӀэсоил пуьрси э ёнки даравге, уре огол зеруьт э секретарь парткомиссия добугью хуне. Пушой инжо оморе ГӀэсоил хуб руьш хуьшдере чиреву, чекмегьоре маз зере, гузгире хуно тов-тови сохдебу, бэгьдовой ченд салгью галстук денореву, кастумгью эз доморию эри ю бэхш оморевуьгореш хуб чутке зере, вокурдебу. Э кабинет секретарь парткомиссия у диromo торжественни тегьер, э лап хосд-воисдию дебиренигью жиге дироморенигьоре хуно. ГӀэсоил пушотегьош, э партийни собраниягью не

конференцияго темиз мномо, э Гэруьси оморенигьоре хуно. Эле, э кабинет дироморенге, у дирени э сер стол секретарь парткомиссия ю секретарь не нуьшди, е одомиге нуьшди. И одомиш шинохэ одомире хуно, денишири э Гэсоил эдей хэндуйсде. И кини бу? Э Фомичев ухшеш зере, э Дербенд секретарь райком бугьо. Эхи муйгьой сер Фомичев гьечи сипи не бу, зерд буьруьт. Эри дие, ченд сал гирошди, пир бири.

— Куьнд биё гьери, ние шинохде? — пуьрси хэнде-хэнде Фомичев.

— Фомичеви?

— Эри.

— Туь хош оморей! — шори сохд Гэсоил, э дуьдеси гуьрде дес Фомичеве. — Туь э командировка оморей?

— Эри. Нуьш Чув хэбери эз туь, эз коргьой туь?

Гэсоил эз шори гьеле-меле лэглэ вокурде, гоф сохде ние дануьсденбу. Эхириш хомуш бисдо, еки-еки ихдилот сохд, чув сохдиге и ченд салгьо-чуьтам председатель колхоз э Эгьлеби кор сохдиге, чуьтам хэбер куь, ю э довгю пуч бирей омориге, ю нечогь бириге, песде э уполминзаг агенти кор сохдиге ве имогьой управдоми кор сохдениге.

— Э общественни коргьо чуьтам?

— Е хэйли мэхьэл лекциягьо хундебуьруьм э анти-религиозни темагьо, эри колхозникгьо...

— Имогьой? — пуьрси Фомичев, э лой секретарь парткомиссия э гьирогь стол нуьшдебугьош дениши.

Гэсоил некруьм-некруьм ихдилот сохд, чуьтам эз товуней э ю лекциягьо тапшуьрмиш сохдеи секретарь партбюрой эн е колхозе, хубе корсохе, пушолуье бригадире тэхсиркор сохдетге, зиёдие гофгьо бириге, чуьтам имогьой Рэхьмон гьошгьобогьлуь, туьндэхуй бириге...

Фомичев э тегьнимиревоз гуш доше ихдилот Гэсоиле, сер гьуз, думит сохд, песде э секретарь парткомиссия денишире, мугу:

— Ишмуре хэбер нисди эз и ихдилотгьо?

— Нэгл, — мугу у сере жумунде.

— Да-а-а, гьисдики э гьуьлом жире-жире одомигьо. — Песде э Гэсоил денишире, пуьрси: — Секретарь райком Мамедовиш дануьсдени и ихдилоте?

Гэсоил сере жумунде, жугьоб до:

— Нидануьм гуьфдире. Ме э Мамедовоз гоф не сохдем. Инструктор райком огол зеребу мугу Рэхьмоне...

Фомичев дуразе сипре муйгьой сер хуьшдере э пенж энгуьшдевоз дуз сохд, гъэлемдеше е ченд гиле э стол зере, думит сохд, песде эз ГӀэсоил пуьрси:

— Хуб, туь те имогьой эйчуь эрзо не доребири эри восстановить сохде туьре? Гъэгьри биребири эз партия?

— Эле, — зерде ранг ГӀэсоил гьирмизи бисдо. — Эз партия гъэгьри бире нэгло, ме эй рэхь партия гуьмуьр мере дорем, жунмереш гьони муьдуьм. Партия эн ме гьем беbei, гьем деде... И ченд салгьо эз партбилет эз десме восдоре эйлоревоз, ме хун хурдем, гуфдире-нуьтгьоре хуно, хун верэхьшире, мере шевгьо хов не омори, Гьегене чуьтариш бисдоге ме хуьшдере эз партия журу хьисоб не сохдем. Гуьмуьрме, жунме, дуьлме э партияревози, партбилет э куьфмеш недеге, — ... песде е кем поисде, эз гирфинке глов декуьрде, хурде бэгьдо, у мугу: — Беге ме эрзо не доребуьруьм? Гье у ведекуьрдебугьо сал доребуьруьм. Ишму умогьой эз Дербенд рафдебирит, хьовир Фомичев. Мере гье имид дорут, фегьм мисохим гуфдире эрзоре, гье постой, постой мунд рафд. Песде меш мугум э дуьлме: эхи гӀэйб э меш вери. Э газет ошибка ведирморебу. Ме не дешендебуьруьмгеш у ошибкаре, эхи гьул кеширебуьруьм газете. Мугум, гьечу хуби эрме, э гӀзилгьо имид бире, у шев рафде э типография газете фегьм не сохдум. Эри эн у ошибка келе наказание вегуьрдуьм ме... И ченд салгьо...

ГӀэсоил дие гоф сохде ние дануьсденбу. Шувгьэм ю эденбу дорд доре, чумгьою гӀэрси бире.

— Да-а-а, — мугу Фомичев.

Песде ГӀэсоил хомуш бисдоки, пуьрси Дербенд чуьтам бириге, эз куьгьне корсохгьо гьони ки дериге э шегьер, чуьжире тозе корхонегьо не тозе хунегьо вокурде оморетге. Е ченд гоф секретарь парткомиссияш гуфди. Фомичев э блокнот хуьшде чуьйгеш нуьвуьсде, э ГӀэсоил денишире, мугу:

— Дие иму туьре инжимиш ние сохденим. Гьеле бура э хуне: Э хуьшде дениш. Обком огол мизенуь туьре.

ГӀэсоил гоф не пуьрси, оммо э дуьл хуьшде мугу: «ГӀэзиетгьойме имогьоиш неварасд бу?»

Фомичев э пой вэхуьшд, хэндеруь дениши э ГӀэсоил, чуьтам суьгьде бирор эз дуьли бирор хуьшдере рэхь сохденигьоре хуно, дес ГӀэсоиле гуьрд, рэхь ник гуфди. Оммо хэлгьой ГӀэсоил гьейсэглэт унгьэде омбар бу, у бе-

гъем э сифет Фомичевиш недениши. Энжэгъ дес юре гуърде, мугу:

— Согъ боши, хьовир Фомичев, фурмуш месох Дербенде, дануьсдиге э Дербендиш бие. Дербендигъо шор мибошут туьре винируьтге.

## МИГИД ЗЕНГЪО

Суьфдеи рузгъой март Ахмед не Вера гъул екире гуърде, эденбуьруьт эз кино ведироморе. Сер шев бу. Ленински куче э ён кинотеатр «Ватан» эз лампегъой электри рузе хуно эденбу товуш доре. Вера ило-улере чумечару сохде, поисд э ён келе афиша, хунд, ки шев екишобот коллектив самодеятельность эн колхозгъо эдей комедией Узеир Гаджибекова «Аршин мал-алана» норе гуфдире.

— Мурайм? — пуьрси Вера, эз гъул Ахмед гуърде поюнде, э афиша бирмунде.

— Вэхд бисдоге, мурайм, — жугъоб до Ахмед.

— Гье вэхд не бисдо туьре, гъэгъри кимиси гуфди Вера, — шуьвер одоми келе бире гъич хуб нисди...

Чум Ахмед э и туьтем э лой эз кино ведироморегоргъо добу. Э чум эн у вохурд Рэхъмон, тип-тэхъно, сер гъуз э лой хуне рафденбугъо.

— Дирей? — мугу Ахмед, — Рэхъмон тэхъно эдей ведироморе эз кино.

— Эхъисобевоз боришмиш не бири э Хуморевоз, — гуфди Вера. — Ме гъич ни гуфдурум угъо эз еки гъэгъри мибошут гуфдире, гьечу екире сэхд хосденбуьруьт. Э ёртуь мунди э армия, чуьтам Рэхъмон сирот Хуморе бирмунде шори сохденбуге? «Ижире одохлу, — мугуфди у, — екиреш нибу. У э ме сад салиш миденуьшуь. Э рачи эн у э гъуьлом духдер нисди». Имогъой биё виниш эз гъэрешу мугуиге назу гирошди. Чуь бири игъоре?

Ахмед э думит домунд. Гъул Вераре гуърде, э лой хуне берде юре, Ахмед мугу:

— Е кор сохде гереки, Вера, эри боришмиш сохде угъоре.

— Чуь кор сохим?

— Ме дануьсденум, — мугу Ахмед, — эз пенж рузиге мигид зенгъои, хьэшдимуьн март. Е вогъне офимки и руз туь эз дедей бирейгъо сали гуфдире. Мурай э по-

ликлиника э кор, э ки Хумор, гьич хуьшдере мевени, ки туь дануьсдени гуфдире угьо боришмиш небиреире. Мугуиге э иму мэгІлуьми э хуней эн угьо шолуми офдори. Огол мизени ишуре, зен-шуьвере э именинай туь, хьэш-димуьн март.

Вера хэндуьсде, мугу:

— Песде мегуьруьт бэхшгьо, мосдонут, миёрут. Вегирим э зарали венгеним?

— Гьэйгьу нибу, — мугу Ахмед. — Э хотур боришмиш бирей э заралиш офдорутге гІэмел миёв. Гьэрде иму песде могордуним. Эй е гІэил ишу бэхш миберим.

Вера шори сохд, фурмуш сохд ишу э кучеют гуфдире, э бузпой поисде гьэл гуьрд, моч сохд шуьвере эз гьутинею.

— Туь чуй сохде! — мугу Ахмед, песово денишире, — э куче одомигьои.

— Бошгу. Кире ихдиёри эри не гьишде мере, шуьвермере моч сохум?

Себэхьими, э кор гьисдики, эз дежурный врач муьгьлет хосде, Вера зури-зури рафд э поликлиника э ки Хумор. Э кабинет Хумор кор сохденбугьо очередь келе бу, гьеле-меле Хуморе можол ние биренбу эри э буру ведироморе. Эхириш е кем очередь сук биреки Хумор ведиромо. Дирени э ён дер Вера нуьшди.

— Эле, туь игІэре чуй сохде, Вера? — пуьрси Хумор.

Вера хуб дениши э лэгьэр биригьо сифет Хумор. Сипре хэлет э тен вери, сипре калпак э сер вери Хумор диеш азиш веди биренбу, ранг сифет ю ранг сипре муме хуно биребу.

— Ме э китуь оморем, — мугу Вера. — Эн ме руз мигІид хьэшдимуьн март имининаин. Туь дануьсдени мере инжо э Дербенд хэгьер бирор нисди, эз гьеме дусгьо шинохгьо туь не Рэхьмон куьндит эй ме. Э имининайме не оморитге, гьич гІэмел ниёв. Жон Хумор, э кефме дегмиш мебош.

Хумор э думит домунд. «Игьо ние дануьсденуьт бу. Э хьисоб Рэхьмон не гуфдири э Ахмед». Эй эн и кор э дуьл хуьшде Хумор согьбоши гуфди эз Рэхьмон. Мерд гьечу мубу дие. Бегем э хуней хуьшде бугьо гофе одоми мурав э жой мугую? Гье лап куьнде дусдиш бисдоге... Гьич хэгьер не бирориш гІэрей зени шуьверире ние соху... Песде имогьой э Вера чуй гую Хумор? Гую иму гьэгьриним, оmore ниданим? ГІэмел ниёв. Гую, миём?

Уреш гуфдире нидануь, чуьнки юш ние дануьсденбу по-сою чуь мубуге. Хуморе воисденбу Рэхьмон ю вэхуьзуь дир-ров э пой ю, оммо чуь кориге Рэхьмон ние дироморенбу. Хумореш ние воисденбу хуьшдере хуьрд сохде, э пой хуьшдеревоз вэхуьшде, дарафде, ченгъэде и песни руз-гьо кук ю Шемей дироморе, гирисде, оголиш зеренбуге юре. Э думит домунд Хумор, гІэйбе-гІэйб дениши э Ве-ра, мугу:

— Виним гьери. Дануьсдимге, миёйм.

— Дануьсдимге нэгІ, ме дениширем э ишму. Егъин миёйт.

Гъэл гуьрде, моч сохде Хуморе, Вера шори-шори, хэнде-хэнде зури-зури рафдени.

Гъемин гье э и руз Ахмед дирени Рэхьмоне э кантор, огол зере э кабинет партбюро деберде, гуфдирени:

— Вера огол зери ишмуре э иминнай хуьшде. Хьэш-димуьн март, дениширейм. Дануьсди?

Дие Рэхьмон не гуфди э Ахмед у руз Ахмед юре гІэйб доре бэгъдо рафди михьилои хосди гуфдире эз Хумор, песде хуьжет бире, эз лэгІэю зиёдие гоф ведироморе, Хумор гъэгъри бири вадарафди гуфдире. «Эгъ, эйчуь гуюм, — фикир сохд Рэхьмон, — белки э и вогъней иминнаревоз боришмиш биренбирим?» Эз е тараф у шориш бисдо э иминина бирен. Эз ки Ахмед вадарафде сэгІэт, рафд э магазин, е келе гъути «сюрприз» духи, одекалангъо восде, е раче гуьле-гуьле косинкеш восдо, видовусд э хуне. Плаще эз тен векед, шопкере э гъиче дулла сохде, Рэхьмон пуьрси эз Божи:

— Хумор гене не диромори, дедей?

— Дедей миро туьре, — дуь муьшде эз зани зере жугъоб до Божи, — куьмуьр кесов гердо беде гІэйлле-гъоймере хосдегор! Хэлгъ дануьсдге гІэйб шермендени. Гуьлбике хэгъер туьш е сэгІэт инжо нуьшде, хуьшдере куьшди. И чуь нэхьсини. Гоф бисдо, варасд. Текей гьиретине муьгуьруь мипою одоми?

— Гъэйгъу нибу, жон дедей, — шори-шори гуфди Рэхьмон. — Ме гъони мидарам мидировунум уре. Беге чинме эз душе офдоре дарафдуьмге.

Божире ние воисденбу, кук ю дарав э пой зен, хуьшдере хуьрд соху. Оммо гоф несохд. Текей бире гъечи. И дуь орине хуне мугуиге тип-тигъи биребу, э хуне ёс дерире хунобу, мугуиге эз хуне мито вадарафдебу. Эз дуьли разиш не буге, Божи мугу:



— Дара, огол зе дировун, хэлефме зен туьре.

Рэхьмон э хуней Мелкейгьо дарафдгьо, Хумор эденбу сер духдерлей хуьшдере шуне зере, Мелке э пушой кинле эденбу гиней венжире.

— Шев ишму эхэйр бу, — хэнде-хэнде мугу Рэхьмон. Хумор жугьоб недо, Мелке мугу:

— Эгъуьбет туь эхэйр, гирор нуьш.

— Папа, папа! — хээрой дешенде, духдерле вирихунд хуьшдере эз дес дедешу, гьов кенд омо э гъужогъ бешу.

— Э дедеревоз мирош! — хээрой сохд Хумор э сер гІэил, гъуьжуьмгьой туь гьони лов мубу о!

— Гьичиш нибу гу! — хэнде-хэнде ведешенде шаколад доре э дес гІэил.

— Биё инжо бесдуьм муйгьой туьре! — мугу Хумор эз гІэил.

— Песде, ебо шаколаде хурум.

Рэхьмон гІэиле моч сохде, мугу:

— Хьэшдимуьн март имининей Вераи. Не рафдимге, келе гІэйби. Ме бэхшгьош восдорем...

Хумор гье ебо хуьшдере вешенде, пуьрси:

— Кидан рафдей хьэпуьр-чуьпуьр восдореге!

Песде э дуьл хуьшде мугу: «Ме гье ебо гьечи эйчуь гоф сохдум эиревоз? Оммо дуьл ю эденбу сухде эй Рэхьмон, хьэсрет бу ранг Рэхьмоне эй дирет...

— Сюрпризиш восдорем, косынкеш.

— Е хубте чи небу, е ведилуье чи?

Рэхьмон гьирмизи бире, мугу:

— Ме чуь дануьм. Зен нисдуьм ки. Кеш бурайм э меревоз. Чуь туьре воисдге восдо.

Хумор жугьоб недо. Сергъуз нуьшд.

— Дие эйчуь нуьшдей, веги гІэиле, кеш э хуне.

Хумор гоф не сохд.

— Дедей миро туьре! — эхириш тоб не до Мелке. — Мерд вэхуьшди э пой туь диромори, хуьшдере э гъугъ килисе эйчуь венорей!

Хумор гьошгьобогълуь бисдо, гофгьой дедешу зе дуьл юре. ГІэиле гъужогъ зере у мугу:

— Кеш, Рэхьмон, кеш.

Рэхьмон э ён Мелке оморе, гІэйбе — гІэйб мугу:

— Гъэгьри мебош, дедей Мелке. Гьемеймуш инсоним. Хуьрш одоми зиёд биренге, чуь гофиш гуфдирени. Песде гьердуьеки мидиройм э лошму.

— Худо кумек эришму, балайме, — мугу Мелке. — Глов гІэтош бери дуьшмере. Гуьмуьрмеш эйшмуни. Бегем Хуморе гьимиш туьни.

Хумор эз зир чум шефд денниши э дедешу, гьул Рэхьмоне гуьрде, кеши.

### «ГУЬРГ Э ГЪЭД ГЕЛЕ»...

Пушой нисону бу. Сенем дедей Бебейгьо, э жуьндурри геймиш бире, эденбу хунегьоре хьэк сохде. Чуткей хьэки э минутию ебо эз дуьм ведирофдоре, келе зен хьуьршлуь бире мугуфди: «Э сэхьибевоз мирош, гье эдей ведирофдоре. Дедей миро ире, сад бо гуфдурум э Бебе е минут нуьш и хунне, дуьм чуткере гьуьч сох гуфдире. Э гуш ние гуьрде. Гьич э кор хунеревоз кор нисди юре. Кор мердиреш иму биё сохим, кор зениреш»...

— Э дей, чуй гуфдире туь унжо? — пуьрси эз буру Либо.

— Гьичиш, кор туьре сох!

Либо э хьэет бу. Э офдои, э сер расагьо вешенде палтугьо, кастумгьой Бебе нен хуьшдере, у эденбу чутке зере угьоре. Песде е дуразе чубугьэ вегуьрде, Либо сер гуьрд эри зере ведешенде тузгьой холинчегьо, сумогьо, э боруй хьэет дулла буьруьтгьоре.

Сер сифет ю э хьэкевоз буетмиш бире, Сенем э бедирей хьэкиревоз э буру ведироморе, мугу эз Либо:

— Э духдер, э чубугьэвоз бегем тузгьой сумогь темиз мубу? Бигьил е дэгьдэгьэ кор мере варасуьм, гьердуйеки э десевоз туьртуьр мисохим. Туь вечи гьеле стулгьо, шкопгьоре десмол зе, гьоб-гьужобе шу. Глов хьозур сох эй хоригьоре шуше.

Руз эденбу пишнеи бире.

— Гьэжгьуш веноре не омори, — мугу Либо. — Куктуь миёв женг муьгуьруь чи не бири гуфдире.

— Дедей миро уреш, чи бире мэхьэл э кучегьо рафде хурде.

Расдекиш омбара рузгьо Бебе э хуне ниомо эй чи хурде. Оммо э и руз, э хуне гьэребелугь бугьо, у омо раси.

— И чуй гьэребелугьини генел

— Ние дануьсде туь? — пуьрси Либо. — Эй нисону дегь руз мунди.

Гъошгъой Бебе дуллу бисдо.

— Муърдейт мунде э нисону не гьомунуревоз.

— Туь зэхьмет ние кеширеки, — мугу Либо. — Гъуз бире е чубугълереш эз хори ние вегуърде. Уни дуьм чуткей хьэки дедешму гъуьч сохденини. Ченд гиле минет сохди э туь?

— Э жун зерде бешешму, имогъой устой чуткесох мибошум эйшму!

— Весси весси, туьре э бебеймуревоз кор нисди.

— Гьелбетте кор нибу гьони, эхи э склад шороби не деруьм дие. Дие чи ние расире эз ме эю...

Сенеме хьэз не омо эз гофгъой кук.

— Дедей миро туьре, э пушой миглид гене синетхьини венгесде э хуне?

— Эгь, вомундем эз лэгълэгъигъошму! — мугу Бебе. Гьич чиш не хосде эри хурде, вадарафд рафд эз хьэет.

— Эле, пой е дуь хое семе дуьшунум эри туь о! — хьэрой сохд эз песою Сенем.

Бебе э гуш не гуьрд. Бебе-дедей Либоре нифри сохде-сохде, рафд э лой столовой э Ленински куче гьисдигъо. Инжо, э Ленински куче, э пушой аптек, э ён столовой, э домой дер магазин «Шекири» гуфдиренигъо. э лэггэй дер гъопуй каньячни завод сеи-чори нуьшде буьруьт мердгъо-екигъо папрус кешире, екигъо тесбихь э дес вежегъунде, еки овосунегъо хунде, угъониге хьирхьир зере хэндуйсде. Ки одомигъо буьруьт угъо? Е парагъой эн угъо хуьшдере корсуьз гуфдиренбуьруьт. Корсуьзи эн угъо иники, угъо э суке гъурлугъ пул омбар биренигъо е небуге э магазин не склад кор ние офденбуьруьт, э фэхьлен — э завод, совхоз, стройка, э гуруне кор угъо ние рафденбуьруьт. Е парагъойге бу э проводники рафде оморегоргъо — э салию се-чор мегь э проводники биренбуьруьт угъо, шоробгъой винкомбинате э Дальний Восток е ненге э Сибир, у вэхдиге гьечи эз себэхь те шохьонгум э Ленински куче кура бире, э ихдилот нуьшденбуьруьт. Э гъэд эн и одомигъо дебу холуй Бебейгъо Тенхьумиш. У нуьшдебу э сер тукунеи, э пушой каньячный завод, эденбу гъэйле кешире. Бебере Тенхьум вини эз столовой чи хурде ведироморе бэгъдо. Бебе кучере гиросде, эденбу э лой кино гиросде, Тенхьум э пой вэхуьшде, хьэрой сохдгъо:

— Э Бебе, э глээзи!

Бебе песово чарусде, поисд. Вини холушуре, гIоси бисдо.

— Пой е минут, мере э туьревоз гофи.

«Гене чуй воисде ире эз ме», — мугу э дуьл хуьшде Бебе.

— Кеш, э рэхь рафдеки гу, ме э кор биё бурам, — мугу Бебе.

Евош-ёвош угьо рафдуьт э лой келе богъчей шегьер, Тенхьум дерд хуьшдере гуфди:

— Коргьойме гьони шифи, хэгьерзоре.

— Эй чуй?

— Проводники нисди, мигIидгьош э пушо дери. Эй гIзилгьо сери-тени гереки...

— Гм... Сали сивдуьм мегь гье и ихдилот бисдо туьре. Де имогьонш ме э склад шороби недеруьмки.

— ГIоси мебош, хэгьерзоре, туьре шинохгьо омбари. Ме имогьой келе мердуьм. Мере э гуш гуьрдегор нисди. Девр ме гиросди. Меш э вэхд ю эйтуь сохдем. Эз хэтолуье коргьо хилос сохдем туьре.

— Гене сер гуьрд эй серкуш зере. Визор оморем дие!

Бебе эз гъэгьр е папрусе кешире бегьем не варасде, еккереш ведешенд, дено э лэгIэ.

— Чуй гуфдире имогьой туь э ме? — пуьрси Бебе.

— Виниш-у шинохгьой туьре, е хэйр ведиреморение кор...

Бебе е кем думит сохде, мугу:

— Туьреш гьисди хубе шинохгьо. Уни Хьэнуко ошней туь э руьгъэние жиге дарафди.

— Эже?

— Э фермай колхоз. Говгьош э киюни, керггьо-вечегьош, ширгьо-хоегьош.

— И чуйи! — мугу Тенхьум. — Гуьрге бердет э геле дешенде ки...

Бебе ило-улере чуме-чару сохд, кес не вуьнуь гуфдире, не шинову гуфдире ихдилот ишуре, песде мугу:

— Бура э ки Хьэнуко, веги керггьо, хоегьо, гIэре-бир шириш муьдуь. Э дес гIзилгьо медефуьрси, муфурухи. Э туьш мирасуь, э юш.

— Эле, у дуьзди биреки! Песде гуьрдге, чуй мисохим?

Бебе шефде хэнде сохд, мугу:

— Туьре пулиш воисдени, динжиш. ЖэгI гуьруьгьо

биё кун хуьшдере э хинике глов зенуь. Туь гуфдиребири-ки эйме и меселере.

— Э гIээззиме, эхи молгьой колхози...

— Дануьсденуьм. Угьо гьечунигеш э хьуькуьмет биё фурухут керггьо-хоегьо, ширгьоре... Э иму сдавать сох-денуьт угьо. Когьоз эн угьоре иму дореним, пулеш... Туь бура э ки Хьэнуко, гу ме фуьрсорем туьре. Юре ме муь-вунуьм песде.

Тенхьум эз е тараф шори сохд, суке тегьер э дес ю пул мидиров гуфдире, эз е тарафиге терси. Песде мугу э дуьл хуьшде: «Ме эйчуь терсиренуьм? Колхозе когьоз мубу э хьуькуьмет дори гуфдире чигьоре»... Согь боши гуфдире, дес Бебере гуьрде, у гене вегошд омо э пушой коньячный завод, нуьшд э ихдилот э «корсуьзгьоревоз».

## Чоримуьн бэхщ

### ШОРИ ВЕ МОГЬБУЛИ

Эз партбилете вогуьрде эйлоревоз, гьовой ГIэсоил дегиш биребу: ранг ю очмиш, ловгьой ю шор, балай ю тип-тик, лэгьэриш буге. Дорд дореигьой шуьгьэм хуьш-дереш дие унгьэде э гуш ние гуьрденбу ГIэсоил. Беже-бежеи бегем? Эз жогьилиревоз, гуфдиренбу у, э куьнди чуьл сал ме гIуьмуьрмере, зиндегунимере э рэхь партия, э рэхь Марксизм-Ленинизм норем, ме шор ни бошум эй восстановить бирен э партия? Гье себэхуьми, партбилете вегуьрде, эз Махачкала вогошде оморегубуьо руз, ГIэсоил рафд э горком партия (умогьой э Дербенд райком не горком еки биребуьруьт; гуфди ме хьозурум гуфди-ре, гьерчуь тапшуьрмиши дорит мере: войге лекция ху-нум эй колхозникгьо, войге суьгьбет гировунум не дени-шире э пири хуьшде, э нэчогьи хуьшде, гьеме руз э гIэ-рей колхозникгьо, э гIэрей хэлгь мидебисдо у.

Э гьозори нуьгьсади пенжогь хьофдимуни сал э сер ГIэсоил бед-бэхди омо. Эз нокуми офдо муьрд зен ю Ев-дит. Гурунд бисдо хьол ГIэсоил, хуьрд бисдо дуьл ю, то-зе бисдорут лербегьой руригьо ю. «Етим гьишди мере, Евдит, — мугуфди у гьеме руз э сер гьоврегьо рафде, сенгь Евдите моч сохде, — э ме имогьой ки миденуьшуь? Мере ки гьурлугь мисоху? Гьердуьлейму э еки мираф-димгьо хуб бу»... Э Евдитевоз гIэребир хуьжетиш би-

ренбуге Гэсоиле, у омбар хосденбу зен хуьшдере. Э у эловлуье салгьо, э у четине рузгьо Гэсоил рабиетире шенде, э гьэршуй диндоглет вэхуьшде, большевик биребугьо вэхд, бебе эз Гэсоил дес вегуьрдебугьо, дедей ночогь бире эз хьол офдоребугьо, гьовум-гьэрдешгьо эрию дуьшме биребугьо, Евдит хуб ние варасиренбугеш идея Гэсоиле, гьэре бир гофиш мугуфдиге, не шенд Гэсоиле, сэхд гуьрд юре, эз песи э тарафию бире, э хэгьербирор хуьшдеревоз дуьл мундение гофгьош сохд. Пенж духдер не дуь куке дошд, келе сохд эй Гэсоил Евдит, чуй четинигьо вини, чуй зэхьметгьо кеши, гьэрез э Гэсоилевоз бисдо, шориреш, дуьлесдиреш э юревоз бэхш сохд. Бегем эзуни зене фурмуш сохде мубу? Хэйли вэхд, Евдит муьрде бэгьдо, хьол Гэсоилиш гурунд бире, у эз хуне не ведиромо. Рузгьой гьеминон, боггьо-боггьечгьо э савзи геймиш биренге, гьово герм биренге, Гэсоил мадарафд эз хуне, муьнуьшд э ки келемердгьо, э боггьче, э пушой хунешу бугьо. «Бигьил шуьггьамме е кемигеш хуб бу, — мугуфди Гэсоил, — ме гьечи нуьшде нипоюм. Мурам эй лекциягьо хунде».

Е руз пушой мигидгьой жугьури Гэсоил нуьшдебу э боггьче, эденбу газет хунде. Шуш нефес гуьрде омо раси чуйклеи духдерлею, э хуне домундебугьо, гьеле гьэруьс не биребугьо.

— Папа, туьре э горком оголуьт, Иванов гуфдири мугу э кию биьвгу.

— Хуьшдени Иванов? — шори сохд Гэсоил, — бошгу, хэлефме.

Гэсоиле мугуиге паргьо-пардушгьо воромо. «Хуьшдени секретарь горком огол зере бэгьдо Гэсоиле, веди биреники гьеле Гэсоил гереки партияре». Э и дэггьэдэггьэ мугуиге гьеме дердгьо-дуьлесдигьой Гэсоил эз ёрию вадарафдуьт. Шопкей хуьшдере э сер дуз сохде, пинжек хуьшдере туьр-туьр сохде, сере тик гуьрде, рафд Гэсоил э лой горком партия. Тейте э партия востановить бире, э куче гешдеки Гэсоиле э руй хэлгь денишире, руз эхэйр бу доре гьэйб оморенбу. Гьони гьерки эз шинохгьо э ю мохурд, Гэсоил эз дури сере фушенде, руз эхэйр бу мидо, хьол руз гьэйлгьоре хэбер мегуьрд.

Дуьл Гэсоил эденбу тэгди сохде, уре дануьсде воисденбу, чуй гьурлуггьиге эюревоз Иванова. И рэхьэ тейте э горком рафде расире, ченд жире коргьо оморенбу э ёр Гэсоил. Э ёр зну омо у герме руз гьеминон, э

бюро обком партия огол зере, партбилете дорebuуруйт-гьo э ю. У руз мугуиге эри ГIэсоил Махачкала гIэруьсе хуно геймиш биребу. Келе доргьo, э богъчей шегьер не э кучегьo э ён обком вебууруйтгьo е рач велгьoре лов сохде, мугуиге чордогъ зеребууруйт, кучегьoре серин сохдебууруйт. Диворгьoй хунегьo мугуиге тозеле хьэк зере оморебууруйт. Эз лой дерьёгъ е раче эвир, шогьвор эденбу оморе. Э ён дер обком оморе расире сэгIэт, э домой дер поисдебугьo одоми ГIэсоиле шинохд, мугу: «Э бюро оморей? Гирор вара зеворо». Шор бисдо ГIэсоил, хэндусдуйт те умогьoй могъбул бууруйтгьo, дору дарафдебууруйтгьo чумгьoю. Песде ГIэсоиле огол зеруйт э зал заседаний бюро. Секретарь обком, гьеме членгьoй бюро руз эхэйрбуй ГIэсоиле вогордундуйт, шоришори, хэнде-хэнде гоф сохдуйт э юревоз, хьол руз юре пуьрсууруйт. ГIэсоил куйгьне рузгьoй хушдере э ёр оворд, эз шори жендек ю лерзи.

Секретарь обком, э пой взхуьшде, дес ГIэсоиле гуьрде, партбилете доре э ю, мугу:

— Иму имид сохденим, ки туь келе мердиш гьисдиге, пушотейнегьoй туьре хуно активист мибоши, идеягьoй партияре э гIэрей хэлгъ фирегьу мисохи, жовонгьoре тербиет миди. Хосденим гIуьмуьр дурази туьре. Туь партияре гереки!

Эз чумгьoй ГIэсоил у руз кем мундебу похли-похли гIэрс тигьи бирени. «Ме партияре герекуьм», — мугу у. И гофгьo э ёр эн у омо гьониш, э ки Иванов э рафдеки.

ГIэсоил э горком омогьo, э кабинет Иванов одомигьo дебу.

— Екемлей унжо нуьш, — гуфди э буруни хуне нуьш-дебугьo технически секретарь Зугьра-Ханум. — Гьони унжо деригьo одомигьo медировт, туь мидарай.

— Бошгу, духдерме, — рази бисдо ГIэсоил, денишире э дуразе сиегье бендгьoй муй духдер, э хэндусденбууруйтгьo э сиегье бэгIли ухшеш зеренбууруйтгьo чумгьoй ю.

— Гьелелуьге ги газет хун, — мугу духдер.

— Ой согъ боши!

ГIэсоил чешмекгьoре веноре э чум, сер гуьрд эй газет хунде. Хундереш бегьем сер не гуьрдебу, эз кабинет Иванов одомигьo ведиромогьo. Игьo председательгьoй колхозгьo бире бебей. Гьемей эн угьo ГIэсоиле шинохденбууруйт, гьемешу руз э хэйрбу дорут юре.

— Дара, лелей ГЭсоил, — мугу Зугьра-Ханум.

Иванов ГЭсоиле дире сэгЛэт, вэхуьшд эз жигей хуьшде, ведиромо эз песой келе стол, куьнд омо э лой ГЭсоил, дес юре гуьрд.

— Нуьш гьери, чуйтам бирей, е кем рэхьэти сохдей?

— Эри, хьовир Иванов, мугу ГЭсоил.

Ивановиш нуьшд э раче-берачей ГЭсоил, е кем сере гьуз гуьрде, эй чуйгиге думит сохд. ГЭсоил хуб дениши э лэгьэре, гьуьже-гьуьже сифет Иванов, э гендуьмие дураде муйгьой сер ю, э тенискай эвруьшуьми, лэгьэри жендек юре веди сохденбугьо, мугу: «И гьечи лэгьэр эйчуьни бу. Жогьил ю, жовогьил ю, жунсогь ю. Э хьисо-безов фикир омбар сохде, гьэьгьре э хуьшде кешире»...

— Пенсия вегуьрдени? — пуьрси Иванов эз ГЭсоил.

— Эри, — жугьоб до ГЭсоил. — Пенсия вегуьрденуьм, оммо корсуьз гьэрол ние овурденуьм. Қормеш нисдиге, э хуне нуьшде ние дануьсденуьм.

Иванов гене думит сохд, сере жумунд, мугу:

— Э кор хуте бугьо одоми эз корсуьзи кефсуьз бире. Эри схмиш небирей туь гьэре-бир бура э колхозгьо, лекция хун, суьгьбет гировун, нуьш, э жэгьметевоз гоф сох, настроением ишруе дан, рэхь бирмун э ишу...

— Ме хунденуьм лекция, — мугу ГЭсоил, — и е-дуй мегь, эз зенме муьрде эйлоревоз ому не бу мере.

Иванов гене сере жумунд.

— Имогьой чуйтами гьовой туь?

— Гьечу буге е хогьиши мере этуь, — мугу Иванов.— Э и зуригьо богьчирегьои, э тегьенгьош хубе бегьер вери. Гьони колхозгьо коре гьечу биё гировунуьт, ки е хуше онгуреш пуч не сохде э вэхд ю вечинуьт. Мигьидгьой жугьургьош э пушо дери. Туь дануьсдени, ки е пара одомигьо шобот-мигьид гуьрденуьтгьоре? Э у одомигьоревоз гоф сохде гереки. Гьечу биё бу, ки е доне одоми эз кор не домуну. Э и кор туь э иму биё кумеки сохи. Гьеме активистгьо, пропагандистгьо биё кумеки сохут э партияни организацияй колхозгьо.

— Э сер чумгьойме, — шори сохд ГЭсоил, — ме гофиш мисохум э колхозникгьоревоз, лекцияш мухунум, э газетиш статья муьнуьвуьсуьм. Эз ме олхоин бош!

— Омбар хуб, — рази бисдо Иванов.

Пушой ГЭсоил вадарафде, у пуьрси:



— Туь член обществой эн распространения политических и научных знаний нисти?

— Нэгл, эйчуй бу?

— Глэре бир, эз угьош путевка мегуьрди эй лекция хунде, пулиш мидорут туьре.

Глэсоил глэйбе-глэйб хэндуьсд, мугу:

— Ме эй пул ние хунденуьм лекцияре, ме коммунистуьм, ме тапшуьрмей партияре эдем бегьем сохде.

Песде е кем думит сохде, у мугу:

— Хьовир Иванов, туь мере дуз варас, ме э гьэршуй член общество бирей нисдуьм. Член общество мибошум. Оммо мере хьэз ние оморе актив иму э пулевоз э колхозгьо рафде лекция хунде. Пул эйчуй эй? Бегем иму, коммунистгьо пулсуьз рафде э глэрей хэлгь идеяй партияй имуре гьондурмиш сохде ние дануьсденим. Эйме оморе-нигьо гьеме членгьой общество гьовой биё хуну лекцияре. Меш гьечу.

Иванов жугьоб недо. У э дусдиревоз дениши э Глэсоил, дес юре гуьрд.

Э отдел пропаганда дара. Унжо меслэхьэт сохит э коми колхоз кей мурайге. Согь боши!

— Согь боши!

Эз дуь-се рузиге, э клуб колхоз Ленин кура бире-буьруьт колхозигьой эн се артель. Инжо буьрут хэйли колхозигьой эн артель Рэхьмонигьош. Эсеф гьэлейхэн-жели не Глэзиз э мигле нуьшдебуйруьт. Глэсоил э трибуна ведироморе, когьозгьой хуьшдере лов сохдеки, секретарь парторганизацияй колхоз Ленин мугу:

— Гьони лелей Глэсоил эриму мухуну лекция «Мигидгьой дин-доглот, ве чуй зарали доре, пес шендениге угьо жофокешгьоре».

Э и туьтем е пертовуш э ёр Эсеф омо, чуйтам эз и чуйл-чуйлпенж сал пушо, Глэсоил жогьил гьисди, гьобой ластик э тен вери, килэхь бухоре э сер, сиегье дуразе руьшгьо, э сер гьихэл варафде, э тегьер буьлдуьрчин нумаз хунденбуге... Имогьой? И чуй гофгьои шиновусдени Эсеф эз лэглэй Глэсоил?

— Рабигьо, нумазгьо, турогьо гьемише фурмундет жофокешгьоре, — эденбу гуфдире Глэсоил. — фурмундет уне гуьре, ки жофокешгьо ишу не расирет э сур эн бинегьой дин-доглот, десхэтсуьз бирет, не хундет, не угьоре можолиш не бири, минкиниш не бири эй хунде. Гьерчуй рабигьо гуфдири, бовор сохдет. Эгер жофоке-

ше одоми мигешдге э песой расди-дургуи дин-доглот, и коре мисохд? Гуш венит эйшму е меселе биёрум: руз мэглюьмей кипур ишму недово куьшденит. Пушой керге куьшде э сер ишму нен глэилгьошму вежегунденит. Кимигьойге хое вежегунде. Песде куьшде недовогьоре эй ки фирсоренит? Эй бирор, эй хэгьер, эй бебе-деде, эй кук-духдер. Э недово вежегундеки, чуй гофгьо гуфдире оморе? «Зи хэлипоти, зи копороти»... ЕгӀни и недово гьэдогьобологьой туьре бери. Эй ки? У гьэдогьо-бологьоре дорени эй хэгьер-бирор фирсоре...

Э зал клуб офдорени сес... хэнде.

— Евош, — мугу секретарь партийни организация.

Глэсоил гене гуфди:

— Веди биреники, кипур гуьрдегоргьо гьэдогьо-бологьой хуьшдере эри хосдегоргьой хуьшде фирсоре. Эгер зенгьошму, дедегьошму мидануьсдуйтге мэгӀэной эн и коре, е вэглдош недово нивачарундут...

— Дузи, дузи, лелей Глэсоил, — гуфди киниге эз зал.

— Весси, гьурумсогь, нуьш э жигейтуь! — Мугу е келе мерд, сипре руьшгьо.

Глэсоил овурд гене е ченд меселегьойгеш, комигьоки очугь бирмунденуьт шефди дин-доглот, герексуьзи мигӀидгьой диндоглотире.

— Иму биё гирим революционни мигӀидгьоймуре, екиймуьн Мая, мигӀид Октябрьская революцияре, мигӀид Советская конституцияре. И мигӀидгьо гьисдуйт мигӀидгьой дусди ве бирори гьеме милетгьо, мигӀидгьой шори ве азади... Оммо мигӀидгьой дин-доглотуи дуьшмени венгеседе э гӀэрей милетгьо. Варасит, хьовиргьо, и мэгӀэноре.

Омбаргьоре хьэз оморе эз лекцияй Глэсоил, чек зеруьт, согь боши гуфдурут. Оммо е парагьо, сэхд э желей дин-доглот домундетгьо, гьош дуллу вадарафдуйт эз клуб. Себэхьими э нумаз мэгӀлуьм бисдо, ки Глэсоил гене женг вэхузунди гуфдире э гьэршуй рабигьо. Раби Хьэим не е ченд келемердгьойге сер гуьрдуйт эри э гьэриш жэглмет нифри сохде, рошогӀ гуфдире гешде Глэсоиле.

Иллогьки дивоне бисдо раби Хьэим, шиновусд ки э газет статьяй Глэсоил ведиромори гуфдире эз товуней кипур. И хэбере эз гьеме пушо э раби Хьэим расунд Бебе... Руз мигӀид руьшгьошоне себэхь мунде бу. Э гьово

офдои вобу. Раби Хъэим, сиегье макинтош э тен ю вери, назуке килэхь бухоре э сер, туро э гьултугь дери, сере ён гуьрде, хьпре чумгьоре э ило-уло доноре, эденбу эз бинегьой дивор ленге-ленг рафде, э лой нумаз.

— ТэгИди месох, э лелей раби Хъэим!

Раби поисд, посово чаруьсд, дирени еки э дес ю газет, эдей э посою оmore. У Бебе бу.

— Туь гIэил Шомоил нисди, монухьоту ковут, ме бешмуре хуб шинохденбуьруьм, — мугу раби.

— Эри, эри, гье унуьм. МигИид туь омбарак бу леле, тэгИди месох.

— Согь боши, хэлефме, хэйр гердо, чуй хэбери?

Бебе хэндуьсд, газете лов сохде, мугу:

— Туь э зугьун уруси хунде дануьсдени?

— Е кемлей, гу буре чуйниге, эдем э нумаз рафде, дир мубу.

— Ги хун виниш, чуй нуьвуьсдиге ГIэсоил «ошной туь» эз товун мигИид кипур...

Ранг раби дегиш бисдо, мижегьой хьир-хьире чумгьой ю вежегьисдуьт. Газете восдоре, у кеши овурд уре э пушой чумгьой хуьшде... Е пенж минут эз ю гоф не ведиромо.

— Эй рошогI! — хьэрой дешенд Хъэим, эз лэгIэй юш гьилиз рихд.

— Гьеле туь виниш ГIэсоил, чуй луб миёвге э ишму, — хэндуьсде, гьэгьр дешенд э дуьл раби Бебе. — Имогьой гене э куьф эн у гьирмизине книжка дарафди. Нун рабигьо буре миёв э Дербенд э и зуригьо...

Хъэим хуьшдере вешенд, фушенд, ченд жире нифригьо сохд ГIэсоиле.

— ЖэгIмет и гьэгьре ни дегьлуь э у, — мугу Хъэим, — милет хуьшдере э хори зери. Бегем де милетгьойге мигИид ние гуьрде.

Песде э Бебе хьир денишире, пуьрси:

— ГIэмел миёв и газетлере беруьм э хуьшдеревоз?

— Бер, бер лелей раби Хъэим, — мугу Бебе, десе зере эз душ раби. Ме эйтуь овурдем у газете.

— Худо рази эз туь, хэлефме.

Бебе э хэндеревоз томоше сохд, чуйтам сара балай раби Хъэим пой вечире-вечире дур бисдоге эз ю. Э рафдеки раби эденбу эзир зугьу жире-бежире гофгьо фуьгьунде. Рэхь гироргьо, рабире диренбуьруьтгьо, мэхьтел мунденбуьруьт, у э зир зугьу эйчуь гоф сохденбуге.

— Чув бири рабире? — пурси е кук эз Бебе.

— Шидгъэ, зери...

Гьердуйеки хэндуьсдуьт.

Раби э нумаз оморекы, дие нумаз хундере сер негуьрд. Кура сохд келе мердгъо, куьнде гьурлугъ сохгъой нумазе сер гуьрд эри хунде статьей Гэсоиле.

— Эле, и чув гофгъои, и лап эз рэхъ худо-туро вада-рафдики! — мугу е келе мерд.

— Имогъой? — гюси бисдо Хъэим. — У эз и чувл сал пушо вадарафди. Ме диредуьруьм уре, чувтам э митинг бедироморе, худо туроре, хъэсбешолум, нифри сохдубуге.

— Эз сер эн у нум жугьурире вегуьрде гереки! — мугу е мердиге.

— Эри, — рази бисдо раби. — Иму биё мэглуьм сохим э ю, муьрдге жэгмет э сер митоюш ниёв гуфдире.

Расдекиш, себэхьими, Гэсоил э богъче нуьшдеки эй газет хунде, е руьшверие мерд, э нумаз рафденигъо гьемише, куьнд бире, руз э хэйрбу доре Гэсоиле, мугу:

— Эз ме гъэгъри мобош, Гэсоил, ме тапшуьрмей раби Хъэим нен жэгмете эдем сохде. Э нумаз гоф бири, ки туьре эз список жэгмет ведешендени... сере гьуз гуьрд мерд, посоюре гуфдире дуьл не бисдо юре...

— Гьери, посоюреш гу, — мугу Гэсоил.

— Угъо мугу: буре э Гэсоил гу, ки жэгмет э сер муьрдейтуьш ниёв...

Гэсоил э пой вэхуьшд, жингъою voromo, мугу:

— Эй немердгъо! — гу туь э угъо — Кини жэгмет? Жэгмет иму колхозгъоют, жэгмет иму фэхьлегъо не гьурлугъчигъой совети. Жэгмет иму рабигъо не нумаз нисди...

Ингъэдей Гэсоил хуьуршлуь бисдо, жингъою вэхуьшдуьт, у и гофеш гуфди:

— Не ме э сер митойме у дуьмбурегъоре оголиш нигенуьм...

Песде дирики ю гуфдигъо гоф екем дуз ние оmore, Гэсоил мугу:

— Эй муьрдейме угъо фикир мекешуьтгу. Ме муьрдуймки, митоймере вегуьрдогоргъо омбари: партияьмуни, профсоюзи, колхозгъои! Гьечу буре гу э дуьмбурараби Хъэим?

Десгьой ГІэсоил, гьемей шуьгъэм ю лерзируьт. Дне у гоф не сохде, нуьшд э жигей хуьшде, дор дорейгьой шуьгъэм ю тозе бисдо эз гъэгьр. Мердле, сере гъуз уьзигъэре, посово-посово доре хуьшдере, рафд.

## ДУЬШМЕГЬО ВЕ ДУСДГЬО

Дуьшмегьой ГІэсоил пешму биребуьруьтге э партбилет вегуьрденю, э хуььрмет ю гене звер бирей, дусдгьой дуьли шор биребуьруьт. Иллогьки келе шори сохденбу гьони эз ГІэсоил кифлет ГІэзизигьо. У руз шиновусде сэ-гІэт, ки ГІэсоил эз Махачкала шор вогошди гуфдире, э партия восстановить бири оmore гуфдире, Рэхьмон мугунге е виже гъуьндуьр бисдо. У фурмуш сохд э Хуморевоз биребугьо гъэгьрие гофгьоре, ченд гиле мхьилои хосд эз зен хуьшде, руй очугъ бисдо э Ахмед не Мукоилевоз, хэнде руй бисдо э кор, э бригада боггьоре э гьурлугъ сохдеки. Днеш шори сохд Рэхьмон, шиновусд-ки горком э ГІэсоил лекциягьо тапшуьрмиш сохди гуфдире, ю хуьшденю рафд эри гуш дошде лекцияй ГІэсоиле.

У руз э колхоз Ленин лекцияй ГІэсоиле шиновусде, э хуне оmore, Рэхьмон мугу эз бебешу:

— Шиновусди? Гьич е недуже гоф гуфди у? Оммо келе мердгьо, келе зенгьой ему гье овом мундет, ишу ние варасиренуьт э турогьо чуй вериге, гьерчуь рабигьо гуфди, сохденуьт. Недеворе куьшденуьт, гъэдогьо бологьой хуьшдере эй хосдегоргьой хуьшде фирсоре.

— Гене чуй гуфдире гезде туй унжо? — гъэгьри бисдо Божи, гофгьой Рэхьмоне шиновусде.

ГІэзиз жугьоб недо. Ведибу, ки у рази бу э гофгьой Рэхьмон.

— Ногьогъ ние гуфдиреки э метелегьо, — мугу Рэхьмон. — Раби гуфдирере месох раби сохдере сох.

Бэгьдовой е ченд рузиге, пушой кипур Божи мугу эз Рэхьмон.

— Имогьой ишму ние гуьрденит и мигІиде, меш не гуьруьм? Эгезде, и пушой муьрдерузи мере э пушой худо гІовун мегьил сохде о!

ГІэзиз е вэгІдош хотур Божи зен хуьшдере ние гьишденбу. Ю дес вегуьрдебугеш эз дин-догІот, уре не воисд гъэгьри сохде Божире, гІэрс тигьи сохде.

— Э туьревоз кор иму нисди, — мугу ГӀэзиз. — Туьги мигӀид туьре, нодовош куьш эри туь. Иму руз кипур э кор, э богъчирегьо мибошим.

Божи шори сохд. «Гене ГӀэзиз семе дарафдени э дердме», — мугу у.

Песде Шемей невей хуьшдере огол зере, минет сохд:

— Туьлле мибери керге эй куьшде э ки раби.

— Эле, ме ни беруьм! — жугьоб до Шемей.

Рэхьмон шори сохд.

— Герек нисд Шемее хуте сохде э у кор, — мугу у. — Шемее э ки раби чуь кор дери!

Чорей Божи не бисдо, керге э гъэрзинке доноре, рафд э лой хуней раби Хьэим. Хэет раби журое хъэет бу. Руз мэгӀлуйме эз себэхъэвоз у эз хуне ние вадарафденбу, муьшдеригьо миёв гуфдире эй керг куьшде. Оммо раби эденбу дире пушотеннегьоре хуно и дес унгъэде муьшдери нисди. ГӀэре-бир миовурдуьт керггьо е келе мерд небуге е чуькле гӀэил, мекенд е хэйли паргьоре, мубури герден керге, мишенд э хори хъэет. Божи керге овурдгьо, вини, ки хори хъэет, пушой хуней раби гьеме хунини. Э дивор хуне э ён дер е тумореле дуллунн. Эз гъэд туморе паргьо ведини. Мэхьтел мунд Божи, виники туморере. «И чуьни бу?» Песде керге дореки э раби, е монетеш дореки эй керге куьшдеи, Божи вини, чуьтам раби Хьэим герден керге пучунде, е хэйли паргьоре кешире ведешенде, э туморе декуьрдге. «Гьо-о-о, эй эн и паргьо биребей туморе! — гуфди Божи, — И чуь сэгъэте рабини, еки-еки паргьоре эдей кура сохде. Гьеле е монет эй керге куьшдеи восдоренигьо вес нисди? Лухьлуьхуьт сохош туь у пулгьоре! Эй кини туьре и пулгьо!» И коргьо, и сэгъэтигьой рабире виники, Божи омбар дуьлхуьрд бисдо эз ю. Эз чум келе зен офдо раби Хьэим. «Гьеме рабигьо ижирейбу ярам? мугу у. — Ногьогъ ние гуфдиреки Рэхьмон, мермекином, бегем у хэри? Бегем гӀэсоил чен раби Хьэимиш ние дануьсде. Ногьогъ нешендики ГӀэсоил нумазе. Э хьисобевоз дануьсдени дие»...

Гьечи думит сохде-сохде омо Божи э хуне, оммо э ГӀэзиз шуьвер хуьшде не гуфди э чум ю дарафдигьо муьгӀуьжуьзе.

— Рафди омори эки раби? — пуьрси ГӀэзиз.

— Эри, — недуьл-недуьл жугьоб до Божи.

— Имогьой гловунгьой туь копоре мубу.

— Дедей миро туьреш, весси бура о! Ме э пушой худо гловун не сохдем, ме шир хьэлоле дедсе хурдем.

Оммо гене э пушой чумгьою омо туморей пар э дивор хуней раби дуллу бугьо, парлегьо эз бугьоз керг венде омогьо, Божире воисд келе-келе нифри соху Хьэ-име, туф дешенуь э у руьшгьою.

## ЗИЕДИ ХУРУГЬО, МЕРЭХШУЬ

Мол-гъэре дошденигьо фермай колхоз Рэхьмонигьо вокурде оморебу э биней догь, э глэрей келе гъэребечдоргьо не тутдоргьо, онордоргьо не энжилдоргьо. Эз лой звер мезрей участкей ферма савзе догьгьо буге, эз лой зофру, эз ён келе стандартни говдугьо, гиросденбу и пушогьо вокурде оморигьо тозе ерх. Эз ерх оуло веди буьруьт гьиргьире онгурбогьгьо. Э ферма вокурде оморебуьруьт эз стандартни говдугьо бэгъэй, тозе хунегьо эри дояркегьо не нэхирчигьо, красный уголок не кантор эри заведующий не эй учетчик. Е кем дурте, э мейдузи веди бу е дуразе сипре хуне, ило-улею сипре кергьо-вечегьо. Унжо птицеферма бу, э уш серберэхьи сохденбуьруьт Абас не Хьэнуко.

Дояркагьо говгьоре дуьшире, эденбуьруьт жиге говгьоре темиз сохде, нэхирчигьо говгьоре э нэхир ведебердебуьруьт, эз дури ведибу, чуйтам э ён догь чомох э дес дери, нэхирчи хорунденбуге говгьоре. Рузиш герме, хуьшге руз бу, офдой веди небугеш. Имбуруз мэглуймет гидрометбюро дуз веди биребу. Чуйтам у э радио гуфдиребугьоре хуно, гьово герм, хуьшг булутлуь бу. Кулок зэглиф бу. Э и герме хуьшге булутлуь руз Хьэнуко нуьшдебу э кантор, э пушо норе когьозгьоре, Абас э зверсер ю поисде, эденбу дире ченд процент ферме бегьем сохдиге план шир дуьшире, керг ве хое зиёд сохде э хьуькуьмет фурухдере.

— Годовой план эн иму бегьем бири? — пуьрси Абас.

— Ини, ние дире туь? — мугу Хьэнуко. — Э се квартал годовой плане бегьем сохдейм. Эз е мегьиге обязательствореш мидим.

Абасе унгъэде хунден небу, оммо цифрагьоре хунде дануьсденбу. Уре зав. ферма норебуьруьт куьгьне хубе

корсохи гуфдире, эз мол-гъэре сер ю хуб вадарафде, ченд салгьо нэхирчи бири.

— Серме ние вадарафде, — мугу Абас — сад тонн шир зиёд дорейм иму э хьюкуьмет? Унжо э хьисоб сади пенжогъ вери.

— Дие чуйтам, ние дирe туь? Сади пенжогъ дорейм дие...

Хъэнуко э гIэмелданиревоз дениши э сифет Абас. Лэгъэре сифет Абас, э сипи-сиегье, чире не оморе руьшгьо депичиреbugьo, дегиш бисдо, дуразе бигъгьoю мугу-иге жуьмуьсдуьт.

— Пой ебо, — мугу Абас, — эхи имуре пенжогъ гов зиёдте нисди шир доренигьo. Бегем гьерки эн угьo се тонн шир дори имуре? Эйме оморенигьo говгьoй Ненейгъуьз дуь гьозор зиёдте не дори, говгьoй Алагъуьз — дуь гьозори дивисд дори...

ХIэнуко менэхъэфие тегьер дениши э Абас, мугу:

— Бегем ме этуь не гуфдиребуьруьм? Е хэйли вэхд э жигей шир хое не керг сдавать сохдебуьруьм э заготовка, унжо э сер шир воноребуьруьт угьоре: Эхи керг-вече имисал гъэдерсуьз омбар бири имуре. Эйму чуй бешгъэи? Плaне зиёд бегьем сохдейм, бэхшиш мегирим. Гъирмизине гIэлемиш э иму мирасуь...

Гъoшгьoй Абас дуллу бисдо, дуьл ю гурунд. Ченд салгьо э колхоз дери у, нэхирчи бири, гIэребечи бири, бригадир бири, зав. ферма бири, гьич э дуьл эн у не омори ужире коргьo, ки е гIэмел-чемел соху, дургуни гую, хьюкуьмете, колхозе е ненге колхозникгьоре фурмуну. «Ме пенжогъ сале бирем, е эдомире не фурмундем, — мугу э дуьл хуьше Абас, — и чуй гофгьoи и эме гуфдирени!» Гъэгъри, гIоси бире, Абас э чумгьоревоз сула сохде гъирмизи биреbugьo гиргине сифет Хъэнуко-ре, мугу:

— Эде, туь чуй гуфдире! И ширгьo керггьo мол бебе келебебешму нисдио, эн колхози!

Хъэнуко э пой вэхуьшд, э жун ю терс офдо, э менэхъэфиревоз гуфди:

— Эле, э Абас дои, бегем иму эйму вегуьрдейм шире не керггьоре? Э хуькуьмет дорейм дие. Чуй бешгъэи э и когъоз нуьвуьсд распискере, э у когъозиге нуьвуьсдге. Эрменигьo гуфдиренуьт: «Гъингни-гъинг, тасни гъинг».

Жендек Абас лерзи. Килэхъэ эз сер вегуьрде, эрэгъ пушонире э килэхъэвоз темиз сохде у гешд э ило-улей



кантор, жинленмиш бисдо, терси, мугу: «Хэто-боле миёв э сер иму!»

— Эле, туь эйчуь терсире? — пуьрси Хьэнуко, — иму бегем дуьзди сохдейм?

Э и туьтем э пушой ферме гIэребе поисд, эз гIэребе фураморе э кантор, диromo Ахмед.

— Руз ишму эхэйр! — у гуьрд дес Абас нен Хьэ-нукоре. — Дояркегьошму эжи, гьери кура сохит гьемере э красный уголок, гофи мере э ишмуревоз!

Эз Абас гоф не ведиромо. У перт бисдо мунд э жигей хуьшде: «Бебейме вой, кидан мэгIлуьм бириге э горком, эхьисоб Ахмеде огол зерет гуфдире. Хунеймере ва-чарунд и дуьмбура Хьэнуко»...

— Гьери, эйчуь поисдейт? — мугу Ахмед.

— Гьони, ме огол мизенуьм! — Хьэнуко видовусд.

Абасе воисденбу те Ахмед лэгIэре вокурде гоф сохде, гую юре хэбер нисди гуфдире эз гIэмел-чемелгьой Хьэ-нуко, кидан эз ю пэхьники Хьэнуко чуь сохдиге. Оммо терси Мугу э дуьл хуьшде: «Туь чуь жире заведующий боши, туь-суьз учетчик гьерчуь юре воисд, соху? Инжо жигей чуьтуьни нисди.» Э думит домунд Абас гьони э пушой гьеме корсохгьо биёбур мубу гуфдире. И гофгьо э дуьл Абас дери, еки-еки дояркегьо э гуьле-гуьле булу-шигьо геймиш бире, дуьгуьргьо-келегъэиьгьо э сер де-гуьрде, диromорут.

— Кешит э красный уголок, — мугу Ахмед э хэндере-воз дес дояркегьоре гуьрде, хьол-руз ишуре пуьрсире.

Абас мэхьтел мунд, Ахмед хэнде руй эй чуьниге. «Ме жигей эн у парторг бире, гьони мигирисдуьм. Инжо хуькуьмет фурмунде омори, жигей хэндуйсдейт?» Песде диеш мэхьтел мунд Абас, Ахмед эз куьф газете ведешенде, гуфдики:

— Э имбурузине газет корсохгьой фермашмуре келе тэгIриф эдет доре. Салине плане э се квартал бегьем сохдейт. И эримуш келегедиьни. Ишму э хубе кор ишму-ревоз хуьрмет колхозимуре зеверо вебердейт...

Абас чуьклеле бире, гьуьж диromоре, сэхд нуьшд э жигей хуьшде. «Серме гьич эз е кориш ние вадараф-де, — мугу у, — ме пир бирем». Оммо Хьэнуко шори сохд э хэндеревоз дениши э дояркегьо, егIни дирейт, чуьтам тэгIриф дореге ишмуре. Э гIэрей дояркегьо е жогьиле духдер добу — Ругьне, комсомолка. У лэгIэре пур сохде, воисденбу юре пуьрсуь! «Сер ме ние вадараф-

де, иму салине плане чуйтам бегьем сохдеймге. Эхи ки-ми дояркегьо эжигей се тонн дуйдуш шир не дуйши-рет!» И гоф э лэгIэй Ругъие дери, эз у хунейге сес теле-фон омо. Абас видовусд, вегуьрд трубкаре.

— Чуй, кини? Мукоил? Гьо, эри, Ахмед инжои. Де-нуьшуь э туь, гьони мий? Бошгу. Сэхде гьурлугьи? Меш герекуьм? Дояркегьош? Бошгу...

Дуьл Абас лерзи, зэхьлею жэгьусд. Зури-зури ди-роморе, у мугу:

— Гьони Мукоил эдей оmore. Денишит эме мугу. Сэх-де гьурлугьи мугу. Гьэгьире хуно бу.

— Ахмед мугу:

— Гьэгьри нэгI. Уш эхьисоб газете хунди, шор бири, эри омбарак бу сохде ишмуре эдей оmore.

«Хубе омбарекбуни», — э дуьл хуьшде гирисде, гуфди Абас Уре воисденбу лэгIэ вокуну, гую е сэгIэтойге чуй ихдилот бириге э гIэрею нен Хьэнуко. Оммо гьеле-меле дуьл не бисдо юре. «Ахмед нигую эз ме: туь чуйжире за-ведующий ферман, туьре учетчик фурмуну, туьсуьз ижи-ре коргьоре соху?» Тейте Абас думит сохде, Ругъие десе гьово гуьрде, мугу:

— Мере гIэйб месохит, эхи эйме мэхьтеле кор оmore, иму чуйтам плане бегьем сохдеймге...

Э гуфдиреки хэндуьсд, э лой Абас чарусд.

— Эйчуь? — мугу Ахмед э мэхьтелиревоз.

Хьэнуко сере э улойге чарунд, герм бисдо юре. «Хэто боле неьв ебойге э сер иму»... мугу у э дуьл хуьшде. Ругъие э пой вэхуьшд, сер гуьрд эри гуфдире э дуьл хуьшде дегь гофгьоре.

— Ингьэде шир эз же омориге имуре ние дануьсде-нуьм, — мугу у. — Белки Абас дои не Хьэнуко эз колхоз-гьойге восдорет, сдавать доре...

— Эле, чуй гуфдире туь! — хьэрой вегуьрд Хьэнуко. — Бегем иму инжо севдегергьоим...

Э красный уголок офдо хэнде, хьэрой-хьэрой, гьерки эз лэгIэй хуьшде оморере сер гуьрд эй гуфдире. Ахмед э мэхьтели домунд, Абас лэгIэре гIов пур сохдебу, мугиге поисде.

— Гьи, Абас, и чуй ихдилотгьойи? — пуьрси Ахмед.

Абас энжэгъ вэхуьшдебу эй гоф сохде, эз буру омо сес машин. Гьемееки лос бисдорут, э лой дер денишуь-руьт. Э красный уголок гьов кенде диromo Мукоил, ехэн плаш ю хьэрзо, сифет ю гьирмизи, гьошгьою дуллу. Руз

э хэйрбу гуфдире эз курабирегорго, Мукоил э гээгъревоз денишире э Абас, пуърси:

— Гъери гу вуьнуьм, Абас, ченгъэде шир дуьширейт ишму эз говго э нуьгъ мегъ?

Абас дениши э лой Хъэнуко, десе кешире, жугъоб до:

— Уни, вегуьруьгу гуьгу, уни учетчик.

— Ме эз туь эдем пуърсире, туьни заведующий ферма! — сесе келе сохде, хъэрой дешенд Мукоил.

Э дуьл Ахмедиш шек офдо. «Эхъисоб е кор гъисди», — мугу у гогъ э Мукоил денишире, гогъ э Абас денишире.

— Гъери ведешенит гъеме когъозгошмуре, учет дуьшире оmore ширгъоре, — мугу Мукоил эз Абас не Хъэнуко, песде э лой дояркагъо чарусде, ёвошлей гуфди: — Ишму гъеле бурайт э кор ишму, песде огол мизеним ишмуреш.

Хъэнуко десгъою лерзире-лерзире ведешенд эз шкоп когъозгъоре, но э пушой Мукоил.

— Когъозгъо гъеме дузи, — терсе-терс гуфди Хъэнуко, — туь гуш вени, Мукоил дои, чуьтамиге ихдилот, ме гуюм эйтуь....

Хъэнуко чорею небире ихдилот сохд, чуьтам э заготовительгъоревоз игърол сохде э жигей шир де чигъойгере хъисоб сохдиге...

— Эйчуь сохдебири, эз ки ихдиёр вегуьрдебири? — мугу Ахмед.

— Эле, ме эй ме невегуьрдем ки..., гъэззи Ахмед.

— Премия воисденбу туьре! — мугу Мукоил э пой вэхуьше, хуни-хуни денишире э Хъэнуко. — Э фурмундекиревоз хуьшдере тэгърифлуь сохденбирит. Туь э же бири, Абас, туьре эйчуь нори инжо правление?!

— Жон Мукоил, ме чуь дануьм...

Мукоил ихдилот сохд эй Ахмед, чуьтам корсохгъой горком имбурузине газете хунде, огол зеретге юре, руьхшед сохдетге э ю, гъэйб доретге юре.

— Очковтирательгъоит ишму мугу! — гуфди Мукоил, гээгър кеши, папрус ведешенд, кеши. — Имогъой ки биё жугъоб дуь эй эн и корго? — пуърси у эз Хъэнуко. — Хуьшдереш биёбур сохдей, Абассеш, имуреш...

Песде корсохгъой фермаре кура сохде, гоф сохде, ведироморэ э машин венуьше бэгъдо, Мукоил мугу эз Ахмед:

— Хъэнуко эз ферма пиш сохде гереки, е рузиш уре дегъише гъэмел ниёв инжо. Эйме оморенигъо дес эню

темиз нисди. Э ногогъ не сохди у и коре. Эме гуфдире-горгъо гысди эз керггъой колхоз иму э базар омбар фурухде оmore гуфдире... Кидан чуй сохдеге у инжо.

Эз Абасиш имуре дне зав. ферма нибу...

Ахмед сергъуз нуьшдебу э машин, эденбу думит сохде. Э дуьл эн у омо рафде-оморегъо, отчетно-выборное собрание, Хъэнуко възхуьшде жуьрбежуьре гофгъо гуфдиренбугъо эз товун Рэхмон...

— Э ёртуь мунди партийни собрание, — мугу Ахмед эз Мукоил. — Екишмуш възхуьшде тараф Рэхмоне не гуьрдит. Хъэнуко чуй гофгъо гуфди. Якубов чуй Гловунгъо вешенд э сер Рэхмон. Чуй бисдо? Бегем иму ние дануьсденбирим Рэхмон зобуне кор не сохдигъоре?

Мукоил жугъоб недо. У энжэгъ папрус кеши, думит сохд. У юш варасиренбу гъэиб хуьшдере, екем терси у шев лой Рэхмоне гуьрде. Эз ки? Эз Якубов терси. И коргъо э ёр оmore, Мукоилиш эз хуьшде нерази бисдо. Гье эри Хъэнуко э ферма вегуьрдеиш гъэлети хуьшдере э герде вегуьрд у. «Эгъ, фурмунде оморум», — мугу у э дуьл хуьшде.

Эз ферма пиш сохде миёв гуфдире Хъэнуко юш хуб вараси. У имогъой терсиренбу юре эз партия ведекуьрде, берде э судгъо чигъо недуьтге. Иллогъки у терсиренбу, очугъ бисдоге ю э Тенхъум керг вече дореи, хое хъэрзо сохдеи. «Умэхъэли ме зйме биё зинде-зинде гъовре веке-нуьм», — мугу Хъэнуко э думит домунде. Шохъонгум эз кор вогошденге, у гъич э хунеш не рафд, видовусд дуз э лой хуней Бебейгъо.

Гъово эденбу торик бире. Зерд биребуьруьтгъо велггъой доргъой мэхъэлей Бебейгъо кулок расире э ишу эденбуьруьт еки-еки офдоре, э зир пойгъой рэхъ гироргъо хъэл бире. Мугунге и велггъо эденбуьруьт гирисде зй варасдигъо гъуьмуьр хуьшде. Хэрче-хэрч эденбуьруьт сес сохде жэгъ-жэгъие велггъо э зир пойгъой Хъэнуко, шуш нефес гуьрде оmoreнбугъо э хуней Бебейгъо. Э пушой гъопу дес э чуне веноре нуьшдебу Либо. Чиле-чиле чогуь сифет эн уре эденбу товуш сохде фонар э звер гъопу вебугъо.

— Бебе э хуне неде? — пуьрси Хъэнуко.

— Эй зурн Бебе э хуне кей омори? — мугу Либо, ох кешире.

Хъэнуко эрэгъ сохдебу. Шопкере эз сер вегуьрде, у э ейлугъэвоз темиз сохд эрэгъэ эз пушони хуьшде.

— Ме имогьой эз же миофум уре, — гуфди Хьэнуко, мугунге эз хуьшде пуьрсире.

Либоре воисденбу гую: «Эз хуней ошнегьою миофи. Кидан туьш э уревоз эеки э ошнегьо рафдеге»... Оммо гуьрд лэгIэй хуьшдере, мугу э пушой эн иш хуьрд несохум хуьшдере. Хьэнуко е хэйли поисд э думит, песеде э ёр эн уш омоки Бебе шевгьо э ошнегьо рафде гуфдире, согь боши гуфдире эз Либо, видовусд э лой ресторан. У дануьсденбу еки эз ошнегьой Бебе э ресторан официантка гьисдигьо чоггэ зени. «Тамара э кор нисдиге, значит э хуней эн угьойи Бебе», — мугу эри хуьшде Хьэнуко. Оммо э ресторан оморе, Тамараре э зал дире сэгIэт дуьл Хьэнуко эз мунде жигеш гурунд бисдо. «Пуьрсуьм бу? — мугу эй хуьшде Хьэнуко. — НэгI, гэгьри мубу. Мугую ме э же Бебе эже? Нифриш мисоху гьеле мере. Гьич дуьзд мугую, ме дуьздуьм гуфдире?» Хьэнуко думит сохд, гIэмел офд. Куьнд бире, эз Тамара пуьрси:

— Эй хэгьер, ме хьэрмэхь мере вир сохдем, е чоггэ сара одомини, льсий, игIэре эйчи хурде оморе у гIэребир, белки туь шинохдениге, э и заготовкагьо-чигьо кор сохде, Бебей нум эн у, э уруси Борис. Дире чи не бирей уре имбуруз, не оморебу инжо?

Гьовой официантка дегиш бисдо, э дуьл ю зеде раси.

— Оморени у инжо гIэре-бир эй чи хурде, — жугьоб до Тамара, — имбуруз не дирем. Вир бири гуфдири?

— Ние офденуьм, — мугу Хьэнуко, э думит нуьшде, десе э чуне воноре. — Мере сэхд гереки у.

Официанткаре огол зеруьт чи хурдегоргьо, Хьэнуко думит сохд э же буравге. Е ошнейгей Бебе, Аснат гуфдиренигьо бие зен бу. «Э хуней эн у мубу бу ярам? — гуфди Хьэнуко. Ебойге сере тик гуьрде, дирени Бебе тозе палтуй демисезонный э тен вери, тозг: шопкей модни э сер вери, дер ресторане вокурд, дирочо, э посою швейцар хьэрой сохд:

— Эй хьовир, палтуре веке!

— Ме гьони эдем вадарафде, — жугьоб до Бебе, — э е одомиревоз гьууллугьы.

Песеде ловгьою хэндусд, э пиёне чумгьоревоз Тамараре гешд, чумию омо э чум Хьэнуко вохурд.

— Эле, туь инжо чуь сохде, гене эй лэхьэим сохде оморей? — пуьрси Бебе.

Хьэнуко э пой взхуьшд, гьул Бебере гуьрде, кеши:

— Кеш ебо э куче, мере этуьревоз гьурлугьы.

— Пой ебо, игІәре е одомире диренинуым.

— Дануьсденуым, инжон Тамара, песеде мидирой, ни вуьруьхуь.

— Гьери, чуь бири гене туьре? — пуьрси Бебе ведироморутки э куче, э е торике куьнж поисде.

Хьэнуко ловгьою лерзире-лерзире ихдилот сохд, чуьтам себэхьмунде Ахмед шори-шори э ферма оморебуге, чуьтам, песеде телефон зере, шуш нефес гуьрде Мукоил омоге, чуьтам гофгьо бисдоге, шулухигьой кор ишу мэгІ-луым бисдоге.

— Ме имогьой чуь мисохум? — пуьрси Хьэнуко, сес юш дегиш бире.

Бебе суьфде гІоси бисдо, э дуьл ю ченд жире гофгьо омо. Песеде мугу:

— Дениш, Хьэнуко, весси э посой коргьойтуь гешдемгьо. Ме гьичиш ние дануьсденуым. Гуьгье хурдей, веги мурдалигьореш верэхш. Нум мере берде э у жигегьо медеше. Дануьсди?

— Эле, — мугу Хьэнуко.—И коргьо дувойнеш э хотур холушму бири. Туь не гуьфдири э Тенхьум ди эзу керггьохоегьо, меш этуь кумеки мисохум? Туь не гуьфдири: дес десе муьшуру, десиш мэхуьзуь руе муьшуру?

Бебе гІоси бисдо, жинленмиш бисдо.

— Дениш, э колхозевоз кор туьре туь дан. Нум мере дешендиге, меш гьэгьре ни дегьлуым. Эгер нуммере не дешендиге, ме этуь кумеки мисохум, эз колхоз ведекуьрдутьге, ме эйтуь кор миофум.

— Белки мере эз партия ведекуьрд?

— Де уре ме гуьфдире нидануым, — мугу Бебе, — ихдиьери эн у кор э десме неде. Корсуьз туь нимуни.

Гьул Хьэнуко ре гуьрде, Бебе дебердени юре э ресторан.

Себэхьими Хьэнуко эз хов дир вэхуьшде. Ичку сэхд кори сохдебу э ю. Хьэгило зен ю дуьл посо бире эй э кор рафде дир мубу гуьфдире, гьуз бире э сер ю, гьуьл додоре, хэбер сохд:

— Э пиёне монок, текей михиси?

Хьэнуко не вэхуьшд. Хьэгило гене гьуьл додо:

— Не вэхизи! Туь бегем э кор ние рафде?

— Вир бош, духдер нолоигь! — хьэрой сохд Хьэнуко, е лэжете зере эз луьнг зен.

— Эле, гьйэсер гердо дедей туь, луьнгме хуьрд бисдоки! — божэхь ведиромо эз Хьэгило.

— Дедей мере нифри сохде туь? — мугу серсу бире Хьэнуко, вэхуьшд, вегуьрд э дес ю офдогьо тирочуре, венжи Хьэгилоре.

Э хуне офдо шивен, хьэрой-хьэрой. Э сес гирисдей Хьэгило видовусдут оморут гьуншигьо, бисдо келе гофгьо. Хьэгилоре эз дес Хьэнуко э гужевоз ведешендуьт гьуншигьо. Куфде оморе зен, дедей дуь гIэил, сертен хуьшдере кура сохде, чуьклеи гIэиле э гьужогь вегуьрде, «Худо меветово сохде», — рафд э хуней дедей хуьшде.

— Бура, духдер куксег, бура шуькеет сох эз десме, бура!

Хьэгило шуькеет не сохд. Оммо э колхоз гье у руз мэгIлуьм бисдо женг Хьэнуко. Ахмед себэхьими кура сохде членгьой партбюроре, но э меслэхьэти эн угьо шефде коргьой Хьэнуко э ферма сохдигьо, колхозе не партийная организацияре фирмундигьореш, пиёнискеи сохде, зене куфде ведекуьрдигьореш. Коммунистгьо дие тоб не дорут э бишэгIрие коргьой Хьэнуко. Угьо гьемееки дес вегуьрдуьт эри ведекуьрде Хьэнуко эз партия.

— Зурбое кори, — гуфдурут коммунистгьо, — бебей эн игьореш винишит, иреш. Эз гьуьзуьргуьулиш гьэретикон бире бебей!

## ТОЗЕ САЛ

Имисалине зимистуй Дербенд хубе зимисту бу: не сэхде хиники бу, не хуьшге герми. И вэгIдогьойге верф оморе зу, хьэл бире рафденбуге, гьони пел-пелуье, пембелуье верф э хори нуьшде мугуиге сипре перзинегьо дешенде оморебуьруьт э сер тэхдее дузе бунгьой хунегьой гьири, сипи биребуьруьт боругьой норунгьэле, э сипии вараисдебуьруьт гьэдимие догьгьой Дербенд.

— Ох, чуь хубе эвири! — шори сохде гуфди Вера, себэхь-себэхь эз хов вэхуьшде, э гьопу ведироморе. — Ахмед, ведиро виниш... Э ёртуь мунди Россия? Ижире биё бу зимисту эй!

Ахмедиш ведиромо, чуме-чару сохд эйлонмей хунешуре, эз гьейву, томоше сохд, чуьтам ёвош-ёвош эз асму офдбреньутге лепе-лепе верфгьо, е хуб, лугьонд нефес кешире, Ахмед мугу:

— Ох-хойш, чуь раче эвири. Э ёрмени зимистуй Уруснет: хуьшге эвир, э зир пой хирч сохденигьо верф... пес-

де думит сохде, мугу: сес тупе-тупгьо, сес гуниле шенде...  
Эгь!

Вера э дуьдеси гуьрде эз гьул Ахмед, мугу:

— Ой, э ёр меёр у беде рузгьой довгlore, дие гьич меёво ужире рузгьо.

Ахмед сере гьуз гуьрд, е кем думит сохд.

— Эй, жон Вера, кире воисде довгlo? Бегем хьуькуьмет иму руз бе-руз гьовхо ние берде эй гьоим дошде динжи, шолумире эгlэрей хэлггьо? Оммо динж ние гьишденуьт империалистгьо. Имогьой Западная Германияре; Аденауэреш атомный не водородный бомбагьо воисде кура сохде. Гьич огьогьой Америка лэглэй Аденауэре зеренуьт?

— Мере имиди, — мугу Вера, — хьуькуьмет иму нигьилуь довгlo бире.

— Мегердо довгlo, — жугьоб до Ахмед, — умэхьэли диеш хуб мубу зигьисдеи хэлгь. Гlэиллегьоймуш динж мухунут, келе мибошут.

— Мама, туь эжеи? — хьэрой вегуьрд эз дору ховолу духдерлешу Эльмира.

— Инжоюм, эдем оморел! — жугьоб до Вера, видовусде э хуне.

— Дес руй шушде, чой чи хурде, Ахмед эз гьул зен хуьшде гуьрде, берд, рэхь сохд юре э кор, э больница. Вераре гьечи хьэз оморенбу верф э хори гьисди, у гlэиллере хуно, хуьшдере эз гьул Ахмед неведешенде, эденбу пойгьоре суьрт кешире эз хори, э киршо жегьисденигьоре хуно. Э куче одомигьо омбариш буге, э рэхь ишу шиногьош вохурденбуьруьтге, Вераре гlэйб ние оморенбу. Э дуьл эн у гьони шори дебу: э юревоз шуьвер ю бу, эз дуьли, эз жуни хосденигьо шуьвер ю.

Оморут э больницаш расируьт, Ахмед хьэрзо сохд гьул Вераре.

— Эз хьовир туь чуь хэбери? — пуьрси Вера пушой эз Ахмед журо бире э кор дарафде, — эхи е хэйли вэхд ние диренуьм ишмуре э еки. Имогьоиш гьэгьргьой Рэхьмон не гиросди.

Ахмед десе э пушонии зе, мугу:

— Эле, ме фурмуш сохдем бегем этуь гуфдире? Рэхьмон имуре э мигlид огол зери, э новый год. Се рузиге бэггьэй мунди! Мурайм?

— Гьелбетте, — мугу Вера. — Е дед Морозиш мосдоним миберим эй гlэйлгьой Рэхьмон...



Гьердуйшу хэндуйсдуйт.

Шев мигид тозе сал хуней Рэхьмонигьо е рач вараюнде омореву: Э доруни хуне э ило-улей ранги-рангие ёлка эденбу вози сохде Марал э духделегьой гьунширевоз. Э буруни хуне сер келе дуразе стол вараисде бу э чигьой мигидиревоз. Столе рач сохденбуурьт вазегьой онгур нен гьирмизине сибгьо, шишегьой шороб нен ширине ве минеральни гловгьо, бишгьобгьой вобуржунде могьи нен зердепенигьо, эн савзи нен хошхошзере нунгьой тонуй. Э биней дивор, э сер нерме диван нуьшдебурьт э ширине меслэхьэт дуй куьгьне бироргили Гээзиз не Гэсоил. Э чи сохденигьо хуне Хумор не Гуьлбике хэгьер Рэхьмон эденбуурьт кумеки сохде э Божи эри гловгьо, епрегьнгьоре душунде. Рэхьмон не домор ишу Сосун э гьейву поисде, эденбуурьт папрус кешире.

— Худоре шуькуьр имогьой дуьл туь динж мубу;— гуфди Гээзиз эз Гэсоил. — Ненге ме эдем дире и ченд салгьо туь чуй кеширейге.

— Чуй сохум? — мугу Гэсоил. — Туь дануьсдени ме э чуй рузгьо э партия дарафдебурьумге. Бегем ме хуьшдере гьич эз партия журо мисохум?

— Зурбое тоб бисдо туьре, бирор. Худо жун туьре согь сохо!

— Эгь, — мугу Гэсоил. — Гье худо-худо бисдо энтуьш...

— Гэйб месох мере, бироргили, у гоф э лэглэйму дери, хуте бирейм... Гьеле-меле ние бире эз лэглэ ведешенде.

Э хуне дироморут Рэхьмон не Сосун.

— Дануьсдени, кире диремге, лелей Гэсоил? — пурьси Рэхьмон, — э ёртуь мунди у Бенил э китуь э редакция кор сохденбугьо? Уре. Э Ленинград зигьисденуьм мугу...

— Бениллемиш сохо Бенил, — жугьоб до Гэсоил, — меш дирем уре и перигьо. Омори гуьрди мере, эдей гуфдире: «Лелей Гэсоил, ме э пушойтуь тэхсиркорум, и коргьо э сертуь омогьо эз ме бисдо, михьило сох эме; ме шор бирем э восстановить бирейтуь»...

— Эзу чуйтам? — пурьси Гээзиз.

Дору дарафдебурьтгьо чумгьой Гэсоил екем хисруьт, песде э Гээзиз денишире, мугу:

— И кечеле Бебе нисди, кук зерде Шомоил гьэрчогьи? Берди Бениле, шороб дори, пиён сохди, у шев, газет ведироморигьо шев, э типография рафди э юревоз. Ме

мэхьтелуым э типография чуйтам дегьшдетге у дуьмбу-  
раре... Дие пиёне Бенилеш хэбер не бири, кидан чуй би-  
риге унжо, Бенилиш газете не хунде овурди э ме доре...

— Эй угьрешгьо! — гIосн бисдо ГIэзиз. — Угьо вре-  
дительгьоютки!

— Биё туь имогьой бэгъдовой ченд салгьо испот сох,  
книиге вредитель.

Гьемееки сергъуз поисдуьт, э думит. Э ёр Рэхьмон  
омо гьеме коргьо Бебе сохдигьо, чугъулигьо. гирошде  
рузгьо...

— Шефде дор эз бине воровгьоре, дуз сохде нибу, —  
мугу Рэхьмон.

— ГIэсоил десе э шуьгъэм вено, гуфди:

— Ме имогьой эдем шек сохде, у дуьмбура кечел и  
коргьоре эйчуй сохдиге. Гье умогьойгьо ме эз хуней бебей  
эн угьо гендуьмгьо бердебуьруьм эй Красная Армия.  
Э хьисоб фурмуш не сохдет... Оммо ме э угьо песде куме-  
ки сохдебуьруьм о, Шомоил муьрденге, угьо богъэ  
фурухде э колхоз оморенге... Э лэгIэй сег ченгъэде чи  
дешендигеш, сурои ние бире. Эгь!

Шуьгъэм ГIэсоил сэхд дор до.

— Е пейле чой гьисди?

— Эри, эри, — мугу ГIэзиз э пой вэхуьшде, — э Гуьл-  
бике, чой биёр эй ГIэсоил.

Сосун эз Рэхьмон пуьрси:

— Гьуногьгьойгейтуь эжи эй?

— Меш мэхьтелуым э жеиге. Гуфдирет эхи миёйм.  
Екемигеш денишим.

Рэхьмон рафд, приёмнике пучунде, Бокуре гуьрд.  
Эденбу мэгIни хунде Буьлбуьл Мамедов. Эз мэгIнигьой  
«Кёр Оглы».

— Буьгьлуьм хуну? — пуьрси Рэхьмон.

— Эри, бигьил, — мугу ГIэсоил, пейлей чое хуьп  
кешире.

Нечогъиш буге, шуьгъэмиш дор доренбуге, ГIэсоил э  
эшгъэвоз эденбу гуш дошде, жун одомире тозе сохде-  
нуьтгьо мэгIнигьоре.

— Гьемише э тозе салгьо, гьемише э тозе салгьо! —  
гуфдире эз буру диromo Ахмед, гьул Вераре гуьрде.

— Ой хош оморит! — шори сохд Рэхьмон, — кешит  
ебо э дору, гIэилгьо эжи, духдергьоре эйчуй не овурдейт?  
— пуьрси Рэхьмон палтуй Вераре эз дес ю восдоре.

— Дури эй оворде гӀзилгьоре, — мугу Вера, — хинни-ки, егилейге миӀрим.

Хумор диromo, гӀӀл гуьрд, моч сохд Вераре, кеши, деберд э доруни хуне.

— Одигюзел бироргиллиме эй чуй не омори? — пуьрси ГӀӀзиз.

Ахмед палтуй хуьшдере дулла сохде, сиегье муйгьой сере шуне зсре, э раче-берачей ГӀӀзизигьо нуьшде, мугу:

— Туь ние дануьсде, лелей ГӀӀзиз, луьнг эн у чуйта-миге? Э десдечуревоз у рӀхӀ хуб ние рафде. Шеви. зинистуни, верфи э хоригьо...

ГӀӀзиз ох кеши, руьшгьой хуьшдере тимор сохд.

— Э-э-эй, гиросд руьшгьойму... Э ёрмени, чуйтам Одигюзел э партизани гьисдики пегьлуьвоне хуно э сер догьгьо гешденбуге. Екиймуш э у нирасирим э рӀхӀ рафде. Едов э вӀхд наступленийму е солдат дуьшме э песой дохьор пӀхьни сохде пулемете, парта-парт гуниле шенде, нмуре ние гьшденбу сереш тик гирим. Ебойге Одигюзел командире чум зере, эз гӀӀрегьой кулегьо гилгез сохде, эз пӀхьнуьки догьӀ эйлонмиш сохде рафде, эз гьуьндуьри хуьшдере э сер пулеметчи шенде, бугьмиш сохдебу дуьш-мере, рӀхӀ вокурде эриму... О-о-о, келе игидигьо бурмундебу Одигюзел...

Ахмед шор бисдо сер ю келе бисдо, ГӀӀзиз ижире тӀгӀ-риф доки бебешуре.

— Э Хумор, — хӀӀрой сохд эз буру Божи, — не нушунни гьуногьгьоре э сер суьфре. Вес нисди ихдилот сохдейтгьо. Туь э ки дениширей, геде! — хӀӀрой вегуьрд келе зен э сер ГӀӀзиз.

ГӀӀзиз вӀхуьшд э пой, мугу:

— Дуз гуфдире Божи зен ме. Гьери, биӀйт нуьшит. Эз хӀбер гьингьӀр хуби, э меселегьо гуфдиренигьоре хуно.

Вера э ки Ахмед нуьшд, Хумор э ки РӀхьмон нуьшд, ГӀӀсоил не ГӀӀзиз э келлей стол нуьшдуьт, Гуьлбике э ён Сосун стул хуьшдере норе, мугу:

— Туь нуьш, меш гьонн миём, муьнуьшуьм.

РӀхьмон пейлегьоре пур сохд, но э пушой гьеме гьуногьгьо, э ГӀӀсоил минет сохд е дуь гоф гуь.

— Ме мугуюм, хӀлефме, — мугу ГӀӀсоил, — энжӀгь эри ме шороб нӀгӀ, эзу боржом деки.

— Бошгу, гуж нисохим, леле.

Гьемееки э лой Гэсоил деншуурьют. И песини мэхэл коргьою хубиш буге, хуърмет юш зиёд биребуге. ранг ю зерд бу. Веди бу, ки глэзор омбар зэхьмет доре юре. Оммо Гэсоил хьрекет сохденбу нечогъи хуьшдере зиёди э кес не бирмуну, дуьл дусд ошноре хуьрд не соху, у хьрекет сохденбу эри хэндуйсде, мэхсерегьо сохде. Пейлере вегуьрде, Гэсоил мугу:

— Хьовиргьо, бироргьо, дусдгьо, хэлефгьойме. Данит: инсон э гуьлом егиле зигьисде. Гуьмуьр хуьшдере одоми гьечу биё гировуну, ки инсонгьо эз ю рази бу. Гьер одоми, тейте зинде гьисдигьо, биё хэйр дуь жэгъимнете, зигьуь эри хэйр Ватан хуьшде, эри хэйр инсонгьо, У одоми, комики энжэгъ эри хуьшде зигьисденигьо, куьрми. Эз куьрм э ки хэйр мубу? Хурим э шори хубе одомигьо, эн куьрмгьо нэгл, э шори тозе сал, э шори биёвтгьо диеш хубе рузгьо, э шори коммунизм!

— Согъ боши, лелей Гэсоил, — мугу Ахмед.

Вера, Хумор, Сосун чек зеруьт. Гьемееки пейлегьошуре хурдуьт. Песде гоф сохд Гэзиз, Сосун, Ахмед. Э пушо омо гюш, епрэгъи, диromo нуьшд келе зен Божиш.

— Биё э киме, — мугу Гэсоил, — ме бирор туьнуьм.

Э сер суьфре Гэзизигьо ихдилот сохде, э ёр овордуьт хьовир-хьэрмэхъ, дусд-ошнере, коргьой колхозе, гьознегьо гиросдетгьоре.

— Ихдилот эн у кук Эсеф гьэлейхэнжели чуй бисдо? — пуьрси Сосун.

— Кут зено уре! — мугу Рэхьмон. — Келе биёбуригьо не оворд э сер колхоз?

— Ишмуре хэбер нисди о, — лэгъэй хуьшдере норе, десе покурде гуфди Ахмед. — Эхи иму уре э партбюро гьэрор сохдейм эри эз партия ведекуьрде. Имогьой виним горком чуй мугуюге. Эз фермаш, эз учетчики ведекуьрди уре правление. Абасеш ведекуьрди. Эз дес эн у кор ние вороморе. Эри, и перигьо омори Хьэнуко, гуьрди мере э куче, эдей жуьре-бе-жуьре гофгьо гуфдире: туь энтуьнигьоре сэхд гуьрде, одомигьой туь чуйш сохдге, гьемере пэхъни сохде туь, туь милетперези, филон-фошмокон...

— И чуй гофи, — гюси бисдо Гэзиз, — туь мэхьшешмуь гердошгу эзу дуьм бура. Эжигей э гьэземет недешендени юре!

Ахмед гене мугу:

— Гуьрди мере, эдей гуфдире: гьэйгъу нибу, фурмуш

нисохум. Ме эдем гуфдире: шефди сохдегориш туьни, гловункориш ме? Чув глэжел воисде туьре? Бура э бригада кор сох дне. Нэгл, мугу, метлеб ишмуре ме нисохум...

— Гьей дуьм бура! — хьэрой вегуьрд Глэзиз.

— Э ёртуь не мунди, Ахмед, — пуьрси Рэхьмон, — чувтам у шев, э партийни собрание ведироморе э серме хьэшогыь вешендебугыь? Мукоилиш е гоф не гуфди. Лэглэ юре не зе. Имогыь пешму бири Мукоил.

Вера не Хумор лос нуьшдебуьрут. Эхириш Вера серетик гуьрде, мугу:

— Эйчуьч ишмуре и гофгыь. У ние верзире эз товун эн у ишму э сер эн и суьфрей миглиди ингэде гоф сохденит. Инжо лелей Глэсоил е хубе гоф гуфди. Гьисди мугу инсонгыь, верзиренуьтгыь э нум ишу инсон бирен. Гьисдуьт куьрмгыьш. У Хьэнуко куьрми. Э гуш мегирит уре. Гьечу мупусу мурав.

— Эй согь боши, духдерме! — шори сохд Глэсоил, пейлей хуьшдере боржом пур сохд.

Гьемееки рази бисдорут э гоф Вера, гьемееки пейлегыь вегуьрдуьт, хурдут, зокуске сохдуьт. Дуз те сэглэт дуваздегыь, тейте келе сэглэт эз Кремля дуваздегыь занг зере нуьшдуьт гьуногыь. Сэглэт дуваздегыь биренки, гене пейлегьоре э шори тозе сал зере, хурде, шоригыь никигыь хосде эри еки, вехуьшдуьт эз сер суьфре.

... Верф поисдебу. Менг невобугеш, шев товуш бу. Э кучегыь лампегыь электриш эденбуьруьт сухде. Вера не Ахмед, гьул екире сэхд гуьрде, э тегьнимиревоз эденбуьруьт варафде э звере, э лой хуне.

## ТИЖЕ ТЕВЕР

Э-у шев тозе сал, хэлгь э сер суьфрей миглиди нуьшде, дуь екире омборекбу сохде, дуь эй еки шори-ники хосденбугыь, Хьэнуко не Тенхьум холуй Бебейгыь, гене куьгьне сениглэте э ёр овурде, вогун шороб вегуьрде, э проводники рафдебуьрут. Рэхь эн угыь дуре рэхь бу-угыь миёсдуьт шоробгыьоре берде норе есер э лойгыь Дальний Восток.

— Рэхь дури, — гуфдиребу Хьэнуко, — хэйр кем.

Бебе, кор ишуре дуз сохдебугыь, эришу вогун вегуьрдебугыь, гуфдиребу:

— Хэйриш мубу. Е тике мувэхъэ э кор овурде герекк. Челеггьой шоробе дирейт чуь келе челеггьойге. Э гьерки е ченд бедире глов декуьрдитге, гьичиш нибу, дэгІэм шороб гье ү дэгІэм мумуну. Э рэхъиш ки шороб восдорогор омбар офд оморе. Варасирит ишму?

Варасире варасируьт, оммо Тенхьум терси. Хьэнуко шор бисдо:

— Сертуь кечелиш гьисдиге, Бебе, академияй науки...

— Сертуь бурра биёво! — хьэрой сохд Бебе, гьэгьри бире. — Эжигей никигьоймени, дуьм-бура!

— Эле, гьэгьри бисдори?

Песде угьо ним литр эрэгъи хурде, боришмиш бисдорут. Э рэхъ офдореки, Хьэнуко не Тенхьум гофгьой Бебе-ре фурмуш не сохдуьт.

Вогун, шоробгьо вобугьо келе вогун бу. Э е лою жерге-жерге челеггьо дечире оморебуьрут, е лойгере проводникгьо эйшу э жигей хуне вараюндебуьруьт: э хори, э сер порхол нимдергьо-лихьифгьо дебу, э дивор холинче вобу, э сер стол гузги вобу, э куьнж вогун бедирегьо, чуькле челеггьо, шороб пеймунденигьо гьобгьо-пейлегьо бу. Э домой дер печь гьовуни эдебу сухде. Э ён печь хьуьзуьмгьош, тиге тевериш буьруьт. Хьэнуко дегешдебу э сер нимдер, луьнге э сер луьнг веноре, эденбу мэгІни хунде. Тенхьум чорзани зере, нуьшдебу э пушой гІэтош, эденбу гьэйлей хуьшдере томоку пур сохде.

— ГІхуь, гІхуь, — е ченд бо суьгьруьсд Тенхьум, хэйфтуф шенд э хоригьой вогун, гьуьж дироморе, лэгъэре сифет ю гьирмизи бисдо эз суьгьруьсде.

Хьэнуко-ре дилоково гуьрд.

— Э ире дениш туь о, — гІоси бисдо у, — гьеле эки хуьшде э келе гьурлугьгьо дебири, интеллигент Хэсен бири...

— Весси, весси! — гьэгьри бисдо Тенхьум, — екем лэгІэй туьре темиз дор.

— Эде, гьеле гьифиш не сохум! Туь э хори хунейтуьш гьечи хэйф-хуьлм шенде?

— Худо шэхьитуре дур сох эз ме! — мугу Тенхьум.

Хьэнуко вэхуьшд, омо, поисд э ён дер вогун, томоше сохд э машин рафдеки чулгьо, дигьгьо, хунегьо э рэхъ вохурденбуьруьтгьоре. Тенхьумигьо ченд руз э рэхъ дебуьруьт. Ростове гирошде, вогун эн угьо оморе э лойгьой Миллерово оморебу расире. Хьэнуко томоше сохде, эденбу дире, чуьтам верф нуьшде, гьеме чулгьо-сэхьрогьо

сип-сипи биретге, э рэхъгьо одомигьош тек-тук вохурденбу, гьово омбар хиник бу. Эз дер вогун шэхдере хуно хиники дироморенбу э дору.

— Сэхд не сохи дере! — мугу Тенхьум, эз гъэйлей хуьшде дуре ведешенде.

— Илле хуби дие! — жугьоб до Хьэнуко, — эзу мурдале буй томбокуй туь эи зуригьо чухутке мибошим. Гьеле эвириш незеним э хуьшде?

— И нэхъсигьойтуь эй хуби нисди, — мугу Тенхьум, — туь имбуруз хуре бирей.

Хьэнуко хэнде гуьрд, рафд дегешд э сер нимдер хуьшде, гене сер гуьрд эри мэгIни хунде.

— Гьечу дие! — шор бисдо Тенхьум.

Э гуш эн у дарафдуьт эз ело сес мэгIни Хьэнуко, эз е лойге сес тэх-тэх черхгьой вогун, э рельсгьо расире, рафденбуьруьтгьо пушово. Гье гьечу э пушой гIэтош нуьшде, гъэйле кешире, Тенхьум ховелуь бисдо, уре хифлет берд.

Гьовой шохьонгум, пушой торик бире машин омо раси э е келе узловая станция. Вогун Хьэнукойгьоре журо сохдуьт эз машин эри э екке дебесде, э е рэхъиге берде.

— Эй, э Тенхьум — хэбер сохд Хьэнуко хьэрмэхь хуьшдере. — Уёгъ бош ебо. Узловои, пуьрсире дануьсде воисде ченд сэгIэт инжо мумунимге. Белки екем шороб фурухдим...

— Бура пуьрс, — мугу Тенхьум.

Хьэнуко вокурд фуфайкегьой хуьшдере, шиши э сер гушверие герме килэхъэ, шенд хуьшдере эз вогун. Тенхьум э домой дер поисде, томоше сохд, чуйтам э станция дагесиренуьтге лампегьой электри, вини ки гешдеге э куьндигьой станция, чумечару сохд зем-зоре эз пушой вогун гирошденбуьруьтгьоре. Ебойге Тенхьум дирени е чогъэ хунширине жогьиле зен, сер хуьшдере э нерме шол бесде, чумгьоре донори поисде э ю. Тенхьум денишики э зен, у хэндуьсд, э чумгьоревоз хурде Тенхьуме. «По-огь, и чуй чини!» — мугу Тенхьум. Жендек ю биз-биз бисдо, десгьой ю лерзи. Диреники жогьиле зен чум ние вегуьрде эз ю, Тенхьум чум зе раче сере, огол зе э ки хуьшде.

— Чуй воисде, жогьиле кук? — пуьрси зен.

— «Эле, ме жогьиле кукум» — шори сохд Тенхьум, сер ю келе бисдо, дуьл ю динж бисдо.

— Чуйниге дануьсдени? — мугу Тенхьум — эз е ним сэгIэтиге инжо биё, мере э туьревоз е гьурлугьи...

— Э меревоз? — хэндуьсд раче сер. — омбар хуб...  
Зен посово рафде, дегь минутиш не бисдо, Хьэнуко шуш нефес гуьрде омогьо.

— Иму те себэхь инжоим, — мугу у, — муьшдеригьош дирем эй шороб. Э ме ди е дуь чуйкис пичинкегьоре, беруьм.

— Ужуз меди о! — гьэдэгьэ зе Тенхьум.

— Ме хомле нисдуьм ки.

Дуь пичинкей шоробе вегуьрде, э рэхь офдоре. Хьэнуко мугу:

— Дир оморумге, дуьл посо мебош, — чум зе Тенхьуме, хэндуьсд.

Ним сэгIэт гиросьдки, э гуьфдире вэхд раче жогьиле зен омо раси.

— Биё, биё, гIэсел, раби Хьэим гьурбу гердо эри энугуьндуьре синей туь, эри энугуьн одомире сула сохденуьтгьо ковре чумгьой туь.

Тенхьум лампере сухунд, товуш бу гуьфдире, дес дуьраз сохд, эз гьул зен гуьрд, кеши воровунд юре э вогун.

— О, и чуй рачи инжо, — гуьфди зен, холинчегьо-чигьоре дире, хунере хунои.

— Дие чуй дануьсденбири, гIэсел. Иму культурни одомигьоимо.

Песде ило-улере чуме-чару сохде, тевере дире э ён печь, зен гуьфди:

— О, ме терсиренуьм, ишмуре тевериш дери инжо...

Дуьразе, бонгьузлуье жендек Тенхьум гьэд-гьуд бисдо рафд э пушой раче сер.

— Туь чуй гуьфдире, гIэсел, бегем иму одомире гьэгьри сохденим? Иму энжэгь рази сохденим... Э лой челеггьо чарусде, мугу: — эз коми шороб декуьнуьм эй туь, гIэсел, эз ширин, эз туьрш, эз нимелитширин?

Зен э вогьнекиле сере жумунде, гуьфди:

— Ме терсиренуьм шороб хурде.

— Гьич метерс, ме инжо гьисдики, — мугу Тенхьум, — ме гьэлхэндуьм э кемер туь.

Тенхьум рафд э лой челеггьо, э шороб декуьрде, зен гене чуме-чару сохд холинчегьоре тигьэтлуь дениши э тевер...

— Ини, ги ху, — гуьфди Тенхьум, пура пейлей шоробе доре, куьнд нуьшде э ён зен.

— Ой, гIэмелдане одомини туь, — мугу зен, — пура



пейлеш декурдей эйме, куьндиш нуьшдей эз ме. Песде мегири мочиш мисохи мере...

Тенхьум хэндуйсд, шори сохд.

— Гэсел гердош туь, бегем зобунн моч сохдумге у ширине ловгьой туьре.

Зен хэндуйсд, э вогьнекиле пэхьни сохд сифет хуьш-дере.

— Нэгі, нэгі, моч ни сохум. Ху шоробе.

— Ебо туь ху, — гуфди зен.

— Эхи ме омбар хурдем имбуруз, — мугу Тенхьум.

— Ме недирем.

Чорей Тенхьум не бисдо, хурд.

— Еккеш ху — мугу зен.

— Моч сохде мигьли?

— Ебо ху, песде мивиним.

Тенхьум хьозур бу дегь пейлеш эй хурде, токи у хуьш-ге лэгьэре, пажире ловгьою э и чоьгэ, гьирмизине ловгьой раче зен варав. Хурд еккеш, дуьдуьйгеш, сер гуьрд эри гьэл гуьрде зене, моч сохде.

— Туь гьеле пиён не биреки эдей гьэл гуьрде, моч сохде мере, — мугу зен. — Пиён бисдориге, кидан чуй миеохиге...

— Эле, гьэдойтуь биёво э жун раби Хьэим, туь гьеме-ре варасиреники...

Тенхьум пиёниш буге, вэхуьшд. дер вогуне эй сэхд сохде.

— О-о, омон о, — гуфди зен. — Сэхд месох. Ненге гьони мурам.

— Нэгі, нэгі, жон гуьзсл. Тиракле эдем дегьишде.

— Гьечу гэмел миёв.

Тенхьум гене шороб декуьрд эй хуьшдеш, эй зениш. Эз шори жиге небу уре. «Эле, и раче чи эз же омо офдо э и пире серме. — мугу у. — Хьэнуко мивниге пэх-парах мибисдо». Ченгьэде пиён биренбу, Тенхьум унгьэде эденбу буш бире.

— Е мочле ди дие! — минет сохде, гьэл дешенд у э герден зен.

Оммо чумгьой зен гогь э лой тевер добу, гогь э лой дер вогун... Ние дануьсденуьм, ченгьэде вэхд и раче зен э гьэл Тенхьум домундебуге, ченгьэде имишев шороб хурдебуьруьтге угьо, оммо пушой себэхь Хьэнуко во-гошде оmore, дьрени: хори вогуне хун берди, меит Тенхьум э пушой пич офдори...

— Бебейме вой! — хээрэй дешенд Хьэнуко, дирэ  
вере э ён мент Тенхьум.

Песде чуме-чару сохде, дирени холинче берде ом-  
чуькле пичинкегьой шоробиш нисди, оммо э келе челег-  
гьо дес зере не омори. Вини куьфгьо-кешегьой Тенхьу-  
ме. Тип тигьи бу.

— Се гьозор пулиш рафд!

Гьогъ бисдо Хьэнуко, перт бисдо. Песде эз ю е меле  
божэхь ведиромо, э божэхь хэлгъ кура бисдо...

Себэхьими э Дербенд телеграмма оморе, божэхь  
офдо, ки Тенхьум холуй кечеле Бебейгьо э проводникки  
рафде, куьшде омори гуфдире. Екигьо гуфдиренбуьруьт  
Хьэнуко хьэрмэхь ю эз гьэгр хгьерзорею, эн Бебе  
куьшди гуфдире, екигьо сес дешендебуьруьт пиён бири  
э шороб хурдегоргьоревоз женг гуьрди, еккегьойге му-  
гуфдурут эй шоробгьоре вирихунде гьэчэггьо омори.  
куьшдс. «Гьечу бирекки. дие Хьэнуко эйчуь согъ мун-  
ди?» — гуфди Бебе. У гьэйбе вешенд э сер Хьэнуко.

Поси, диври, гьэгр э дуьл, Бебе муьгьлет хосде эз  
кор, зү-зү э самолет венуьшде, рафд эри овурде митой  
холушуре. Э Беберевоз рафдебуьруьт зен Тенхьум не  
келе кук ю. Оморе э жигею расире, миторе офде, угьо э  
Хьэнуко бебе-деде негьишдуьт, э сер ю хуьрш ишуре тигь-  
гьи сохдут. «Гьей омон, ишму гуш дорит, чуьтам бириге  
ихдилот, — эдебу минет сохде Хьэнуко, — муьрде-зин-  
дейме э гуьгъ чаро, эгер ме э и кор гьэриш гьисдуьмге».  
Оммо Бебейгьо э гуш не гуьрдуьт минетгьой Хьэнуко.  
Угьо гьич Хьэнуко э машиниш не вегьишдуьт э кишу, э  
миторе овурдеки. Э Дербенд оморе расире, миторе де  
пучунде, Бебейгьо хьофд руз-хьофд шев э овил нуьн-  
дуьт, чуьтам куьгьне гьэдотгьо гьисдигьоре хуно, ра  
Хьэиме огол зере, дегьмерд кура сохдуьт, э хьофди суь-  
ре дорут... Ингэдей гьэйбе э сер Хьэнуко вешендебу-  
руьт угьо, гьич юре э овилхунеш недегьишдуьт. «НэгI, м  
и коре гьечи нигьлуьм, — гуфди э дуьл хуьшде Хьэну-  
ко, — ме э серме ногьогьи гьовунэ ни вегуьруьм».

Е руз ичку хурде, е кем серхуш бире, у гешд Бебере  
эй гоф сохде. Гьеле-меле ние офденбу. Эхириш дануьсде,  
шев э хуней ошней гуфдире, рафд гьэреул сохд юре кей  
медировге. Хэйли шев рафдебу Бебе эз хуней Аснат ве-  
диромогьо. Хуней Аснатиш э дуре мэхьэ. гьо бу, товуш  
кем сухденбу унжо.

— Э Бебе! — гуфди Хьэнуко, у эз диш гиросдкки.

т Бебе э гуш не гуьрд.

— Пой, мере э туьревоз гьурлугьи!

цо У ние поисденбу. Хьэнуко гуьрд эз гьул Бебе эй поюнде. Оммо хун эн у зиёд бисдо, гьэтош ю гужлуь бисдо.

— Туь дануьсдени э серме чуй бедигьо овурдейге! — гьэтош гуьрде, гуфдире Бебе. — Холуймере бердейгьо куьшдейгьо мунугу, мереш гьеле э дес дорей. Молгьой колхозе хурдей, нум мере гьэриш сохдей...

— Ме хурдем? — Гьоси бисдо Хьэнуко. — Гьемей эн и хьилулешимигьо эз туь нисди? Э Рэхьмоннш туь воухде хьэлево не сохдебирн мере?

— Ме! Э и гьудугьлелере денишо!

— Гьудугьлеле туьш гьисди, бебешмуш! — не вотовусде гуфди Хьэнуко.

Дие уре хэбериш не бисдо, кей Бебе эз куьф бейбуте ведешенде э синею вогьундге...

Хьэнуко ре э больница овурдуьтгьо у э хуьше не добу. Эзу омбаре хун рафдебу, тейте рэхьгироргьо оmore дире юре э хун бердеки. Имишев э больницаш эз сестрагьо Вера бу дежурни. У шинохд Хьэнуко ре, э ёрию омо гофгьой Ахмед, чуйтам Хьэнуко эрию гьелебуле гуьрдебуге.

— Чуй сохим? — пуйрси Вера эз дежурный духдир

— Хирурге огол зере гереки.

Эз дегь-паздегь минутиге хирург омо, халат хуьшедере вокурде, вини яралуьре.

— Ире гьечи хуб сохде нибу. Э и хун не домунди. Оммо зу-зу хилос сохде гереки ире, ненге муьмуьруь.

— Чуй биё сохим?

л. — Хун декуьрде гереки.

д). Сестрагьо фегьм сохдуьт доноргьо доре хунгьоре, бирфмундуьт э духдир.

д. — Эз игьо чи нибу. Эвелимуьнжи кеми, ве дубореи-муьнжи эй группай энугь гьэмели нисди.

Э думит домундуьт духдиргьо. Хирург бу келе мерд, сипре муйгьо, чогаэ одоми. Уре езугь омо э нечога. «Чум дире-дире куьшедере бире инсоне? — мугу у. — Иму духдиргьо чуйш биё сохим эри кумеки сохде э нечогагьго». Сере тик гуьрде, э сестрагьо духдиргьо денишире, мугу:

— Ме муьдуьм хун мере, хьозур сохит герек гьисди-гьо чигьоре?

— Ишму келе мердит, Петр Иванович! — хьэрой дешенд Вера. — Поит ебо.

Гене э ёр Вера омо, чуйтам Хьэнуко гьеле-буле гуьр-дебуге эй шуьвер ю, думит домунд, мугу «Эхи ме медицински корсохум. И келе мерд эйчуь бие дуь хуне, ме недуьм?» Гьул хирурге гуьрде, мугу:

— Петр Иванович, ме муьдуьм хунс, эн ишму герек нисд.

Петр Иванович чешмекгьоре вегуьрде эз чум, шори-шори дениши э Вера.

— Бошгу, духдерме. Ме мугум туь нидиге хун туьрс. Согь боши, духдерме.

Имишев гьечи корсохгьой больница те себэхь э ило-улей Хьэнуко гешде, хуне декуьрде э ю, сер гуьрдуьт эри хос сохде юре.

Э хуне омореки Вера не гуфдиребу хун хуьшде Хьэ-нукоре дореире. Оммо Ахмед и гофе шиновусдебу эз кес, гьэгьр кеширебу э хуьшде. У рази небу э хун хуьшдере дорей эн Вера, оммо очугь гуфдире э ю, дуьлхуьрди сох-деш ние воисденбу, «Эхи ме ире эз вилоетгьой гьуьлом овурдем, сэхьибсуьзи, чумгьэрсиде сохдумге хуб нибу» — думит сохд Ахмед. Оммо Вера эз гьовой эн Ахмед, эз гьош-гьобогьню эденбу дире, чуй дериге э дуьл шуьвер ю. Пушотегьэ эз кор оморе сэгьэт, моч мисохдгьо Вераре, э гьужогь мегуьрдгьо келе-келе духдергьой хуьшдере эз шори, гьони Ахмед лос биребу, хэндей ловгьою вирихдебу. «Бошгу, — мугу э дуьл хуьшде Вера, — гьэгьр микешуь е кем, песде фурмуш мисоху. Ме медицински корсохум, эй гьэгьр ме одомире куьшде нидануьм». Песде и песини мэхьэлгьо, Бебере э гьэземет дешенде бэгьдо, очугь мэглуйьм биребу шефдигьэ э колхоз биригьо, и чугьулигьо, гьэрегьэришкие коргьо, биебуригьэ э Рэхь-монигьоревоз биригьо, гьеме кор Бебе бирзи. Хьэнуко овом бири, хэр бири, э дес Бебе офдоре. Чогьоли Бебе э шегьер очугь биребу. И коргьоре Ахмедиде хуб дануьсденбу. Оммо эз дуьли эн у ние биренбу хун зен ю э жендек Хьэнуко дарафден. Гьечи е руз Ахмед э хуне оморе, чи хурде, э думит нуьшде, почтальон овурдени е когьозе, доре.

Ахмед векенде, дирени нум Хьэнуко ве. Бэгьдовой е ченд рузгьо, э хуьшде дироморе, дануьсде бэгьдо, ки Вера хун хуьшдере дори гуфдире, Хьэнуко келе номус кешиде, хуьшдере вешмерд эри дуьлхуьрдигьэ э Ахмедевоз сохдигьэ, эри э гоф Беберевоз хэр бире, нисдигьэ дургунигьоре э сер Рэхьмон вешендигьэ, эри э ферма да-

рафде, бишэґрие коргьо сохдигьо. Пушой эз больница ведироморей хуыште у эри Ахмед ижире когъоз нуьвуьс-дебу: «Хьовир Ахмед, ме тэхсиркорум э пушой туь. Ме хок пойгьой туьш нисдуьм. У сохде коргьо э ёрме оморенге, ме сифете пэхьни сохде э хьэлов гирисде, гуфди-ренуьм, э коми чумевоз миденуьшуьм э мердлуье сифет-туь. Мере сер нисди э руй туь эри денишире. Туьре ихдиёри чуьш эй сохде эмеревоз, туьре ихдиёри эри рэхьм не берде эме... Оммо товогъэйме ини: эгер екем семе э дуьл туь рэхьм омоге, гъэгьр туь хомуш бисдоге, минкип ди мере вогордум э колхоз, э бригадай Рэхьмон. Виниш умэхьэли чуьжире ме кор мисохумге. Мере воисдени туь не Рэхьмоне хуно бошум. НэґI, мере келести ние воисде. Ме кор мисохум, жунмере муьдуьм эй колхоз... Е гилейгеш гуьом ме хок пойгьой туьнуьм. Сад сала гердошит туь не Вера зен туь. У Вера зен туь, хэгьер ме эзинбэгъдойге, эз уьлуьм хилос сохди мере. Бегем ме и коре фурмуш мисохум. Те муьрде ме гъэрдхундум туьре, кифлет туьре.

Ахмед кеши когъозе э лой Вера ве Вера вини, чуьтам гIэрси бисдорутге чумгьой Ахмед.

— Бэхшлемиш сох э ме, Вера, — мугу Ахмед, Вера когъозе хунде варасде бэгъдо, — бэхшлемиш сох...

## ЖЕНГ ЭРИ БЕГЬЕР

Э сер Хьэнуко омогьо коргьо кемер Эсефе гъэд сохд. Ебо гIэруьс эз хуне вадарафд, песде Хьэнуко э гоф Беберевоз эз сер вадарафде, шефде коргьо сохд э колхоз, эхириш э зир тиже бейбут Бебе домунде, хуние рури бисдо. Тейте Хьэнуко эз больница ведироморе, Эсеф э е неверевоз тэхьно э хуне домунде, эй хуыште жиге ние офденбу. Э ох не ух домундебу шев-руз келе мерд, сер куфде гешденбу, эз ело дерд эз елойге гIэйб эденбу куьште юре. Энжэгъ Хьэнуко хуб бире эз больница ведиромоки, е кем хомуш бисдо дуьл келе мерд. Песде Хьэнуко юхуьле-будуре рафде э хуней хисургьой хуыште. минет сохде, зен хуышдере овурдки, гьовой Эсеф екемигеш очмиш бисдо.

— Дне ме туьре дерд нидуьм, бебе, — гуфди е руз э сер суьфре нуьшдеки Хьэнуко, — дне Хьэгилош эз ме е

усоле гоф ни шинову. Ишму мивнит ме имогьой, чуьтам кор сохде, хунере дорумге...

Хээнуро э бешу гурди э кор нерай гурдире, келе мерд биё форигъэти вегируь.

— Нидануьм, хэлефме, корсуьз поисде ме, — жугьоб до Эсеф, — пара мибошум. Ечи гурдиренуьт мере деймуш э сер кор, э бисдуре гурлуьгь сохдеки зенди гурдире. Меш корсуьз нуьшде мидануьм э хуне?

Иллоьгьки хэвес бисдо Эсефе эри э кор рафде богъгьо суьфделе бегьер гуьрде, эз гьово гьемме руз оморе воруш тигьи биренге. Эсеф хуб дануьсденбу: э тегьенг хуше ведиромо, эз гьово воруш тигьи бисдо, дир не сохде дерму шенде гереки, онгургьо глэзор не гуьруь. Еккейге воруш оморе-оморе, ологъ зиёд бире, э ологъэвоз эй хушегьой онгур глэзор оморе. Зу-зу ологъ сохде гереки, зиёдние гнэвгьоре эз бине ведешенде гереки. Гьемин имисал гьечу биребу, ки тегьенггьо суьфделе гуьл кенде, хуше доре мунде, сер гуьрдебуьруьт ворушгьо... Суьфден рузгьой июнь сер гуьрдебуьгьо воруш се шев се руз лэглэ ние гуьрденбу.

И рузгьо колхозигьо э богъгьо рафде ние дануьсденбуьруьт, эз себэхь тейте шохьонгум жогьилгьо э клуб кура бире, вози мисохдуьт, келе мердгьо э гьейвуй шишехоней эн правлением колхоз муьнуьшдуьт э ихдилот. Э гъэриш эн и се руз ченд гиле бригадиргьо кура биребуьруьт э кабинет партбюро эри меслэхьэт сохде, чуьтам дошде герекиге бегьере эз глэзор, чуьтам воруш поисде сэглэт келе, чуькле э кор вадарафде, богъгьоре ологъ сохде, капарус шенде герекиге. Мукоил и рузгьо э шегьер недебу, у руьхсет вегуьрде эз правление, рафдебу э Масков чем-чи эй овурде эй духдер хуьшде, имисал э шуьвер рафденбуьгьо. Э жигей энэ главный агроном Натанов бу.

— Ме эз е кор терсиренуьм, — гурди Натанов, чумечару сохде бригадиргьоре, — эй капарус-гугурт шенде имуре машингьо вес ние сохде...

— Те имогьой эже бирит? — пуьрси Рамазан.

Натанов душгьоре вешенде, э лой Ахмед денишире, мугу:

— Эз ме эдей пуьрсире. Мугуиге ме председателуьм...

— Туь бегем чуькле одомилей, хьовир Натанов, -- пуьрси Ахмед, — Аграном расди гьул председатели.

Рэхьмон теимогой сергъуз нуьшдебугьо, сере тик гуьрд, гуфди:

— Гьони э хьуьжет поисдим гуфдире, иму е хэйриш нивегирим. Ини, ки думит сохде воисде, е чоре офде воисде, воруш поисде руз эри э богъ дарафде, дерму шенде.

— Э Боку фирсоре гереки одоми эри машингьо восдорё, — гуфди Ахмед, — вэхде вир не сохде.

Гье и руз э Боку одомигьо рафдуьт, оммо пушой себэхь воруш поисд. У шев Г'эзиз уёгъ хисиребу гьемишенере хуно. У шиновусденбу сес воруш э бун гьовунишу расиренбугьоре, сес эз лилову рихденбугьо г'лове, гогъ вэхуьшде эз пенжере э куче денширенбу, гогъ кул хуьшдере дегуьрде, э гьейву вадарафденбу. Пушой себэхь сес воруш поисдки, дуьл Г'эзиз динж бисдо, у шори сохд, себэхь очмиш бире сэг'эт евошлей э дору дарафде, Рэхьмоне хэбер сохд.

— Чув сохум? — ховолуь пуьрси Рэхьмон.—Поисди поисде воруш. Гьеле имбуруз э кор вадарафде нибу, хори богъгьо малад мубу. Э малади тракторе дешенде бире э богъгьо эй дерму шенде?

Богъгьой бригадай Рэхьмон имогьой гьеме рядовой бу, омбаре коргьоре э тракторевоз гировунденбуьруьт. Капарус шендеш э тракторевоз гирошденбу. Г'эзиз хэбер сохде Рэхьмоне, ведировунде э гьейву, мугу:

— Э хэлефме, гьони воруш поисди, кидан себэхь — персебэхь чужьире гьово биреге. Тракториш гьони э богъ недарафденге, капарус гугурт шенде гереки.

— Чуьтам?

— Э десевоз.

— Машингьо?

— Гье э у гьисдигьоревоз. Ини имуре э хуне у куьгне машинлейму дери, э хьэёт капарус шенденимгьо. Гьуьч мисохум уре, миёрум э богъ. Э склад колхозиш дери куьгнегьо. Э бригадеш гьисди.

Рэхьмон фикир сохд, мугу: «Хубе эгьуьли».

— Гьейсэг'эт, бебе, — мугу у, зури-зури дарафде эй партал вокурде.

Суьфдәле себэхь вокурдебу. Булутгьо догъгьой Дербенде пучундебуьруьтгьо лов бире-бире, эденбуьруьт сивов зере-зере рафде э дуре улкегьо. Эз гьэргьи дерьёгъ эденбу г'этош чуьшме веди бире.

— Худоре шуькуьр, гьово эдей очмиш бире, — гуфди Г'эзиз, руьшгьой хуьшдере э дес вегуьрде. Песде сере

тик гуурде, дирени э хьэст Эсеф гъэлейхэнжели эдей дироморе.

— Себэхь тув эхэйр, Гээзиз!

— Рэхьмон вэхуьшди? — пуьрсен Эсеф.

— Эри, дино, хэйр гердо?

— Хэйри, ние дино, гъово эдей очмиш биро. Мугум белки Рэхьмон гъеле сер ние гуурдеге капарус шендеро, бурам гужом рузе пуч не соху. Гьеркиму е машин вегирим, дараим э богъ.

Гээзиз шор бисдо.

— Туьш эз дуьли мени, — мугу Гээзиз. — Меш гуфдирем э Рэхьмон.

— Разини?

— Эри.

— Гьечу буге бурам хьозури мере вьунуьм. У куьгьне машин э хьэст шенде оморигьореш вегуьруьм, белки герек бисдо.

— Вегн, вегн. Дуз э лой кантур биё...

Чой-чи хурде, Рэхьмонигъо тэгди сохдуьт э лой колхоз. Гээзиз геймиш биребу э парталгьой кори, э кемер веноре машин дерму шенденигьоре. Сторож э пушой кантур колхоз нуьшдебугъо, мэхьтел мунд.

— Эле, э и малад э богъ дарафде, бире?

Гээзиз гъово гуурд луьнг хуьшдеро, бирмунд чекмегьой резини хуьшдеро, мугу:

— Э девр Николай э богъгьой Менешир Огъо неи Оврогьом Нетен э тирохгьоревоз маладе мишиширим. Гьони дирей чуьжире пойвокугъо э пой иму вериге?

Сторож, сиегье келе руьшгьой хуьшдеро тимор сохд. хэндуьсд, шори сохд эз гофгьой Гээзиз. Эз е ченд минутиге Эсеф не Хьэнукош оморут. Рэхьмон э мэхьтелиревоз дениши э Хьэнуко, мугу:

— Туь эйчуь оmore, эйтуь гьони гурунд мубу.

— Бигьил, — мугу Эсеф. — Э ме кумеки мисоху.

Рэхьмон э думит домунд, мугу э дуьл хуьшде: «У Хьэнукои бу и? Эжеи у гиргине гьирмизине уьктеме сифет, келегеде гофгъо, озгъуне чумгъо?» Гьони Хьэнуко зим-зерд, лэгъэр, гьэйбе-гьэйб дениширебу э Рэхьмон.

— Ме гъеле суке коргъо мисохум, — гуфди Хьэнуко. — Туь олхонн бош...

— Гьечу буге, туь бура Шуьгьими не Едедиёре хьэрой зе, ме бурам Ислом не Алирзаре огол зенуьм, Гьемей бригадаре биё кура сохим, бурайм.



— Трактористгьоре? — пуърси Хьэнуко.

— Имбуруз трактор мунугу, себэхь воруш не бисдоге, огол мизеним.

Э Ахмед не Натанов сес расн, ки бригадей Рэхьмон кура сохде гьеме куьгьне машингьоре, эдей эй дерму шенде вадарафде гуфдире. Угьо шор бисдорут. Огол зеруьт шофергьоре, эрэхь декуьрдуьт бригадере.

— Хьэрекет сохде гереки у бригадагьойгеш вадаравт э кор, — мугу Ахмед. — Бригадей мере ме гьони кура мисохум.

— Машингьо эз же биёрим? — пуърси Натанов Ахмед гьоси бисдо.

— Чутьтам гуфдире у метелере: пушой э ов рафде, сего хорунде. Эн имуш гьечуни. Те имогьой эже бирит — агроном, председатель... Ме ние дануьсденуьм эз гьержой офди оф!

Келе-келе гоф бисдо инжо агроном не парторге, хуьжет офдо э гьэрей бригадагьош. Гьэрез гьисдигьо машингьой колхозе кура сохде, бригадагьо вадарафдуьт э кор.

Себэхьими гьово днеш хуб бисдо. Э рядовой кошде оморебуьруьтгьо боггьо дарафдуьт эй капарус шенде тракторгьо, эз капарус шенде азад буьруьтгьо одомигьо, гьупи вегуьрде, эри ологь сохде рафдуьт. Гьечи е дуь руз гьово хуб бире, дуьл колхозигьо шор биребу, ебойге гене асму булутгьо пур бисдо, гьово тип-торик бисдо, сиегьи зе, гене дегуьрд воруш.

— И чуй кор бисдо! — гьоси бире гуфди Ахмед, э зир воруш э гьэд богь дехсире. Э уревоз зеки эзир гьов дэхсире поисдебу агроном.

— Гьеме кешире зэхьметгьойму пуч, — мугу агроном. — Имогьой дуборе биё дерму шенде биёв. Тэглди сохдит ишму, э гоф Рэхьмон денишире.

Ахмед жугьоб не до, оммо шефд дениши э сифет агроном. Не поисд воруш. Вэхсире-тэхсире, э машингьо венуьшде, вогошдуьт колхозигьо э хуне.

Себэхьими, гене воруш поисденге, е пара одомигьо рази не бисдорут эри гье ёбо капарус шенде.

— Бигьил хори хуьшг бу, — гуфдиренбуьруьт угьо, — белки гене воруш оморенбу.

— Нэгл, ме те хуьшг бире поисде нидануьм, — жугьоб до Рэхьмон.

У гьегене воруш поисде сэглэ, кура сохд бригадере,

вадарафд эй дерму шенде. Вадарафд э кор бригадей Ахмедиш.

— Кемиш гьисдге машингьо, капарус шенде воисде, — мугуфди Ахмед.

И гьеминон омбаре четинигьо овурд эри колхозигьо. Ченд гиле ворущ омоге, унгъэде бригадей эн Рэхьмон нен Ахмед дерму шендуэт э тегьенгьо. Э ворущи, э ма-лади, чуй четинигьош мибисдоге, угьо эз кор ни поисдуэт. Борбор э Рэхьмон не Гэзизевоз э кор ведироморенбуурьт Хэнуко не Эсеф. Ве жофогьой эн угьо пуч не бисдорут. Гьеминон, хушегьой онгур хуб келе биренигьо вэхд, Мукоил эз Масков оmore, э боггьо рафде; тегьенгьоре фегьм сохде, мэхьтел мунд. Э тегьенгьой бригадегьой Рэхьмон нен Ахмед келе-келе пура хушегьой онгур веруэт, лугьегьой тегьенг эдет эз гуруни э хорн офдоре, оммо эн у бригадегьойге онгур сейреки, кимн тегьенггьо тип-тигьини, омбара хушегьо жуыр бирет, овуле гуьрдере хуноют.

— Гьечи эйчуь? — пуьрси Мукоил эз агроном.

— Ние дире? Мильдю хурди...

— Песг дермуре чуй биребу?

— Машингьо? Те машингьо эз Боку оmore, глэзор куьшд рафд боггьоре.

— Гьич глэзор не куьшди боггьой Рэхьмон нен Ахмеде! — э гьэгьревоз дениши Мукоил э агроном.

## ТЕ НЕФЕС ДЕРИГЬО

Е руз шохьонгум Глэзиз не Рэхьмон эз кор оmore, дес-руй шушде, нун шохьонгумишуре хурде бэгьдо, Хумор мугу:

— Имбуруз эз киму духдир рафдебу э хуней лелей Глэсонлигьо.

— Гьери, чуйтаман мугу? — пуьрси Глэзиз дуьлпесо бире.

— Усоли, — сере гьуз гуьрде, жугьоб до Хумор. — Духдир эдей гуфдире гьич е чореш нисди...

Эз чумгьой Хумор омо глэрс тигьи бисдо. Глэзиз не Рэхьмон эеки денишуурьт, дуьл ишуш гурунд бисдо.

— Вэхиз, Рэхьмон хэлефме, бурайм, сер кешим!

Вэхуьшдуэт, сер-тен вокурдут.

— Хуне-хэреб э у Махачкалагыош берде хуышдере ние бурмунде, — мугу ГӀээзиз.

— Чутьтам ние бурмунде? — гуфди Хумор. — Рафдебукк у э Махачкала, э профессоргыош бурмундебу хуышдере. Гуруне ГӀээзори дие, келе мердиш — келе мерди.

— Келе мердиш гысдиге, езугыи, — мугу Рэхьмон.

ГӀээзиз не Рэхьмон оморутгыо э ки ГӀэсоил, е хэйли одомгыо дебу: бироргыою, духдергыою, гъуншигыо. ГӀэсоил дегешдебу э доруни хуне, э сер кравать, сифет ю муме хуно, мугуиге муырде одоми дегешдебу. ГӀээзиз не Рэхьмоне виники у э хуышде диromo, ловгыою екемлей хэндуйсдуът, гоф сохде воисд юре.

— Оморейт? — пуьрсн ГӀэсоил. — Куьнд нуышит э киме. Ишму дануьсденит, ме чутьтам хотур гьердуйшмуре — эн бебереш, эн писереш хосденуьмге...

Дие гоф сохде не дануьсд ГӀэсоил, сере э сер болуш вено, чумгыоре хисунд... Нуышдегоргыо терсуьруът, кимгыо э пой вэхуышде, э сер кравать нечогы гъуз бисдорут. ГӀэсоил чумгыоре вокурд, дениши, екемлей лэгъэре ловгыою э хэнде варафдуът.

— Мере гӀэйб месохит, — мугу ГӀэсоил, — омбар гоф сохде ние дануьсденуьм... Егиле е кем семе гъувот мибисдоге мере... ГӀээзиз э гужевоз гӀэрсгьой чумгьой хуышдере гуьрде, хъэрекет сохд эри дуьл доре гуруне нечогыэ:

— Худо гышдге хуб мибоши, бироргили, омбар гоф сохде гьони хуб нисди эри туь. Дегерд, чум туьре э хов ди екем.

ГӀэсоил э дегешдеки сере жумунд.

— Хов мномоге мере, дерди белогьойме чуй бу!...

Хуне лос бисдо. Екиш гоф сохде не дануьсд. Гьемере езугы оморенбу э нечогы.» Вой эй дуьшмегьойтуь, — гуфди ГӀээзиз э зир зугуь э нимелит зиндее сифет ГӀэсоил денишире, — эжеи у бэхдевере рузгьой туь: э рузгьой Май нен Октябрь э митингыо ведироморе, килэхьэ э дес вегуьрде, буьлдуьрчине хуно гоф сохденбиригьо, косиб-кусубе кура сохде, богьгьой Гоширгьоре вегуьрде, колхоз кура сохде, эй хэлгь хубе рэхьгьо норенбиригьо, э салгьой партизани, туфенг э душ вери, ченд верс рэхьэ пейде рафде, э догьгьо дуьшменгьой совете венжиренбиригьо... хьэл бисдо у озгьуне гьулгьой туь, зерд бисдо у гьирмизине ширмогыие сифет туь...»

Гэсоил эдей диреки, э кню оморегорго, гьеме лос нуьшдет. «Эйчуь эхи? Бегем ме муьрденуьм? Игьо эйчуь дуьл хуьрд бирет?» Э у гуруне хьол хуьшдеревозни Гэсоиле воисд дуьндуьрмиш соху нуьшдегорго, дуьл дуь ишуре.

— Баракеллогь бирорзерейме Рэхьмоне, — мугу Гэсоил, — шиновусдем чуьтам богьгоре эз глэзор хилос сохдиге, сер ебо ворущ оmore поисде, дерму шенди, ологь, сохди... Гьечу биё бу хубе корсох!

— Баракеллогь членгой бригадаре, лелей Гэсоил, — гуфди Рэхьмон, — угьют гьурлугь сохдеуьтго богьгоре: лелей Эсеф, кук ю Хьэнуко, Исмаилиго, —

— Хубе корсохгореш рэхь бердегор гереки, хэлефме, — мугу Гэсоил.

Оmore-оmore, гоф сохде-сохде, гьовой Гэсоил эденбу очмиш бире, гоф сохдемуниюш эденбу хуб бире. Гэзизигь шор бисдорут, ловгошу эз песи хэндуйсдуйт. Нимешевигь, Гэзизигь рафдуйтго, Гэсоил мугуиге пушотеннегой хуьшдере хуно согь бу, хуб-хос эденбу ихдилот сохде.

— Дие е кем хис, имуш бурайм, — мугу Гэзиз, — борух гьешим гьовойтуь хуби, э и зуригь мэхизн эз хьэлов.

— Худо шиново эз лэглэй туь, — мугу е келе зен, э бинзани Гэсоил нуьшдебугьо.

Е кем дуьл динж бире, э Гэзизигьоревоз э еки вадарафдуйт бирорго не гьуншигой Гэсоилиш. Пушой себэхь е кем хиси Гэсоил. Себэхьмунде у е пейле шириш хурд, е хэйли э глэилгьоревоз мэхсерегьош сохд. Духдерго — невегьоу винируьтки, гьовой бебешу е кем боботи, дегьишдуйт юре э хуне, вадарафдуйт е кем э буру, эй нуьшде, ихдилот сохде. Ебойге эз дору Гэсоил хьэрой дешенд:

— Э Саро, э Саро, духдерме, инжо биё?

Духдер шуш нефес гуьрде, терсире, видовусд диromo.

— Чуьни, бебе?

— Гьичиш, духдерме е, гьурлугь мени э туь: ме е мегьине партийни взносе не дорем, хэлефме, мере ому нисди эри взхуьшде, э ки парторг рафде. Гьэдой бебе этуь, бура огол зе парторге. Гэмел миёвге гу, биё партийни взносе веги.

— Эле, — мугу духдер. — Гье гьейсэглэт не дориге чуйни. Бегем вирихдени взнос?

Гэсоил сере жумунд, мугу:

— Хэлефме, белки ме имбуруз — себэхь муьрденбуь: руьм рафде... Мере ние воисде э партбилетме тигьне жиге вомуну. Ме коммунистуьм. Те нефесме э синейме дери-гьо. ме гьэрдмере биё бегьем сохум...

Духдер гоф сохде не дануьсд. Э синей ю мугуиге омо е култе поисд. Эз чумгьою шэхде-шэхде глэрс омо тигьи бисдо.

— Бошгу, гьони мурам, — гуфдире у вадарафд эз ки нечогь.

— Бура, хэлефме, мегирис...

Саро рафде э парторг гуфдире сэглэт, у вэхуьшд эз жигей хуьшде, мугу бурам вуьнуьм келе мерд чуйтам бириге, чуй кумеки юре герекиге... Оммо те Саро вогош-де э хуне ве парторг оmore расире, Гэсоил жу доробу.

— Гьейвой, бебе муьрди! — е божэхь ведиромо эз духдер. Шэх-шэх глэрс тигьи сохд инжо парторг. Гирье дешендуйт э сес хьэрой духдер дироморегоре зенгьой гьунши.

Себэхьими э келе хуьрметевоз гьовре сохде омо Гэсоил. Чуйтам юре воисденбугьоре хуно, коммунистгьо эри ю гроб гьуйч сохдут, э сер гробию жуьре-бе-жуьре гуьлгьо веноруьт, э песой гробию музыкантгьо музик зеруьт. Эй рэхь сохде Гэсоиле эз колхозгьо ве совхозгьо, эз заводгьо ве учреждениягьо, одомигьой ченд жире миллетгьо — урусгьо, азербайджанигьо, татгьо, лезигьо, эрменигьо оморут. Э сер гьоврей Гэсоил ведироморе гоф сохдут эз нуминей жофокешгьой шегьер, одомигьо э е ченд зугьугьо. Э сер гьоврей Гэсоил глэрс тигьи сохдут пире Одигюзел же кукию Ахмед, Эсеф гьэлейхэнжели не Хьэнуко, Мукоил не Иванов, Рэхьмон не Гэзиз...

— Чуйтам ю жун хуьшдере эй хэлгь доренбуге, хэлгьиш ужире э хуьрметевоз э рэхь декуьрд юре, — гуфди Гэзиз, чумгьой хуьшдере покурде э сер гьоврегьо.

— Хубе мерд бу! — эденбуьруьт езугьбери сохде омбаре одомигьо, эз сер гьоврегьо фурамореки.

## ОНГУРГЬО РАСИРЕНГЕ

Э мегь сентябрь э Дербенд ки бириге, у дануьсдени, чуй рач бирениге э рузгьой богъчирегьо и гъэдимие шегьер онгурчигьо. Расди, гьони гуфдире нибу, ки Дербенд энжэгъ шегьер онгурчигьои гуфдире. Вара э самолет е ненге э сер гъолине боругьой Норун-гъэле, виниш чуй-жире шекил тозе Дербенд веди бирениге э пушойтуь. Шегьер мугуиге луьнг зере эз сер гъэдимие боругьой хуьшде, рафди э лой Север не э лой Юг, э чор тараф куьгъне шегьер вероморет гъэлемете боругьой келе заводгьо не фабригьо, корхонегьой рэхъ гьовуни: э ело шише ведешенденигьо заводи э ело машингьо ведешенденигьо, э ело холигьо бофденигьо фабрика э ело партал духденигьо, э ело консервгьо гъуьч сохденигьо комбинати э елойге хурдение чигьойге ведешенденигьо. Келе бири, рач бири, жогъил бири гъэдимие шегьер. Оммо тэгърифи эи у — тэгърифи шегьер онгурчигьои гуфдире имогъош дери э лэгъэй хэлгъгьо. Нуьгъ игидгьой жофой социалисти дорет Ватане онгурчигьой Дербенд. Фирегъ бирет, тозе бирет, рач бирет онгурбогъгьой колхозгьо ве совхозгьо, бине норетгьо э эйлонмей гъэдимие шегьер. Э мегь сентябрь, онгургьо расиренге, богъгьо емиш пур биренге, гъемише рач бире Дербенд. Рузгьо герм бире, чуйшме эшгълуь сохде одомире, доргьо гъеле савз мунденуьт, э догъгьо ве чулгьо, вадабуратгьо шегьере, тозе савзе вороморе, дерьегъ лос бире, ширине буй доре...

Гъемин и рузгьо, э раче вэхд сал хъэз оморенбу Шимире рафде э шегьер деден хуьшде, вохурде э гъовумгъэрдеш, хьовир-хъэрмэх хуьшде, эз дес ю вороморе ку-мекире сохде э колхозгьой шегьер э, комигьоревозки уре ологъо бу и ченд салгьо. Гъемин э и рузгьо. Министр сельского хозяйства огол зере э ки хуьшде Шимире, мугу:

— Хьовир Юсупов, имисал э Дербенд онгур кем бири. Э туь мэгълуьми. Э вэхдию дошде не дануьсдет, воровунде бегьере. Вомундигьо бегьере семе э тегъерию чире гереки, э пучи не доре. Туь биё зу-зу бурай э Дербенд. Те богъгьоре чире варасде унжо биё пои...

Шими бошгу гуфди, меслэхэт вегуьрд эз министр, рафд э хуне, хьозури хуьшдере вини эй рафде э Дербенд.

... Э Дербенд богъчирегьо сер гуьрде оморенбу. Ма-

шин Шими вобугьо э Дербенд оmore расиренге, эз ён консервни комбинат нен клуб железнодорожникгьо ги-рошденге, э чум Шими вохурд грузовикгьой колхозгьо те лов-лови онгур пур буюруйтгьо, э ён шлакбаум рэхь машин поисдебуурьютгьо. «Огьодеини, эхьисоб, эдет э консервни комбинат доре», — мугу Шими. Эз вогун фу-раморе, Шими ебо рафд э горком. Э домой дер горком у вохурд э Иванов. Секретарь горком э парталгьой чули геймиш бире (э тен энугу вобу ковре пинжек сатини, шовол галифе не гердеверие чекмегьо) эденбу э легковая машин венуыше.

— Хош оmoreй, хьовир Юсупов, кидан э мерево гьур-лугьиге туьре?

— Э богьгьо рафде воисденбу мере, — мугу Шими.

— Венуыш бурайм, меш эдем э богьгьо рафде.

Шими шор бисдо. Дешенд плащ хуышдере э машин, нуышд э посо. Шофер гьей сохд машине эз звери рэхь, эз ён колхозный базар, есиёв шегьери, вадарафд э глэ-рей богьгьо. Э гьердуьлой рэхь, э гьэд богьгьо кемере гьуз гурде, одомигьо эденбуурьют онгур чире. Шими чуме-чару сохд ило-улере.

— Эхи одоми кем дери э богьгьо, — мугу у.

— Онгуриш кеми, хьовир, — жугьоб до Иванов, — имогьой мивини.

Е хэйли рэхь рафде фураморе эз машин, дарафде э богьгьо, Шимийгьо винируйт чуйтам сейрек вериге ху-шегьой онгур э кими богьгьо. Э е пара тегьенгьо пенж-шеш хуше онгур зиёдте не вобу. Юш чуй хушегьо? Чуйк-лелегьо.

— Дениш и «Огьодеире», — мугу Иванов, — гуьле-гьою эз гуьлегьой «Нермеш» чуйклеи. Гуьлегьой «огьо-деи» ижире чуйкле биё бу?

— Гьечи эй чуй эхи?

— Пуьрс виниш эз председательгьой колхозгьо... Э вэхдию ологь не сохдет, еккегьойге машингьой дерму-ире эй овурде богьгьо глэзор гурденге рафдет. Войге туьре е председатель Мукоил вир биребу вадарафде эз шегьер... Оммо богьгьо эденбуурьют пуч бире.

Шими мэхьтел мунд эз Мукоил у кор бири гуфдире.

— Эхи у ужире небу...

— Эгь, — мугу Иванов. — Небу, бири, сер ю гьэриш бири, келегед бири, значит! Гене хуби, ки э колхоз хубе бригадиргьо деруьт.

У ихдилот сохд, чуйтам гьеминон Рэхьмон не Ахмед хьэрекет сохдетге эри хилос сохде онгургьоре эз Гэзор.

— Гьони мурайм э колхоз эн угьош, мивини участкагьой Рэхьмон нен Ахмедеш, эн у бригадагьойгереш, Расди, богъгьой эн совхоз Карл Марксиш хуби...

Машин э буру поисдебу. Ведироморе, э машин ве нуушде, угьо рафдуьт э лой богъгьой колхоз Рэхьмонигьо. Пушотеннегьоре хуно имогьой весовщик э домой дер гьопу нуушде, колхозигьо э гьэрзинкегьоревоз ние ведировунденбуьруьт онгуре. Богъгьой бригадей Рэхьмон рядовой бу, эз Гэрей тэхдегьой богъи машингьо гирошденбу, гье эз миглей богъ э машиневоз онгур берде оморенбу. Э бригадай Рэхьмон оmore расире, Шимийгьо винируьт э мигле поисдетгьо машингьоре, пура ешиггьой онгур э машин вебуьруьтгьоре. Колхозигьо э зенгьо Гэилгьошуревоз онгур чире, севергьоре пур сохде, э ён тирозу миовурдут, пеймунде мидорут, могошд. Рэхьмониш э серпои поисде—гогъ э ён тирозу мибисдо, гогъ э лой машингьо, гогъ э Гэрей тегьенгьо. Э богъ дироморе сэлэт Шими вини гьуйндурье балай Гэзизе, север онгуре ведировунденбугьоре, келе сипре руьшгьо веригьо Эсефе, э невегьой хуьшдеревоз онгур чиренбугьоре.

— Хубе мердгьоют и келе мердгьо, — гуфди Иванов бирмунде э чумевоз Эсефигьоре.

— Эри, ме шинохденуьм угьоре, — мугу Шими.

Рэхьмон вини Ивановигьоре, видовусд омо, дес ишуре гуьрд. Ивановигьо рафдуьт э лой келе мердгьо, гьувотбу гуфдурут, суьгьбет сохдут э ишуревоз.

— Чуйтами онгургьошму, лелей Гэзиз? — пуьрси Шими.

Гэзиз тик гуьрд кемер хуьшдере, руьш хуьшдере тимор сохде, мугу.

— Э гьеме бригадагьо ижире бегьер мибисдоге, бэхд иму чуй бу!

Эз расдекиш э тегьенгьо денишире, чумгьой Шими мугуиге келе бисдо. Келе хубе хушегьой онгур, кимигьо миомо е кило, э гьер тегьенг бисд-си хуше, бисденж хуше.

— Биё «Огъуьзуьмгьоре» виниш,—мугу Рэхьмон, эз гьул Шими кешире берде.

Э миглей богъ е ченд жерге «Огъуьзуьм» вобу. Келе хушегьо, зерде кегьробое гуьлегьо, Шими гьуз бисдо, е гуьлере чи э лэглэ доно. «И чуй раче буй?»



-- Бур хушере ху! — мугу Рэхмон, — бурит, хьовир Иванов

Эз Гіэрей участкаго омо сес дудуй машин. Эз «Победа» фурамо Мукоил. Эз дурине вини Ивановигьоре, видовусд.

-- Хош оморейт! — гуфди у дес гьуногьгьоре гуьрде. -- Э бригадай Рамазан буьруьм.

Сереш жумунд, нерази-нерази.

-- Чуьтами, ченд тонн медиров сери гектар? — пуьрси Иванов.

Мукоил могьбул бисдо.

— Кем. Уьсд-уьсде шеш-хьофд тонн. Бригадай Рэхмон муьдуь дуваздегь тонн. Эн Ахмед дегь...

— Омон ишму мидануьсдит уьсд-уьсде легь-дуваздегь вегуьрде, — мугу Иванов. — Имогьой дистри ошибкай туьре?

«Егіэлмеен бир аллагь» эденбу гуфдире Мукоил. оммо гуьрд лэгіэй хуьшдере.

— Э менгиш дэгьме вебирени хьовир Иванов.

Иванов шефд дениши э Мукоил.

-- Гьеле туь э менг не расирей... Зуңи.

Песде э лой Шими денишире, мугу:

— Бурайм?

— Ме гьеле милоюм инжо, хьовир Иванов.

Секретарь горком согь боши гуфдире, венуьшде э машин, рафд э совхоз.

Шими те шохьонгум э богьгьой колхоз Рэхмонигьо поисд. У гоф содх э бригадиргьоревоз, э келе мердгьоревоз, э агрономгьоревоз эри варасире дануьсде себег хуби-зобуни бегьер жуьр-жуьре бригадагьоре, опыт пушолуье богьдоргьоре, кемсуьнгьой пес мундетгьо корсохгьоре. Шохьонгум, кор варасденге, хэлгь э машингьо венуьшденге эри э хуне рафде, Шими мугу эз Рэхмон:

— Мевенуьш э машин. Биё пейде бурайм. Эз рэхь э сер гьоврей Гіэсонл варайм. Эхи ме э сер митой эн уш небирем...

— Бошгу.

Евош-евош и рэхь богьгьоре угьо рафдуьт песде. Эз лой чеп, э зверсер богь тик поисдебу келе догь Джалган. чуьшмеш эденбу пэхьни бире э посой догь. Э лой расд, эз богьгьо овло, дуь э посой еки эденбуьруьт видовусде келе леуьргьой ковре дерьегь. Эз ён Шимий-

гьош глэре не дегьиште эденбуурьт зере гиросде пура машингьо, эвир гьоворе буетмиш сохде э тузевоз.

— Гьемейму туз мубу, — мугу Рэхьмон.

— Бошгу. Э хотур гьоврей Глэсонле дире тузиш бисдоримге глэмел миёв.

Э гужевоз офдут гьоврей Глэсонле. Рэхьмон е гилеле оmore инжо, фурмуш сохдебу. Е хэйли гьердуйеки сергъуз поисдуйт, э ёр омурдуйт гиросде глуймуыр Глэсонле, чумгьошу глэрсис бисдо.

— Кеш имогьой! — мугу Шими.

Ён есиёве гиросдуйтки, Рэхьмон дениши э жендек Шими.

— Чуйни? — пуьрси Шими.

— Мугунге гьемей туь глордни, эз есиёв ведироморей.

— Туьш эз ме темизте нисди, хьовир. Биё туьртуур сохим.

Пинжекгьоре эз те векенде, угьо туьртуур сохдуйт, пезде э ён чол поисде, дес руй ишуре шушдуйт.

— Имогьой кеш э хуне, дедейгьо миденуьшуйт, — мугу Рэхьмон.

Пой вечируьт эри фураморе э хуне. Шегьер е рач омо эри Шими. Дузе фирегье кучегьо, серине доргьо, тозе келе хунегьой сенгьи... Сере тик гуьрд, э гьово дениши. Тип-темиз, кову, тов-тови... Энжэгъ э север, э лой Огни гьилгьили асму мугунге эденбу глэтош гуьрде сухде. Чуйшме дарафде, эз унжо ригазгьою эденбу сухунде асмуре...

Ини хьэет Рэхьмонигьош. Емишдоргьо, тегьейгьой онгури: «Огьодеи», «Нерме», «Хэтми», «Гуьлоби», «Кишмиши»... Эле! Шими чумгьоре хисунд, гене вокурд. Нэ-го! Гье гьечуни. Онгургьо пусири... Кара гуьрди, сухди, пурдали бири... Э тегьенгьо хурдение онгур неве. Эй хьэсретиш. И чуй кори!

— Рэхьмон?

— Гьой? — мугу у.

— Серме ние вадарафде, — мугу Шими, — э богъ хьэет ишму онгур невери. Гьеме сухди, пусири...

— Эри, чуй биё сохде биёв?

— Чуйтам эхи?

— Чуйтам туь дирениге.

Шими гьогъ бисдо, мунд э поисде жигей хуйште.

— Туь хубе бригадир, агроном, э шегьер эз гьеме

зиёд бегьер вегуърдейгьо, богъ хъэт туьре гъурлугъ сохде не дануьсдей?

Рэхьмон хэндуьсд, мугу:

— Кей миёсдум гъурлугъ сохде. Ме бригадир колхозум. Бебеймуш э бригадаиме дери. Богъгьой колхоз эденбу пуч бире. Суьфде комигьоре миёсдим хилос сохде эз гӀэзор? Эн хуьшдере ненге эн колхозе? Иму э посой богъ иму мипоисдимге, богъгьой колхоз эз гӀэре мирафд. Варасири?

Шими сере гъуз гуьрде, думит сохд.

— Эри, варасируьм.

У гене сере гъуз гуьрде, фикир сохд, чужире биё буге коммунист... Гье ебо у гъэл дешенде э герден Рэхьмон, моч сохд юре эз ловгьо, эз гъутине, эз пушони. Э вэхд эн и моче моч э хъэт омо диромо Хумор, чужкле сумке э дес дери.

— Эле, — хэндуьсд Хумор, — и чуж моче мочи!

Шими э гӀэрсгьой шориревоз дениши э Хумор, мугу:

— Хубе шуьвери шуьвер туь, Хумор. Ме э жигей туь мибисдорумге шев руз моч мисохдум мипонсд уре.

\* \* \*

... Сер эни романе ме нуьвуьсдем, ченгъэде гъувотме рафдиге. Оммо и романе эхир нисди... Чужьшме эдей товуш доре, хушегьой онгур сал бе сал эдет келе бире, зиёд бире, лезетлуь бире, инсонгьо эдей зигьисде, кор сохде, лезет вегуьрде эз зиндегуни... Бегем зиндегуниреш эхир бирени?

1959—1961 сал.

## СЕРНОМЕ

Эвели бэхш	3
Шев глэрүйси	15
Богъчирегъо	26
Чугъули	36
<b>Дуьимуьн бэхш</b>	42
Хумор	48
Суьфден руз довгlo	54
Бура рэхьник	57
Гьер мерд э нубой хуьшде	61
Э вишегъой Уруснет	69
Шими вохурдени э Ахмед	73
Рэхьмон э довгlo	80
Сирот Хумор	85
Рэхьмон веди нисди	90
Кимлере вой, кимлере бой	92
Песни руз довгlo	98
Хьовиргъо вохурденуьт э еки	108
Мелхэм ярагъой дедей	116
<b>Сеймуьн бэхш</b>	120
Э ён боругъой Норун-гъэле	139
Гърьет ве ненге пул	143
Шефде рэхь	146
Дуьл ди хуьшдере	150
Э кек гуьре одоми пустире ни сухуну	155
Верфгъо хьэл биренге	162
Пейле дусди	166
Гьер шеюн тозеси, ошненуьн куьгънеси	174
Э рэхь рафдеки пушово денишире воисде	180
Дусд эйчуь мубу одомире	184
Догъ—э догъ ние вохурде	187
Мигинд зенгъо	195
Гуьрг э гъэд геле	197
<b>Чоримуьн бэхш</b>	205
Шори ве могъбули	211
Дуьшмегъо ве дусдгъо	219
Зиёди хуругъо мерэхшуь	224
Тозе сал	228
Тяже тевер	228
Женг эри бегъер	228
Те нефес деригъо	228
Онгургъо: расиренге	228

*Миши Бахшиев*

## **ГРОЗДЬЯ ВИНОГРАДА**

На татском языке

Художник *И. Садыков.*

Редактор *Х. Аюшалумов.*

Худож. редактор *Е. Омельченко.*

Техн. редактор *М. Ханукиев,* Корректор *М. Ханукаев.*

Сдано в набор 15.VIII-1963 г. Подписано в печать 14.IX-1963 г.

Форм. бум. 84×108<sup>1</sup>/<sub>32</sub>. Бум. л. 3,6875. + 1 вкл. Печ. л. 7,37 + 1 вкл.

Усл. печ. л. 12,095+1 вкл. Уч.-изд. л. 12,4 + 1 вкл. = 12,436.

Тираж 2000. Цена 37 коп. Переплет 10 коп. С00919.

Дагестанское книжное издательство Министерства культуры ДАССР,  
Махачкала, ул. Маркова, 55. Зак. № 989.

Типография им. С. М. Кирова Министерства культуры ДАССР,  
Махачкала, ул. Маркова, 51.

Цена 47 коп.

МАХАЧКАЛА 1963

*Миши Бахшиев*

ГРОЗДЬЯ ВИНОГРАДА

На татском языке